

D.R. 24/2010

**RANG UNDANG-UNDANG PERBADANAN INSURANS
DEPOSIT MALAYSIA 2010**

SUSUNAN FASAL

BAHAGIAN I

PERMULAAN

Fasal

1. Tajuk ringkas dan permulaan
2. Tafsiran

BAHAGIAN II

PERBADANAN INSURANS DEPOSIT MALAYSIA

Bab 1

Objektif dan operasi

3. Perbadanan yang ditubuhkan di bawah Akta Perbadanan Insurans Deposit Malaysia 2005
4. Matlamat Perbadanan
5. Meterai perbadanan dan meterai faksimile
6. Penyempurnaan dokumen
7. Penubuhan jawatankuasa
8. Pejabat Perbadanan
9. Kuasa untuk melantik wakil dan ejen
10. Penubuhan subsidiari

Bab 2

Lembaga Pengarah

11. Tugas dan komposisi
12. Lembaga boleh membuat undang-undang kecil
13. Tempoh jawatan pengarah

Fasal

14. Kehilangan kelayakan dan penamatan pengarah Lembaga
15. Tindakan dan prosiding Lembaga tidak terjejas oleh kekosongan, dsb.
16. Saraan dan elaun bagi pengarah
17. Tugas pengarah
18. Mesyuarat

Bab 3

Ketua Pegawai Eksekutif

19. Pelantikan, fungsi dan kebertanggungjawaban
20. Terma dan syarat perkhidmatan

Bab 4

Pegawai dan pekerja

21. Pelantikan, terma dan syarat perkhidmatan
22. Bantuan kewangan kepada pegawai, pekerja dan orang lain

Bab 5

Kewajipan dan kuasa

23. Sekatan menyiasat secara khusus mengenai hal ehwal pelanggan tertentu
24. Kerahsiaan
25. Kuasa Perbadanan
26. Pinjaman bagi maksud tertentu
27. Penetapan institusi anggota tambahan

Bab 6

Kewangan

28. Kumpulan wang dan sumber kumpulan wang
29. Peminjaman wang dan peruntukan dana kepada Perbadanan
30. Pelaburan dibenarkan
31. Tahun kewangan
32. Kehendak menyimpan buku, rekod, akaun atau dokumen lain

Fasal

33. Juruaudit
34. Penyata kewangan dan laporan tahunan
35. Penyata kewangan tidak disatukan

BAHAGIAN III

KEANGGOTAAN, PEMBATALAN DAN PENAMATAN

36. Keanggotaan disifatkan
37. Terma dan syarat keanggotaan
38. Pembatalan keanggotaan
39. Penamatan keanggotaan
40. Kesan pembatalan atau penamatan

BAHAGIAN IV

INSURANS DEPOSIT

Bab 1

Skop perlindungan

41. Takrif
42. Skop perlindungan bagi deposit
43. Pemindahan deposit di antara anggota penerima deposit
44. Deposit anggota penerima deposit diperoleh oleh bukan anggota penerima deposit
45. Deposit disifatkan
46. Bukan sebahagian deposit

Bab 2

Premium

47. Premium pertama berkenaan dengan anggota penerima deposit
48. Premium tahunan berkenaan dengan anggota penerima deposit
49. Pengiraan premium tahunan berkenaan dengan anggota penerima deposit
50. Tiada tolakan berkenaan dengan anggota penerima deposit

Fasal

51. Surcaj premium berkenaan dengan anggota penerima deposit
52. Caj lampau tempoh berkenaan dengan anggota penerima deposit
53. Peraturan-peraturan premium berkenaan dengan anggota penerima deposit
54. Premium dan surcaj ke atas anggota penerima deposit disifatkan diperoleh

Bab 3

Bayaran

55. Bayaran berkenaan dengan deposit diinsurankan
56. Bayaran wajib berkenaan dengan deposit diinsurankan
57. Bayaran budi bicara berkenaan dengan deposit diinsurankan
58. Bayaran pendahuluan berkenaan dengan deposit diinsurankan
59. Tarikh mengira liabiliti
60. Pengiraan pulangan atau bunga atas deposit bagi bayaran wajib
61. Perbadanan boleh membayar pulangan atau bunga atas bayaran wajib
62. Pengiraan pulangan atau bunga atas deposit dikira bagi bayaran budi bicara
63. Pulangan atau bunga atas deposit berkaitan indeks
64. Pelepasan liabiliti, dsb., berkenaan dengan deposit diinsurankan
65. Subrogasi berkenaan dengan deposit diinsurankan
66. Penyerahhakan berkenaan dengan deposit diinsurankan
67. Had masa bagi tuntutan berkenaan dengan deposit diinsurankan

BAHAGIAN V

PERLINDUNGAN MANFAAT TAKAFUL DAN INSURANS

Bab 1

Skop perlindungan

68. Takrif
69. Skop perlindungan bagi sijil takaful dan polisi insurans
70. Pemindahan sijil atau polisi di antara anggota penginsurans

Bab 2

Premium

Fasal

71. Premium pertama berkenaan dengan anggota penanggung insurans
72. Premium tahunan berkenaan dengan anggota penanggung insurans
73. Pengiraan premium tahunan berkenaan dengan anggota penanggung insurans
74. Tiada tolakan berkenaan dengan anggota penanggung insurans
75. Surcaj premium berkenaan dengan anggota penanggung insurans
76. Caj lampau tempoh berkenaan dengan anggota penanggung insurans
77. Peraturan-peraturan premium berkenaan dengan anggota penanggung insurans
78. Premium dan surcaj atas anggota penanggung insurans disifatkan diperolehi

Bab 3

Bayaran

79. Bayaran berkenaan dengan manfaat dilindungi
80. Bayaran wajib berkenaan dengan manfaat dilindungi
81. Bayaran budi bicara berkenaan dengan manfaat dilindungi
82. Bayaran pendahuluan berkenaan dengan manfaat dilindungi
83. Pemberhentian polisi insurans dan sijil takaful dalam penggulangan
84. Penentuan bayaran wajib bagi sijil takaful perpaduan keluarga dan polisi hayat
85. Penentuan bayaran wajib bagi sijil takaful am dan polisi am
86. Pemberitahuan oleh Perbadanan
87. Pengiraan pulangan atau bunga atas manfaat dilindungi bagi bayaran wajib
88. Perbadanan boleh membayar pulangan atau bunga atas bayaran wajib berkenaan dengan manfaat dilindungi
89. Pengiraan pulangan atau bunga atas manfaat dilindungi bagi bayaran budi bicara
90. Pelepasan liabiliti, dsb., berkenaan dengan manfaat dilindungi
91. Subrogasi berkenaan dengan manfaat dilindungi
92. Penyerahhakan berkenaan dengan manfaat dilindungi
93. Had masa bagi tuntutan berkenaan dengan manfaat dilindungi
94. Aktuari bebas

BAHAGIAN VI

PEMERIKSAAN INSTITUSI ANGGOTA

Fasal

95. Bank Negara Malaysia hendaklah menyediakan maklumat
96. Pemeriksaan
97. Pemeriksaan khas

BAHAGIAN VII

TINDAKAN OLEH PERBADANAN

*Bab 1**Tindakan berkenaan dengan institusi anggota tidak berdaya maju*

98. Pemberitahuan mengenai tidak berdaya maju
99. Kuasa Perbadanan dalam hal institusi anggota tidak berdaya maju
100. Notis pengambilalihan kawalan
101. Peruntukan berhubung dengan pengambilalihan kawalan
102. Kuasa mengurangkan modal syer dan membatalkan syer institusi anggota di bawah perenggan 99(1)(c)
103. Penyelesaian resolusi
104. Penubuhan Jawatankuasa Pentaksir
105. Perkhidmatan peralihan
106. Pelantikan penerima, dsb.
107. Peruntukan berhubung dengan pelantikan di bawah perenggan 99(1)(c) dan seksyen 106
108. Kesahan transaksi
109. Penggantungan prosiding
110. Pelanjutan masa
111. Kesahan cagaran
112. Penyerahhakan bukan keingkaran, dsb.
113. Perjanjian diatasi bagi maksud perenggan 99(1)(c) dan seksyen 106
114. Bekalan dan pendahuluan lanjut
115. Perjanjian kewangan yang layak
116. Perbadanan, dsb., bukan majikan pengganti
117. Tuntuan, prosiding tertentu dilarang

Bab 2

Peruntukan berhubung dengan institusi perantaraan

Fasal

118. Penamaan institusi perantaraan
119. Siaran notis
120. Institusi perantaraan diberi kuasa untuk menjalankan perniagaan
121. Ketidapkapaian kehendak
122. Institusi perantaraan bukan majikan pengganti
123. Kuasa memberikan arahan
124. Pengambilalihan sebahagian liabiliti deposit yang tidak diinsuranskan atau manfaat yang tidak dilindungi
125. Penggantungan berkenaan dengan institusi perantaraan
126. Notis mengenai niat untuk meneruskan prosiding
127. Bantuan kepada institusi perantaraan
128. Perbadanan boleh memegang syer institusi anggota

Bab 3

Peruntukan am berhubung dengan penggulangan

129. Penggulangan institusi anggota atas permohonan Perbadanan
130. Disifatkan sebagai pemiutang
131. Objektif pelikuidasi apabila menggulungan institusi anggota
132. Pelantikan dan saraan pelikuidasi yang dilantik berkenaan dengan institusi anggota
133. Penyeliaan Perbadanan

Bab 4

Peruntukan khusus mengenai penggulangan anggota penerima deposit

134. Aturan bayaran dalam penggulangan anggota penerima deposit

Bab 5

Peruntukan khusus mengenai penggulangan anggota penanggung insurans

135. Tafsiran
136. Penggulangan anggota penanggung insurans atas permohonan oleh orang selain Perbadanan

Fasal

137. Notis prosiding penggulungan oleh orang selain Perbadanan
138. Laporan dan akaun pelikuidasi
139. Penyata hal ehwal
140. Aturan bayaran tertentu dalam penggulungan suatu anggota penanggung insurans
141. Penggunaan dana takaful atau dana insurans dalam penggulungan suatu pengendali takaful atau syarikat insurans
142. Aturan bayaran berhubung dengan aset pengendali takaful atau syarikat insurans
143. Penepian beban bukti hutang yang ketat
144. Ketidakpakaian peruntukan tertentu dalam Akta Syarikat 1965, Akta Insurans 1996 dan Akta Takaful 1984

BAHAGIAN VIII

PERLINDUNGAN PENSTABILAN

145. Tafsiran
146. Perintah perlindungan penstabilan
147. Pemakaian peruntukan khas
148. Perlindungan penstabilan
149. Fi atau premium bagi perlindungan penstabilan
150. Pemakaian peruntukan berkenaan dengan institutsi anggota
151. Fi atau premium disifatkan sebagai diperoleh
152. Perluasan pemakaian seksyen 51 atau 75
153. Surcaj
154. Caj lampau tempoh
155. Tiada tolakan
156. Pendanaan dan kerugian
157. Pemakaian berterusan peruntukan khas

BAHAGIAN IX

KUASA BERHUBUNG DENGAN ASET YANG DIPEROLEH OLEH PERBADANAN

Bab 1

Pemerolehan dan pelupusan oleh Perbadanan

158. Pemerolehan dan pelupusan aset oleh Perbadanan
159. Hak untuk melupuskan dan mengekalkan nilai harta

Bab 2

Peruntukan berkaitan dengan konservator

Fasal

160. Tafsiran
161. Kuasa untuk melantik konservator dan konservator tambahan, dsb.
162. Kelayakan konservator
163. Dua konservator atau lebih
164. Tempoh pentadbiran
165. Pemberitahuan pelantikan konservator
166. Kesan pelantikan konservator
167. Kuasa am konservator
168. Tugas am konservator
169. Konservator sebagai ejen orang terjejas
170. Pegawai orang terjejas hendaklah melaksanakan atau menjalankan fungsi dengan kelulusan bertulis
171. Urus niaga dengan aset orang terjejas
172. Pampasan
173. Obligasi pegawai orang terjejas
174. Penyiasatan urusan dan hal ehwal
175. Hak konservator ke atas buku, rekod, akaun atau dokumen lain orang terjejas
176. Hak konservator ke atas aset orang terjejas
177. Menyekat atau menghalang konservator
178. Penafian tuntutan
179. Moratorium
180. Perjanjian kewangan yang layak dengan orang terjejas
181. Mendapatkan balik balasan wang daripada aset yang diperoleh atau dijual sebelum pelantikan konservator
182. Keutamaan tidak wajar
183. Pengosongan jawatan penerima, dsb.
184. Konservator hendaklah menyediakan cadangan
185. Mesyuarat pemiutang bercagar
186. Pelaksanaan cadangan

Fasal

187. Pengubahsuaian kepada cadangan
188. Syarat kelulusan kawal selia
189. Penolakan atau pemberhentian cadangan
190. Laporan mengenai salah laku
191. Kesahan transaksi

BAHAGIAN X

KESALAHAN

192. Mengemukakan diri sebagai institusi anggota
193. Pernyataan palsu
194. Tidak memberikan maklumat, dsb.
195. Kesalahan am
196. Kesalahan oleh pertubuhan perbadanan atau badan tidak diperbadankan atau oleh pengarah, pegawai, pengawal, dsb.
197. Kuasa Perbadanan untuk mengkompaun kesalahan
198. Mahkamah boleh memerintahkan pematuhan
199. Hukuman kewangan tambahan
200. Perintah pematuhan atau penyekatan
201. Mendapatkan kembali denda

BAHAGIAN XI

PERUNTUKAN AM

202. Pengemukaan maklumat kepada Perbadanan
203. Pengemukaan maklumat kepada Bank Negara Malaysia
204. Niat untuk menggulung institusi anggota
205. Pengiktirafan kehakiman
206. Penggulungan Perbadanan
207. Kekebalan
208. Pemakaian dan ketidakpakaian Akta lain
209. Kuasa untuk membuat peraturan-peraturan, kaedah-kaedah, perintah, undang-undang kecil, arahan, garis panduan, pekeliling atau nota

BAHAGIAN XII

PEMANSUHAN, KECUALIAN DAN PERALIHAN

Fasal

- 210. Pemansuhan
- 211. Kecualian dan peralihan
- 212. Pemindahan kumpulan wang tertentu daripada Bank Negara Malaysia

JADUAL PERTAMA

JADUAL KEDUA

JADUAL KETIGA

JADUAL KEEMPAT

RANG UNDANG-UNDANG

b e r n a m a

Suatu Akta untuk mengadakan peruntukan bagi kewujudan berterusan Perbadanan Insurans Deposit Malaysia, pentadbiran sistem insurans deposit dan sistem perlindungan manfaat takaful dan insurans di bawah Akta ini dan perkara yang bersampingan atau berkaitan dengannya.

[]

BAHAWASANYA kestabilan sistem kewangan ialah penentu utama pertumbuhan ekonomi dan kemakmuran Malaysia:

DAN BAHAWASANYA sistem insurans deposit dan sistem perlindungan manfaat takaful dan insurans ialah komponen penting dalam jaring keselamatan kewangan kerana ia menggalakkan dan menyumbang kepada kestabilan sistem kewangan:

DAN BAHAWASANYA maksud sistem insurans deposit dan sistem perlindungan manfaat takaful dan insurans adalah untuk melindungi pendeposit daripada kehilangan sebahagian atau kesemua deposit mereka dan benefisiari takaful dan orang diinsuranskan daripada kehilangan sebahagian atau kesemua manfaat takaful atau insurans mereka sekiranya berlaku kegagalan sesuatu institusi anggota dan Perbadanan Insurans Deposit Malaysia hendaklah menjalankan fungsi yang dimandatkan dengan cepat dan berkesan dan menggalakkan pengurusan risiko yang wajar dalam sistem kewangan dan menggalakkan serta memperkukuh perlindungan berguna kewangan:

DAN BAHAWASANYA peruntukan khusus dikehendaki demi kepentingan orang awam untuk memberi Perbadanan kuasa untuk melaksanakan dengan segera tindakan resolusi yang dinyatakan dalam Akta ini pada kos minimum kepada sistem kewangan:

MAKA, INILAH, DIPERBUAT oleh Parlimen Malaysia seperti yang berikut:

BAHAGIAN I

PERMULAAN

Tajuk ringkas dan permulaan kuat kuasa

1. (1) Akta ini bolehlah dinamakan Akta Perbadanan Insurans Deposit Malaysia 2010.

(2) Akta ini mula berkuat kuasa pada 31 Disember 2010.

Tafsiran

2. (1) Dalam Akta ini, melainkan jika konteksnya mengkehendaki makna yang lain—

“Akta dimansuhkan” ertinya Akta Perbadanan Insurans Deposit Malaysia 2005 [*Akta 642*];

“anggota penanggung insurans” ertinya suatu institusi anggota yang merupakan syarikat insurans atau pengendali takaful;

“anggota penerima deposit” ertinya suatu institusi anggota yang merupakan bank Islam sebagaimana yang ditakrifkan di bawah seksyen 2 Akta Bank Islam 1983 [*Akta 276*] atau suatu bank berlesen atau syarikat kewangan berlesen sebagaimana yang ditakrifkan di bawah seksyen 2 Akta Bank dan Institusi Kewangan 1989 [*Akta 372*];

“aset” termasuklah apa-apa kemudahan pembiayaan Islam, kemudahan kredit konvensional, harta, perniagaan dan perusahaan dalam apa-apa jenis;

“aset Islam” ertinya suatu aset yang diuruskan atau dimiliki melalui suatu perniagaan perbankan Islam atau perniagaan kewangan Islam;

“aset konvensional” ertinya suatu aset selain aset Islam;

“benefisiari takaful” ertinya seseorang yang berhak ke atas suatu manfaat takaful, sama ada orang itu ialah pemunya sijil atau tidak;

“berkaitan”, berhubung dengan suatu perbadanan, ertinya berkaitan mengikut pengertian seksyen 6 Akta Syarikat 1965 [*Akta 125*];

“bersekutu” ertinya suatu perbadanan yang tidak kurang daripada dua puluh peratus dan tidak lebih daripada lima puluh peratus daripada syer perbadanan itu dipegang oleh perbadanan lain, dengan itu perbadanan yang mula-mula disebut itu ialah suatu perbadanan bersekutu dengan perbadanan yang lain itu;

“cagaran” termasuklah suatu gadai janji atau gadaian, sama ada di sisi undang-undang atau ekuiti, debentur, bil pertukaran, nota janji hutang, jaminan, lien atau sandaran, sama ada sebenar atau konstruktif, surat hipotekasi, tanggung rugi, aku janji dan cara lain untuk menjamin pembayaran atau pelepasan hutang atau liabiliti, sama ada pada masa sekarang atau hadapan dan sama ada terletak hak atau kontingen;

“deposit” ertinya—

(a) suatu deposit konvensional; atau

(b) suatu deposit Islam;

“deposit diinsuranskan” ertinya deposit yang diinsuranskan secara berasingan sebagai deposit Islam atau deposit konvensional di bawah seksyen 42;

“deposit Islam” ertinya suatu jumlah wang atau nilai wang yang diterima atau dibayar menurut terma oleh mana-mana orang, yang penerimaan dan pembayaran baliknya hendaklah mengikut terma mana-mana perjanjian yang selaras dengan Shariah atas apa-apa asas termasuk jagaan atau perkongsian keuntungan;

“deposit konvensional” ertinya suatu jumlah wang yang diterima atau dibayar menurut terma—

(a) yang akan dibayar balik atau kena dibayar balik, berserta atau tanpa bunga atau premium, atau dengan apa-apa balasan wang, sama ada apabila dituntut atau pada masa atau dalam hal keadaan yang dipersetujui antara atau bagi pihak orang yang membuat bayaran itu dengan orang yang menerimanya; dan

(b) yang tidak berhubung dengan peruntukan harta atau perkhidmatan atau pemberian cagaran,

dan tidak termasuk suatu deposit Islam;

“depositori pusat” mempunyai erti yang sama sebagaimana yang ditakrifkan di bawah Akta Perindustrian Sekuriti (Depositori Pusat) 1991 [*Akta 453*];

“ditentukan”, jika tiada cara disebutkan, ertinya ditentukan secara bertulis;

“ditetapkan”, jika tiada cara disebutkan, ertinya ditetapkan melalui perintah yang disiarkan dalam *Warta*;

“dokumen” mempunyai erti yang sama sebagaimana yang ditakrifkan di bawah seksyen 3 Akta Keterangan 1950 [*Akta 56*];

“dokumen konstituen”, berhubungan dengan suatu pertubuhan, perbadanan atau bukan perbadanan, ertinya statut, piagam, memorandum persatuan, perkara persatuan, kaedah-kaedah, undang-undang kecil, perjanjian perkongsian, atau surat cara lain, yang di bawahnya atau dengannya pertubuhan itu diperbadankan atau ditubuhkan, atau struktur tadbir urus dan pentadbirannya, bidang fungsi, urusan, kuasa atau tugasnya dinyatakan, sama ada terkandung dalam satu dokumen atau lebih;

“ejen depositori yang dibenarkan” mempunyai erti yang sama sebagaimana yang ditakrifkan di bawah Akta Perindustrian Sekuriti (Depositori Pusat) 1991;

“kumpulan perniagaan” ertinya suatu kumpulan syarikat yang mana sesuatu institusi anggota adalah berkaitan atau bersekutu dengan syarikat lain dalam kumpulan yang sama;

“Gabenor” ertinya Gabenor Bank Negara Malaysia;

“harta” ertinya apa-apa harta alih atau tak alih dan termasuklah—

- (a) apa-apa hak, kepentingan, hakmilik, tuntutan, hak dalam tindakan, kuasa atau keistimewaan, sama ada pada masa sekarang atau hadapan, atau sama ada terletak hak atau kontingen, yang berhubungan dengan mana-mana harta, atau yang selainnya mempunyai nilai;
- (b) apa-apa dokumen yang disempurnakan untuk memindahmilikan, menyerahkan, melantik, menyerahkan, atau selainnya memindahkan atau melupuskan harta jika orang yang menyempurnakan dokumen itu ialah pemunya

atau pemilik, atau yang dia berhak mendapat suatu hak kontingen mengenainya, sama ada bagi keseluruhan atau sebahagian kepentingan dalam harta;

- (c) apa-apa sekuriti, termasuk apa-apa saham, syer, debentur, bon, pinjaman saham, hak langganan atau waran yang boleh dipindah milik;
- (d) apa-apa surat cara boleh niaga, termasuk apa-apa nota bank, nota pembawa, bil Perbendaharaan, waran dividen, bil pertukaran, nota janji hutang, cek dan perakuan deposit boleh niaga;
- (e) apa-apa gadai janji atau gadaian, sama ada di sisi undang-undang atau ekuiti, jaminan, lien atau sandaran, sama ada sebenar atau konstruktif, surat hipotekasi atau resit amanah, tanggung rugi, aku janji atau cara lain yang menjamin pembayaran atau pelepasan suatu hutang atau liabiliti, sama ada pada masa sekarang atau hadapan, atau terletak hak atau kontingen; dan
- (f) apa-apa harta ketara atau tak ketara yang lain;

“hayat sertain” ertinya—

- (a) seseorang yang berkenaan dengannya suatu sijil takaful memperuntukkan perlindungan atas kematian atau keberterusan hidupnya; atau
- (b) seseorang yang berkenaan dengannya suatu sijil takaful memperuntukkan perlindungan atas suatu kemalangan, penyakit atau keuzuran,

sama ada orang itu ialah pemunya sijil atau tidak;

“institusi anggota” ertinya suatu institusi kewangan atau perbadanan yang disifatkan atau ditetapkan sebagai institusi anggota di bawah Akta ini dan keanggotaannya tidak dibatalkan di bawah seksyen 38 atau ditamatkan di bawah seksyen 39;

“institusi kewangan” ertinya suatu bank berlesen atau syarikat kewangan berlesen sebagaimana yang ditakrifkan di bawah seksyen 2 Akta Bank dan Institusi Kewangan 1989, bank Islam sebagaimana yang ditakrifkan di bawah seksyen 2 Akta Bank Islam 1983, dan termasuklah suatu syarikat insurans atau pengendali takaful;

“institusi kewangan pembangunan” mempunyai erti yang sama sebagaimana yang ditakrifkan di bawah Akta Institusi Kewangan Pembangunan 2002 [*Akta 618*];

“institusi perantaraan” ertinya suatu subsidiari Perbadanan yang dinamakan sebagai suatu institusi perantaraan di bawah perenggan 99(1)(f);

“Jawatankuasa Pentaksir” ertinya jawatankuasa yang diperuntukkan di bawah seksyen 104;

“kemudahan kredit konvensional” ertinya—

- (a) pemberian apa-apa pendahuluan, pinjaman, kredit perdagangan atau kemudahan lain dalam apa-apa jua bentuk atau dengan apa-apa jua nama yang dengannya orang yang kepadanya pendahuluan, pinjaman, kredit perdagangan atau kemudahan lain itu diberikan mempunyai akses, secara langsung atau tidak langsung, kepada dana atau harta orang yang memberikan;
- (b) pemberian suatu jaminan atau apa-apa cagaran berhubung dengan kewajipan mana-mana orang; atau
- (c) apa-apa urusan niaga atau transaksi seumpama itu sebagaimana yang ditetapkan oleh Perbadanan;

“kemudahan pembiayaan Islam” ertinya—

- (a) pemberian apa-apa pendahuluan, pinjaman, kredit perdagangan atau kemudahan lain dalam apa-apa jua bentuk atau dengan apa-apa jua nama yang dengannya orang yang kepadanya pendahuluan, pinjaman, kredit perdagangan atau kemudahan lain itu diberikan mempunyai akses, secara langsung atau tidak langsung, kepada dana atau harta orang yang memberikannya dan termasuk apa-apa perkiraan jualan dan belian balik, perjanjian usaha sama, jualan bayaran tertunda, perkiraan perkongsian pulangan dan apa-apa perkiraan pembiayaan lain yang dibuat mengikut Syariah;
- (b) sewa beli, sewa dan beli, pajakan, pemfaktoran, perdagangan hutang dan urusan niaga atau transaksi yang seumpamanya;

- (c) pemberian suatu jaminan atau apa-apa cagaran berhubung dengan kewajipan mana-mana orang; atau
- (d) apa-apa urus niaga atau transaksi seumpama itu sebagaimana yang ditetapkan oleh Perbadanan;

“ketua eksekutif”, berhubung dengan suatu perbadanan, ertinya seseorang orang sebenar, dengan apa-apa jua nama, yang bertanggungjawab, sama ada secara perseorangan atau bersesama dengan seseorang atau lebih, tertakluk kepada kuasa pengarah, bagi penjalanan urusan dan pentadbiran perbadanan itu;

“Ketua Pegawai Eksekutif” ertinya ketua eksekutif Perbadanan;

“Kumpulan Wang Disatukan” ertinya Kumpulan Wang Disatukan Persekutuan yang ditubuhkan oleh Perlembagaan Persekutuan;

“Lembaga” ertinya lembaga pengarah Perbadanan;

“liabiliti” termasuklah tiap-tiap jenis hutang, kewajipan dan obligasi, sama ada pada masa sekarang atau hadapan, dan terletak hak atau kontingen;

“manfaat dilindungi” ertinya manfaat takaful dan insurans yang dilindungi secara berasingan oleh sistem perlindungan manfaat takaful dan insurans di bawah Bahagian V;

“manfaat insurans” ertinya suatu obligasi di bawah suatu polisi insurans untuk membayar suatu amaun kepada atau bagi manfaat orang diinsuranskan atau untuk menunaikan suatu obligasi yang tidak berupa wang apabila berlakunya satu kejadian yang diperuntukkan dalam polisi insurans dan suatu amaun yang kena dibayar di bawah suatu polisi insurans disebabkan oleh obligasi sedemikian;

“manfaat insurans dilindungi” ertinya suatu jenis atau perihalan manfaat insurans yang ditetapkan melalui peraturan-peraturan yang dibuat di bawah subseksyen 69(2) sebagai dilindungi di bawah sistem perlindungan manfaat takaful dan insurans yang diperuntukkan dalam Akta ini;

“manfaat takaful” ertinya suatu obligasi di bawah suatu sijil takaful untuk membayar suatu amaun kepada atau bagi manfaat benefisiari takaful atau untuk menunaikan suatu obligasi yang

tidak berupa wang apabila berlakunya satu kejadian atau lebih yang diperuntukkan dalam sijil takaful dan suatu amaun yang kena dibayar di bawah suatu sijil takaful disebabkan oleh obligasi sedemikian;

“manfaat takaful dilindungi” ertinya suatu jenis atau perihalan manfaat takaful yang ditetapkan melalui peraturan-peraturan yang dibuat di bawah subseksyen 69(2) sebagai dilindungi di bawah sistem perlindungan manfaat takaful dan insurans yang diperuntukkan dalam Akta ini;

“Menteri” ertinya Menteri yang dipertanggungjawabkan dengan tanggungjawab bagi hal kewangan;

“meterai faksimile” ertinya pendua kepada meterai perbadanan bagi Perbadanan;

“orang diinsuranskan” ertinya seseorang yang berhak kepada suatu manfaat insurans, sama ada orang itu ialah pemunya polisi atau tidak;

“orang diinsuranskan hayat” ertinya—

- (a) seseorang yang berkenaan dengannya suatu polisi insurans memperuntukkan perlindungan atas kematian atau kebeterusan hidupnya; atau
- (b) seseorang yang berkenaan dengannya suatu polisi insurans memperuntukkan perlindungan atas suatu kemalangan, penyakit atau keuzuran,

sama ada orang itu adalah pemunya polisi atau tidak;

“orang terjejas” ertinya—

- (a) mana-mana syarikat yang berkewajipan atau berhutang di bawah suatu kemudahan pembiayaan Islam atau kemudahan kredit konvensional kepada Perbadanan atau mana-mana subsidiari Perbadanan, sama ada pada masa sekarang atau hadapan, atau sama ada terletak hak atau kontingen;
- (b) mana-mana subsidiari syarikat yang disebut dalam perenggan (a);

- (c) mana-mana syarikat yang telah menyediakan cagaran bagi pelaksanaan atau penunaian suatu kewajipan atau liabiliti yang terhutang oleh mana-mana orang terjejas utama kepada Perbadanan atau mana-mana subsidiari Perbadanan, sama ada pada masa sekarang atau hadapan, atau sama ada terletak hak atau kontingen; atau
- (d) mana-mana syarikat yang sekurang-kurangnya lima peratus daripada modal syernya telah digadaikan, disandarkan atau digadaijanjikan oleh mana-mana orang untuk menjamin pelaksanaan atau penunaian suatu kewajipan atau liabiliti yang terhutang oleh mana-mana orang terjejas utama kepada Perbadanan atau mana-mana subsidiari Perbadanan, sama ada pada masa sekarang atau hadapan, atau sama ada terletak hak atau kontingen,

dan tidak termasuk suatu institusi anggota;

“orang terjejas utama” ertinya mana-mana syarikat yang disebut dalam perenggan (a) takrif “orang terjejas itu”;

“pegawai”, berhubung dengan suatu institusi anggota atau orang terjejas, ertinya—

- (a) mana-mana pengarah, setiausaha atau pekerja institusi anggota atau orang terjejas;
- (b) mana-mana penerima, pengurus atau penerima dan pengurus sama ada dilantik oleh mahkamah atau selainnya; dan
- (c) mana-mana pelikuidasi yang dilantik oleh mahkamah atau selainnya;

“pengendali takaful” ertinya suatu syarikat yang menjalankan perniagaan takaful dan didaftarkan di bawah seksyen 8 Akta Takaful 1984 [*Akta 312*], selain pengendali yang menjalankan perniagaan takaful semula dan pengendali takaful antarabangsa;

“pejabat” termasuklah ibu pejabat, tempat utama perniagaan, cawangan, agensi, tempat perniagaan bergerak, tempat perniagaan yang diadakan dan disenggarakan bagi suatu tempoh terhad sahaja dan mana-mana tempat perniagaan lain;

“pemunya polisi” ertinya seseorang yang mempunyai hakmilik sah ke atas suatu polisi insurans dan termasuklah—

- (a) jika polisi telah diserahkan, pemegang serah hak;

- (b) jika berhak terhadap syarikat insurans untuk melaksanakan hak seorang pemunya polisi yang sah, wakil diri pemunya polisi yang mati; dan
- (c) berhubungan dengan suatu polisi yang memperuntukkan pembayaran anuiti, penerima anuiti;

“pemunya sijil” ertinya seseorang yang mempunyai hakmilik sah ke atas suatu sijil takaful dan termasuklah—

- (a) jika sijil telah diserahkan, pemegang serah hak;
- (b) jika berhak terhadap pengendali takaful untuk melaksanakan hak seorang pemunya polisi yang sah bagi sijil itu, wakil diri pemunya sijil yang mati; dan
- (c) berhubung dengan suatu sijil yang memperuntukkan pembayaran anuiti, penerima anuiti;

“pendaftar kapal Malaysia” ertinya pendaftar kapal Malaysia yang dilantik di bawah subseksyen 14(1) Ordinan Perkapalan Saudagar 1952 [*Ord.70/1952*] dan termasuklah Pendaftar Besar Kapal yang dilantik di bawah subseksyen 14(1) Ordinan itu;

“Pendaftar Syarikat” ertinya Pendaftar Syarikat yang ditetapkan di bawah Akta Syarikat 1965;

“pendaftar mahkamah” ertinya mana-mana Pendaftar, Timbalan Pendaftar, Penolong Pendaftar Kanan atau Penolong Pendaftar Mahkamah Tinggi yang dilantik di bawah seksyen 10 Akta Mahkamah Kehakiman 1964 [*Akta 91*];

“Pendaftar tanah” ertinya Pendaftar sebagaimana yang ditakrifkan di bawah seksyen 5 Kanun Tanah Negara [*Akta 56/1965*], Pendaftar sebagaimana yang ditakrifkan di bawah seksyen 4 Ordinan Tanah Sabah [*Sabah Bab 68*] atau Pendaftar di bawah Kanun Tanah Sarawak [*Sarawak Bab 81*];

“pendeposit” ertinya seorang—

- (a) yang akaunnya telah atau akan dikreditkan berkenaan dengan wang yang menjadi suatu deposit Islam atau deposit konvensional atau sebahagian daripada deposit itu; atau

(b) yang kepadanya suatu institusi anggota bertanggung berkenaan dengan suatu surat cara yang dikeluarkan bagi wang yang menjadi suatu deposit Islam atau deposit konvensional atau sebahagian daripada deposit itu;

“Pengerusi” ertinya pengerusi Lembaga;

“Perbadanan” ertinya Perbadanan Insurans Deposit Malaysia;

“perbadanan” mempunyai erti yang sama sebagaimana yang ditakrifkan di bawah seksyen 4 Akta Syarikat 1965;

“perjanjian kewangan yang layak” ertinya suatu perjanjian yang disebut dalam subseksyen 115(1) atau seksyen 180;

“perniagaan kewangan Islam” ertinya mana-mana perniagaan kewangan, yang tujuan dan operasinya tidak melibatkan apa-apa unsur yang tidak selaras dengan Shariah, termasuk perniagaan takaful;

“perniagaan perbankan Islam” ertinya mana-mana perniagaan perbankan yang mana tujuan dan operasinya tidak melibatkan apa-apa unsur yang tidak selaras dengan Shariah;

“pihak ketiga yang layak” ertinya suatu perbadanan yang memenuhi apa-apa kriteria yang ditetapkan oleh Perbadanan;

“polisi am” ertinya suatu polisi yang dikeluarkan oleh suatu syarikat insurans selain polisi hayat;

“polisi hayat” ertinya suatu polisi yang dikeluarkan oleh suatu syarikat insurans yang menjalankan perniagaan insurans hayat yang di bawahnya suatu obligasi timbul atas kematian atau keberterusan hidup seseorang, termasuk peluasan perlindungan bagi kemalangan diri, penyakit atau keuzuran, dan termasuk suatu anuiti, dan suatu polisi yang hanya memperuntukkan perlindungan terhadap penyakit atau keuzuran sahaja atau perbelanjaan perubatan sahaja tetapi tidak termasuk suatu polisi yang merupakan polisi bagi kemalangan diri sahaja;

“polisi insurans” ertinya suatu polisi hayat atau polisi am;

“pulangan” termasuklah apa-apa bentuk sewaan, keuntungan, dividen dan manfaat, termasuk apa-apa fi atau hadiah, yang kena dibayar atau diberikan berhubung dengan apa-apa deposit Islam atau sebagai sebahagian daripada apa-apa manfaat takaful atau di bawah mana-mana dokumen, perjanjian, perkiraan dan surat cara yang berhubung dengan suatu kemudahan pembiayaan Islam;

“sekuriti” mempunyai erti yang sama sebagaimana yang ditakrifkan di bawah Akta Pasaran dan Perkhidmatan Modal 2007 [*Akta 671*];

“sijil takaful” ertinya suatu kontrak berkenaan dengan takaful perpaduan keluarga atau takaful am;

“sijil takaful am” ertinya suatu sijil takaful yang dikeluarkan oleh suatu pengendali takaful selain sijil takaful perpaduan keluarga;

“sijil takaful perpaduan keluarga” ertinya suatu sijil takaful yang dikeluarkan oleh pengendali takaful yang menjalankan perniagaan takaful perpaduan keluarga yang di bawahnya suatu obligasi timbul atas kematian atau keberterusan hidup seseorang, termasuk peluasan perlindungan bagi kemalangan diri, penyakit atau keuzuran, dan termasuk suatu anuiti, dan suatu sijil yang hanya memperuntukkan perlindungan terhadap penyakit atau keuzuran sahaja atau perbelanjaan perubatan sahaja tetapi tidak termasuk suatu sijil bagi kemalangan diri sahaja;

“subsidiari” mempunyai erti yang sama sebagaimana yang ditakrifkan di bawah Akta Syarikat 1965;

“surat cara modal” ertinya syer keutamaan, saham pinjaman, hutang berjangka subordinat atau surat cara lain yang diluluskan oleh Bank Negara Malaysia sebagai layak untuk menjadi dana modal bagi maksud Akta Bank Dan Institusi Kewangan 1989, Akta Bank Islam 1983, Akta Insurans 1996 [*Akta 553*] atau Akta Takaful 1984;

“syarikat” mempunyai erti yang sama sebagaimana yang ditakrifkan di bawah Akta Syarikat 1965;

“syarikat insurans” ertinya suatu syarikat tempatan yang diperbadankan yang dilesenkan untuk menjalankan perniagaan insurans di bawah seksyen 16 Akta Insurans 1996, selain suatu syarikat yang menjalankan perniagaan penanggung insurans semula dan Danajamin Nasional Berhad;

“syer” mempunyai erti yang sama sebagaimana yang ditakrifkan di bawah Akta Syarikat 1965;

“tahun taksiran”, berhubungan dengan pengiraan dan pembayaran premium di bawah Akta ini, ertinya tempoh yang bermula pada hari pertama bulan Januari dan berakhir pada hari ketiga puluh satu bulan Disember setiap tahun atau apa-apa tempoh lain yang diluluskan oleh Menteri;

“takaful” mempunyai erti yang sama sebagaimana yang ditakrifkan di bawah Akta Takaful 1984;

“takaful am” ertinya takaful selain takaful perpaduan keluarga;

“takaful perpaduan keluarga” mempunyai erti yang sama sebagaimana yang ditakrifkan di bawah seksyen 2 Akta Takaful 1984.

(2) Apa-apa sebutan dalam Akta ini mengenai “Akta ini” hendaklah, melainkan jika konteksnya mengkehendaki makna yang lain, disifatkan sebagai termasuk sebutan mengenai mana-mana kaedah-kaedah, peraturan-peraturan, undang-undang kecil, perintah, pemberitahuan, garis panduan, pekeliling, nota atau mana-mana perundangan subsidiari lain yang dibuat atau dikeluarkan di bawah Akta ini.

BAHAGIAN II

PERBADANAN INSURANS DEPOSIT MALAYSIA

Bab 1

Objektif dan operasi

Perbadanan yang ditubuhkan di bawah Akta Perbadanan Insurans Deposit Malaysia 2005

3. (1) Walau pun Akta Perbadanan Insurans Deposit Malaysia 2005 dimansuhkan oleh menurut seksyen 210, perbadanan yang ditubuhkan di bawah Akta yang dimansuhkan dengan nama “Perbadanan Insurans Deposit Malaysia” hendaklah terus wujud di bawah dan tertakluk kepada peruntukan Akta ini.

(2) Perbadanan ialah pertubuhan perbadanan yang sama yang telah ditubuhkan di bawah Akta yang dimansuhkan.

(3) Perbadanan hendaklah terus kekal turun-temurun dan mempunyai suatu meterai perbadanan, dan boleh membawa guaman dan dibawa guaman terhadapnya atas nama perbadanannya.

Matlamat Perbadanan

4. (1) Matlamat Perbadanan adalah untuk—

- (a) mentadbirkan suatu sistem insurans deposit dan suatu sistem perlindungan manfaat takaful dan insurans di bawah Akta ini;
- (b) memperuntukkan insurans terhadap kehilangan sebahagian atau kesemua deposit yang baginya anggota penerima deposit adalah bertanggung dan memperuntukkan perlindungan terhadap kehilangan sebahagian atau kesemua manfaat takaful atau insurans yang baginya anggota penanggung insurans adalah bertanggung;
- (c) mengadakan insentif bagi pengurusan risiko yang wajar dalam sistem kewangan; dan
- (d) menggalakkan atau menyumbang kepada kestabilan sistem kewangan.

(2) Dalam mencapai matlamatnya di bawah perenggan (1)(b) dan (d), Perbadanan hendaklah bertindak dalam apa-apa cara bagi meminimumkan kos kepada sistem kewangan.

Meterai perbadanan dan meterai faksimile

5. (1) Meterai perbadanan dan meterai faksimile Perbadanan boleh dipecahkan, ditukar, diubah dan dibuat baharu sebagaimana yang difikirkan patut oleh Perbadanan.

(2) Lembaga boleh mengadakan suatu meterai faksimile dan boleh membenarkan tandatangan mana-mana pengarah dan setiausaha dibuat melalui cetakan atau cara mekanikal yang lain.

(3) Meterai perbadanan hendaklah digunakan dengan kebenaran Lembaga dan tiap-tiap surat cara yang padanya meterai perbadanan itu dicapkan hendaklah ditandatangani oleh seorang pengarah dan hendaklah ditandatangani balas oleh setiausaha atau oleh seorang lagi pengarah atau oleh seorang lain yang dilantik oleh

Lembaga, dan semua surat ikatan, dokumen dan surat cara lain yang berupa sebagai dimeteraikan dengan meterai perbadanan, yang disahkan sebagaimana yang disebut terdahulu, hendaklah disifatkan sebagai telah disempurnakan dengan sah melainkan jika dibuktikan sebaliknya.

(4) Tiap-tiap surat cara yang padanya meterai faksimile dicapkan dan ditandatangani oleh seorang pengarah dan setiausaha melalui cetakan atau cara mekanikal yang lain hendaklah mempunyai kuasa dan kesahan yang sama seolah-olah meterai perbadanan telah diletakkan pada surat cara itu dan surat cara itu telah ditandatangani mengikut subseksyen (3).

(5) Semua mahkamah, hakim dan orang yang bertindak secara kehakiman hendaklah memberi pengiktirafan kehakiman kepada meterai perbadanan dan meterai faksimile itu.

(6) Meterai perbadanan dan meterai faksimile itu hendaklah disimpan dalam jagaan setiausaha atau mana-mana orang lain sebagaimana yang dibenarkan oleh Lembaga.

Penyempurnaan dokumen

6. Apa-apa dokumen atau surat cara yang, jika disempurnakan oleh seorang yang bukan suatu pertubuhan perbadanan, tidak dikehendaki dibuat di bawah meterai boleh dengan cara yang sama disempurnakan oleh Perbadanan, dan mana-mana dokumen atau surat cara itu boleh disempurnakan bagi pihak Perbadanan oleh mana-mana pegawai Perbadanan yang diberi kuasa secara am atau khusus oleh Lembaga bagi maksud itu.

Penubuhan jawatankuasa

7. Perbadanan boleh menubuhkan apa-apa jawatankuasa sebagaimana yang difikirkannya perlu atau suai manfaat untuk melaksanakan fungsinya.

Pejabat Perbadanan

8. Perbadanan boleh, di dalam atau di luar Malaysia, menubuhkan mana-mana pejabat sebagaimana yang difikirkannya perlu atau suai manfaat untuk melaksanakan fungsinya.

Kuasa untuk melantik wakil dan ejen

9. (1) Perbadanan boleh, melalui surat cara di bawah meterai perbadanannya, melantik seseorang sama ada di Malaysia atau di suatu tempat di luar Malaysia untuk menjadi wakilnya, dan orang yang dilantik itu boleh, tertakluk kepada surat cara itu, melakukan apa-apa perbuatan atau melaksanakan apa-apa kuasa atau fungsi yang dia diberi kuasa oleh surat cara itu untuk melakukan atau menyempurnakan.

(2) Perbadanan boleh, di dalam atau di luar Malaysia, melantik mana-mana ejen sebagaimana yang difikirkannya perlu atau suai manfaat untuk melaksanakan apa-apa tindakan bagi pihak Perbadanan.

Penubuhan subsidiari

10. (1) Bagi maksud menjalankan fungsi, kuasa dan kewajipan di bawah Akta ini, Perbadanan boleh menubuhkan apa-apa subsidiari sebagaimana yang difikirkannya perlu atau suai manfaat.

(2) Tanpa menjejaskan mana-mana peruntukan lain dalam Akta ini, sesuatu subsidiari Perbadanan hendaklah mempunyai apa-apa kuasa dan imuniti Perbadanan sebagaimana yang ditetapkan oleh Perbadanan dengan kelulusan Menteri, termasuk kuasa dan kekebalan yang diperuntukkan dalam seksyen 25, 158, 159, dan 161, perenggan 99(1)(b) dan Jadual Kedua, Ketiga dan Keempat.

*Bab 2**Lembaga Pengarah***Tugas dan komposisi**

11. (1) Hendaklah ada suatu lembaga pengarah yang hendaklah bertanggungjawab bagi penjalanan urusan dan hal ehwal Perbadanan dan hendaklah menjalankan segala kuasa dan melakukan segala tindakan yang boleh dijalankan atau dilakukan oleh Perbadanan.

(2) Lembaga hendaklah terdiri daripada pengarah yang berikut:

- (a) seorang Pengerusi yang dilantik oleh Menteri yang hendaklah mempunyai pengalaman yang berkaitan dalam sektor swasta;
- (b) Gabenor;
- (c) Ketua Setiausaha Perbendaharaan;
- (d) dua orang pengarah yang dilantik oleh Menteri, seorang daripada mereka hendaklah daripada sektor awam dan seorang lagi boleh daripada sektor awam atau seorang yang mempunyai pengalaman dalam sektor awam; dan
- (e) tidak lebih daripada empat pengarah lain yang dilantik oleh Menteri, yang hendaklah mempunyai pengalaman yang berkaitan dalam sektor swasta dan sekurang-kurangnya seorang daripada mereka hendaklah mempunyai pengalaman yang berkaitan dalam sektor perbankan dan kewangan.

(3) Tanpa menjejaskan subseksyen 18(2), tiada seorang pun pengarah yang disebut dalam perenggan (2)(b), (c) atau (d) layak dilantik sebagai Pengerusi oleh Menteri.

Lembaga boleh membuat undang-undang kecil

12. (1) Lembaga boleh membuat apa-apa undang-undang kecil sebagaimana yang perlu atau suai manfaat berhubung dengan pentadbiran, pengurusan, kawalan, urusan, aset dan hal ehwal Perbadanan termasuk—

- (a) fungsi, kuasa, kewajipan, saraan, faedah dan terma dan syarat perkhidmatan, tatakelakuan atau surcaj ke atas pegawai, pekerja dan ejen Perbadanan;
- (b) percanggahan kepentingan berkenaan dengan pengarah, pegawai dan pekerja Perbadanan yang sedang berkhidmat dan pengarah, pegawai dan pekerja yang telah meninggalkan perkhidmatan Perbadanan;
- (c) pelantikan, terma rujukan dan aktiviti jawatankuasa yang ditubuhkan oleh Perbadanan;
- (d) kaedah-kaedah dan tatacara yang hendaklah dipatuhi oleh pengarah pada mesyuarat Lembaga; dan

(e) apa-apa perkara lain sebagaimana yang dikehendaki untuk diperuntukkan di bawah undang-undang kecil dalam Akta ini.

(2) Undang-undang kecil yang dibuat di bawah seksyen ini hendaklah mengikat semua orang yang baginya undang-undang kecil itu terpakai.

(3) Mana-mana orang yang tidak mematuhi undang-undang kecil yang dibuat di bawah perenggan (1)(b) melakukan suatu kesalahan.

Tempoh jawatan pengarah

13. (1) Pengarah yang dilantik oleh Menteri di bawah subseksyen 11(2) hendaklah memegang jawatan bagi suatu tempoh yang tidak melebihi tiga tahun dan layak untuk dilantik semula.

(2) Gabenor dan Ketua Setiausaha Perbendaharaan, masing-masing, hendaklah menjadi pengarah sepanjang tempoh mereka memegang jawatan sebagai Gabenor dan Ketua Setiausaha Perbendaharaan.

Kehilangan kelayakan dan penamatan pengarah Lembaga

14. (1) Tiada seorang pun boleh dilantik atau dikekalkan, sebagai seorang pengarah Lembaga jika orang itu merupakan—

- (a) seorang ahli Dewan Negara atau Dewan Rakyat atau mana-mana Dewan Perundangan;
- (b) seorang pegawai sesuatu institusi anggota; atau
- (c) seorang ketua bahagian, atau mana-mana orang yang memegang apa-apa jawatan atau kedudukan yang seumpamanya dalam sesuatu parti politik.

(2) Menteri boleh menamatkan atau menggantung pelantikan mana-mana pengarah jika—

- (a) dia menjadi tidak sempurna akal atau selainnya menjadi tidak berupaya untuk menjalankan tugasnya;

- (b) telah dikenakan ke atas pengarah itu apa-apa bentuk sekatan atau pengawasan melalui bon atau selainnya, di bawah mana-mana undang-undang yang berhubungan dengan pencegahan jenayah, atau tahanan pencegahan bagi pencegahan jenayah atau pengedaran dadah, atau kediaman terhad, atau buang negeri atau imigresen;
- (c) dia menjadi seorang bankrap, menggantung pembayaran atau mencapai penyelesaian dengan pemiutangnya;
- (d) dia telah dipertuduh atas suatu kesalahan jenayah di bawah mana-mana undang-undang yang boleh dihukum pemenjaraan, sama ada hukuman pemenjaraan sahaja, atau sebagai ganti, atau sebagai tambahan kepada, suatu denda, dalam mana-mana mahkamah di dalam atau di luar Malaysia;
- (e) dia bersalah kerana salah laku yang serius berhubungan dengan kewajipannya di bawah Akta ini; atau
- (f) dia tidak menghadiri, kecuali atas sebab cuti yang dibenarkan oleh Menteri dalam hal Pengerusi atau oleh Pengerusi dalam hal mana-mana pengarah lain, dua mesyuarat Lembaga dalam mana-mana tempoh dua belas bulan.

(3) Walau apa pun subseksyen (2), mana-mana pengarah yang dilantik oleh Menteri di bawah subseksyen 11(2) boleh pada bila-bila masa meletakkan jawatan dengan memberikan notis bertulis tidak kurang daripada tiga puluh hari kepada Menteri.

Tindakan dan prosiding Lembaga tidak terjejas oleh kekosongan, dsb.

15. Lembaga boleh bertindak walau pun terdapat apa-apa kekosongan dan prosidingnya tidak boleh menjadi tidak sah oleh—

- (a) ketidakhadiran mana-mana pengarah;
- (b) apa-apa kecacatan yang kemudiannya diketahui dalam pelantikan atau kelayakan mana-mana pengarah atau keanggotaan Lembaga;
- (c) apa-apa peninggalan, kecacatan atau ketidakteraturan dalam pengadaan atau perjalanan sesuatu mesyuarat; atau
- (d) kehadiran atau penyertaan seseorang yang bukan seorang pengarah Lembaga.

Saraan dan elaun bagi pengarah

16. Tiap-tiap pengarah hendaklah dibayar oleh Perbadanan apa-apa fi, elaun dan apa-apa saraan lain sebagaimana yang ditentukan oleh Menteri, atas syor Lembaga.

Tugas pengarah

17. (1) Seorang pengarah Lembaga hendaklah, pada setiap masa, bertindak dengan jujur dan demi kepentingan Perbadanan dan menggunakan usaha yang munasabah dalam menunaikan tugas jawatannya.

(2) Seorang pengarah atau mana-mana orang yang pernah menjadi seorang pengarah tidak boleh—

- (a) menggunakan secara tidak wajar apa-apa maklumat yang diperolehi oleh sebab kedudukannya sebagai seorang pengarah untuk mendapat, secara langsung atau tidak langsung, suatu faedah bagi dirinya atau bagi mana-mana orang lain; atau
- (b) melakukan, mengatakan atau menyiarkan apa-apa yang boleh memudaratkan kepentingan Perbadanan.

Mesyuarat

18. (1) Lembaga hendaklah bermesyuarat sekerap yang dikehendaki tetapi tidak kurang daripada empat kali setahun.

(2) Pengerusi hendaklah mempengerusikan semua mesyuarat Lembaga dan semasa ketiadaannya, pengarah yang hadir hendaklah memilih seorang pengerusi daripada kalangan pengarah dalam perenggan 11(2)(e) dan orang yang dipilih itu hendaklah mempengerusikan mesyuarat itu dan mempunyai segala kuasa Pengerusi.

(3) Kuorum bagi mesyuarat Lembaga hendaklah tidak boleh kurang daripada empat orang pengarah, sekurang-kurangnya dua daripadanya hendaklah terdiri daripada pengarah yang disebut dalam perenggan 11(2)(b), (c) atau (d).

(4) Keputusan Lembaga hendaklah diambil secara majoriti biasa bagi undian pengarah yang hadir dan mengundi.

(5) Dalam hal bilangan undi yang sama banyak, Pengerusi hendaklah mempunyai undi pemutus.

(6) Suatu ketetapan secara bertulis, yang ditandatangani oleh semua pengarah yang pada masa itu berhak untuk menerima notis mengenai suatu mesyuarat pengarah, adalah sah dan berkesan seolah-olah ia telah diluluskan pada suatu mesyuarat pengarah yang sewajarnya diadakan dan dijalankan dan apa-apa ketetapan sedemikian boleh terdiri daripada beberapa dokumen dalam bentuk yang serupa, setiap satunya ditandatangani oleh seorang pengarah atau lebih.

(7) Tiada apa jua dalam seksyen ini boleh menghalang Pengerusi daripada membenarkan seorang pengarah untuk menggunakan video secara langsung, rangkaian televisyen atau kemudahan perhubungan atau multimedia lain yang sesuai untuk mengambil bahagian dalam mana-mana mesyuarat Lembaga jika, sebelum mesyuarat itu, pengarah itu, melalui pemberitahuan kepada Pengerusi, telah memohon kebenaran itu.

Bab 3

Ketua Pegawai Eksekutif

Pelantikan, fungsi dan kebertanggungjawaban

19. (1) Ketua Pegawai Eksekutif hendaklah dilantik oleh Menteri, atas syor Lembaga.

(2) Ketua Pegawai Eksekutif hendaklah bertanggungjawab bagi pentadbiran urusan dan hal ehwal harian Perbadanan.

(3) Ketua Pegawai Eksekutif hendaklah bertanggungjawab menjawab dan bertanggungjawab menerangkan kepada Lembaga bagi penjalan kuasanya dan pelaksanaan tugasnya.

(4) Semasa ketiadaan atau ketidakupayaan Ketua Pegawai Eksekutif, Lembaga boleh membenarkan seorang pegawai Perbadanan untuk melaksanakan tugas, fungsi dan tanggungjawab Ketua Pegawai Eksekutif.

Terma dan syarat perkhidmatan

20. Ketua Pegawai Eksekutif hendaklah—

- (a) bagi maksud Bab 4, disifatkan sebagai seorang pegawai atau pekerja Perbadanan dan tertakluk kepada terma dan syarat perkhidmatan; dan
- (b) menikmati apa-apa pampasan, faedah dan saraan lain sebagaimana yang diluluskan oleh Menteri, atas syor Lembaga.

*Bab 4**Pegawai dan pekerja***Pelantikan, terma dan syarat perkhidmatan**

21. (1) Perbadanan boleh melantik mana-mana pegawai dan pekerja sebagaimana yang perlu untuk menjalankan urusan dan hal ehwal Perbadanan dan pegawai atau pekerja itu hendaklah memegang jawatan bagi apa-apa tempoh, menerima apa-apa pampasan dan apa-apa saraan lain, dan hendaklah tertakluk kepada apa-apa terma dan syarat perkhidmatan sebagaimana yang diputuskan oleh Lembaga.

(2) Seorang pegawai atau pekerja Perbadanan hendaklah, pada setiap masa, bertindak dengan suci hati dan mematuhi apa-apa kehendak, piawai, kewajipan dan tatakelakuan termasuk surcaj sebagaimana yang diperuntukkan dalam undang-undang kecil yang dibuat oleh Lembaga di bawah perenggan 12(1)(a).

(3) Perbadanan boleh, dengan kelulusan Lembaga, menubuhkan dan menyenggara suatu dana pencen atau simpanan bagi pegawai dan pekerjanya daripada wang Perbadanan.

Bantuan kewangan kepada pegawai, pekerja dan orang lain

22. Perbadanan boleh mengadakan—

- (a) subsidi, pemberian, kemudahan pembiayaan Islam atau kemudahan kredit konvensional, dengan atau tanpa pulangan atau bunga, untuk memperoleh perumahan atau kenderaan atau bagi maksud perubatan atau bagi pembiayaan atau pinjaman belas kasihan, kepada pegawai dan pekerjanya;

- (b) kemudahan pembiayaan Islam atau kemudahan kredit konvensional, dengan atau tanpa pulangan atau bunga, bagi maksud pendidikan atau biasiswa kepada pegawai dan pekerjaanya atau mana-mana orang lain; dan
- (c) derma kepada mana-mana orang,

atas apa-apa terma dan syarat sebagaimana yang ditentukan oleh Lembaga.

Bab 5

Kewajipan dan kuasa

Sekatan menyiasat secara khusus mengenai hal ehwal pelanggan tertentu

23. Tanpa menjejaskan kuasa penelitian, pemeriksaan, penyiasatan, siasatan atau resolusi yang diberikan kepada Perbadanan, tiada apa-apa jua dalam Akta ini boleh—

- (a) membenarkan Menteri untuk mengarahkan Perbadanan; atau
- (b) membenarkan Perbadanan,

untuk menyiasat secara khusus mengenai hal ehwal mana-mana pelanggan suatu institusi anggota.

Kerahsiaan

24. (1) Seseorang pengarah, pegawai, pekerja atau ejen Perbadanan termasuk seseorang yang dilantik di bawah subseksyen 25(3) atau mana-mana orang yang kerana apa-apa jua sebab mempunyai dengan apa-apa cara akses kepada apa-apa rekod, buku, daftar, surat-menyurat atau apa-apa jua dokumen lain, bahan atau maklumat yang berhubungan dengan urusan dan hal ehwal—

- (a) Perbadanan;
- (b) Bank Negara Malaysia;
- (c) suatu institusi anggota;
- (d) seorang pelanggan Bank Negara Malaysia; atau
- (e) seorang pelanggan suatu institusi anggota,

yang telah diperolehnya semasa melaksanakan kewajipannya atau menjalankan fungsinya, tidak boleh—

- (A) memberikan, memberitahu, menunjukkan, menyiarkan, atau selainnya menzahirkan, kepada mana-mana orang, rekod, buku, daftar, surat menyurat atau apa-apa jua dokumen yang lain, bahan atau maklumat; atau
- (B) menggunakan rekod, buku, daftar, surat menyurat atau apa-apa jua dokumen yang lain, bahan atau maklumat,

melainkan jika pendedahan atau penggunaan itu, mengikut mana-mana yang berkenaan, dikehendaki—

- (C) di bawah mana-mana undang-undang;
- (D) bagi pelaksanaan kewajipannya atau penjalanan fungsinya di bawah Akta ini; atau
- (E) mengikut undang-undang oleh mana-mana mahkamah.

(2) Tiada seorang pun yang menerima atau memperoleh rekod, buku, daftar, surat menyurat atau apa-apa jua dokumen lain, bahan atau maklumat yang dizahirkan mengikut subseksyen (1) boleh menzahirkan atau menggunakannya kecuali bagi maksud khusus yang kerananya rekod, buku, daftar, surat menyurat atau apa-apa jua dokumen lain, bahan atau maklumat itu telah dizahirkan kepada orang itu.

(3) Seksyen ini tidak terpakai bagi apa-apa rekod, buku, daftar, surat menyurat atau apa-apa jua dokumen lain, bahan atau maklumat yang pada masa penzahiran adalah, ataupun telah dijadikan, tersedia ada mengikut undang-undang bagi orang awam daripada apa-apa sumber.

(4) Tiada seorang pun yang mempunyai apa-apa rekod, buku, daftar, surat menyurat atau apa-apa jua dokumen lain, bahan atau maklumat yang pada pengetahuannya telah dizahirkan dengan melanggar subseksyen (1) boleh dengan apa jua cara sekalipun menzahirkan yang sama kepada mana-mana orang lain.

(5) Jika Perbadanan dalam penjalanan mana-mana kuasanya, atau penunaian mana-mana kewajipannya atau fungsinya, di bawah Akta ini atau di bawah mana-mana jua undang-undang lain, mengesyaki mana-mana orang telah melakukan mana-mana kesalahan di bawah Akta ini, atau mana-mana jua undang-undang lain, maka adalah sah di sisi undang-undang bagi Perbadanan untuk memberikan maklumat mengenai pelakuan itu kepada seorang pegawai polis,

atau menyampaikan apa-apa maklumat berhubungan dengan kesalahan itu kepada mana-mana institusi anggota atau orang lain yang terjejas oleh kesalahan itu atau kepada mana-mana pihak berkuasa lain atau orang yang mempunyai kuasa untuk menyiasat di bawah atau menguatkuasakan peruntukan undang-undang yang di bawahnya kesalahan itu disyaki oleh Perbadanan telah dilakukan.

(6) Subseksyen (5) hendaklah berkuat kuasa dan berkesan sepenuhnya, walau apa pun apa-apa ketidakselarasan berkenaan dengannya atau yang bertentangan dengannya, dalam Akta ini atau mana-mana undang-undang lain.

(7) Mana-mana orang yang melanggar subseksyen (1), (2) atau (4) melakukan suatu kesalahan dan boleh, apabila disabitkan, didenda tidak melebihi tiga juta ringgit atau dipenjarakan selama tempoh tidak melebihi tiga tahun atau kedua-duanya.

Kuasa Perbadanan

25. (1) Perbadanan hendaklah mempunyai segala kuasa sebagaimana yang perlu untuk atau berkaitan dengan, atau semunasabahnya bersampingan dengan, pencapaian matlamatnya, pelaksanaan fungsinya atau penunaian kewajipannya.

(2) Tanpa menjejaskan keluasan subseksyen (1), bagi maksud Akta ini, Perbadanan boleh melakukan segala perkara yang perlu bagi atau bersampingan dengan matlamat Perbadanan dan, khususnya, Perbadanan boleh—

- (a) bagi maksud mengurangkan atau mengelakkan risiko kepada sistem kewangan atau ancaman kerugian kepada Perbadanan—
 - (i) memperoleh aset daripada institusi anggota;
 - (ii) membuat pinjaman atau pendahuluan dengan atau tanpa cagaran, atau menjamin dengan atau tanpa cagaran apa-apa pinjaman atau pendahuluan yang diadakan, kepada suatu institusi anggota;
 - (iii) memperoleh, dengan cara cagaran atau selainnya, syer atau surat cara modal suatu institusi anggota dan memegang, melupuskan atau selainnya berurusan dengan syer atau surat cara modal itu;

- (iv) membuat deposit dengan anggota penerima deposit;
 - (v) menjamin semua atau sebahagian liabiliti anggota penerima deposit berkenaan dengan suatu deposit; atau
 - (vi) menjamin atau mengambil alih semua atau sebahagian liabiliti anggota penanggung insurans berkenaan dengan suatu manfaat takaful atau insurans;
- (b) memegang, melupuskan atau selainnya berurusan dengan aset yang diperoleh daripada institusi anggota;
 - (c) meminjam atau selainnya mendapatkan dana mengikut apa-apa cara yang difikirkan patut oleh Perbadanan;
 - (d) memperoleh dan memegang apa-apa harta alih atau harta tak alih bagi kegunaannya sendiri dan melupuskan atau selainnya berurusan dengan harta sedemikian;
 - (e) menjamin, menanggung rugi, atau menjadi bertanggung bagi pembayaran wang atau pelaksanaan apa-apa obligasi;
 - (f) menggadai janji, menggadaikan atau mewujudkan suatu lien atau memindahkan atau selainnya berurusan dengan mana-mana asetnya untuk menjamin pelaksanaan apa-apa obligasinya atau obligasi mana-mana orang lain;
 - (g) membuat apa-apa perjanjian dengan mana-mana orang untuk mencapai objektifnya atau berhubungan dengan pelaksanaan fungsinya, termasuk suatu perjanjian perikatan strategik dengan Bank Negara Malaysia;
 - (h) menyelesaikan atau mengkompromi apa-apa tuntutan oleh atau terhadap Perbadanan; dan
 - (i) melakukan segala perkara lain yang perlu untuk atau bersampingan dengan penjalanan apa-apa kuasa atau pelaksanaan apa-apa obligasi Perbadanan.

(3) Perbadanan boleh, sama ada secara am atau dalam mana-mana hal tertentu, melantik mana-mana orang yang bukan seorang pengarah, pegawai atau pekerja Perbadanan, untuk memberikan apa-apa bantuan sebagaimana yang ditentukan olehnya dalam penjalanan kuasanya, pelaksanaan fungsinya atau penunaian kewajipannya, di bawah Akta ini, atau untuk menjalankan, melaksanakan atau menunaikan kuasa, fungsi atau kewajipan itu bagi pihak dan atas nama Perbadanan sebagaimana yang boleh ditentukan oleh Perbadanan.

Pinjaman bagi maksud tertentu

26. Perbadanan boleh membuat pinjaman, sama ada dengan atau tanpa cagaran, kepada suatu perbadanan selain institusi anggota—

- (a) bagi maksud, atau berkaitan dengan, pelaksanaan satu tindakan resolusi atau lebih di bawah Akta ini; dan
- (b) bagi maksud mengurangkan atau mengelakkan risiko kepada sistem kewangan atau ancaman kerugian kepada Perbadanan.

Penetapan institusi anggota tambahan

27. (1) Bagi maksud menggalakkan atau mengekalkan kestabilan sistem kewangan atau keyakinan orang awam dalam kestabilan itu dan atas syor Perbadanan dan Bank Negara Malaysia, Menteri boleh melalui perintah yang disiarkan dalam *Warta*, menetapkan mana-mana institusi kewangan pembangunan atau perbadanan lain yang dikawal selia dan diselia oleh Bank Negara Malaysia, selain institusi kewangan yang ditakrifkan dalam seksyen 2, menjadi suatu institusi anggota bagi maksud Akta ini.

(2) Perintah yang disebut dalam subseksyen (1) boleh memperuntukkan bahawa apa-apa peruntukan Akta ini tidaklah terpakai berkenaan dengan perbadanan yang ditetapkan itu, atau hendaklah terpakai dengan pengubahsuaian berkenaan dengan perbadanan yang ditetapkan itu.

Bab 6

Kewangan

Kumpulan wang dan sumber kumpulan wang

28. (1) Bagi maksud Akta ini, Perbadanan hendaklah menyenggara dan mentadbirkan enam kumpulan wang yang berasingan yang berikut—

- (a) suatu kumpulan wang insurans deposit Islam yang hendaklah terdiri daripada—
 - (i) segala premium yang diterima oleh Perbadanan di bawah Akta ini; dan

- (ii) segala wang atau aset lain yang boleh dalam apa-apa cara menjadi kena dibayar dengan sah kepada, diterima oleh atau terletak hak pada Perbadanan berhubung dengan mana-mana perkara yang bersampingan dengan kuasa, kewajipan dan fungsinya,

berkenaan dengan deposit Islam;

- (b) suatu kumpulan wang insurans deposit konvensional yang hendaklah terdiri daripada—

- (i) segala premium yang diterima oleh Perbadanan di bawah Akta ini; dan
- (ii) segala wang atau aset lain yang boleh dalam apa-apa cara menjadi kena dibayar dengan sah kepada, diterima oleh atau terletak hak pada Perbadanan berhubung dengan mana-mana perkara yang bersampingan dengan kuasa, kewajipan dan fungsinya,

berkenaan dengan deposit konvensional;

- (c) suatu kumpulan wang perlindungan takaful perpaduan keluarga yang hendaklah terdiri daripada—

- (i) segala premium yang diterima oleh Perbadanan di bawah Akta ini; dan
- (ii) segala wang atau aset lain yang boleh dalam apa-apa cara menjadi kena dibayar dengan sah kepada, diterima oleh atau terletak hak pada Perbadanan berhubung dengan mana-mana perkara yang bersampingan dengan kuasa, kewajipan dan fungsinya,

berkenaan dengan sijil takaful perpaduan keluarga;

- (d) suatu kumpulan wang perlindungan takaful am yang hendaklah terdiri daripada—

- (i) segala premium yang diterima oleh Perbadanan di bawah Akta ini; dan
- (ii) segala wang atau aset lain yang boleh dalam apa-apa cara menjadi kena dibayar dengan sah kepada, diterima oleh atau terletak hak pada Perbadanan berhubung dengan mana-mana perkara yang bersampingan dengan kuasa, kewajipan dan fungsinya,

berkenaan dengan sijil takaful am;

(e) suatu kumpulan wang perlindungan insurans hayat yang hendaklah terdiri daripada—

(i) segala premium yang diterima oleh Perbadanan di bawah Akta ini; dan

(ii) segala wang atau aset lain yang boleh dalam apa-apa cara menjadi kena dibayar dengan sah kepada, diterima oleh atau terletak hak pada Perbadanan berhubungan dengan mana-mana perkara yang bersampingan dengan kuasa, kewajipan dan fungsinya,

berkenaan dengan polisi hayat; dan

(f) suatu kumpulan wang perlindungan insurans am yang hendaklah terdiri daripada—

(i) segala premium yang diterima oleh Perbadanan di bawah Akta ini; dan

(ii) segala wang atau aset lain yang boleh dalam apa-apa cara menjadi kena dibayar dengan sah kepada, diterima oleh atau terletak hak pada Perbadanan berhubungan dengan mana-mana perkara yang bersampingan dengan kuasa, kewajipan dan fungsinya,

berkenaan dengan polisi am.

(2) Perbadanan diberi kuasa untuk mengkredit segala pendapatan pengendalian langsung kepada, dan mempertanggungkan segala perbelanjaan, kos dan kerugian terhadap kumpulan wang atau kumpulan-kumpulan wang tertentu yang berkaitan, dan jika perbelanjaan, kos atau kerugian itu tidak dapat dihubungkan secara khusus dengan kumpulan wang atau kumpulan-kumpulan wang tertentu, caj itu—

(a) hendaklah diagihkan antara kumpulan wang itu mengikut suatu formula yang ditetapkan oleh Perbadanan; atau

(b) jika Perbadanan tidak menetapkan suatu formula, hendaklah diagihkan antara kumpulan wang itu mengikut perkadaran amaun premium Islam dan konvensional yang dipungut dalam tahun taksiran sebelum tahun yang kredit atau tanggungan itu dibuat.

Peminjaman wang atau peruntukan dana kepada Perbadanan

29. (1) Tanpa menjejaskan seksyen 156, Menteri boleh, atas permintaan Perbadanan, meminjamkan wang atau memperuntukkan dana kepada Perbadanan atas apa-apa terma dan syarat sebagaimana yang ditentukan oleh Menteri.

(2) Apa-apa peminjaman wang atau peruntukan dana menurut subseksyen (1) hendaklah dibuat daripada Kumpulan Wang Disatukan dan jika peminjaman atau peruntukan dana sedemikian dibuat, Menteri hendaklah menyebabkan suatu penyata mengenai peminjaman atau peruntukan dana itu dibentangkan di hadapan Dewan Rakyat pada peluang yang sewal mungkin.

Pelaburan dibenarkan

30. (1) Perbadanan boleh melabur dalam yang berikut:

- (a) sekuriti denominasi ringgit yang dikeluarkan atau dijamin oleh Kerajaan atau Bank Negara Malaysia atau daripada gred pelaburan tinggi sebagaimana yang dinilai oleh suatu agensi penilaian yang bereputasi baik;
- (b) deposit dengan Bank Negara Malaysia atau mana-mana institusi kewangan; atau
- (c) apa-apa pelaburan lain yang diluluskan oleh Menteri, atas syor Lembaga.

(2) Perbadanan boleh, semata-mata bagi maksud melindungi apa-apa pendedahan yang berbangkit daripada perenggan (1)(a), (b) atau (c), membuat transaksi kewangan, sama ada diniagakan di bursa atau di kaunter termasuk kontrak swap, niaga hadapan, opsyen dan hadapan.

(3) Apa-apa pelaburan yang dibuat oleh Perbadanan di bawah subseksyen (1) daripada kumpulan wang insurans deposit Islam, kumpulan wang perlindungan takaful perpaduan keluarga atau kumpulan wang perlindungan takaful am hendaklah mengikut Shariah.

Tahun kewangan

31. Melainkan jika diarahkan selainnya oleh Menteri, tahun kewangan Perbadanan hendaklah bermula pada hari pertama Januari dan berakhir pada hari ke tiga puluh satu Disember pada setiap tahun.

Kehendak menyimpan buku, rekod, akaun atau dokumen lain

32. Perbadanan hendaklah menyebabkan buku, rekod, akaun atau dokumen lain disimpan dan hendaklah, secepat yang dapat dilaksanakan selepas berakhirnya setiap tahun kewangan, menyebabkan disediakan bagi tahun kewangan itu penyata kewangan yang sesuai mengikut Akta Badan Berkanun (Akaun dan Laporan Tahunan) 1980 [*Akta 240*].

Juruaudit

33. Akaun Perbadanan hendaklah diaudit oleh Ketua Audit Negara.

Penyata kewangan dan laporan tahunan

34. Perbadanan hendaklah, dalam tempoh tiga bulan dari penutupan tahun kewangannya, menghantar suatu salinan akaun tahunan yang diperakui oleh Ketua Audit Negara dan suatu laporan tahunan mengenai perjalanan kerja Perbadanan sepanjang tahun itu kepada Menteri, yang hendaklah, secepat yang mungkin, menyebabkan ia dibentangkan di hadapan Dewan Negara dan Dewan Rakyat.

Penyata kewangan tidak disatukan

35. Walau apa pun seksyen 32 dan mana-mana undang-undang yang lain, Perbadanan tidak perlu menyediakan, menunjukkan atau menyiarkan penyata kewangan yang disatukan dan Perbadanan, suatu institusi perantaraan dan mana-mana subsidiari Perbadanan yang lain sebagaimana yang ditentukan oleh Perbadanan boleh menyediakan, mengemukakan dan menyiarkan penyata kewangan yang berasingan.

BAHAGIAN III

KEANGGOTAAN, PEMBATALAN DAN PENAMATAN

Keanggotaan disifatkan

36. (1) Suatu institusi kewangan—

(a) yang disifatkan sebagai suatu institusi anggota di bawah seksyen 37 Akta yang dimansuhkan, hendaklah berterusan kekal sebagai suatu institusi anggota di bawah Akta ini; atau

(b) yang dilesenkan di bawah Akta Bank dan Institusi Kewangan 1989 atau Akta Bank Islam 1983 selepas mula berkuatkuasanya Akta ini, disifatkan sebagai suatu institusi anggota dari tarikh ia diberi lesen.

(2) Suatu pengendali takaful atau syarikat insurans disifatkan sebagai suatu institusi anggota—

(a) dari tarikh berkuatkuasanya Akta ini; atau

(b) jika ia mula wujud selepas tarikh berkuatkuasanya Akta ini, dari tarikh ia didaftarkan di bawah Akta Takaful 1984 atau diberi lesen di bawah Akta Insurans 1996.

(3) Mana-mana perbadanan yang ditetapkan sebagai suatu institusi anggota oleh suatu perintah yang disebut dalam subseksyen 27(1) disifatkan sebagai suatu institusi anggota dari tarikh kuat kuasa perintah itu.

(4) Walau apa pun subseksyen 120(1), seksyen ini tidak terpakai bagi suatu institusi perantaraan.

Terma dan syarat keanggotaan

37. (1) Terma dan syarat keanggotaan suatu institusi anggota hendaklah ditetapkan melalui peraturan-peraturan yang dibuat di bawah seksyen 209.

(2) Suatu institusi anggota hendaklah mematuhi terma dan syarat sebagaimana yang ditetapkan menurut subseksyen (1).

(3) Mana-mana orang yang melanggar subseksyen (2) melakukan suatu kesalahan dan boleh, apabila disabitkan, didenda tidak melebihi lima juta ringgit atau dipenjarakan selama tempoh tidak melebihi lima tahun atau kedua-duanya dan boleh, sebagai tambahan, dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan.

Pembatalan keanggotaan

38. Perbadanan hendaklah membatalkan keanggotaan suatu institusi anggota yang merupakan suatu institusi kewangan dengan memaklumkan institusi anggota itu secara bertulis jika lesen atau pendaftaran institusi anggota itu telah diserahkan balik atau dibatalkan di bawah Akta Bank dan Institusi Kewangan 1989, Akta Bank Islam 1983, Akta Takaful 1984 atau Akta Insurans 1996.

Penamatan keanggotaan

39. (1) Lembaga boleh, pada bila-bila masa selepas Perbadanan menerima suatu pemberitahuan di bawah seksyen 98 dan sama ada Perbadanan telah menjalankan mana-mana kuasanya di bawah seksyen 99 atau tidak, mengadakan suatu mesyuarat untuk memutuskan sama ada keanggotaan institusi anggota itu patut ditamatkan.

(2) Jika Lembaga bercadang untuk menamatkan keanggotaan institusi anggota itu, Perbadanan hendaklah memberikan notis bertulis mengenai cadangannya kepada institusi anggota itu dan hendaklah memberi institusi anggota itu suatu peluang untuk membuat representasi dalam tempoh lima hari dari tarikh notis itu berkenaan dengan cadangan itu.

(3) Jika representasi telah diterima oleh Perbadanan daripada institusi anggota itu, Lembaga hendaklah menimbang representasi itu dan hendaklah membuat keputusan untuk mengesahkan atau tidak mengesahkan cadangan untuk menamatkan keanggotaan institusi anggota itu.

(4) Jika Lembaga telah mengesahkan cadangannya untuk menamatkan keanggotaan institusi anggota itu, Lembaga hendaklah memaklumkan Menteri mengenai keputusannya secara bertulis.

(5) Jika Menteri tidak bersetuju dengan keputusan Lembaga, Menteri hendaklah dalam tempoh lima belas hari dari tarikh penerimaan notis itu memaklumkan kepada Lembaga mengenai keputusannya secara bertulis berhubung dengan keputusan Lembaga itu, dan arahan itu hendaklah mengikat Lembaga.

(6) Jika Menteri tidak memaklumkan Lembaga mengenai keputusannya dalam tempoh yang dinyatakan di bawah subseksyen (5), Menteri hendaklah disifatkan sebagai telah meluluskan cadangan Lembaga untuk menamatkan keanggotaan itu dan Perbadanan hendaklah—

- (a) dengan serta merta memaklumkan Bank Negara Malaysia sewajarnya; dan
- (b) mengeluarkan suatu notis bertulis mengenai penamatan keanggotaan kepada institusi anggota itu dan keanggotaannya hendaklah ditamatkan apabila habis tempoh yang dinyatakan dalam notis itu.

(7) Jika, pada bila-bila masa selepas suatu notis penamatan telah diberikan kepada suatu institusi anggota di bawah subseksyen (6), Perbadanan berpuas hati bahawa sebagai akibat daripada apa-apa tindakan oleh institusi anggota itu, atau mana-mana orang lain, risiko kepada pendeposit atau benefisiari takaful atau orang diinsuranskan atau Perbadanan telah dielakkan atau dikurangkan secara substansial, Perbadanan boleh membatalkan notis penamatannya itu dan memaklumkan Menteri sewajarnya.

(8) Apa-apa keputusan Perbadanan untuk menamatkan suatu keanggotaan atau membatalkan penamatan itu adalah muktamad dan mengikat.

Kesan pembatalan atau penamatan

40. (1) Jika keanggotaan suatu institusi anggota telah dibatalkan di bawah seksyen 38 atau ditamatkan di bawah seksyen 39—

- (a) bekas institusi anggota itu tidak boleh memakai atau menggunakan perkataan “insurans deposit” atau “perlindungan manfaat takaful” atau “pampasan manfaat takaful” atau “perlindungan manfaat insurans” atau

“pampasan manfaat insurans”, atau apa-apa terbitan daripada atau variasi perkataan itu dalam apa-apa bahasa atau apa-apa perkataan lain dalam apa-apa bahasa yang boleh ditafsirkan sebagai bererti atau membayangkan bahawa institusi itu ialah suatu institusi anggota;

- (b) dalam hal bekas anggota penerima deposit, deposit yang belum dijelaskan pada tarikh kuat kuasa pembatalan atau penamatan keanggotaan itu, ditolak apa-apa pengeluaran daripada deposit itu, akan terus diinsuranskan selama tempoh dua tahun dari tarikh kuat kuasa pembatalan atau penamatan itu atau sehingga dikeluarkan kesemuanya, mengikut mana-mana yang lebih awal;
- (c) dalam hal bekas anggota penanggung insurans, manfaat dilindungi yang belum dijelaskan pada tarikh pembatalan atau penamatan keanggotaan itu berkuat kuasa, ditolak apa-apa bayaran yang dibuat disebabkan oleh manfaat itu, akan terus dilindungi selepas tarikh kuat kuasa pembatalan atau penamatan itu;
- (d) bekas institusi anggota itu tidak boleh dianggap sebagai suatu institusi anggota hanya kerana liabilitinya berkenaan dengan deposit atau manfaat takaful atau insurans terus diinsuranskan atau dilindungi di bawah Akta ini walaupun keanggotaannya telah dibatalkan atau ditamatkan; dan
- (e) bekas institusi anggota itu tidak boleh dilepaskan daripada obligasi atau liabilitinya kepada Perbadanan yang telah terakru sebelum pembatalan atau penamatan keanggotaannya itu.

(2) Jika keanggotaan bekas anggota penerima deposit telah ditamatkan di bawah seksyen 39, institusi itu tidak boleh, mulai tarikh kuat kuasa penamatan itu, meminta atau menerima apa-apa lagi deposit.

(3) Jika keanggotaan bekas anggota penanggung insurans telah ditamatkan di bawah seksyen 39, institusi itu tidak boleh, mulai tarikh kuat kuasa penamatan itu, menawarkan atau mengeluarkan apa-apa lagi sijil takaful atau polisi insurans atau memperbaharui apa-apa sijil takaful atau polisi insurans.

(4) Bagi maksud perenggan (1)(b) atau (c), suatu pembatalan atau penamatan keanggotaan tidak boleh menjejaskan obligasi, hak dan keupayaan Perbadanan untuk membuat suatu bayaran di bawah Bab 3 Bahagian IV atau Bab 3 Bahagian V.

(5) Jika keanggotaan suatu institusi anggota telah dibatalkan atau ditamatkan—

- (a) dalam hal bekas anggota penerima deposit, institusi itu hendaklah memberi notis mengenai insurans berterusan yang diperuntukkan dalam perenggan (1)(b);
- (b) dalam hal bekas anggota penanggung insurans, institusi itu hendaklah memberikan notis mengenai perlindungan berterusan yang diperuntukkan dalam perenggan (1)(c); dan
- (c) Perbadanan boleh memberikan notis mengenai pembatalan atau penamatan keanggotaan bekas institusi anggota jika pada pendapat Perbadanan, kepentingan awam menghendaki supaya notis itu diberikan,

melalui penyiaran dalam sekurang-kurangnya dua akhbar harian yang disiarkan di Malaysia, salah satu daripadanya hendaklah dalam bahasa kebangsaan.

(6) Jika suatu bekas anggota penerima deposit berkewajipan untuk membayar balik kepada seseorang apa-apa wang yang telah diterima atau dipegang olehnya semasa ia masih suatu institusi anggota, wang itu tidak boleh menjadi suatu deposit atau sebahagian daripada suatu deposit bagi maksud insurans deposit dengan Perbadanan jika tarikh yang orang yang memperoleh kepentingannya dalam wang itu ialah suatu tarikh selepas tarikh pembatalan atau penamatan keanggotaan bekas institusi anggota itu berkuat kuasa sebagaimana yang ditentukan oleh Perbadanan.

(7) Jika bekas anggota penanggung insurans bertanggung kepada mana-mana orang bagi suatu manfaat takaful atau insurans dan liabiliti itu ditanggung semasa ia masih suatu institusi anggota, manfaat takaful atau insurans itu tidak boleh menjadi suatu manfaat dilindungi jika tarikh yang orang yang memperoleh kepentingannya dalam manfaat itu ialah suatu tarikh selepas tarikh pembatalan atau penamatan keanggotaan bekas institusi anggota itu berkuat kuasa sebagaimana yang ditentukan oleh Perbadanan.

(8) Mana-mana bekas institusi anggota yang melanggar perenggan (1)(a) atau perenggan (5)(a) atau (b) melakukan suatu kesalahan dan boleh, apabila disabitkan, didenda tidak melebihi lima juta ringgit dan boleh, sebagai tambahan, dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan.

BAHAGIAN IV

INSURANS DEPOSIT

Bab 1

Skop perlindungan

Takrif

41. Bagi maksud Bahagian ini—

(a) “deposit” ertinya baki belum dibayar daripada agregat deposit sebagaimana yang ditakrifkan dalam subseksyen 2(1) yang diterima atau dipegang oleh anggota penerima deposit daripada atau bagi pihak seseorang dalam perjalanan biasa perniagaan pengambilan deposit anggota penerima deposit itu dan termasuklah—

(i) suatu draf bank, cek atau surat cara atau arahan lain yang seumpamanya yang telah dimasukkan ke dalam sistem pembayaran yang ditetapkan di bawah subseksyen 6(1) Akta Sistem Pembayaran 2003 [*Akta 627*] walau apa pun apa-apa kelengahan atau kegagalan oleh anggota penerima deposit itu untuk mengkreditkan akaun itu;

(ii) deposit mata wang asing; atau

(iii) apa-apa liabiliti atau surat cara kewangan sebagaimana yang ditentukan oleh Perbadanan,

tetapi tidak termasuk, melainkan jika ditentukan sebaliknya oleh Perbadanan di bawah subperenggan (iii)—

(A) suatu deposit yang tidak kena dibayar di Malaysia;

(B) suatu deposit pasaran wang;

- (C) suatu deposit surat cara boleh niaga dan apa-apa deposit pembawa yang lain;
 - (D) suatu perjanjian beli balik; dan
 - (E) apa-apa liabiliti atau surat cara kewangan yang lain sebagaimana yang ditentukan oleh Perbadanan; dan
- (b) “akaun amanah” termasuklah wang yang dipegang dalam akaun bagi maksud suatu amanah.

Skop perlindungan bagi deposit

42. (1) Perbadanan hendaklah secara berasingan menginsuranskan kategori deposit yang berikut yang diletakkan dengan institusi anggota:

- (a) deposit Islam; dan
- (b) deposit konvensional.

(2) Bagi maksud subseksyen (1)—

- (a) jika seorang pendeposit memiliki hanya satu deposit dengan suatu anggota penerima deposit, deposit itu hendaklah diinsuranskan—
 - (i) berkenaan dengan wang pokok dan pulangan bagi deposit Islam, setakat amaun yang ditetapkan oleh Menteri atas syor Perbadanan; dan
 - (ii) berkenaan dengan wang pokok dan bunga bagi deposit konvensional, setakat amaun yang ditetapkan oleh Menteri atas syor Perbadanan; dan
- (b) jika seorang pendeposit memiliki lebih daripada satu deposit dengan suatu anggota penerima deposit, agregat deposit itu hendaklah diinsuranskan—
 - (i) berkenaan dengan wang pokok dan pulangan bagi deposit Islam, setakat apa-apa amaun yang ditetapkan oleh Menteri atas syor Perbadanan; dan
 - (ii) berkenaan dengan wang pokok dan bunga bagi deposit konvensional, setakat amaun yang ditetapkan oleh Menteri atas syor Perbadanan.

(3) Bagi megelakkan keraguan, suatu amaun yang ditetapkan di bawah subseksyen (2) boleh berhubungan dengan apa-apa jenis atau perihal deposit dan had yang berbeza boleh terpakai bagi jenis atau perihal deposit yang berbeza.

(4) Tertakluk kepada peraturan-peraturan yang dibuat di bawah seksyen 209—

(a) jika anggota penerima deposit berkewajipan untuk membayar balik wang kepada seorang pendeposit yang bertindak sebagai seorang pemegang amanah untuk seorang yang lain atau sebagai pemunya bersama dengan seorang yang lain, dan peramanahan atau pemunyaan bersama itu telah didedahkan dalam rekod anggota penerima deposit itu—

(i) deposit pendeposit itu sebagai pemegang amanah atau sebagai seorang pemunya bersama, hendaklah disifatkan sebagai suatu deposit yang berasingan daripada mana-mana deposit pendeposit itu yang bertindak bagi pihak dirinya sendiri atau bertindak bagi amanah yang lain atau keupayaan bersama dengan anggota penerima deposit itu;

(ii) jika seorang pemegang amanah bertindak bagi dua benefisiari atau lebih, deposit yang dipegang olehnya sebagai amanah bagi setiap benefisiari, hendaklah setiap satu disifatkan sebagai suatu deposit yang berasingan; dan

(iii) deposit yang dipegang sebagai amanah oleh seorang pemegang amanah bagi seorang benefisiari dalam anggota penerima deposit hendaklah disifatkan sebagai suatu deposit yang berasingan daripada suatu deposit benefisiari itu dengan anggota penerima deposit itu bagi pihak dirinya sendiri dan hendaklah juga disifatkan sebagai berasingan daripada mana-mana deposit yang dipegang sebagai amanah oleh pemegang amanah yang lain untuk benefisiari itu dalam anggota penerima deposit itu;

(b) bagi mengelakkan keraguan, jika seorang pendeposit ialah pemunya bersama bagi suatu deposit dalam suatu anggota penerima deposit dengan seorang yang lain, kesemua deposit pendeposit itu dengan orang itu hendaklah diagregatkan dan disifatkan sebagai satu deposit dan hendaklah diinsuranskan setakat amaun yang ditetapkan di bawah subseksyen (2); dan

(c) bagi maksud perenggan (4)(a) dan (b)—

- (i) anggota penerima deposit itu hendaklah menyatakan dalam rekodnya—
 - (A) bagi suatu akaun amanah, bahawa akaun itu dipegang oleh pemegang amanah bagi benefisiari yang dinamakan; atau
 - (B) bagi suatu akaun bersama, nama tiap-tiap pemegang akaun bersama;
- (ii) pemegang amanah hendaklah—
 - (A) menyenggara rekod terperinci sebagaimana yang ditetapkan oleh Perbadanan mengenai akaun amanah;
 - (B) mengemukakan kepada anggota penerima deposit itu apa-apa rekod yang dikehendaki oleh Perbadanan di bawah Akta ini; dan
 - (C) memfailkan suatu akuan berkanun yang memperakui ketepatan rekod yang dikemukakan di bawah subsubperenggan (B) apabila dikehendaki oleh Perbadanan; dan
- (iii) pemegang amanah dalam menyenggara dan mengemukakan mana-mana rekod mengenai akaun amanah yang dikehendaki di bawah subperenggan (ii) hendaklah memastikan bahawa maklumat yang diberikan itu adalah benar, betul dan lengkap dan tidak mengandungi maklumat yang palsu atau mengelirukan dan anggota penerima deposit itu hendaklah bergantung pada apa-apa rekod itu bagi maksud subperenggan (i) dan pemegang amanah hendaklah menanggung rugi anggota penerima deposit itu sekiranya berlaku apa-apa prosiding undang-undang yang berhubungan dengan rekod itu.

(5) Walau apa pun apa-apa dalam perenggan (4)(a), Perbadanan tidak boleh menginsuranskan secara berasingan deposit yang dipegang sebagai amanah bagi mana-mana benefisiari sekiranya, pada pendapat Perbadanan, amanah itu wujud terutamanya bagi maksud mendapatkan atau menaikkan insurans deposit.

(6) Bagi maksud subperenggan (4)(a)(i), mana-mana deposit yang dipegang sebagai amanah oleh seorang pemegang amanah yang sama untuk benefisiari yang sama hendaklah diagregatkan dan disifatkan sebagai satu deposit.

(7) Tertakluk kepada peraturan-peraturan yang dibuat di bawah seksyen 209 dan penzahiran yang dibuat oleh pemegang amanah di bawah subperenggan (4)(c)(ii), jika seorang pendeposit—

- (a) mengendalikan suatu perniagaan sebagai tuan punya tunggal atau seorang rakan kongsi suatu perkongsian; atau
- (b) menjalankan mana-mana amalan profesional,

yang telah dizahirkan sedemikian dalam rekod anggota penerima deposit, suatu deposit perniagaan atau amalan profesional itu hendaklah disifatkan sebagai berasingan daripada deposit pendeposit bagi pihak dirinya sendiri atau sebagai pemegang amanah atau pemunya bersama.

(8) Perbadanan boleh menghendaki pendeposit untuk mengemukakan kepada Perbadanan apa-apa maklumat sebagaimana yang difikirkan suai manfaat atau perlu bagi maksud membuat apa-apa bayaran di bawah Akta ini.

Pemindahan deposit di antara anggota penerima deposit

43. (1) Jika liabiliti deposit anggota penerima deposit (dalam seksyen ini disebut sebagai “anggota pemindah”) dipindahkan kepada dan diambil alih oleh anggota penerima deposit yang lain, deposit itu, ditolak apa-apa pengeluaran daripada deposit itu, disifatkan sebagai dan akan terus diinsuranskan secara berasingan oleh Perbadanan setakat apa-apa amaun yang ditetapkan di bawah subseksyen 42(2) selama tempoh dua tahun, atau sehingga deposit itu matang atau dikeluarkan kesemuanya, mengikut mana-mana yang lebih awal, selepas tarikh pemindahan dan pengambilalihan.

(2) Jika terdapat pemindahan liabiliti deposit di bawah subseksyen (1)—

- (a) anggota pemindah itu hendaklah memberikan notis mengenai pemindahan liabiliti deposit dan insurans yang berasingan yang berterusan yang disebut dalam subseksyen (1); dan

- (b) Perbadanan boleh memberikan notis mengenai perkara yang disebut dalam perenggan (a) jika pada pendapat Perbadanan, kepentingan awam menghendaki supaya notis itu diberikan,

melalui penyiaran dalam sekurang-kurangnya dua akhbar harian yang disiarkan di Malaysia, salah satu daripadanya hendaklah dalam bahasa kebangsaan.

(3) Anggota pemindah hendaklah menanggung rugi Perbadanan sekiranya apa-apa bayaran dibuat oleh Perbadanan kepada pendeposit disebabkan oleh insurans berasingan yang disebut dalam subseksyen (1).

(4) Jika keanggotaan anggota pemindah dibatalkan atau ditamatkan selepas tarikh liabiliti deposit dipindahkan kepada dan diambil alih oleh anggota penerima deposit yang mengambil alihnya, insurans berasingan yang disebut dalam subseksyen (1) hendaklah terpakai sebagai ganti insurans berterusan yang disebut dalam perenggan 40(1)(b).

(5) Anggota penerima deposit hendaklah menyenggara apa-apa rekod yang dikehendaki oleh Perbadanan bagi maksud subseksyen (1).

(6) Anggota penerima deposit yang melanggar perenggan (2)(a) melakukan suatu kesalahan dan boleh, apabila disabitkan, didenda tidak melebihi lima juta ringgit dan boleh, sebagai tambahan, dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan.

Deposit anggota penerima deposit diperoleh oleh bukan anggota penerima deposit

44. (1) Jika liabiliti deposit anggota penerima deposit (dalam seksyen ini disebut sebagai “anggota pemindah”) dipindahkan kepada dan diambil alih oleh seseorang yang bukan anggota penerima deposit, deposit itu disifatkan sebagai dan akan terus diinsuranskan oleh Perbadanan setakat apa-apa amaun yang ditetapkan di bawah subseksyen 42(2), bagi baki tahun taksiran itu, atau sehingga deposit itu matang atau dikeluarkan kesemuanya, mengikut mana-mana yang lebih awal, selepas tarikh pemindahan dan pengambilalihan.

(2) Bagi maksud subseksyen (1), dan mengikut mana-mana kaedah yang dibuat oleh Perbadanan—

(a) berhubung dengan pendeposit, anggota pemindah hendaklah—

(i) mendapatkan kebenaran bertulis sekurang-kurangnya tujuh puluh lima peratus daripada semua pendeposit untuk memindahkan liabiliti deposit;

(ii) mendapatkan perakuan bertulis daripada setiap pendeposit bahawa pendeposit sedar bahawa deposit yang dipindahkan kepada dan diambil alih oleh orang yang mengambil alihnya akan diinsuranskan bagi baki tahun taksiran itu, atau sehingga deposit itu matang atau dikeluarkan kesemuanya, mengikut mana-mana yang lebih awal, dan selepas itu, liabiliti deposit itu tidaklah lagi diinsuranskan keseluruhannya atau sebahagiannya oleh Perbadanan;

(iii) apabila dikehendaki secara bertulis, membayar kepada seorang pendeposit, amaun pokok deposit itu dan pulangan atau bunga, dikira sehingga tarikh pengeluaran dan tiada caj atau penalti boleh dikenakan berkenaan dengan pembayaran itu; dan

(iv) menyediakan suatu pernyataan bahawa obligasi anggota pemindah untuk membayar balik deposit akan diambil alih oleh orang yang mengambil alih deposit itu; dan

(b) orang yang mengambil alih deposit itu hendaklah membuat suatu perjanjian secara bertulis untuk mengambil alih liabiliti deposit anggota pemindah atas terma dan syarat yang sama.

(3) Bagi maksud perenggan (2)(b), anggota pemindah hendaklah menanggung rugi Perbadanan sekiranya berlaku apa-apa bayaran yang dibuat oleh Perbadanan kepada pendeposit disebabkan oleh insurans berterusan yang disebut dalam subseksyen (1).

(4) Orang yang mengambil alih deposit itu hendaklah menyenggara apa-apa rekod yang dikehendaki oleh Perbadanan bagi maksud subseksyen (1).

Deposit disifatkan

45. Jika anggota penerima deposit mengambil alih liabiliti deposit daripada anggota penerima deposit yang lain di bawah seksyen 43, deposit itu bagi maksud seksyen 47 dan 48, disifatkan telah diletakkan dengan anggota penerima deposit yang mengambil alihnya pada hari ia diambil alih.

Bukan sebahagian deposit

46. Jika wang yang atau telah diterima oleh anggota penerima deposit yang baginya anggota penerima deposit itu telah mengeluarkan atau berkewajipan untuk mengeluarkan suatu surat cara yang membuktikan suatu deposit, selain suatu draf bank, cek diperakui, cek kembara, surat kredit bayar dahulu atau perintah kiriman wang—

- (a) wang itu tidak menjadi suatu deposit melainkan jika surat cara dan rekod anggota penerima deposit itu menyatakan orang yang berhak, pada tarikh pengeluaran surat cara itu, kepada pembayaran balik wang yang dibuktikan itu;
- (b) orang yang disebut dalam perenggan (a) hendaklah disifatkan sebagai pendeposit berkenaan dengan wang itu melainkan jika butiran suatu pindah milik surat cara itu dicatatkan dalam rekod anggota penerima deposit itu, dalam hal sedemikian penerima pindah milik terkini yang ditunjukkan dalam rekod itu hendaklah disifatkan sebagai pendeposit; dan
- (c) catatan suatu pindah milik dalam rekod anggota penerima deposit tidaklah berkesan bagi maksud perenggan (b), jika catatan itu dibuat selepas pembatalan atau penamatan keanggotaan anggota penerima deposit itu.

*Bab 2**Premium***Premium pertama berkenaan dengan anggota penerima deposit**

47. (1) Perbadanan hendaklah mentaksirkan dan memungut premium yang kena dibayar oleh anggota penerima deposit bagi

tahun taksiran yang ia menjadi institusi anggota (dalam seksyen ini disebut sebagai “premium pertama”) seperti yang berikut:

- (a) dua ratus lima puluh ribu ringgit; atau
- (b) suatu kadar yang akan ditetapkan oleh Menteri atas syor Perbadanan,

mengikut mana-mana yang lebih tinggi.

(2) Bagi mengelakkan keraguan, kadar yang berbeza boleh ditetapkan di bawah subseksyen (1) bagi kategori anggota penerima deposit yang berbeza.

(3) Tiada premium pertama dikehendaki untuk dibayar berhubungan dengan liabiliti bagi suatu deposit yang dipindahkan daripada suatu anggota penerima deposit kepada anggota penerima deposit yang lain dalam suatu kumpulan perniagaan yang berkenaan dengannya premium telahpun dibayar bagi tahun taksiran yang anggota penerima deposit yang kedua itu menjadi anggota.

(4) Anggota penerima deposit hendaklah membayar premium pertama kepada Perbadanan dalam tempoh tiga puluh hari dari tarikh ia menjadi anggota atau apa-apa tempoh lain yang ditentukan oleh Perbadanan.

Premium tahunan berkenaan dengan anggota penerima deposit

48. (1) Tiap-tiap anggota penerima deposit hendaklah, bagi setiap tahun taksiran berikutan tahun taksiran yang ia menjadi anggota penerima deposit, membayar premium tahunan pada atau sebelum tarikh kena bayar tahunan yang ditetapkan oleh Perbadanan.

(2) Tertakluk kepada subseksyen (3), kadar atau kadar-kadar premium tahunan adalah sebagaimana yang ditetapkan oleh Menteri atas syor Perbadanan.

(3) Premium tahunan yang kena dibayar oleh anggota penerima deposit bagi suatu tahun taksiran tidak boleh lebih rendah daripada apa-apa amaun atau amaun-amaun minimum sebagaimana yang ditetapkan oleh Menteri atas syor Perbadanan.

(4) Bagi mengelakkan keraguan, kadar yang ditetapkan di bawah subseksyen (2) dan amaun minimum yang ditetapkan di bawah subseksyen (3) boleh berhubung dengan kategori yang dalamnya anggota penerima deposit dikelaskan di bawah peraturan-peraturan premium dan kadar-kadar dan amaun-amaun minimum yang berbeza boleh terpakai bagi kategori yang berbeza.

(5) Mana-mana anggota penerima deposit yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi tiga juta ringgit dan boleh, sebagai tambahan, dikenakan denda harian tidak melebihi tiga puluh ribu ringgit bagi tiap-tiap hari kesalahan itu berterusan selepas sabitan.

Pengiraan premium tahunan berkenaan dengan anggota penerima deposit

49. (1) Premium tahunan hendaklah dikira seperti yang berikut:

- (a) premium tahunan yang kena dibayar oleh anggota penerima deposit hendaklah berdasarkan jumlah deposit diinsuranskan yang dipegang oleh anggota penerima deposit itu pada 31 Disember tahun taksiran yang sebelumnya;
- (b) premium tahunan deposit Islam dan konvensional hendaklah dikira secara berasingan; dan
- (c) kadar premium yang terpakai bagi setiap anggota penerima deposit hendaklah berdasarkan apa-apa kriteria yang ditetapkan dalam peraturan-peraturan.

(2) Premium yang kena dibayar oleh anggota penerima deposit hendaklah berdasarkan penyata yang diperakui oleh ketua eksekutif anggota penerima deposit itu dan dikemukakan dalam apa-apa bentuk dan tempoh sebagaimana yang dikehendaki oleh Perbadanan.

Tiada tolakan berkenaan dengan anggota penerima deposit

50. Melainkan jika Perbadanan bersetuju selainnya dalam mana-mana hal tertentu, tiada pembayaran premium atau surcaj premium yang terhutang kepada Perbadanan oleh anggota penerima deposit

boleh dilepaskan, dikurangkan atau selainnya diselaraskan oleh sebab apa-apa tuntutan yang anggota penerima deposit itu ada terhadap Perbadanan.

Surcaj premium berkenaan dengan anggota penerima deposit

51. (1) Walau apa pun bayaran premium pertama berkenaan dengan tahun taksiran pertama atau premium tahunan berkenaan dengan mana-mana tahun taksiran tertentu, Perbadanan boleh mentaksirkan dan memungut suatu surcaj premium daripada anggota penerima deposit berkenaan dengan tahun taksiran itu atau mana-mana bahagiannya mengikut seksyen ini.

(2) Surcaj premium yang kena dibayar oleh anggota penerima deposit di bawah subseksyen (1) dalam mana-mana tahun taksiran tertentu tidak boleh melebihi 0.5 peratus setahun daripada premium tahunan yang kena dibayar oleh anggota penerima deposit itu berkenaan dengan tahun taksiran itu atau satu juta ringgit, mana-mana yang lebih tinggi.

(3) Jika, pada pendapat Perbadanan anggota penerima deposit—

- (a) telah tidak atau tidak mematuhi mana-mana peraturan, kaedah, perintah, undang-undang kecil, pemberitahuan, garis panduan, pekeliling atau nota yang berhubungan dengan amalan kewangan dan perniagaan yang wajar yang dikeluarkan oleh Bank Negara Malaysia atau mana-mana aku janji yang diberikan kepada atau perjanjian yang dibuat dengan Bank Negara Malaysia;
- (b) telah tidak atau tidak mematuhi terma dan syarat keanggotaan, mana-mana aku janji yang diberikan kepada atau perjanjian yang dibuat dengan Perbadanan, atau mana-mana peraturan, kaedah, perintah, undang-undang kecil, pemberitahuan, garis panduan, pekeliling atau nota Perbadanan berkenaan dengan insurans deposit;
- (c) telah tidak atau tidak mematuhi permintaan bagi mendapatkan maklumat atau telah menyekat hak untuk mendapat akses kepada maklumat oleh Perbadanan, Bank Negara Malaysia atau mana-mana orang yang bertindak bagi pihak Perbadanan, di bawah Akta ini; atau

- (d) telah tidak atau tidak menyenggara rekod deposit dengan sewajarnya atau membuat salah nyataan, sama ada melalui apa-apa perbuatan atau peninggalan, mengenai apa-apa maklumat, termasuk maklumat tentang liabiliti deposit diinsuranskan yang digunakan sebagai suatu asas bagi apa-apa pentaksiran premium di bawah Bahagian ini,

Perbadanan hendaklah—

- (A) jika ia bercadang untuk mengenakan surcaj premium ke atas anggota penerima deposit itu, berunding dengan Bank Negara Malaysia tentang alasan untuk mengenakan suatu surcaj premium dan amaun surcaj premium itu; dan
- (B) memberi anggota penerima deposit itu suatu peluang untuk membuat representasi kepada Perbadanan tentang apa-apa cadangan surcaj premium dalam tempoh tujuh hari dari tarikh suatu notis bertulis dikeluarkan oleh Perbadanan kepada anggota penerima deposit itu.
- (4) Jika Perbadanan menerima representasi daripada anggota penerima deposit itu dalam tempoh masa yang dinyatakan dalam subperenggan (3)(B), Perbadanan hendaklah menimbang representasi itu dan memutuskan sama ada untuk mengenakan suatu surcaj premium dan jika ya, memutuskan amaun surcaj premium itu.
- (5) Jika Perbadanan memutuskan untuk mengenakan suatu surcaj premium, Perbadanan hendaklah mendapatkan kelulusan bertulis daripada Menteri sebelum mengenakan surcaj premium itu ke atas anggota penerima deposit itu.
- (6) Suatu surcaj premium hendaklah dikenakan oleh Perbadanan melalui notis bertulis kepada anggota penerima deposit itu dan hendaklah kena dibayar kepada Perbadanan dalam tempoh tiga puluh hari dari tarikh notis itu atau apa-apa tempoh lain sebagaimana yang ditentukan oleh Perbadanan.
- (7) Apa-apa pendapat yang dibentuk atau keputusan yang dibuat oleh Perbadanan berkaitan dengan pengenaan atau amaun apa-apa surcaj premium berkenaan dengan mana-mana anggota penerima deposit adalah muktamad dan mengikat.
- (8) Suatu surcaj yang dibayar kepada Perbadanan di bawah seksyen ini hendaklah dibayar kepada dan menjadi sebahagian daripada Kumpulan Wang Disatukan.

Caj lampau tempoh berkenaan dengan anggota penerima deposit

52. Jika mana-mana premium atau surcaj premium yang terhutang dan kena dibayar di bawah seksyen 47, 48 atau 51 belum dibayar oleh anggota penerima deposit pada tarikh kena dibayar, premium yang belum dibayar itu hendaklah, tanpa penyampaian notis lanjutan kepada anggota penerima deposit itu, dinaikkan ke suatu jumlah yang ditetapkan dalam peraturan-peraturan premium yang belum dibayar sedemikian.

Peraturan-peraturan premium berkenaan dengan anggota penerima deposit

53. Perbadanan boleh membuat peraturan-peraturan berkenaan dengan penentuan premium pertama dan premium tahunan termasuk—

- (a) penubuhan suatu sistem pengkelasan anggota penerima deposit dalam kategori berbeza; dan
- (b) kriteria atau faktor yang hendak diambil kira dan tatacara yang hendak diikuti oleh Perbadanan dalam menentukan kategori yang dalamnya anggota penerima deposit itu dikelaskan.

Premium dan surcaj ke atas anggota penerima deposit disifatkan diperoleh

54. Apa-apa premium atau surcaj premium yang kena dibayar di bawah Bahagian ini hendaklah disifatkan sebagai diperoleh sepenuhnya apabila kena dibayar dan tidaklah boleh dibayar balik.

Bab 3

Bayaran

Bayaran berkenaan dengan deposit diinsuranskan

55. (1) Semua bayaran yang dibuat oleh Perbadanan berkenaan dengan—

- (a) deposit Islam dan segala kos yang berhubungan dengannya hendaklah dibuat daripada kumpulan wang insurans deposit Islam; dan

- (b) deposit konvensional dan segala kos yang berhubungan dengannya hendaklah dibuat daripada kumpulan wang insurans deposit konvensional.

(2) Semua sebutan dalam Bab ini mengenai anggota penerima deposit termasuklah, jika berkenaan, bekas anggota penerima deposit yang keanggotaannya telah dibatalkan di bawah seksyen 38 atau ditamatkan di bawah seksyen 39.

Bayaran wajib berkenaan dengan deposit diinsuranskan

56. (1) Perbadanan hendaklah membuat bayaran berkenaan dengan mana-mana deposit yang diinsuranskan oleh Perbadanan jika suatu perintah penggulangan telah dibuat berkenaan dengan—

- (a) anggota penerima deposit yang memegang deposit itu;
- (b) bekas anggota penerima deposit sebagaimana yang disebut dalam perenggan 40(1)(b), jika perintah penggulangan itu dibuat dalam tempoh dua tahun dari tarikh kuat kuasa pembatalan atau penamatan keanggotaannya; atau
- (c) mana-mana orang yang kepadanya liabiliti deposit telah dipindahkan di bawah subseksyen 44(1).

(2) Jika Perbadanan berkewajipan untuk membuat bayaran di bawah subseksyen (1) berkenaan dengan mana-mana deposit, Perbadanan hendaklah dengan seberapa segera yang mungkin dan dalam apa-apa hal tidak lebih daripada tiga bulan dari tarikh perintah penggulangan (dalam seksyen ini disebut sebagai “tempoh statutori”) membuat bayaran kepada orang itu berdasarkan rekod anggota penerima deposit, bekas anggota penerima deposit atau orang yang kepadanya liabiliti deposit telah dipindahkan sebagaimana yang disebut dalam perenggan (1)(c), sebagaimana Perbadanan berpendapat ternyata berhak kepadanya.

(3) Tempoh statutori tidak boleh terpakai jika Perbadanan tidak dapat menentukan orang yang berhak kepada suatu bayaran atau amaun yang hendaklah dibayar berkenaan dengan suatu deposit, disebabkan oleh—

- (a) kuat kuasa undang-undang;
- (b) suatu tindakan di mahkamah mengenai hak ke atas atau amaun deposit;

- (c) suatu perintah mahkamah; atau
- (d) suatu petisyen kebangkrapan atau penggulungan dikemukakan kepada mahkamah terhadap seorang pendeposit.

(4) Apa-apa keputusan yang dibuat oleh Perbadanan berhubung dengan orang yang berhak kepada suatu bayaran atau amaun yang hendaklah dibayar berkenaan dengan suatu deposit adalah muktamad dan mengikat.

Bayaran budi bicara berkenaan dengan deposit diinsuranskan

57. Perbadanan boleh, dengan kebenaran bertulis Menteri terlebih dahulu, membuat bayaran berkenaan dengan mana-mana deposit yang diinsuranskan oleh Perbadanan jika—

- (a) suatu anggota penerima deposit yang memegang deposit itu, bekas anggota penerima deposit yang memegang deposit sebagaimana yang disebut dalam perenggan 40(1) (b) atau seseorang yang kepadanya liabiliti deposit telah dipindahkan di bawah subseksyen 44(1), tidak dapat membuat apa-apa bayaran berkenaan dengan deposit itu, disebabkan oleh—
 - (i) suatu perintah mahkamah;
 - (ii) apa-apa tindakan yang diambil oleh suatu badan kawal selia atau Perbadanan; atau
 - (iii) apa-apa tindakan yang diambil oleh penerima, pengurus atau penerima dan pengurus semasa tempoh anggota penerima deposit itu atau orang yang kepadanya liabiliti deposit telah dipindahkan berada dalam penerimaan;
- (b) suatu petisyen penggulungan telah dikemukakan kepada mahkamah terhadap anggota penerima deposit yang memegang deposit itu atau seseorang yang kepadanya liabiliti deposit telah dipindahkan di bawah subseksyen 44(1); atau
- (c) keanggotaan anggota penerima deposit yang memegang deposit itu dibatalkan atau ditamatkan.

Bayaran pendahuluan berkenaan dengan deposit diinsuranskan

58. Bagi mengelakkan keraguan, Perbadanan boleh menggunakan budi bicaranya berkenaan dengan seksyen 56 atau 57 untuk membuat apa-apa bayaran atau bayaran sebahagian kepada mana-mana pendeposit berkenaan dengan apa-apa deposit yang diinsuranskan oleh Perbadanan, mendahului bayaran kepada mana-mana pendeposit lain.

Tarikh mengira liabiliti

59. (1) Tarikh bagi mengira amaun bayaran wajib oleh Perbadanan hendaklah pada tarikh pemfailan petisyen penggulungan.

(2) Tarikh bagi mengira amaun bayaran budi bicara di bawah seksyen 57 hendaklah pada tarikh mana-mana kejadian yang disebut dalam seksyen 57 itu pertama kali berlaku.

Pengiraan pulangan atau bunga atas deposit bagi bayaran wajib

60. Bagi maksud mengira bayaran wajib oleh Perbadanan berkenaan dengan mana-mana deposit yang diinsuranskan oleh Perbadanan jika suatu perintah penggulungan telah dibuat berkenaan dengan anggota penerima deposit yang memegang deposit itu, wang pokok, termasuk pulangan atau bunga yang terakru berhubung dengan deposit itu hendaklah dimasukkan hanya sehingga tarikh pemfailan petisyen penggulungan itu.

Perbadanan boleh membayar pulangan atau bunga atas bayaran wajib

61. Jika Perbadanan membuat suatu bayaran wajib di bawah seksyen 56, Perbadanan boleh atas budi bicaranya sendiri membayar, sebagai tambahan kepada amaun yang Perbadanan berkewajipan untuk membayar, pulangan atau bunga ke atas amaun itu pada suatu kadar yang ditentukan oleh Perbadanan bagi tempoh yang bermula pada tarikh pemfailan petisyen penggulungan berkenaan dengan anggota penerima deposit yang memegang deposit itu dan

berakhir pada tarikh bayaran dibuat berkenaan dengan deposit itu, tetapi agregat bayaran yang dibuat di bawah seksyen ini dan seksyen 56 berhubung dengan deposit itu hendaklah dalam apa-apa hal tidak melebihi apa-apa amaun sebagaimana yang ditetapkan di bawah subseksyen 42(2).

Pengiraan pulangan atau bunga atas deposit bagi bayaran budi bicara

62. Bagi maksud mengira bayaran oleh Perbadanan berkenaan dengan mana-mana deposit yang diinsuranskan oleh Perbadanan jika Perbadanan membuat suatu bayaran budi bicara—

- (a) tertakluk kepada perenggan (b), pulangan atau bunga yang terakru berhubung dengan deposit itu hendaklah dimasukkan hanya sehingga tarikh bayaran oleh Perbadanan; atau
- (b) jika suatu prosiding bagi penggulangan anggota penerima deposit yang memegang deposit itu telah dimulakan sebelum tarikh bayaran oleh Perbadanan tetapi suatu perintah penggulangan belum lagi dibuat, pulangan atau bunga yang terakru berhubung dengan deposit itu hendaklah dimasukkan hanya sehingga tarikh pemfailan petisyen penggulangan.

Pulangan atau bunga atas deposit berkaitan indeks

63. Apa-apa pulangan atau bunga yang disebut dalam seksyen 60 atau 62 berhubung dengan suatu deposit yang dipegang oleh anggota penerima deposit hendaklah ditentukan mengikut kaedah-kaedah yang ditetapkan oleh Perbadanan jika suatu bayaran yang hendaklah dibuat oleh anggota penerima deposit itu berkenaan dengan deposit itu akan ditentukan, keseluruhannya atau sebahagiannya, dengan merujuk dalam apa-apa cara kepada—

- (a) harga pasaran sesuatu sekuriti, komoditi atau surat cara kewangan;
- (b) kadar pertukaran antara mana-mana dua mata wang;
- (c) suatu kadar rujukan yang ditentukan dengan merujuk kepada mana-mana satu atau lebih harga atau kadar itu;

- (d) suatu kadar rujukan yang ditentukan dengan merujuk kepada mana-mana satu atau lebih kejadian bukan kewangan; atau
- (e) apa-apa jenis indeks boleh ubah atau sumber rujukan yang lain sebagaimana yang ditentukan oleh Perbadanan.

Pelepasan liabiliti, dsb., berkenaan dengan deposit diinsuranskan

64. (1) Bayaran di bawah Bab ini oleh Perbadanan berkenaan dengan mana-mana deposit yang diinsuranskan oleh Perbadanan melepaskan Perbadanan daripada semua liabiliti setakat amaun bayaran yang dibuat berkenaan dengan deposit itu, dan dalam apa-apa hal pun Perbadanan tidak mempunyai apa-apa kewajipan untuk memastikan bahawa bayaran yang dibuat itu digunakan sewajarnya dalam apa-apa cara.

(2) Perbadanan boleh membuat bayaran di bawah seksyen 56, 57, 58 atau 61 mengikut apa-apa cara yang disifatkan sesuai oleh Perbadanan.

(3) Tanpa menjejaskan subseksyen (2), Perbadanan boleh membuat bayaran dengan mengaturkan supaya orang yang dianggap oleh Perbadanan sebagai berhak kepada bayaran itu menerima suatu deposit di anggota penerima deposit sebanyak amaun bayaran itu yang kena dibayar balik apabila dituntut, dengan syarat bahawa deposit itu ialah suatu deposit Islam atau deposit konvensional mengikut sama ada deposit diinsuranskan itu yang berkenaan dengannya bayaran itu dibuat ialah suatu deposit Islam atau deposit konvensional.

Subrogasi berkenaan dengan deposit diinsuranskan

65. Jika Perbadanan membuat suatu bayaran di bawah Bab ini berkenaan dengan mana-mana deposit, Perbadanan adalah disubrogasi, setakat amaun bayaran yang dibuat, terhadap semua hak dan kepentingan pendeposit berhubung dengan deposit itu dan boleh mengambil suatu tindakan berkenaan dengan hak dan kepentingan itu atas nama pendeposit atau atas nama Perbadanan.

Penyerahhakan berkenaan dengan deposit diinsuranskan

66. Jika Perbadanan menyifatkannya sebagai wajar, Perbadanan boleh menahan bayaran berkenaan dengan mana-mana deposit dengan anggota penerima deposit sehingga ia menerima suatu penyerahhakan secara bertulis mengenai semua hak dan kepentingan pendeposit berhubung dengan deposit itu.

Had masa bagi tuntutan berkenaan dengan deposit diinsuranskan

67. Had masa untuk memulakan suatu tindakan terhadap Perbadanan berkenaan dengan kewajipan Perbadanan di bawah subseksyen 56(2) untuk membuat bayaran berhubung dengan suatu deposit adalah sepuluh tahun selepas tarikh pemfailan petisyen penggulungan.

BAHAGIAN V

PERLINDUNGAN MANFAAT TAKAFUL DAN INSURANS

Bab 1

Skop perlindungan

Takrif

68. Bagi maksud Bahagian ini—

- (a) “manfaat takaful” ertinya agregat manfaat takaful yang baginya anggota penanggung insurans bertanggung kepada mana-mana orang dalam perjalanan biasa perniagaan takaful anggota penanggung insurans itu; dan
- (b) “manfaat insurans” ertinya agregat manfaat insurans yang baginya anggota penanggung insurans bertanggung kepada mana-mana orang dalam perjalanan biasa perniagaan insurans anggota penanggung insurans itu.

Skop perlindungan bagi sijil takaful dan polisi insurans

69. (1) Perbadanan hendaklah menyediakan perlindungan secara berasingan berkenaan dengan kehilangan manfaat dilindungi di bawah kategori sijil takaful atau polisi insurans yang berikut:

- (a) takaful perpaduan keluarga;
- (b) takaful am;

(c) insurans hayat; dan

(d) insurans am.

(2) Bagi maksud subseksyen (1), Perbadanan boleh menetapkan yang berikut melalui peraturan-peraturan di bawah seksyen 209:

(a) jenis atau perihalan manfaat takaful dalam kategori yang disebut dalam subseksyen (1) yang adalah manfaat takaful dilindungi, jenis atau perihalan benefisiari takaful dan jenis atau perihalan harta yang dilindungi, atau tidak termasuk, di bawah sistem perlindungan manfaat takaful dan insurans; dan

(b) jenis atau perihalan manfaat insurans dalam kategori yang disebut dalam subseksyen (1) yang adalah manfaat insurans dilindungi, jenis atau perihalan orang diinsuranskan dan jenis atau perihalan harta yang dilindungi, atau tidak termasuk, di bawah sistem perlindungan manfaat takaful dan insurans.

(3) Bagi maksud Bahagian ini—

(a) “risiko” ertinya—

(i) berhubungan dengan suatu sijil takaful perpaduan keluarga, kematian atau keberterusan hidup orang hayat sertaan;

(ii) berhubungan dengan suatu polisi hayat, kematian atau keberterusan hidup orang diinsuranskan hayat;

(iii) berhubungan dengan suatu sijil takaful am, kerugian apabila berlakunya satu kejadian atau lebih yang diperuntukkan di bawah sijil itu; dan

(iv) berhubungan dengan suatu polisi am, kerugian apabila berlakunya satu kejadian atau lebih yang diperuntukkan di bawah polisi itu;

(b) “sijil kumpulan” atau “polisi kumpulan” ertinya sijil takaful atau polisi insurans yang di bawahnya terdapat tiga hayat sertaan atau orang diinsuranskan hayat atau lebih pada masa sijil atau polisi itu dikeluarkan;

(c) “pihak ketiga” ertinya seseorang, yang bukan benefisiari takaful atau orang diinsuranskan, yang terhadap tuntutan seseorang benefisiari takaful atau orang diinsuranskan ditanggung rugi di bawah suatu sijil takaful am atau polisi am;

- (d) “risiko kejadian” ertinya apa-apa kejadian yang berhubungan dengannya suatu sijil takaful atau polisi insurans memperuntukkan suatu manfaat takaful atau insurans.

(4) Bagi maksud subseksyen (1)—

- (a) jika seseorang pemunya sijil berhak ke atas manfaat dilindungi di bawah dua atau takaful perpaduan keluarga dengan anggota penanggung insurans yang sama dengan risiko kejadian yang sama berkenaan dengan orang diinsuranskan hayat sertaan yang sama, agregat manfaat itu hendaklah dilindungi setakat apa-apa amaun yang ditetapkan oleh Menteri atas syor Perbadanan;
- (b) jika seseorang pemunya polisi berhak ke atas manfaat dilindungi di bawah dua polisi hayat atau lebih dengan anggota penanggung insurans yang sama berhubungan dengan risiko kejadian yang sama berkenaan dengan orang diinsuranskan hayat yang sama, agregat manfaat itu hendaklah dilindungi setakat apa-apa amaun yang ditetapkan oleh Menteri atas syor Perbadanan;
- (c) jika seseorang pemunya sijil atau polisi berhak ke atas manfaat dilindungi di bawah dua atau lebih sijil takaful am atau polisi am atau lebih dengan anggota penanggung insurans yang sama, agregat manfaat takaful atau insurans di bawah sijil takaful am atau polisi am itu hendaklah dilindungi—
 - (i) berkenaan dengan manfaat dilindungi di bawah takaful am berhubungan dengan risiko kejadian yang sama berkenaan dengan hayat sertaan atau harta dilindungi yang sama, setakat apa-apa amaun yang ditetapkan oleh Menteri atas syor Perbadanan; dan
 - (ii) berkenaan dengan manfaat dilindungi di bawah polisi am berhubungan dengan risiko kejadian yang sama berkenaan dengan diinsuranskan hayat atau harta diinsuranskan yang sama, setakat apa-apa amaun yang ditetapkan oleh Menteri atas syor Perbadanan;
- (d) jika seseorang pemunya sijil atau polisi ditanggung rugi oleh anggota penanggung insurans yang sama di bawah suatu sijil takaful am atau polisi am terhadap tuntutan dua pihak ketiga atau lebih berkenaan dengan risiko kejadian

yang sama, manfaat takaful atau insurans berkenaan dengan tuntutan setiap pihak ketiga hendaklah dilindungi secara berasingan setakat apa-apa amaun sebagaimana yang ditetapkan oleh Menteri atas syor Perbadanan;

(e) jika—

- (i) seseorang pemunya sijil berhak kepada manfaat dilindungi di bawah suatu sijil takaful perpaduan keluarga kumpulan; atau
- (ii) seseorang pemunya polisi berhak kepada manfaat dilindungi di bawah suatu polisi hayat kumpulan,

manfaat takaful atau insurans berkenaan dengan setiap hayat sertaan atau orang diinsuranskan hayat yang mana kumpulan sijil takaful perpaduan keluarga kumpulan atau polisi hayat kumpulan adalah berhubungan itu hendaklah dilindungi secara berasingan setakat apa-apa amaun yang ditetapkan oleh Menteri atas syor Perbadanan;

(f) jika—

- (i) seseorang pemunya sijil berhak kepada manfaat dilindungi di bawah suatu sijil takaful am kumpulan; atau
- (ii) seseorang pemunya polisi berhak kepada manfaat dilindungi di bawah suatu polisi am kumpulan,

manfaat takaful atau insurans berkenaan dengan setiap hayat sertaan atau orang diinsuranskan hayat yang dengannya sijil takaful am kumpulan atau polisi am kumpulan itu adalah berhubungan hendaklah dilindungi secara berasingan setakat apa-apa amaun yang ditetapkan oleh Menteri atas syor Perbadanan;

(g) jika—

- (i) seseorang pemunya sijil berhak kepada manfaat dilindungi di bawah dua kumpulan sijil takaful perpaduan keluarga kumpulan atau lebih yang dikeluarkan oleh anggota penanggung insurans yang sama berhubungan dengan risiko kejadian yang sama berkenaan dengan hayat sertaan yang sama; atau

- (ii) seseorang pemunya polisi berhak kepada manfaat dilindungi di bawah dua polisi hayat kumpulan atau lebih yang dikeluarkan oleh anggota penanggung insurans yang sama berhubungan dengan risiko kejadian yang sama berkenaan dengan orang diinsuranskan hayat yang sama,

agregat manfaat takaful atau insurans itu berkenaan dengan setiap hayat sertaan atau orang diinsuranskan hayat yang dengannya sijil takaful perpaduan keluarga atau polisi hayat kumpulan itu adalah berhubungan hendaklah dilindungi setakat apa-apa amaun yang ditetapkan oleh Menteri atas syor Perbadanan;

(h) jika—

- (i) seseorang pemunya sijil berhak kepada manfaat dilindungi di bawah dua sijil takaful am kumpulan atau lebih yang dikeluarkan oleh anggota penanggung insurans yang sama berhubungan dengan risiko kejadian yang sama berkenaan dengan hayat sertaan yang sama; atau
- (ii) seseorang pemunya polisi berhak kepada manfaat dilindungi di bawah dua polisi am kumpulan atau lebih yang dikeluarkan oleh anggota penanggung insurans yang sama berhubungan dengan risiko kejadian yang sama berkenaan dengan orang diinsuranskan hayat yang sama,

agregat manfaat takaful atau insurans itu berkenaan dengan setiap hayat sertaan atau orang diinsuranskan hayat yang dengannya sijil takaful am atau polisi am kumpulan itu adalah berhubungan hendaklah dilindungi setakat apa-apa amaun yang ditetapkan oleh Menteri atas syor Perbadanan;

(i) jika—

- (i) seseorang pemunya sijil berhak kepada manfaat dilindungi di bawah suatu sijil takaful perpaduan keluarga dan suatu sijil takaful perpaduan keluarga kumpulan yang dikeluarkan oleh anggota penanggung insurans yang sama berhubungan dengan risiko kejadian yang sama berkenaan dengan orang diinsuranskan hayat sertaan yang sama; atau

- (ii) seseorang pemunya polisi berhak kepada manfaat dilindungi di bawah suatu polisi hayat dan suatu polisi hayat kumpulan yang dikeluarkan oleh anggota penanggung insurans yang sama berhubungan dengan risiko kejadian yang sama berkenaan dengan orang diinsuranskan hayat yang sama,

agregat manfaat takaful atau insurans itu berkenaan dengan setiap hayat sertaan atau orang diinsuranskan hayat yang dengannya sijil takaful perpaduan keluarga dan sijil takaful perpaduan keluarga kumpulan itu atau polisi hayat dan polisi hayat kumpulan itu adalah berhubungan hendaklah dilindungi setakat apa-apa amaun yang ditetapkan oleh Menteri atas syor Perbadanan; dan

(j) jika—

- (i) seseorang pemunya sijil berhak kepada manfaat dilindungi di bawah suatu sijil takaful am dan satu sijil takaful am kumpulan atau lebih yang dikeluarkan oleh anggota penanggung insurans yang sama dan berhubungan dengan risiko kejadian yang sama berkenaan dengan hayat sertaan yang sama; atau
- (ii) seseorang pemunya polisi berhak kepada manfaat dilindungi di bawah suatu polisi am dan satu polisi am kumpulan atau lebih yang dikeluarkan oleh anggota penanggung insurans yang sama dan berhubungan risiko kejadian yang sama berkenaan dengan orang diinsuranskan hayat yang sama,

agregat manfaat takaful atau insurans itu berkenaan dengan setiap hayat sertaan atau orang diinsuranskan hayat yang dengannya sijil takaful am dan sijil takaful am kumpulan itu atau polisi am dan polisi am kumpulan itu adalah berhubungan hendaklah dilindungi setakat apa-apa amaun yang ditetapkan oleh Menteri atas syor Perbadanan.

(5) Dalam hal seseorang pemunya sijil atau polisi yang berhak kepada manfaat dilindungi di bawah hanya satu sijil takaful atau polisi dengan suatu anggota penanggung insurans, manfaat takaful atau insurans itu hendaklah dilindungi setakat amaun berkaitan yang ditetapkan di bawah perenggan (4)(a), (b) atau (c).

(6) Dalam hal seseorang pemunya sijil atau polisi yang berhak kepada manfaat dilindungi di bawah perenggan (4)(a), (b) atau (h) dan menyerahkan sijil takaful perpaduan keluarga atau polisi hayatnya, atau sijil takaful perpaduan keluarga kumpulan atau polisi hayat kumpulannya, agregat nilai serahan berkenaan dengan setiap hayat sertaan atau orang diinsuranskan hayat hendaklah dilindungi setakat apa-apa amaun yang ditetapkan oleh Menteri atas syor Perbadanan.

(7) Bagi mengelakkan keraguan, suatu amaun yang ditetapkan di bawah subseksyen (4) boleh berhubung dengan apa-apa jenis, perihalan atau kategori manfaat dilindungi dan amaun berbeza boleh ditetapkan bagi jenis, perihalan atau kategori manfaat takaful dan insurans dilindungi yang berbeza.

Pemindahan sijil atau polisi antara anggota penanggung insurans

70. (1) Jika liabiliti sijil takaful atau polisi insurans suatu anggota penanggung insurans (dalam seksyen ini disebut “anggota pemindah”) dipindahkan kepada dan diambil alih oleh anggota penanggung insurans lain, manfaat dilindungi itu hendaklah disifatkan sebagai dan akan terus dilindungi secara berasingan oleh Perbadanan sehingga penunaian obligasi anggota pemindah berkenaan dengan manfaat takaful atau insurans itu.

(2) Jika terdapat suatu pemindahan liabiliti sijil takaful atau polisi insurans di bawah subseksyen (1)—

- (a) anggota pemindah itu hendaklah memberikan notis mengenai pemindahan liabiliti sijil takaful atau polisi insurans dan perlindungan berasingan yang berterusan yang disebut dalam subseksyen (1); dan
- (b) Perbadanan boleh memberikan notis mengenai perkara yang disebut dalam perenggan (a) jika pada pendapat Perbadanan, kepentingan awam menghendaki supaya notis itu diberikan,

melalui penyiaran dalam sekurang-kurangnya dua akhbar harian yang disiarkan di Malaysia, salah satu daripadanya hendaklah dalam bahasa kebangsaan.

(3) Anggota penanggung insurans hendaklah menyenggara apa-apa rekod yang dikehendaki oleh Perbadanan bagi maksud subseksyen (1).

(4) Anggota penginsurans yang melanggar perenggan (2)(a) melakukan suatu kesalahan dan boleh, apabila disabitkan, didenda tidak melebihi lima juta ringgit dan boleh, sebagai tambahan, dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan.

Bab 2

Premium

Premium pertama berkenaan dengan anggota penanggung insurans

71. (1) Perbadanan hendaklah mentaksirkan dan memungut premium yang kena dibayar oleh suatu anggota penanggung insurans bagi tahun taksiran yang ia menjadi suatu anggota penanggung insurans (dalam seksyen ini disebut “premium pertama”) seperti yang berikut:

(a) dua ratus lima puluh ribu ringgit; atau

(b) suatu kadar yang ditetapkan oleh Menteri atas syor Perbadanan,

mengikut mana-mana yang lebih tinggi.

(2) Bagi mengelakkan keraguan, kadar yang berbeza boleh ditetapkan di bawah subseksyen (1) bagi kategori anggota penanggung insurans yang berbeza.

(3) Tiada premium pertama dikehendaki dibayar berhubung dengan liabiliti bagi sijil takaful atau polisi insurans yang dipindahkan daripada suatu anggota penanggung insurans kepada anggota penanggung insurans yang lain dalam suatu kumpulan perniagaan yang berkenaan dengannya premium telahpun dibayar bagi tahun taksiran yang anggota penanggung insurans yang kedua tersebut menjadi suatu anggota.

(4) Anggota penanggung insurans hendaklah membayar premium pertama kepada Perbadanan dalam tempoh tiga puluh hari dari tarikh ia menjadi suatu anggota atau apa-apa tempoh lain yang ditentukan oleh Perbadanan.

Premium tahunan berkenaan dengan anggota penanggung insurans

72. (1) Tiap-tiap anggota penanggung insurans hendaklah, bagi setiap tahun taksiran berikutan tahun taksiran yang ia menjadi anggota penginsurans, membayar premium tahunan pada atau sebelum tarikh kena bayar tahunan yang ditetapkan oleh Perbadanan.

(2) Tertakluk kepada subseksyen (3), kadar atau kadar-kadar premium tahunan adalah sebagaimana yang ditetapkan oleh Menteri atas syor Perbadanan.

(3) Premium tahunan yang kena dibayar oleh anggota penanggung insurans tidak boleh lebih rendah daripada apa-apa amaun atau amaun-amaun minimum sebagaimana yang ditetapkan oleh Menteri atas syor Perbadanan.

(4) Bagi mengelakkan keraguan, kadar-kadar yang ditetapkan di bawah subseksyen (2) dan amaun-amaun minimum yang ditetapkan di bawah subseksyen (3) boleh berhubungan dengan kategori yang dalamnya anggota penanggung insurans dikelaskan di bawah peraturan-peraturan premium dan kadar dan amaun minimum yang berbeza boleh terpakai bagi kategori yang berbeza.

(5) Mana-mana anggota penanggung insurans yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi tiga juta ringgit dan boleh, sebagai tambahan, dikenakan denda harian tidak melebihi tiga puluh ribu ringgit bagi tiap-tiap hari kesalahan itu berterusan selepas sabitan.

Pengiraan premium tahunan berkenaan dengan anggota penanggung insurans

73. (1) Premium tahunan hendaklah dikira seperti yang berikut:

(a) kadar premium yang terpakai bagi setiap anggota penanggung insurans hendaklah berdasarkan apa-apa kriteria yang ditetapkan dalam peraturan-peraturan.

(b) berkenaan dengan anggota penanggung insurans yang menjalankan perniagaan takaful perpaduan keluarga atau insurans hayat, premium tahunan yang kena dibayar oleh anggota penanggung insurans itu hendaklah dikira

berdasarkan penilaian aktuari liabiliti takaful perpaduan keluarga atau insurans hayat berkenaan dengan manfaat dilindungi yang berkaitan pada 31 Disember tahun taksiran yang sebelumnya, dikira mengikut apa-apa cara yang ditentukan oleh Perbadanan;

- (c) berkenaan dengan anggota penanggung insurans yang menjalankan perniagaan takaful am atau insurans am, premium tahunan yang kena dibayar oleh anggota penanggung insurans itu hendaklah dikira berdasarkan jumlah premium bersih yang diterimanya berkenaan dengan manfaat dilindungi yang berkaitan dalam tahun taksiran yang sebelumnya, dikira mengikut apa-apa cara yang ditentukan oleh Perbadanan; dan
- (d) premium tahunan berkenaan dengan manfaat dilindungi di bawah takaful perpaduan keluarga, takaful am, polisi hayat dan polisi am hendaklah dikira secara berasingan.

(2) Premium yang kena dibayar oleh suatu anggota penanggung insurans hendaklah berdasarkan kepada penyata yang diperakui oleh ketua eksekutif anggota penanggung insurans itu dan dikemukakan mengikut apa-apa bentuk dan tempoh sebagaimana yang dikehendaki oleh Perbadanan.

Tiada tolakan berkenaan dengan anggota penanggung insurans

74. Melainkan jika Perbadanan bersetuju sebaliknya dalam mana-mana hal tertentu, tiada pembayaran premium atau surcaj premium yang terhutang kepada Perbadanan oleh anggota penanggung insurans boleh dilepaskan, dikurangkan atau selainnya diselaraskan oleh sebab apa-apa tuntutan anggota penanggung insurans terhadap Perbadanan.

Surcaj premium berkenaan dengan anggota penanggung insurans

75. (1) Walau apa pun bayaran premium pertama berkenaan dengan tahun taksiran pertama atau premium tahunan berkenaan dengan mana-mana tahun taksiran tertentu, Perbadanan boleh mentaksirkan dan memungut suatu surcaj premium daripada anggota penanggung insurans berkenaan dengan tahun taksiran itu atau mana-mana bahagiannya mengikut seksyen ini.

(2) Surcaj premium yang kena dibayar oleh anggota penanggung insurans di bawah subseksyen (1) dalam mana-mana tahun taksiran tertentu tidak boleh melebihi 0.5 peratus setahun daripada premium tahunan yang kena dibayar oleh anggota penginsurans itu berkenaan dengan tahun taksiran itu atau satu juta ringgit, mana-mana yang lebih tinggi.

(3) Jika, pada pendapat Perbadanan anggota penanggung insurans—

- (a) telah tidak atau tidak mematuhi mana-mana peraturan-peraturan, kaedah-kaedah, perintah, undang-undang kecil, pemberitahuan, garis panduan, pekeliling atau nota yang berhubungan dengan amalan kewangan dan perniagaan yang wajar yang dikeluarkan oleh Bank Negara Malaysia atau mana-mana aku janji yang diberikan kepada atau perjanjian yang dibuat dengan Bank Negara Malaysia;
- (b) telah tidak atau tidak mematuhi terma dan syarat keanggotaan, mana-mana aku janji yang diberikan kepada atau perjanjian yang dibuat dengan Perbadanan, atau mana-mana peraturan-peraturan, kaedah-kaedah, perintah, undang-undang kecil, pemberitahuan, garis panduan, pekeliling atau nota Perbadanan berkenaan dengan perlindungan manfaat takaful dan insurans;
- (c) telah tidak atau tidak mematuhi permintaan bagi mendapatkan maklumat atau telah menyekat hak untuk mendapat akses kepada maklumat oleh Perbadanan, Bank Negara Malaysia atau mana-mana orang yang bertindak bagi pihak Perbadanan, di bawah Akta ini; atau
- (d) telah tidak atau tidak menyenggara rekod manfaat takaful atau insurans dengan sewajarnya atau membuat salah nyataan, sama ada melalui apa-apa perbuatan atau peninggalan, mengenai apa-apa maklumat, termasuk maklumat tentang liabiliti takaful atau insurans atau premium bersih yang digunakan sebagai suatu asas bagi apa-apa pentaksiran premium di bawah Bahagian ini,

Perbadanan hendaklah—

- (A) jika ia bercadang untuk mengenakan surcaj premium ke atas anggota penanggung insurans itu, berunding dengan Bank Negara Malaysia tentang alasan untuk mengenakan suatu surcaj premium dan amaun surcaj premium itu; dan

(B) memberi anggota penanggung insurans itu suatu peluang untuk membuat representasi kepada Perbadanan tentang apa-apa cadangan surcaj premium dalam tempoh tujuh hari dari tarikh suatu notis bertulis dikeluarkan oleh Perbadanan kepada anggota penanggung insurans itu.

(4) Jika Perbadanan menerima representasi daripada anggota penanggung insurans itu dalam tempoh masa yang dinyatakan dalam subperenggan (3)(B), Perbadanan hendaklah menimbang representasi itu dalam memutuskan sama ada untuk mengenakan suatu surcaj premium dan jika ya, memutuskan amaun surcaj premium itu.

(5) Jika Perbadanan memutuskan untuk mengenakan suatu surcaj premium, Perbadanan hendaklah mendapatkan kelulusan bertulis daripada Menteri sebelum mengenakan surcaj premium itu ke atas anggota penanggung insurans itu.

(6) Suatu surcaj premium hendaklah dikenakan oleh Perbadanan melalui notis bertulis kepada anggota penanggung insurans itu dan hendaklah kena dibayar kepada Perbadanan dalam tempoh tiga puluh hari dari tarikh notis itu atau apa-apa tempoh lain yang ditentukan oleh Perbadanan.

(7) Apa-apa pendapat yang dibentuk atau keputusan yang dibuat oleh Perbadanan berhubung dengan pengenaan atau amaun apa-apa surcaj premium berkenaan dengan mana-mana anggota penanggung insurans adalah muktamad dan mengikat.

(8) Suatu surcaj yang dibayar kepada Perbadanan di bawah seksyen ini hendaklah dibayar kepada dan menjadi sebahagian daripada Kumpulan Wang Disatukan.

Caj lampau tempoh berkenaan dengan anggota penanggung insurans

76. Jika mana-mana premium atau surcaj premium yang tentang dan kena dibayar di bawah seksyen 71, 72 atau 75 belum dibayar oleh anggota penanggung insurans pada tarikh kena dibayar, amaun yang belum dibayar itu hendaklah, tanpa penyampaian notis lanjutan kepada anggota penanggung insurans itu, dinaikkan ke suatu jumlah yang ditetapkan dalam peraturan-peraturan premium yang belum dibayar.

Peraturan-peraturan premium berkenaan dengan anggota penanggung insurans

77. Perbadanan boleh membuat peraturan-peraturan berkenaan dengan penentuan premium pertama dan premium tahunan termasuk—

- (a) penubuhan suatu sistem pengkelasan anggota penanggung insurans dalam kategori berbeza; dan
- (b) kriteria atau faktor yang hendak diambil kira dan tatacara yang hendak diikuti oleh Perbadanan dalam menentukan kategori yang dalamnya anggota penginsurans itu dikelaskan.

Premium dan surcaj atas anggota penanggung insurans disifatkan diperoleh

78. Apa-apa premium atau surcaj premium yang kena dibayar di bawah Bahagian ini hendaklah disifatkan sebagai diperoleh sepenuhnya apabila kena dibayar dan tidaklah boleh dibayar balik.

Bab 3

Bayaran

Bayaran berkenaan dengan manfaat dilindungi

79. (1) Semua bayaran yang dibuat oleh Perbadanan berkenaan dengan—

- (a) manfaat dilindungi di bawah takaful perpaduan keluarga dan segala kos yang berhubungan dengannya hendaklah dibuat daripada kumpulan wang perlindungan takaful perpaduan keluarga;
- (b) manfaat dilindungi di bawah polisi hayat dan segala kos yang berhubung dengannya hendaklah dibuat daripada kumpulan wang perlindungan insurans hayat;
- (c) manfaat dilindungi di bawah takaful am dan segala kos yang berhubung dengannya hendaklah dibuat daripada kumpulan wang perlindungan takaful am; dan
- (d) manfaat dilindungi di bawah polisi am dan segala kos yang berhubung dengannya hendaklah dibuat daripada kumpulan wang perlindungan insurans am.

(2) Semua sebutan dalam Bab ini mengenai anggota penanggung insurans termasuklah, jika berkenaan, suatu bekas anggota penanggung insurans yang keanggotaannya telah dibatalkan di bawah seksyen 38 atau ditamatkan di bawah seksyen 39.

Bayaran wajib berkenaan dengan manfaat dilindungi

80. (1) Tertakluk kepada subseksyen (4), Perbadanan hendaklah membuat bayaran berkenaan dengan suatu manfaat dilindungi jika suatu perintah penggulungan telah dibuat berkenaan dengan—

- (a) anggota penanggung insurans yang telah mengeluarkan sijil takaful atau polisi insurans itu; atau
- (b) suatu anggota penanggung insurans yang kepadanya liabiliti sijil takaful atau polisi insurans itu telah dipindahkan di bawah subseksyen 70(1).

(2) Jika Perbadanan berkewajipan untuk membuat bayaran di bawah subseksyen (1), Perbadanan hendaklah, berdasarkan sijil takaful atau polisi insurans itu dan apa-apa dokumentasi sokongan yang termasuk dalam rekod anggota penanggung insurans itu, membuat bayaran kepada mana-mana orang sebagaimana Perbadanan berpendapat ternyata berhak ke atasnya.

(3) Apa-apa keputusan yang dibuat oleh Perbadanan berhubungan dengan orang yang berhak kepada suatu bayaran atau amaun yang hendaklah dibayar berkenaan dengan suatu manfaat dilindungi adalah muktamad dan mengikat.

(4) Perbadanan tidak berkewajipan untuk membuat bayaran berkenaan dengan suatu manfaat dilindungi jika suatu petisyen penggulungan anggota penanggung insurans dikemukakan oleh Bank Negara Malaysia atau Ketua Pengarah sebagaimana yang ditakrifkan dalam Akta Takaful 1984.

(5) Bagi mengelakkan keraguan, berkenaan dengan suatu sijil takaful perpaduan keluarga atau polisi hayat—

- (a) penilaian rizab aktuari yang disebut dalam perenggan 83(2)(b), 83(3)(b) atau subseksyen 84(3) ialah suatu manfaat dilindungi; dan

- (b) walau apa pun subseksyen 83(2), 83(3) dan 84(3), Perbadanan berkewajipan untuk membuat bayaran berkenaan dengan setiap hayat sertaan atau orang diinsuranskan hayat seperti yang berikut:
- (i) jika terdapat satu sijil atau polisi, rizab penilaian aktuari itu hanya setakat apa-apa amaun yang ditetapkan oleh Menteri atas syor Perbadanan; dan
 - (ii) jika terdapat dua sijil atau polisi atau lebih, agregat penilaian rizab aktuari itu hanya setakat apa-apa amaun yang ditetapkan oleh Menteri atas syor Perbadanan.

Bayaran budi bicara berkenaan dengan manfaat dilindungi

81. Perbadanan boleh, dengan kebenaran bertulis Menteri terlebih dahulu, membuat bayaran berkenaan dengan suatu manfaat dilindungi jika—

- (a) anggota penanggung insurans yang telah mengeluarkan sijil takaful atau polisi insurans itu atau anggota penanggung insurans yang kepadanya liabiliti sijil takaful atau polisi insurans itu telah dipindahkan di bawah subseksyen 70(1), tidak dapat membuat apa-apa bayaran berkenaan dengan manfaat dilindungi itu, disebabkan oleh—
- (i) suatu perintah mahkamah;
 - (ii) apa-apa tindakan yang diambil oleh suatu badan kawal selia atau Perbadanan; atau
 - (iii) apa-apa tindakan yang diambil oleh penerima, pengurus atau penerima dan pengurus dalam tempoh anggota penanggung insurans itu berada dalam penerimaan;
- (b) suatu petisyen penggugulan terhadap anggota penanggung insurans itu telah dikemukakan kepada mahkamah; atau
- (c) keanggotaan anggota penanggung insurans itu dibatalkan atau ditamatkan.

Bayaran pendahuluan berkenaan dengan manfaat dilindungi

82. Bagi mengelakkan keraguan, Perbadanan boleh menggunakan budi bicaranya berkenaan dengan seksyen 80 atau 81 untuk membuat apa-apa bayaran atau bayaran sebahagian kepada mana-mana benefisiari takaful atau orang diinsuranskan berkenaan dengan apa-apa manfaat dilindungi mendahului bayaran kepada mana-mana benefisiari takaful atau orang diinsuranskan yang lain.

Pemberhentian polisi insurans dan sijil takaful dalam penggulungan

83. (1) Suatu sijil takaful am atau takaful perpaduan keluarga atau suatu polisi am atau polisi hayat hendaklah terhenti daripada berkuat kuasa pada tarikh perintah penggulungan.

(2) Jika suatu sijil terhenti daripada berkuat kuasa di bawah subseksyen (1), pemunya sijil adalah layak untuk menuntut sebagai hutang yang kena dibayar kepadanya oleh anggota penanggung insurans disebabkan oleh sijil itu—

(a) berkenaan dengan sijil takaful amnya, suatu jumlah yang bersamaan dengan bahagian prorata sumbangannya yang mengikut kadar tempoh mulai tarikh perintah penggulungan dan berakhir pada tarikh yang sijilnya sepatutnya tamat jika mengikut termannya sendiri; atau

(b) berkenaan dengan sijil takaful perpaduan keluarganya, suatu jumlah yang bersamaan dengan penilaian rizab aktuari pada tarikh perintah penggulungan.

(3) Jika suatu polisi terhenti berkuat kuasa di bawah subseksyen (1), pemunya polisi adalah layak untuk menuntut sebagai hutang yang kena dibayar kepadanya oleh anggota penanggung insurans disebabkan oleh polisi itu—

(a) berkenaan dengan polisi amnya, suatu jumlah yang bersamaan dengan bahagian prorata premiumnya yang mengikut kadar tempoh mulai pada tarikh perintah penggulungan dan berakhir pada tarikh yang polisinya sepatutnya tamat jika mengikut termannya sendiri; atau

- (b) berkenaan dengan polisi hayatnya, suatu jumlah bersamaan dengan penilaian rizab aktuari pada tarikh perintah penggulungan.
- (4) Bagi mengelakkan keraguan—
- (a) subseksyen (1) dan (2) tidak boleh berkuat kuasa untuk meniadakan apa-apa hak seseorang pemunya sijil atau mana-mana benefisiari takaful lain terhadap anggota penanggung insurans itu berkenaan dengan mana-mana risiko kejadian yang telah berlaku sebelum tarikh perintah penggulungan, yang dalam hal ini, pemunya sijil atau benefisiari takaful lain itu adalah layak untuk menuntut sebagai hutang yang kena dibayar kepadanya oleh anggota penanggung insurans itu, amaun yang kena dibayar kepadanya disebabkan oleh risiko kejadian yang telah berlaku itu; dan
- (b) subseksyen (1) dan (3) tidak boleh berkuat kuasa untuk meniadakan apa-apa hak seseorang pemunya polisi atau mana-mana orang diinsuranskan yang lain terhadap anggota penanggung insurans itu berkenaan dengan mana-mana risiko kejadian yang telah berlaku sebelum tarikh perintah penggulungan, yang dalam hal ini, pemunya polisi atau orang diinsuranskan yang lain itu adalah layak untuk menuntut sebagai hutang yang kena dibayar kepadanya oleh anggota penanggung insurans itu, amaun yang kena dibayar kepadanya disebabkan oleh risiko kejadian yang telah berlaku itu.

Penentuan bayaran wajib bagi sijil takaful perpaduan keluarga dan polisi hayat

84. (1) Tertakluk kepada subseksyen (2), jika, dalam tempoh tiga bulan dari tarikh perintah penggulungan, Perbadanan menerima suatu tuntutan daripada seseorang benefisiari takaful atau orang diinsuranskan yang menyatakan bahawa suatu risiko kejadian di bawah takaful perpaduan keluarga atau polisi hayat telah berlaku sebelum tarikh perintah penggulungan yang berkenaan dengannya bayaran belum dibuat oleh atau bagi pihak anggota penanggung insurans, amaun bayaran wajib berkenaan dengan suatu manfaat dilindungi hendaklah dikira berdasarkan kewajipan anggota penanggung insurans itu yang timbul apabila risiko kejadian itu berlaku.

(2) Bayaran wajib itu hendaklah tertakluk kepada—

- (a) penerimaan tuntutan itu oleh Perbadanan dalam tempoh tiga bulan sebagaimana yang dinyatakan dalam subseksyen (1) mengikut apa-apa cara dan dengan apa-apa dokumentasi sokongan sebagaimana yang ditentukan oleh Perbadanan;
- (b) bukti, pada kepuasan munasabah Perbadanan, bahawa risiko kejadian itu berlaku sebelum tarikh perintah penggulangan, jika Perbadanan berpendapat bahawa dokumentasi sokongan yang disebut dalam perenggan (a) tidaklah mencukupi; dan
- (c) kesahan tuntutan itu.

(3) Jika mana-mana syarat yang dinyatakan dalam subseksyen (1) dan (2) tidak dipenuhi, amaun bayaran wajib hendaklah dikira berdasarkan kepada penilaian rizab aktuari berkenaan dengan takaful perpaduan keluarga atau polisi hayat itu pada tarikh perintah penggulangan.

(4) Jika seseorang pemunya sijil atau pemunya polisi menyerahkan sijil takaful perpaduan keluarga atau polisi hayatnya sebelum tarikh perintah penggulangan, amaun bayaran wajib hendaklah dikira berdasarkan nilai serahan sijil takaful perpaduan keluarga or polisi hayat itu pada masa serahan.

(5) Apa-apa keputusan yang dibuat oleh Perbadanan berhubungan dengan orang yang berhak kepada suatu bayaran atau amaun yang hendaklah dibayar berkenaan dengan suatu manfaat dilindungi adalah muktamad dan mengikat.

Penentuan bayaran wajib bagi sijil takaful am dan polisi am

85. (1) Walau apa pun mana-mana peruntukan lain dalam undang-undang atau terma apa-apa sijil takaful atau polisi atau perjanjian lain, jika suatu petisyen penggulangan terhadap anggota penanggung insurans dikemukakan di mahkamah, Perbadanan boleh, dengan notis terdahulu tidak kurang daripada tiga puluh hari mengikut seksyen 86, menamatkan sijil takaful am atau polisi am yang memperuntukkan jenis manfaat takaful atau manfaat insurans yang dilindungi di bawah sistem perlindungan manfaat takaful dan insurans.

(2) Tertakluk kepada subseksyen (3), jika Perbadanan menerima suatu tuntutan daripada seseorang benefisiari takaful atau orang diinsuranskan yang menyatakan bahawa suatu risiko kejadian di bawah takaful am atau polisi am telah berlaku sebelum tarikh sijil takaful atau polisi itu terhenti berkuat kuasa yang berkenaan dengannya bayaran belum dibuat oleh atau bagi pihak anggota penanggung insurans, amapun bayaran wajib berkenaan dengan suatu manfaat dilindungi hendaklah dikira berdasarkan kepada kewajipan anggota penanggung insurans itu yang timbul apabila risiko kejadian itu berlaku.

(3) Bayaran wajib itu hendaklah tertakluk kepada—

(a) penerimaan tuntutan itu oleh Perbadanan dalam apa-apa tempoh, dan mengikut cara dan dengan apa-apa dokumentasi sokongan yang ditentukan oleh Perbadanan;

(b) bukti, pada kepuasan munasabah Perbadanan, bahawa risiko kejadian itu berlaku sebelum tarikh sijil takaful atau polisi itu terhenti berkuat kuasa, jika Perbadanan berpendapat bahawa dokumentasi sokongan yang disebut dalam perenggan (a) tidaklah mencukupi; dan

(c) kesahan tuntutan itu.

(4) Jika mana-mana syarat yang disebut dalam subseksyen (2) dan (3) tidak dipenuhi, amapun bayaran wajib hendaklah berdasarkan amapun yang sepatutnya kena dibayar sebagai hutang yang kena dibayar kepada pemunya sijil atau pemunya polisi pada tarikh sijil takaful atau polisi itu terhenti berkuat kuasa sebagai pembayaran balik bahagian prorata sumbangan atau premiumnya yang mengikut kadar tempoh mulai pada tarikh sijil takaful atau polisi itu terhenti berkuat kuasa dan berakhir pada tarikh sijil takaful atau polisi itu sepatutnya tamat jika mengikut termannya sendiri.

(5) Walau apa pun peruntukan seksyen 80 atau 81, Perbadanan boleh membuat bayaran yang disebut dalam seksyen ini pada bila-bila masa selepas suatu petisyen penggulungan terhadap anggota penanggung insurans itu dikemukakan di mahkamah.

(6) Walau apa pun mana-mana peruntukan yang bertentangan dalam sijil takaful atau polisi atau perjanjian lain, seseorang benefisiari takaful atau orang diinsuranskan disifatkan sebagai berhak di bawah sijil takaful atau polisi itu untuk membuat suatu

tuntutan terhadap anggota penanggung insurans itu berdasarkan kewajipan anggota penanggung insurans itu berkenaan dengan suatu risiko kejadian yang berlaku sebelum tarikh sijil takaful atau polisi itu terhenti berkuat kuasa dalam apa-apa tempoh yang ditentukan oleh Perbadanan.

(7) Apa-apa keputusan yang dibuat oleh Perbadanan berkaitan dengan orang yang berhak kepada suatu bayaran atau amaun yang hendaklah dibayar berkenaan dengan suatu manfaat dilindungi adalah muktamad dan mengikat.

Pemberitahuan oleh Perbadanan

86. (1) Perbadanan hendaklah, dengan secepat yang dapat dilaksanakan, selepas pemfailan suatu petisyen penggulangan terhadap suatu anggota penanggung insurans, memberitahu pemunya sijil atau pemunya polisi perkara yang berikut:

- (a) tarikh yang ditetapkan untuk mendengar petisyen itu;
- (b) tempoh masa untuk memfailkan dengan Perbadanan tuntutan berkenaan dengan manfaat takaful perpaduan keluarga atau polisi hayat dilindungi berdasarkan risiko kejadian yang telah berlaku atau berlaku sebelum tarikh perintah penggulangan;
- (c) tempoh masa untuk memfailkan dengan Perbadanan tuntutan berkenaan dengan manfaat takaful am atau polisi am dilindungi berdasarkan risiko kejadian yang telah berlaku atau berlaku sebelum tarikh sijil takaful atau polisi itu terhenti berkuat kuasa; dan
- (d) apa-apa maklumat berkaitan yang lain yang ditentukan oleh Perbadanan.

(2) Pemberitahuan yang disebut dalam subseksyen (1) hendaklah dibuat melalui pos biasa yang dihantar ke alamat pemunya sijil atau pemunya polisi yang terakhir ditunjukkan dalam rekod anggota penanggung insurans dan melalui iklan dalam sekurang-kurangnya dua akhbar harian yang disiarkan di Malaysia, salah satu daripadanya hendaklah dalam bahasa Kebangsaan.

Pengiraan pulangan atau bunga atas manfaat dilindungi bagi bayaran wajib

87. Bagi maksud mengira bayaran wajib oleh Perbadanan berkenaan dengan apa-apa manfaat dilindungi jika suatu perintah penggulangan telah dibuat berkenaan dengan anggota penanggung

insurans, manfaat dilindungi itu, termasuk pulangan atau bunga yang terakru berhubungan dengan kewajipan di bawah sijil takaful atau polisi insurans hendaklah, walau apa pun mana-mana peruntukan lain dalam undang-undang, dimasukkan hanya sehingga tarikh pemfailan petisyen penggulungan.

Perbadanan boleh membayar pulangan atau bunga atas bayaran wajib berkenaan dengan manfaat dilindungi

88. Jika Perbadanan membuat suatu bayaran wajib di bawah seksyen 80, Perbadanan boleh atas budi bicaranya sendiri membayar, sebagai tambahan kepada amaun yang Perbadanan berkewajipan untuk membayar, pulangan atau bunga ke atas amaun itu pada suatu kadar yang ditentukan oleh Perbadanan bagi tempoh bermula pada tarikh pemfailan petisyen penggulungan anggota penanggung insurans itu dan berakhir pada tarikh bayaran dibuat oleh Perbadanan, tetapi agregat bayaran yang dibuat di bawah seksyen ini dan seksyen 80 berhubungan dengan suatu manfaat dilindungi hendaklah dalam apa-apa hal tidak melebihi apa-apa amaun yang ditetapkan di bawah subseksyen 69(4).

Pengiraan pulangan atau bunga atas manfaat dilindungi bagi bayaran budi bicara

89. Bagi maksud mengira bayaran oleh Perbadanan berkenaan dengan apa-apa manfaat dilindungi jika Perbadanan membuat suatu bayaran budi bicara—

(a) tertakluk kepada perenggan (b), pulangan atau bunga terakru berhubungan dengan manfaat takaful atau insurans itu hendaklah dimasukkan hanya sehingga tarikh bayaran oleh Perbadanan; atau

(b) jika suatu prosiding bagi penggulungan anggota penanggung insurans itu telah dimulakan sebelum tarikh bayaran oleh Perbadanan tetapi suatu perintah penggulungan belum lagi dibuat, pulangan atau bunga yang terakru itu hendaklah dimasukkan hanya sehingga tarikh pemfailan petisyen penggulungan.

Pelepasan liabiliti, dsb., berkenaan dengan manfaat dilindungi

90. (1) Bayaran di bawah Bab ini oleh Perbadanan yang berkenaan dengan apa-apa manfaat dilindungi melepaskan Perbadanan daripada segala liabiliti setakat amaun bayaran yang dibuat berkenaan dengan manfaat dilindungi itu, dan dalam apa-apa hal pun Perbadanan tidak mempunyai apa-apa kewajipan untuk memastikan bayaran yang dibuat itu digunakan sewajarnya dalam apa-apa cara.

(2) Perbadanan boleh membuat bayaran di bawah seksyen 80, 81, 82 atau 88 mengikut apa-apa cara yang disifatkan sesuai oleh Perbadanan.

(3) Tanpa menjejaskan subseksyen (2), Perbadanan boleh membuat bayaran dengan—

- (a) mengaturkan supaya liabiliti bagi manfaat dilindungi dipindahkan kepada dan diambil alih oleh anggota penanggung insurans, dengan syarat bahawa kewajipan itu hendaklah diambil alih oleh pengendali takaful atau syarikat insurans mengikut sama ada manfaat dilindungi itu adalah di bawah suatu sijil takaful atau polisi insurans; atau
- (b) membayar kepada orang yang dianggap oleh Perbadanan sebagai berhak kepada bayaran suatu amaun yang bersamaan dengan penilaian rizab aktuari polisi hayat tetapi dalam apa-apa hal tidak melebihi amaun maksimum perlindungan yang diberikan oleh Perbadanan berkenaan dengan manfaat itu.

Subrogasi berkenaan dengan manfaat dilindungi

91. Jika Perbadanan membuat suatu bayaran di bawah Bab ini berkenaan dengan apa-apa manfaat dilindungi, Perbadanan adalah disubrogasi, setakat amaun bayaran yang dibuat, terhadap semua hak dan kepentingan benefisiari takaful atau orang diinsuranskan berhubung dengan manfaat dilindungi itu dan boleh mengambil suatu tindakan berkenaan dengan hak dan kepentingan itu atas nama benefisiari takaful atau orang diinsuranskan itu atau atas nama Perbadanan.

Penyerahhakan berkenaan dengan manfaat dilindungi

92. Jika Perbadanan menyifatkannya sebagai wajar, Perbadanan boleh menahan bayaran berkenaan dengan apa-apa manfaat dilindungi sehingga ia telah menerima suatu penyerahhakan secara bertulis terhadap semua hak dan kepentingan benefisiari takaful atau orang diinsuranskan berhubung dengan manfaat dilindungi itu.

Had masa bagi tuntutan berkenaan dengan manfaat dilindungi

93. Had masa untuk memulakan suatu tindakan terhadap Perbadanan berkenaan dengan kewajipan Perbadanan di bawah subseksyen 80(2) untuk membuat bayaran berhubung dengan suatu sijil takaful atau polisi insurans deposit adalah sepuluh tahun selepas tarikh pemfailan petisyen penggulangan.

Aktuari bebas

94. (1) Jika, bagi maksud mana-mana peruntukan Bab ini, Perbadanan menyifatkannya sebagai wajar penilaian rizab aktuari bagi suatu manfaat takaful atau insurans ditentukan, Perbadanan boleh melantik seorang aktuari bebas (dalam seksyen ini disebut sebagai seorang “aktuari bebas”) untuk menentukannya.

(2) Seseorang tidak layak dilantik sebagai aktuari bebas melainkan jika dia mempunyai kelayakan sebagaimana yang dinyatakan dalam perenggan 83(2)(a) dan (b) Akta Insurans 1996 atau kelayakan yang ditentukan oleh Bank Negara Malaysia.

(3) Mana-mana pegawai, juruaudit, penerima, pengurus, penerima dan pengurus, pelikuidasi atau ejen masa sekarang atau dahulu bagi pengendali takaful atau syarikat insurans yang berkenaan atau mana-mana orang lain hendaklah memberi seorang aktuari bebas apa-apa dokumen, bahan, maklumat atau penjelasan sebagaimana yang aktuari bebas berpendapat patut dipertimbangkan dalam menentukan penilaian rizab aktuari bagi suatu manfaat takaful atau insurans.

(4) Penilaian rizab aktuari bagi suatu manfaat takaful atau insurans sebagaimana yang ditentukan oleh seorang aktuari bebas adalah muktamad dan mengikat.

(5) Kos aktuari bebas, termasuk saraannya sebagaimana yang diluluskan oleh Perbadanan, hendaklah ditanggung oleh anggota penanggung insurans dan sekiranya berlaku apa-apa keingkaran pembayaran oleh anggota penanggung insurans itu, hendaklah kena dibayar dengan keutamaan yang sama dan daripada sumber yang sama dengan kos, caj dan perbelanjaan yang disebut dalam perenggan 140(1)(a) dan (3)(a).

BAHAGIAN VI

PEMERIKSAAN INSTITUSI ANGGOTA

Bank Negara Malaysia hendaklah menyediakan maklumat

95. Bank Negara Malaysia hendaklah, dalam masa yang sesuai, menyediakan kepada Perbadanan—

- (a) laporan bertulis selepas pemeriksaan yang dijalankan di bawah seksyen 69 Akta Bank dan Institusi Kewangan 1989, seksyen 31 Akta Bank Islam 1983, seksyen 99 Akta Insurans 1996 atau seksyen 33 Akta Takaful 1984 atau mana-mana undang-undang lain yang berkaitan yang kepadanya sesuatu institusi anggota adalah tertakluk;
- (b) suatu perkadaran atau melalui apa-apa cara lain, suatu penilaian mengenai keselamatan dan kekukuhan institusi anggota, termasuk keadaan kewangannya;
- (c) apa-apa maklumat yang difikirkan berkaitan oleh Bank Negara Malaysia mengenai apa-apa perkara yang disebut dalam perenggan (a) atau (b); atau
- (d) apa-apa maklumat yang sampai ke perhatian Bank Negara Malaysia mengenai apa-apa perubahan dalam hal keadaan institusi anggota yang boleh memberi kesan secara material terhadap kedudukan Perbadanan.

Pemeriksaan

96. (1) Bagi maksud Akta ini, Perbadanan atau Bank Negara Malaysia, atas permintaan Perbadanan, boleh memeriksa operasi sesuatu institusi anggota.

(2) Skop pemeriksaan di bawah subseksyen (1) boleh termasuk pemeriksaan mengenai—

- (a) sama ada rekod yang wajar dan mencukupi mengenai liabiliti deposit atau manfaat takaful atau insuransnya disenggarakan oleh institusi anggota;
- (b) sama ada laporan yang dibuat oleh institusi anggota mengenai premium atau liabiliti takaful atau insuransnya adalah betul secara substansial;
- (c) pematuhan terhadap terma dan syarat atau apa-apa kehendak lain mengenai keanggotaan; atau
- (d) apa-apa hal lain yang difikirkan sesuai oleh Perbadanan, selepas berunding dengan Bank Negara Malaysia.

(3) Perbadanan boleh menugaskan orang lain untuk menjalankan apa-apa pemeriksaan di bawah subseksyen (2) atau subseksyen 97(1).

(4) Suatu salinan laporan mengenai apa-apa pemeriksaan di bawah subseksyen (1) atau yang ditugaskan di bawah subseksyen (3) hendaklah disediakan oleh Perbadanan untuk Bank Negara Malaysia dalam tempoh tiga bulan selepas siapnya laporan itu.

(5) Perbadanan boleh mendapatkan apa-apa kos dan perbelanjaan yang dilakukan di bawah seksyen ini daripada institusi anggota sebagai suatu hutang yang perlu dan kena dibayar kepada Perbadanan.

Pemeriksaan khas

97. (1) Jika Perbadanan mempunyai sebab untuk mempercayai bahawa pemeriksaan usaha wajar atau pemeriksaan lain patut dibuat bagi maksud menjalankan mana-mana kuasa Perbadanan di bawah seksyen 25 atau subseksyen 99(1) atau membuat bayaran di bawah Bab 3 Bahagian IV atau Bab 3 Bahagian V, Perbadanan boleh menjalankan satu atau lebih pemeriksaan khas atau lebih terhadap institusi anggota.

(2) Skop pemeriksaan khas di bawah subseksyen (1) boleh termasuk pemeriksaan rekod, buku, akaun atau dokumen dan transaksi lain institusi anggota.

(3) Bagi maksud seksyen ini, seorang pegawai, juruaudit, penerima, pengurus, penerima dan pengurus, pelikuidasi atau ejen institusi anggota atau mana-mana orang lain hendaklah mengemukakan kepada pegawai atau pekerja Perbadanan atau mana-mana orang lain yang dilantik oleh Perbadanan apa-apa dokumen, bahan, maklumat atau penjelasan yang dikehendaki oleh Perbadanan.

(4) Perbadanan boleh mendapatkan apa-apa kos dan perbelanjaan pemeriksaan khas daripada institusi anggota sebagai suatu hutang yang perlu dan kena dibayar kepada Perbadanan.

(5) Perbadanan hendaklah membuat suatu laporan kepada Bank Negara Malaysia apabila selesainya pemeriksaan khas itu.

BAHAGIAN VII

TINDAKAN OLEH PERBADANAN

Bab 1

Tindakan berkenaan dengan institusi anggota tidak berdaya maju

Pemberitahuan mengenai tidak berdaya maju

98. (1) Bank Negara Malaysia boleh memberitahu Perbadanan secara bertulis jika Bank Negara Malaysia berpendapat bahawa suatu institusi anggota telah terhenti menjadi berdaya maju atau berkemungkinan terhenti menjadi berdaya maju.

(2) Pemberitahuan di bawah subseksyen (1) adalah muktamad dan mengikat.

Kuasa Perbadanan dalam hal institusi anggota tidak berdaya maju

99. (1) Jika Perbadanan telah menerima suatu pemberitahuan di bawah seksyen 98, ia boleh menjalankan satu atau lebih kuasa yang berikut:

(a) menghendaki institusi anggota itu—

- (i) supaya mengambil apa-apa langkah, atau apa-apa tindakan, atau melakukan atau tidak melakukan apa-apa perbuatan atau benda, yang berhubung

dengan dirinya, urusannya atau pegawainya dalam masa yang difikirkan perlu atau suai manfaat oleh Perbadanan;

(ii) supaya berhenti daripada menerima, mengambil atau membayar semula deposit atau berhenti daripada mengeluarkan atau memperbaharui, atau membuat bayaran di bawah sijil takaful atau polisi insurans, atau menjalankan kuasanya atau sebahagian daripada urusannya sebagaimana yang diarahkan oleh Perbadanan; atau

(iii) untuk menyusun semula keseluruhan atau sebahagian daripada urusannya,

sebagaimana yang ditentukan oleh Perbadanan;

(b) memperoleh syer institusi anggota itu daripada pemegang syernya yang sedia ada atau melanggan syer yang dikeluarkan oleh institusi anggota itu mengikut dokumen konstituen institusi anggota itu;

(c) mengambil alih kawalan keseluruhan atau sebahagian daripada aset, liabiliti, urusan dan hal ehwal institusi anggota itu, menjalankan keseluruhan atau sebahagian daripada urusannya dan menguruskan keseluruhan atau sebahagian daripada aset, liabiliti dan hal ehwalnya termasuk melupuskan aset atau urusannya atau apa-apa bahagian daripadanya, atau melantik mana-mana orang untuk berbuat demikian bagi pihak Perbadanan (dalam Bahagian ini disebut “orang dilantik”) dan terma dan syarat bagi orang dilantik termasuk arahan Perbadanan kepada orang dilantik, hendaklah ditentukan oleh Perbadanan dan hendaklah mengikat institusi anggota yang berkenaan; dan membayar kos, caj dan perbelanjaan Perbadanan atau orang dilantik, termasuk saraan orang dilantik, daripada aset institusi anggota itu mendahului semua tuntutan lain;

(d) memohon kepada Mahkamah Tinggi untuk melantik seorang penerima, pengurus atau penerima dan pengurus (mana-mana satu orang itu disebut dalam Bahagian ini sebagai “penerima”) untuk menguruskan keseluruhan atau sebahagian daripada aset, liabiliti, urusan dan hal ehwal institusi anggota itu;

- (e) tertakluk kepada kelulusan Menteri, mengemukakan suatu petisyen kepada Mahkamah Tinggi untuk menggulung institusi anggota itu;
- (f) dengan kelulusan Menteri, menamakan suatu subsidiari Perbadanan sebagai institusi perantaraan;
- (g) memindahkan —
 - (i) apa-apa aset, urusan dan hal ehwal institusi anggota itu sebagaimana yang ditentukan oleh Perbadanan; dan
 - (ii) apa-apa liabiliti deposit atau liabiliti takaful atau insurans dan liabiliti lain institusi anggota itu sebagaimana yang ditentukan oleh Perbadanan,
 kepada suatu institusi perantaraan, atau menyebabkan satu pindahan demikian atau lebih, atas terma dan syarat yang ditentukan oleh Perbadanan; atau
- (h) melakukan apa-apa, kombinasi mana-mana yang disebut di atas,

dengan syarat bahawa liabiliti deposit Islam hendaklah dipindahkan hanya kepada suatu institusi anggota yang merupakan suatu bank Islam atau institusi perantaraan yang operasinya dijalankan selaras dengan Syariah dan liabiliti takaful hendaklah dipindahkan hanya kepada suatu institusi anggota yang merupakan suatu pengendali takaful atau institusi perantaraan yang operasinya dijalankan selaras dengan Syariah.

(2) Perbadanan boleh menjalankan atau terus menjalankan kuasa di bawah subseksyen (1), kecuali perenggan (1)(a), berkenaan dengan bekas institusi anggota yang keanggotaannya telah dibatalkan di bawah seksyen 38 atau ditamatkan di bawah seksyen 39 dan sebutan mengenai institusi anggota dalam Bahagian ini termasuklah, jika berkenaan, bekas institusi anggota yang keanggotaannya telah dibatalkan di bawah seksyen 38 atau ditamatkan di bawah seksyen 39.

(3) Perbadanan atau orang dilantik, dalam melaksanakan apa-apa transaksi di bawah Bahagian ini —

- (a) tidak dikehendaki untuk memberitahu atau mendapatkan kelulusan pemegang syer atau pemiutang institusi anggota dalam suatu mesyuarat agung atau selainnya, atau mana-mana pihak berkuasa kerajaan, pengawal selia atau pihak berkuasa lain apa-apa jua kecuali, jika berkenaan, pihak berkuasa

Negeri yang mempunyai bidang kuasa terhadap urusan tanah, atau mana-mana orang lain yang terjejas dengan transaksi itu walau apa pun apa-apa rukun undang-undang, kontrak atau apa-apa jua dalam mana-mana undang-undang termasuk Akta Syarikat 1965 atau apa-apa jua dalam dokumen konstituen institusi anggota; dan

- (b) tidak dikehendaki untuk membuat suatu tawaran ambil alih atau dikehendaki untuk memperoleh syer pemegang syer lain mana-mana institusi anggota atau peminjamnya walau apa pun apa-apa rukun undang-undang, kontrak atau apa-apa jua dalam mana-mana undang-undang,

dan bagi mengelakkan keraguan, seseorang, selain Perbadanan, orang dilantik atau mana-mana subsidiari Perbadanan, adalah tertakluk kepada kehendak, jika ada, pihak berkuasa kerajaan, pengawal selia atau yang lain apa-apa jua yang berkenaan yang mempunyai bidang kuasa terhadap pemerolehan oleh atau pelupusan kepada orang itu apa-apa aset, liabiliti atau urusan institusi anggota atau sebahagian daripadanya.

(4) Mana-mana institusi anggota yang tidak mematuhi mana-mana kehendak Perbadanan menurut seksyen ini melakukan suatu kesalahan dan boleh, apabila disabitkan, didenda tidak melebihi lima juta ringgit atau dipenjarakan selama tempoh tidak melebihi lima tahun atau kedua-duanya, dan boleh, sebagai tambahan, dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan.

(5) Perbadanan boleh memindahkan apa-apa aset atau liabiliti institusi anggota kepada suatu institusi perantaraan di bawah Bahagian ini atau menyebabkan suatu pindahan balik kepada institusi anggota akan apa-apa aset atau liabiliti itu sebagaimana yang ditentukan oleh Perbadanan—

- (a) melalui satu surat cara pindah milik atau lebih; atau
- (b) mengikut undang-undang am.

(6) Suatu surat cara pindah milik yang dikeluarkan mengikut Jadual Kedua hendaklah mempunyai kesan yang dinyatakan dalam Jadual Kedua dan hendaklah mengikat mana-mana orang yang terjejas dengannya.

Notis pengambilalihan kawalan

100. Perbadanan hendaklah memberikan notis mengenai bermulanya pengambilalihan kawalan di bawah perenggan 99(1)(c) pada bila-bila masa yang disifatkan sesuai oleh Perbadanan dengan menyiarkan notis itu dalam sekurang-kurangnya dua akhbar harian di Malaysia, salah satu daripadanya hendaklah dalam bahasa kebangsaan, dan Perbadanan boleh memberikan notis mengenai tamatnya pengambilalihan kawalan itu mengikut cara yang sama.

Peruntukan berhubung dengan pengambilalihan kawalan

101. (1) Jika kawalan sesuatu institusi anggota telah diambil alih di bawah perenggan 99(1)(c), institusi anggota dan pegawainya hendaklah dengan serta-merta menyerahkan aset, liabiliti, urusan dan hal ehwalnya kepada kawalan itu, dan hendaklah memberi Perbadanan dan, jika kawalan itu diambil alih oleh orang dilantik, juga orang dilantik, segala kemudahan yang dikehendaki untuk menjalankan urusan dan menguruskan aset, liabiliti dan hal ehwal, termasuk melupuskan aset dan memindahkan liabiliti, institusi anggota itu.

(2) Jika kawalan sesuatu institusi anggota telah diambil alih di bawah perenggan 99(1)(c), Perbadanan atau orang dilantik hendaklah kekal mengawal aset, liabiliti, urusan dan hal ehwal institusi anggota itu, dan menjalankan urusan dan menguruskan aset, liabiliti dan hal ehwal institusi anggota itu atas nama dan bagi pihak institusi itu termasuk melupuskan aset dan memindahkan liabilitinya, sehingga pengambilalihan itu ditamatkan oleh Perbadanan.

(3) Sepanjang tempoh kawalan sesuatu institusi anggota di bawah perenggan 99(1)(c), hendaklah terletak hak pada Perbadanan atau orang dilantik segala kuasa institusi anggota, dan pengarahnya, di bawah dokumen konstituen institusi itu, atau yang boleh dijalankan oleh institusi anggota atau pengarahnya di bawah mana-mana undang-undang, atau bagaimana jua pun selainnya, tidak kira sama ada kuasa itu boleh dijalankan melalui ketetapan, ketetapan khas atau mengikut apa-apa jua cara lain.

(4) Semasa tempoh kawalan sesuatu institusi anggota di bawah perenggan 99(1)(c), tiada pengarah institusi anggota boleh, sama ada secara langsung atau tidak langsung, terlibat dalam apa-apa aktiviti berhubung dengan institusi anggota itu, kecuali sebagaimana yang dikehendaki atau dibenarkan oleh Perbadanan atau orang

dilantik dan tiada saaraan dalam apa-apa jua jenis boleh terakru atau kena dibayar kepada mana-mana pengarah institusi anggota itu, kecuali sebagaimana yang diluluskan secara bertulis oleh Perbadanan atau orang dilantik berhubung dengan apa-apa aktiviti yang dikehendaki atau dibenarkan sebagaimana yang disebut terdahulu oleh Perbadanan atau orang dilantik.

(5) Bagi mengelakkan keraguan, dengan ini diisytiharkan bahawa penjalanan kuasa di bawah perenggan 99(1)(c) tidaklah mempunyai kesan untuk memberi, atau meletak hak pada, Perbadanan atau orang dilantik, apa-apa hak kepada, atau apa-apa kepentingan benefisial dalam, mana-mana aset institusi anggota.

(6) Jika Perbadanan atau orang dilantik telah mengambil alih kawalan institusi anggota di bawah perenggan 99(1)(c), Perbadanan atau orang dilantik—

- (a) dalam menjalankan urusan dan menguruskan aset, liabiliti, urusan atau hal ehwal institusi anggota atau dalam menjalankan mana-mana transaksi berhubung dengan institusi anggota itu atau aset, liabiliti, urusan atau hal ehwalnya, termasuk melupuskan aset dan memindahkan liabiliti, hendaklah disifatkan bertindak sebagai ejen kepada institusi anggota itu; dan
- (b) tidak boleh, dengan sebab mengambil alih kawalan institusi anggota itu atau apa-apa tindakan yang diambil olehnya, dikira sebagai telah mengambil alih atau menanggung apa-apa obligasi atau liabiliti institusi anggota itu atas dirinya sendiri.

(7) Mana-mana orang yang tidak mematuhi subseksyen (1) atau (4) melakukan suatu kesalahan dan boleh, apabila disabitkan, didenda tidak melebihi lima juta ringgit atau dipenjarakan selama tempoh tidak melebihi lima tahun atau kedua-duanya, dan boleh, sebagai tambahan, dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan.

Kuasa mengurangkan modal syer dan membatalkan syer institusi anggota di bawah perenggan 99(1)(c)

102. (1) Jika Perbadanan atau orang dilantik, telah mengambil alih kawalan institusi anggota di bawah perenggan 99(1)(c), dan Perbadanan atau orang dilantik, berpendapat bahawa modal berbayar institusi itu telah kerugian atau tidak digambarkan oleh

aset yang ada, Perbadanan atau orang dilantik boleh memohon kepada Mahkamah Tinggi untuk suatu perintah bagi mengurangkan modal syer institusi itu dengan membatalkan apa-apa bahagian modal berbayarnya yang telah kerugian atau tidak digambarkan oleh aset yang ada.

(2) Jika Mahkamah Tinggi membuat suatu perintah di bawah subseksyen (1) untuk mengurangkan modal syer sesuatu institusi anggota, Mahkamah boleh—

- (a) atas permohonan oleh Perbadanan atau orang dilantik; dan
- (b) jika, apabila habis tempoh tiga puluh hari dari tarikh apa-apa panggilan yang dibuat oleh institusi anggota itu kepada pemegang syernya supaya membayar syer mereka masing-masing, bayaran bagi apa-apa syer itu belum lagi dibuat,

juga memerintahkan supaya syer itu yang bayarannya belum lagi dibuat dibatalkan dengan sewajarnya.

(3) Jika modal syer sesuatu institusi anggota dikurangkan di bawah subseksyen (1), atau mana-mana syernya telah dibatalkan di bawah subseksyen (2), Perbadanan atau orang dilantik boleh menyebabkan dokumen konstituen institusi itu diubah dengan sewajarnya.

(4) Kuasa yang diberikan kepada Perbadanan atau orang dilantik di bawah peruntukan yang disebut terdahulu dalam seksyen ini hendaklah sebagai tambahan kepada apa-apa kuasa yang boleh dijalankan di bawah subseksyen 64(1) Akta Syarikat 1965, dan jika sesuatu permohonan dibuat kepada Mahkamah Tinggi di bawah subseksyen (1)—

- (a) Mahkamah Tinggi boleh menjalankan mana-mana kuasa yang diberikan kepadanya di bawah seksyen 64 Akta Syarikat 1965 berhubung dengan suatu permohonan bagi pengesahan yang disebut dalam permohonan itu; dan
- (b) subseksyen 64(9) dan (10) Akta Syarikat 1965 hendaklah terpakai berhubung dengan permohonan itu.

Penyelesaian resolusi

103. (1) Jika Perbadanan telah mengambil alih kawalan atau melantik seseorang untuk berbuat demikian bagi pihaknya di bawah perenggan 99(1)(c), Perbadanan dan orang dilantik boleh, sebagai tambahan kepada mana-mana hak dan kuasanya, menjalankan apa-apa resolusi yang meliputi—

- (a) suatu transaksi atau beberapa siri transaksi yang melibatkan jualan atau pelupusan lain oleh institusi anggota itu akan kesemua atau sebahagian daripada asetnya atau pengambilalihan oleh mana-mana orang akan kesemua atau sebahagian daripada liabilitinya atau kedua-duanya;
- (b) apa-apa transaksi atau beberapa siri transaksi lain bagi maksud untuk menyusun semula kesemua atau sebahagian daripada urusan institusi anggota itu;
- (c) satu pindahan atau lebih yang disebut dalam perenggan 99(1)(g); atau
- (d) satu pindahan atau lebih yang disebut dalam subseksyen 115(3), 115(4) atau 115(5).

(2) Jika Perbadanan menganggap bahawa resolusi yang disebut dalam subseksyen (1) telah diselesaikan secara substansial, ia hendaklah menyebabkan suatu notis mengenai perkara itu yang menyatakan tarikh resolusi itu telah, pada pendapat Perbadanan, diselesaikan secara substansial, disiarkan dalam *Warta*.

(3) Perbadanan hendaklah membuat petisyen bagi penggulingan institusi anggota itu jika, pada pendapat Perbadanan, tiada resolusi yang disebut dalam subseksyen (1) atau akan diselesaikan secara substansial pada atau sebelum tarikh telah itu, iaitu—

- (a) dua tahun selepas tarikh Perbadanan atau orang dilantik mengambil alih kawalan institusi anggota itu; atau
- (b) habisnya tempoh lanjutan terakhir yang diluluskan di bawah subseksyen (4),

mana-mana yang kemudian.

(4) Menteri boleh, atas syor Perbadanan, meluluskan satu lanjutan tempoh atau lebih yang dinyatakan dalam perenggan (3)(a) bagi suatu tempoh lanjutan yang tidak melebihi tiga tahun dan setiap lanjutan tidak boleh melebihi satu tahun.

Penubuhan Jawatankuasa Pentaksir

104. (1) Hendaklah ditubuhkan suatu jawatankuasa yang dikenali sebagai “Jawatankuasa Pentaksir” dan Jadual Pertama hendaklah terpakai bagi Jawatankuasa Pentaksir itu .

(2) Jika satu transaksi atau lebih yang disebut dalam subseksyen 103(1) dilaksanakan, suatu permohonan untuk mengkaji semula mengikut Jadual Pertama ialah satu-satunya cara untuk mempersoalkan amaun balasan yang diterima atau boleh diterima dalam transaksi atau berberapa siri transaksi atau pengagihan dan penggunaan balasan itu, dan tiada mahkamah yang boleh mendengar apa-apa tindakan, guaman atau prosiding yang bertujuan untuk mempersoalkan amaun atau pengagihan dan penggunaan balasan itu.

(3) Apa-apa keputusan yang dibuat oleh Jawatankuasa Pentaksir yang dibuat di bawah Jadual Pertama adalah muktamad dan mengikat.

(4) Sehingga Perbadanan menetapkan kaedah-kaedah di bawah subseksyen (5), Jawatankuasa Pentaksir boleh menentukan tatacara dan penjalanan bagi prosidingnya sendiri.

(5) Perbadanan boleh menetapkan kaedah-kaedah berkaitan dengan tatacara dan penjalanan prosiding atau di hadapan Jawatankuasa Pentaksir.

Perkhidmatan peralihan

105. (1) Jika satu transaksi atau lebih yang disebut dalam perenggan 99(1)(g) dilaksanakan, Perbadanan atau orang dilantik boleh menyebabkan institusi anggota bersetuju untuk menyediakan perkhidmatan kepada penerima pindahan sebagai balasan penerima pindahan membayar atau membayar balik kos munasabah institusi anggota berbuat demikian sebagaimana yang diluluskan oleh Perbadanan.

(2) Suatu perjanjian yang disebut dalam subseksyen (1) mengikat mana-mana penerima, pengurus, penerima dan pengurus atau pelikuidasi yang dilantik berkenaan dengan institusi anggota, dan dalam hal sedemikian, kos institusi anggota bagi menyediakan perkhidmatan itu hendaklah disifatkan termasuk fi penerima, pengurus, penerima dan pengurus atau pelikuidasi itu untuk masa yang digunakan berkaitan dengan penyediaan perkhidmatan sebagaimana yang diluluskan oleh Perbadanan.

Pelantikan penerima, dsb.

106. (1) Mahkamah Tinggi hendaklah membuat suatu perintah menurut permohonan Perbadanan di bawah perenggan 99(1)(d) bagi melantik seorang penerima berkenaan dengan suatu institusi anggota.

(2) Atas suatu permohonan Perbadanan, Mahkamah hendaklah melantik sebagai penerima orang yang dinyatakan oleh Perbadanan dalam permohonannya untuk mengisi suatu kekosongan atau untuk melepaskan dan menggantikan seorang penerima yang telah dilantik di bawah subseksyen (1).

(3) Seorang penerima hendaklah mengambil kira objektif menguruskan urusan dan hal ehwal institusi anggota mengikut cara yang dibentuk untuk mencapai keputusan yang terbaik bagi semua pemiutang institusi anggota.

(4) Dalam hal apa-apa percanggahan antara kepentingan pendeposit atau benefisiari takaful atau orang diinsuranskan dengan mana-mana pemiutang institusi anggota yang lain yang tidak bercagar, seorang penerima hendaklah memberi keutamaan kepada kepentingan pendeposit atau benefisiari takaful atau orang diinsuranskan itu.

(5) Semua kos, caj dan perbelanjaan seorang penerima, termasuk saraannya dan apa-apa kos yang dilakukan dalam menjalankan kuasa dan kewajipannya, hendaklah dibayar daripada aset institusi anggota itu, mendahului semua tuntutan lain.

(6) Seorang penerima boleh memohon kepada Mahkamah Tinggi bagi mendapatkan arahan berhubungan dengan apa-apa perkara khusus yang berbangkit dalam penerimaan.

(7) Perintah 30 Kaedah-Kaedah Mahkamah Tinggi 1980 tidak terpakai bagi terhadap suatu permohonan bagi melantik seorang penerima di bawah perenggan 99(1)(d).

(8) Suatu permohonan bagi melantik seorang penerima di bawah perenggan 99(1)(d) boleh dibuat melalui suatu saman pemula secara *ex-parte*.

Peruntukan berhubung dengan pelantikan di bawah perenggan 99(1)(c) dan seksyen 106

107. (1) Berkenaan dengan suatu institusi anggota yang Perbadanan atau orang dilantik telah mengambil alih kawalannya atau seorang penerima telah dilantik menurut Akta ini, Perbadanan, orang dilantik atau penerima—

(a) hendaklah mempunyai kuasa—

- (i) untuk memasuki mana-mana premis institusi anggota dan mengambil milikan dan kawalan ke atas aset dan menghendaki mana-mana orang di dalam premis itu untuk bertanggungjawab dan menyerahkan kepada Perbadanan, orang dilantik atau penerima milikan dan kawalan ke atas aset itu;
- (ii) tertakluk kepada subperenggan (iii), untuk menjual atau selainnya melupuskan aset dan perusahaan perniagaan institusi anggota melalui triti persendirian atau jualan awam atau dengan apa-apa cara lain dan atas apa-apa terma dan syarat sebagaimana yang disifatkan sesuai oleh Perbadanan, orang dilantik atau penerima;
- (iii) untuk menjual atau selainnya melupuskan mana-mana aset yang tertakluk kepada sesuatu perjanjian yang mewujudkan suatu kepentingan cagaran kepada mana-mana orang yang bersetuju untuk mengambil alih obligasi yang dijamin oleh kepentingan cagaran itu;
- (iv) untuk mengaturkan pengambilalihan keseluruhan atau mana-mana bahagian liabiliti institusi anggota oleh mana-mana orang;
- (v) untuk menjalankan urusan institusi anggota setakat yang disifatkan perlu atau berfaedah oleh Perbadanan, orang dilantik atau penerima;
- (vi) untuk membawa guaman, membela, mengkompromi dan menyelesaikan, atas nama institusi anggota, apa-apa tuntutan yang dibuat oleh atau terhadapnya;

- (vii) atas nama institusi anggota, untuk melakukan semua tindakan dan menyempurnakan semua penerimaan dan dokumen lain dan bagi maksud itu, apabila perlu, menggunakan meterai perbadanannya; dan
- (viii) untuk melakukan semua perkara lain sebagaimana yang perlu atau bersampingan dalam menjalankan hak, kuasa, keistimewaan dan imuniti Perbadanan, orang dilantik atau penerima; dan

(b) hendaklah mempunyai kuasa untuk membayar daripada aset institusi anggota segala kos, caj dan perbelanjaan Perbadanan, orang dilantik atau penerima dalam menjalankan kuasa dan kewajipan mereka, termasuk saraan orang dilantik atau penerima, mendahului semua tuntutan lain.

(2) Tanpa menjejaskan subseksyen 101(6), jika Perbadanan, orang dilantik atau penerima menjalankan satu kuasa atau lebih di bawah subseksyen (1), Perbadanan, orang dilantik atau penerima itu tidak boleh dianggap, atas alasan penjalanan kuasa demikian, sebagai telah mengambil alih atau menanggung apa-apa obligasi atau liabiliti sesuatu institusi anggota untuk dirinya sendiri.

(3) Tanpa menjejaskan subseksyen 101(3) dan 101(4), jika mana-mana orang telah, atau sedang diletak hak dengan kawalan, pentadbiran atau pengurusan suatu institusi anggota, kawalan, pentadbiran atau pengurusan demikian hendaklah terhenti dengan serta-merta dengan pengambilalihan oleh Perbadanan atau orang dilantik atau pelantikan penerima.

Kesahan transaksi

108. Apa-apa bayaran yang dibuat, transaksi yang dilakukan atau apa-apa perbuatan atau benda lain yang dilakukan oleh Perbadanan, orang dilantik atau penerima yang dilantik menurut Akta ini atau dengan arahan Perbadanan, adalah sah dan boleh dikuatkuasakan dan hendaklah tidak terbatal, boleh batal atau dianggap sebagai suatu keutamaan tidak wajar dalam penggulangan suatu institusi anggota.

Penggantungan prosiding

109. (1) Tertakluk kepada subseksyen (2) dan walau apa-apa pun mana-mana undang-undang lain, jika Perbadanan atau orang dilantik telah mengambil alih kawalan suatu institusi anggota di bawah perenggan 99(1)(c) atau seorang penerima telah dilantik menurut Akta ini—

- (a) tiada tindakan, guaman atau prosiding dalam mana-mana mahkamah atau tribunal boleh dimulakan terhadap Perbadanan atau orang dilantik berkenaan dengan pengambilalihan kawalan atau penerima berkenaan dengan pelantikannya;
- (b) tiada tindakan, guaman atau prosiding dalam mana-mana mahkamah atau tribunal boleh dimulakan atau diteruskan terhadap institusi anggota atau berkenaan dengan asetnya;
- (c) tiada penahanan, garnisan, pelaksanaan atau cara penguatkuasaan lain bagi suatu penghakiman, award atau perintah terhadap institusi anggota atau asetnya boleh diambil atau diteruskan;
- (d) tiada pemiutang institusi anggota mempunyai apa-apa remedi terhadap institusi anggota atau asetnya;
- (e) tiada pemiutang mempunyai apa-apa hak tolakan terhadap institusi anggota, yang untuk kepastian yang lebih, tidaklah termasuk penyatuan akaun yang disenggara dalam perjalanan biasa bagi maksud memperuntukkan perkhidmatan penjelasan dan penyelesaian atau perkhidmatan yang disebut dalam seksyen 114; dan
- (f) tiada seorang pun boleh menamatkan atau meminda apa-apa perjanjian dengan institusi anggota atau menuntut supaya suatu bayaran dipercepat di bawah apa-apa perjanjian sedemikian hanya disebabkan oleh—
 - (i) ketidaksolvenan institusi anggota itu;
 - (ii) suatu keingkaran, sebelum pengambilalihan kawalan di bawah perenggan 99(1)(c) oleh Perbadanan atau orang dilantik atau pelantikan penerima berkuat kuasa, oleh institusi anggota itu dalam melaksanakan obligasinya di bawah perjanjian itu; atau
 - (iii) pengambilalihan kawalan di bawah perenggan 99(1)(c) oleh Perbadanan atau orang dilantik atau pelantikan penerima,

dalam tempoh pengambilalihan kawalan institusi anggota oleh Perbadanan atau orang dilantik atau pelantikan penerima, mengikut mana-mana yang berkenaan.

(2) Tiada apa-apa jua dalam seksyen ini boleh menghalang apa-apa langkah diambil, atau apa-apa tindakan, guaman atau prosiding dimulakan atau diteruskan, oleh Perbadanan berkenaan dengan suatu institusi anggota atau urusan, hal ehwal, aset atau liabilitinya.

Pelanjutan masa

110. Jika—

- (a) bagi apa-apa maksud suatu perbuatan dikehendaki dilakukan dalam suatu tempoh yang tertentu atau sebelum suatu masa yang tertentu di bawah peruntukan mana-mana undang-undang atau mana-mana perjanjian; dan
- (b) Akta ini menghalang tindakan itu daripada dilakukan dalam tempoh atau sebelum masa itu,

tempoh itu disifatkan sebagai dilanjutkan atau masa itu disifatkan sebagai ditangguhkan sehingga hari kelima urusan berikutan berakhirnya tempoh yang dalamnya perbuatan itu dihalang dilakukan oleh Akta ini.

Kesahan cagaran

111. Perbadanan boleh membuat, menyempurnakan atau menguatkuasakan atau menyebabkan pembuatan atau penyempurnaan apa-apa cagaran terhadap mana-mana aset suatu institusi anggota sebagai apa-apa balasan berhubung dengan perjalanan mana-mana kuasa di bawah Akta ini—

- (a) walau apa pun seksyen 109 atau mana-mana peruntukan lain Akta ini; dan
- (b) walaupun institusi anggota itu telah bersetuju bahawa ia tidak boleh atau tidak akan membuat apa-apa cagaran terhadap mana-mana asetnya atau ia boleh atau akan membuat cagaran itu hanya dengan persetujuan orang atau orang-orang lain.

Penyerahhakan bukan keingkaran, dsb.

112. (1) Tiada seorang pun boleh menamatkan atau meminda apa-apa perjanjian dengan suatu institusi anggota atau menuntut supaya suatu bayaran dipercepat di bawah apa-apa perjanjian sedemikian disebabkan perjanjian itu dipindahkan atau diserahkan kepada atau diambil alih oleh institusi anggota lain, institusi perantaraan atau pihak ketiga yang layak.

(2) Suatu pemindahan atau penyerahhakan apa-apa perjanjian dengan suatu institusi anggota kepada institusi anggota lain, institusi perantaraan atau pihak ketiga yang layak menurut Akta ini adalah sah dan mengikat terhadap semua pihak lain perjanjian itu walaupun institusi anggota itu telah bersetuju bahawa ia tidak boleh atau tidak akan menyerahkan perjanjian itu atau ia boleh atau akan menyerahkan perjanjian itu hanya dengan persetujuan orang atau beberapa orang yang lain.

Perjanjian diatasi bagi maksud perenggan 99(1)(c) dan seksyen 106

113. Jika Perbadanan atau orang dilantik telah mengambil alih kawalan suatu institusi anggota atau seorang penerima telah dilantik menurut Akta ini, apa-apa terma dalam mana-mana perjanjian tidak mempunyai kuat kuasa atau kesan sekiranya ia—

- (a) mempunyai kesan untuk memperuntukkan bagi, atau membenarkan, apa-apa jua pun yang, pada matannya, bertentangan dengan seksyen 107, 109 atau 125; atau
- (b) memperuntukkan, dalam perkara matan, bahawa institusi anggota itu terhenti mempunyai hak atau institusi perantaraan atau penerima pindahan atau pemegang serah hak tidak mempunyai hak untuk menggunakan atau berurusan dengan aset yang jika tidak, institusi anggota atau institusi perantaraan atau penerima pindahan atau pemegang serah hak itu akan mempunyai hak, disebabkan oleh—
 - (i) ketidaksolvenan institusi anggota itu;
 - (ii) keingkaran oleh institusi anggota itu dalam melaksanakan suatu obligasi;

- (iii) pengambilalihan kawalan atau pelantikan penerima itu; atau
- (iv) perjanjian itu dipindahkan atau diserahkan kepada atau diambil alih oleh institusi anggota lain, institusi perantaraan atau pihak ketiga yang layak.

Bekalan dan pendahuluan lanjut

114. Tiada apa-apa jua dalam seksyen 109 and 113 boleh ditafsirkan sebagai—

- (a) melarang seseorang daripada menghendaki bayaran dibuat secara tunai bagi barangan, perkhidmatan, penggunaan harta dipajakkan atau dilesenkan atau balasan berharga yang lain yang diperuntukkan selepas pengambilalihan kawalan di bawah perenggan 99(1)(c) atau pelantikan seorang penerima;
- (b) menghendaki pendahuluan wang atau kredit kepada suatu institusi anggota selepas pengambilalihan kawalan di bawah perenggan 99(1)(c) atau pelantikan seorang penerima; atau
- (c) menghendaki peruntukan kepada suatu institusi anggota, selepas bermulanya pengambilalihan kawalan atau pelantikan penerima, mana-mana perkhidmatan yang berikut yang jika dilakukan berkemungkinan, pada pendapat munasabah orang yang memberikan perkhidmatan itu, akan menyebabkan orang itu mendahulukan wang atau kredit kepada suatu institusi anggota selepas pengambilalihan kawalan atau pelantikan itu atau akan menimbulkan, selepas pengambilalihan kawalan atau pelantikan itu, suatu tuntutan oleh orang itu terhadap institusi anggota itu, iaitu—
 - (i) perkhidmatan pengurusan wang tunai;
 - (ii) perkhidmatan berhubungan dengan penebusan surat cara hutang;
 - (iii) perkhidmatan berhubungan dengan pengeluaran surat kredit atau jaminan;

- (iv) perkhidmatan pemerakuan cek;
- (v) perkhidmatan pembekalan mata wang;
- (vi) perkhidmatan pemindahan dana dan perkhidmatan perintah pengiriman wang;
- (vii) perkhidmatan hantar serah dan penyelesaian sekuriti;
- (viii) perkhidmatan kad caj, kad kredit, kad debit dan kad bayaran;
- (ix) perkhidmatan perbankan automatik dan mesin teler;
- (x) perkhidmatan pemindahan dana secara elektronik di tempat jualan;
- (xi) perkhidmatan cek konsainan;
- (xii) perkhidmatan lain yang seumpama dengan yang disebut dalam subperenggan (i) hingga (xi);
- (xiii) mana-mana jenis perkhidmatan yang ditetapkan dalam peraturan-peraturan; dan
- (xiv) suatu jaminan liabiliti berkenaan dengan mana-mana perkhidmatan yang disebut dalam subperenggan (i) hingga (xiii).

Perjanjian kewangan yang layak

115. (1) Tertakluk kepada subseksyen (3), tiada apa-apa jua dalam seksyen 109 boleh menghalang penamatan mana-mana perjanjian yang berikut mengikut termannya atau penolakan atau penggunaan amaun yang kena dibayar di bawah perjanjian itu mengikut termannya, iaitu—

- (a) suatu derivatif, sama ada diselesaikan melalui pembayaran atau hantar serah, yang—
 - (i) diniagakan di suatu bursa, lembaga atau pasaran lain yang dikawal selia bagi derivatif, niaga hadapan atau opsyen; atau
 - (ii) menjadi hal perkara urus niaga berulang di pasaran kaunter derivatif, sekuriti atau komoditi;

- (b) suatu perjanjian untuk—
- (i) meminjam atau meminjamkan sekuriti atau komoditi, termasuk suatu perjanjian untuk memindahkan sekuriti atau komoditi yang di bawahnya peminjam boleh membayar balik pinjaman itu dengan menggunakan sekuriti atau komoditi lain, wang tunai atau yang bersamaan dengan wang tunai;
 - (ii) menjelaskan atau menyelesaikan transaksi sekuriti, niaga hadapan, opsyen atau derivatif; atau
 - (iii) bertindak sebagai suatu depository sekuriti;
- (c) suatu perjanjian beli balik, beli balik songsang atau beli-jual balik yang berkenaan dengan sekuriti atau komoditi;
- (d) suatu pinjaman margin setakat yang berkenaan dengan suatu akaun sekuriti atau niaga hadapan yang disenggarakan oleh suatu perantaraan kewangan;
- (e) mana-mana kombinasi perjanjian yang disebut dalam mana-mana perenggan (a) hingga (d);
- (f) suatu perjanjian induk setakat yang berkenaan dengan suatu perjanjian yang disebut dalam mana-mana perenggan (a) hingga (e);
- (g) suatu perjanjian induk setakat yang berkenaan dengan suatu perjanjian induk yang disebut dalam perenggan (f);
- (h) suatu jaminan, atau tanggung rugi atau obligasi pembayaran balik yang berkenaan dengan liabiliti di bawah suatu perjanjian yang disebut dalam mana-mana perenggan (a) hingga (g); dan
- (i) suatu perjanjian yang berhubungan dengan cagaran kewangan, termasuk apa-apa bentuk sekuriti atau kepentingan sekuriti dalam cagaran dan suatu perjanjian sokongan kredit pindah hakmilik, yang berkenaan dengan suatu perjanjian yang disebut dalam mana-mana perenggan (a) hingga (h).

(2) Bagi maksud subseksyen (1)—

“derivatif” ertinya suatu perjanjian kewangan yang obligasinya terbit daripada, dirujuk atau didasarkan kepada satu sumber rujukan atau lebih iaitu kadar bunga, mata wang, komoditi, sekuriti atau kepentingan pemilikan yang lain, obligasi kredit atau jaminan, sekuriti hutang, indeks yang berkaitan dengannya, atau apa-apa sumber rujukan atau indeks yang lain sebagaimana yang ditetapkan dalam peraturan-peraturan dan termasuklah—

- (a) suatu kontrak bagi perbezaan atau suatu swap, termasuk suatu swap jumlah pulangan, swap pulangan harga, swap keingakaran atau swap asas;
- (b) suatu perjanjian niaga hadapan;
- (c) suatu *cap*, *collar*, *floor* atau *spread*;
- (d) suatu opsyen; dan
- (e) suatu semerta atau hadapan;

“cagaran kewangan” ertinya mana-mana yang berikut yang tertakluk kepada suatu kepentingan atau hak yang menjamin pembayaran atau pelaksanaan suatu obligasi yang berkenaan dengan suatu perjanjian kewangan yang layak atau tertakluk kepada suatu perjanjian sokongan kredit pindah hakmilik:

- (a) wang tunai atau yang bersamaan dengan wang tunai, termasuk surat cara boleh niaga dan deposit tuntutan;
- (b) sekuriti, suatu akaun sekuriti, atau suatu hak untuk memperoleh sekuriti; atau
- (c) suatu perjanjian atau akaun niaga hadapan;

“perantaraan kewangan” ertinya—

- (a) suatu agensi penjelasan; atau
- (b) seseorang, termasuk broker, bank atau syarikat amanah, yang dalam perjalanan biasa perniagaan menyenggara akaun sekuriti atau hadapan untuk orang lain;

“perjanjian sokongan kredit pindah hakmilik” ertinya suatu perjanjian yang di bawahnya hakmilik kepada harta telah diperuntukkan bagi maksud menjamin pembayaran atau pelaksanaan suatu obligasi yang berkenaan dengan suatu perjanjian kewangan yang layak.

(3) Jika Perbadanan atau orang dilantik mengambil alih kawalan suatu institusi anggota atau seorang penerima dilantik menurut Akta ini, seksyen 109 hendaklah menghalang penamatan mana-mana perjanjian yang disebut dalam subseksyen (1) bagi apa-apa tempoh berikutan pemulaan pengambilalihan kawalan atau pelantikan penerima itu sebagaimana yang ditetapkan melalui peraturan-peraturan oleh Perbadanan dan jika, dalam tempoh itu, Perbadanan memindahkan, atau mengesahkan melalui notis bertulis bahawa ia akan memindahkan, perjanjian itu kepada suatu institusi perantaraan menurut perenggan 99(1)(g) atau pihak ketiga yang layak menurut subseksyen ini atau subseksyen (4) atau (5), perjanjian itu kemudiannya hanya boleh ditamatkan terhadap institusi perantaraan atau pihak ketiga yang layak itu mengikut termannya, seolah-olah perjanjian itu sememangnya sentiasa dengan institusi perantaraan atau pihak ketiga yang layak itu dan bukan dengan institusi anggota itu.

(4) Jika seseorang menjadi pihak balas di bawah dua perjanjian atau lebih yang disebut dalam subseksyen (1) dengan institusi anggota yang sama, Perbadanan hanya boleh memindahkan kepada suatu institusi perantaraan atau pihak ketiga yang layak semua atau tidak satu pun perjanjian antara institusi anggota itu dan orang itu.

(5) Jika Perbadanan memindahkan suatu perjanjian yang disebut dalam perenggan (1)(i) yang terpakai bagi mana-mana harta institusi anggota, ia hendaklah juga memindahkan harta itu kepada institusi perantaraan atau pihak ketiga yang layak.

(6) Perbadanan boleh memindahkan mana-mana perjanjian yang disebut dalam subseksyen (3) atau mana-mana harta yang disebut dalam subseksyen (5) kepada institusi perantaraan atau pihak ketiga yang layak melalui suatu surat cara pindah milik yang dikeluarkan mengikut Jadual Kedua dan ianya hendaklah mempunyai kesan yang dinyatakan dalam Jadual Kedua dan hendaklah mengikat mana-mana orang yang terjejas dengannya.

(7) Jika Perbadanan tidak memindahkan, dan tidak mengisytiharkan bahawa ia akan memindahkan, suatu perjanjian yang disebut dalam subseksyen (1) dan orang yang menjadi pihak balas di bawah perjanjian itu boleh menamatkan perjanjian itu mengikut termannya tetapi tidak berbuat demikian, Perbadanan boleh mengisytiharkan melalui notis bertulis bahawa perjanjian itu ditamatkan, maka dalam hal sedemikian, dan walaupun terdapat apa-apa terma yang bertentangan dalam perjanjian itu, perjanjian itu hendaklah disifatkan telah ditamatkan oleh pihak balas itu.

Perbadanan, dsb., bukan majikan pengganti

116. Jika Perbadanan atau orang dilantik di bawah perenggan 99(1)(c) mengambil alih kawalan suatu institusi anggota, atau seorang penerima atau pelikuidasi dilantik menurut Akta ini, Perbadanan, orang dilantik, penerima atau pelikuidasi tidaklah—

- (a) dianggap sebagai majikan yang menggantikan institusi anggota itu;
- (b) bertanggung bagi apa-apa obligasi berkenaan dengan pekerja atau bekas pekerja institusi anggota atau mana-mana pendahulu institusi anggota yang wujud sebelum pengambilalihan kawalan atau pelantikan yang berkenaan dengan apa-apa pelan pencen atau pelan manfaat selepas pekerjaan yang lain bagi pekerja atau bekas pekerja institusi anggota atau penakat mereka; atau
- (c) bertanggung bagi apa-apa jumlah wang yang dikira dengan merujuk kepada suatu tempoh masa sebelum institusi perantaraan menjadi majikan orang yang berkenaan.

Tuntutan, prosiding tertentu dilarang

117. Walau apa pun seksyen 109 dan 125, suatu institusi perantaraan, Perbadanan, orang dilantik di bawah perenggan 99(1)(c), seorang penerima atau pelikuidasi yang dilantik menurut Akta ini tidak boleh dinamakan sebagai suatu pihak dalam apa-apa tuntutan atau permohonan yang dibuat atau ditambahkan sebagai suatu pihak dalam apa-apa prosiding yang dimulakan atau diteruskan oleh atau bagi pihak mana-mana pekerja atau bekas pekerja institusi anggota menurut Akta Perhubungan Industri 1967 [*Akta 177*] atau Akta Pekerjaan 1955 [*Akta 265*].

Bab 2

Peruntukan berhubung dengan institusi perantaraan

Penamaan institusi perantaraan

118. (1) Jika suatu subsidiari Perbadanan dinamakan sebagai institusi perantaraan—

- (a) penamaan itu hendaklah habis tempoh dua tahun selepas ia dibuat, melainkan jika penamaan itu—
 - (i) dilanjutkan di bawah perenggan (b); atau
 - (ii) ditamatkan di bawah perenggan (c);
- (b) Menteri, atas syor Perbadanan, boleh melanjutkan penamaan untuk satu tempoh masa atau lebih yang setiap satunya tidak boleh melebihi satu tahun; dan
- (c) penamaan hendaklah tamat pada tarikh berlakunya mana-mana kejadian yang berikut, mengikut mana-mana yang lebih awal:
 - (i) institusi perantaraan bukan lagi suatu subsidiari Perbadanan;
 - (ii) semua aset atau bahagian substantial aset institusi perantaraan diperoleh oleh, atau semua liabiliti atau bahagian substantial liabiliti institusi perantaraan diambil alih oleh, atau kedua-duanya, seseorang yang bukan suatu institusi perantaraan; atau
 - (iii) Perbadanan memutuskan penamaan itu hendaklah ditamatkan.

(2) Walau apa pun mana-mana undang-undang yang lain, jika suatu subsidiari Perbadanan yang dinamakan sebagai institusi perantaraan menukar nama syarikatnya dalam tempoh dua belas bulan sebelum atau selepas penamaan itu, subsidiari atau institusi perantaraan itu hendaklah dikecualikan daripada menyatakan atau selainnya menunjukkan nama lamanya atas apa-apa jua meterai, dokumen atau surat cara.

Siaran notis

119. Jika suatu subsidiari Perbadanan dinamakan sebagai institusi perantaraan atau penamaan itu dilanjutkan di bawah perenggan 118(1)(b) atau ditamatkan di bawah perenggan 118(1)(c), Perbadanan hendaklah menyiarkan suatu notis yang menyatakan tarikh kejadian itu berlaku dalam sekurang-kurangnya dua akhbar harian di Malaysia, salah satu daripadanya hendaklah dalam bahasa kebangsaan.

Institusi perantaraan diberi kuasa untuk menjalankan perniagaan

120. (1) Apabila dinamakan sedemikian, dan selama tempoh penamaan itu berterusan, suatu institusi perantaraan hendaklah disifatkan sebagai telah diberi suatu lesen atau pendaftaran, mengikut yang berkenaan, untuk menjalankan perniagaan sebagai—

- (a) suatu bank berlesen atau syarikat kewangan berlesen sebagaimana yang ditakrifkan di bawah seksyen 2 Akta Bank dan Institusi Kewangan 1989;
- (b) suatu bank Islam sebagaimana yang ditakrifkan di bawah seksyen 2 Akta Bank Islam 1983;
- (c) suatu syarikat insurans; atau
- (d) suatu pengendali takaful.

(2) Institusi perantaraan tidak dikehendaki membayar apa-apa fi berhubung dengan lesen atau pendaftaran itu.

Ketidapkapaian kehendak

121. Suatu institusi perantaraan adalah terkecuali daripada apa-apa kehendak di bawah atau yang dibuat menurut Akta Bank Dan Institusi Kewangan 1989, Akta Bank Islam 1983, Akta Insurans 1996 atau Akta Takaful 1984 dan hendaklah diberi apa-apa kelulusan atau disediakan dengan apa-apa syor, sebagaimana yang dipersetujui dalam suatu perjanjian perikatan strategik antara Perbadanan dengan Bank Negara Malaysia.

Institusi perantaraan bukan majikan pengganti

122. Jika suatu institusi perantaraan menjadi majikan mana-mana orang yang merupakan pekerja atau bekas pekerja suatu institusi anggota, institusi perantaraan tidaklah—

- (a) dianggap sebagai majikan yang menggantikan institusi anggota itu;
- (b) bertanggung bagi apa-apa obligasi berkenaan dengan pekerja atau bekas pekerja institusi anggota atau mana-mana pendahulu institusi anggota yang wujud sebelum institusi perantaraan menjadi majikan orang itu atau yang berkenaan dengan apa-apa pelan pencen atau pelan manfaat selepas pekerjaan yang lain bagi pekerja atau bekas pekerja institusi anggota atau penakat mereka; atau
- (c) bertanggung bagi apa-apa jumlah wang yang dikira dengan merujuk kepada suatu tempoh masa sebelum institusi perantaraan menjadi majikan orang yang berkenaan.

Kuasa memberikan arahan

123. Perbadanan boleh memberikan arahan kepada lembaga pengarah institusi perantaraan dan lembaga pengarah hendaklah melaksanakan arahan demikian.

Pengambilalihan sebahagian liabiliti deposit yang tidak diinsuranskan atau manfaat yang tidak dilindungi

124. (1) Walau apa pun mana-mana undang-undang atau kontrak, jika Perbadanan menyebabkan sebahagian liabiliti deposit yang tidak diinsuranskan oleh Perbadanan atau sebahagian liabiliti manfaat takaful atau manfaat insurans yang tidak dilindungi oleh Perbadanan dipindahkan kepada suatu institusi perantaraan, institusi perantaraan itu adalah disubrogasi kepada semua hak dan kepentingan pemiutang berhubungan dengan keseluruhan liabiliti itu dan boleh mengambil tindakan atas nama institusi perantaraan atau nama pemiutang.

(2) Apabila sahaja institusi perantaraan telah menerima suatu amaun yang bersamaan dengan bahagian liabiliti yang telah diambil alih itu, hak dan kepentingan pemiutang berhubungan dengan baki liabiliti itu hendaklah kembali kepada pemiutang itu, tanpa apa-apa tindakan pindahan atau formaliti yang lain.

Penggantungan berkenaan dengan institusi perantaraan

125. Jika suatu subsidiari Perbadanan dinamakan sebagai institusi perantaraan—

- (a) tiada tindakan, guaman atau prosiding di mana-mana mahkamah atau tribunal boleh dimulakan atau diteruskan terhadap institusi perantaraan atau berkenaan dengan asetnya;
- (b) tiada penahanan, garnisan, pelaksanaan atau cara lain untuk menguatkuasakan penghakiman, award atau perintah terhadap institusi perantaraan atau asetnya boleh dibuat atau diteruskan; dan
- (c) tiada pemiutang institusi perantaraan mempunyai apa-apa remedi terhadap institusi perantaraan atau asetnya,

selama tempoh sembilan puluh hari selepas penamaan dibuat.

Notis mengenai niat untuk meneruskan prosiding

126. Jika, menurut kuasa suatu surat cara pindah milik, institusi anggota lain atau suatu institusi perantaraan menjadi pengganti dalam apa-apa tindakan, guaman atau prosiding oleh atau terhadap suatu institusi anggota (sama ada secara kehakiman, pentadbiran atau pengawalseliaan), prosiding itu tidak boleh diteruskan oleh mana-mana pihak selain institusi itu sebagai pengganti kecuali ia telah diberi notis selama sembilan puluh hari mengenai cadangan untuk meneruskan prosiding itu, dan jika masa yang dibenarkan untuk mengambil apa-apa langkah dalam prosiding akan habis tempoh sebelum berakhirnya tempoh notis itu, maka, walau apa pun yang bertentangan dalam mana-mana undang-undang yang lain, masa itu adalah disifatkan sebagai dilanjutkan sehingga hari kelima mahkamah berurusan selepas tempoh notis itu berakhir.

Bantuan kepada institusi perantaraan

127. (1) Perbadanan boleh, dalam apa-apa cara yang difikirkannya patut, memberikan apa-apa bantuan kewangan kepada institusi perantaraan sebagaimana yang difikirkan sesuai oleh Perbadanan.

(2) Suatu institusi perantaraan hendaklah, apabila dituntut atau pada masa lain yang ditentukan oleh Perbadanan, membayar atau membayar balik kepada Perbadanan—

- (a) apa-apa pinjaman atau peminjaman lain yang diadakan oleh Perbadanan kepada atau disebabkan oleh institusi perantaraan;
- (b) amaun apa-apa bantuan kewangan lain yang diberikan oleh Perbadanan kepada atau disebabkan oleh institusi perantaraan;
- (c) kos kepada Perbadanan bagi apa-apa pinjaman atau peminjaman lain yang ditanggungnya untuk memberikan bantuan kewangan kepada atau disebabkan oleh institusi perantaraan;
- (d) amaun apa-apa kerugian nilai pelaburan apa-apa dana Perbadanan yang digunakan untuk memberikan bantuan kewangan kepada atau disebabkan oleh institusi perantaraan;
- (e) kos perbelanjaan sendiri atau overhead Perbadanan bagi menyediakan apa-apa perkhidmatan atau meminjamkan mana-mana pekerjanya kepada institusi perantaraan; dan
- (f) apa-apa kos lain, termasuk cukai pendapatan atau cukai lain, yang Perbadanan tidak akan tanggung jika tidak kerana tindakan yang diambilnya di bawah seksyen 99 atau selainnya yang berhubungan dengan institusi perantaraan.

Perbadanan boleh memegang syer institusi anggota

128. Walau apa pun subperenggan 25(1)(a)(iii), Perbadanan boleh memegang—

- (a) syer bekas institusi perantaraan; atau
- (b) syer mana-mana orang lain yang diterima oleh Perbadanan, sama ada secara langsung atau daripada suatu institusi perantaraan akibat jualan atau pelupusan lain syer institusi perantaraan atau jualan atau pelupusan lain aset institusi perantaraan oleh Perbadanan.

Penggulangan institusi anggota atas permohonan Perbadanan

129. Walau apa pun seksyen 217 dan 218 dan subseksyen 221(1) Akta Syarikat 1965, dan seksyen 114 Akta Insurans 1996, Mahkamah Tinggi hendaklah membuat suatu perintah penggulangan berkenaan dengan suatu institusi anggota menurut petisyen yang dikemukakan oleh Perbadanan di bawah perenggan 99(1)(e).

Disifatkan sebagai pemiutang

130. Jika suatu petisyen bagi penggulangan suatu institusi anggota dikemukakan oleh seseorang selain Bank Negara Malaysia, Perbadanan hendaklah disifatkan bagi segala maksud sebagai seorang pemiutang.

Objektif pelikuidasi apabila menggulungkan institusi anggota

131. (1) Walau apa pun mana-mana undang-undang lain, seorang pelikuidasi yang dilantik berkenaan dengan penggulangan suatu institusi anggota hendaklah mengambil kira objektif yang berikut:

- (a) untuk bekerjasama dengan Perbadanan bagi maksud memastikan bahawa—
 - (i) setiap pendeposit yang mempunyai suatu deposit diinsuranskan, sebagaimana yang ditentukan oleh Perbadanan; atau
 - (ii) setiap benefisiari takaful atau orang diinsuranskan yang mempunyai suatu manfaat dilindungi, sebagaimana yang ditentukan oleh Perbadanan,

secepat yang dapat dilaksanakan—

- (A) dipastikan liabiliti deposit atau liabiliti manfaat takaful atau insurans yang berkaitan itu dipindahkan kepada dan diambil alih oleh orang lain; atau

(B) menerima bayaran daripada, atau yang dibuat bagi pihak, Perbadanan; dan

(b) untuk menggulung hal ehwal institusi anggota dalam cara yang dibentuk untuk mencapai keputusan yang terbaik bagi semua pemiutang institusi anggota.

(2) Objektif dalam perenggan (1)(a) diberi keutamaan berbanding dengan objektif dalam perenggan (1)(b) dan seorang pelikuidasi hendaklah mula mengusahakan kedua-dua objektif serta-merta apabila dilantik.

Pelantikan dan saraan pelikuidasi yang dilantik berkenaan dengan institusi anggota

132. (1) Atas suatu petisyen bagi penggulangan suatu institusi anggota, kecuali jika petisyen itu dikemukakan oleh Bank Negara Malaysia, dan tertakluk kepada seksyen 228 Akta Syarikat 1965, Mahkamah hendaklah melantik sebagai pelikuidasi mana-mana orang yang ditentukan oleh Perbadanan dalam petisyennya atau, jika Perbadanan bukan pempetisyen, permohonannya.

(2) Atas suatu permohonan Perbadanan, Mahkamah hendaklah melantik sebagai pelikuidasi mana-mana orang yang ditentukan oleh Perbadanan dalam permohonannya—

(a) untuk mengisi suatu kekosongan; atau

(b) untuk memecat dan menggantikan seorang pelikuidasi yang dilantik di bawah subseksyen (1) atau atas petisyen penggulangan selain yang dikemukakan oleh Bank Negara Malaysia.

(3) Walau apa pun subseksyen 232(3) Akta Syarikat 1965, dan kecuali jika petisyen bagi penggulangan dikemukakan oleh Bank Negara Malaysia, dalam penggulangan suatu institusi anggota, Mahkamah hendaklah menentukan saraan pelikuidasi atas syor Perbadanan, dan tiada orang selain Perbadanan boleh memohon kepada Mahkamah untuk mengkaji semula saraan pelikuidasi.

Penyeliaan Perbadanan

133. Tertakluk kepada perintah Mahkamah dan walau apa pun subseksyen 237(4) Akta Syarikat 1965, seorang pelikuidasi, selain Pegawai Penerima, yang dilantik berkenaan dengan penggulangan suatu institusi anggota atas suatu petisyen yang dikemukakan oleh seseorang selain Bank Negara Malaysia, hendaklah menjalankan fungsinya di bawah arahan dan penyeliaan Perbadanan.

Bab 4

Peruntukan khusus mengenai penggulangan anggota penerima deposit

Aturan bayaran dalam penggulangan anggota penerima deposit

134. (1) Jika suatu anggota penerima deposit digulung—

(a) hasil daripada likuidasi—

- (i) aset Islam hendaklah digunakan untuk membayar apa-apa deposit Islam; dan
- (ii) aset konvensional hendaklah digunakan untuk membayar apa-apa deposit konvensional; dan

(b) mana-mana lebih selepas membayar—

- (i) deposit Islam di bawah subperenggan (a)(i) hendaklah digunakan untuk membayar apa-apa deposit konvensional; dan
- (ii) deposit konvensional di bawah subperenggan (a)(ii) hendaklah digunakan untuk membayar apa-apa deposit Islam.

(2) Dalam penggulangan suatu anggota penerima deposit—

(a) tertakluk kepada perenggan (b), liabiliti deposit anggota penerima deposit hendaklah dibayar secara keutamaan mendahului semua liabiliti tidak bercagar lain; dan

(b) liabiliti yang berikut hendaklah dibayar secara keutamaan mendahului liabiliti deposit—

- (i) pertama, semua kos, caj dan perbelanjaan pelikuidasi termasuk saraannya dan apa-apa kos yang ditanggung dalam menjalankan kuasa dan melaksanakan tugasnya sebagai pelikuidasi; dan

- (ii) kedua, hutang keutamaan yang dinyatakan dalam perenggan 292(1)(b) hingga (f) Akta Syarikat 1965 dan hutang kepada Kerajaan di bawah seksyen 10 Akta Prosiding Kerajaan 1956 [*Akta 359*].

(3) Dalam penggulungan suatu anggota penerima deposit, aturan bayaran bagi deposit Islam adalah seperti yang berikut:

- (a) pertama, deposit Islam berasaskan jagaan; dan
- (b) kedua, deposit Islam lain, yang boleh dibahagikan kepada kategori berbeza dan diberi keutamaan antara kategori itu melalui peraturan-peraturan yang dibuat di bawah seksyen 209.

Bab 5

Peruntukan khusus mengenai penggulungan anggota penanggung insurans

Tafsiran

135. (1) Bagi maksud Bab ini—

- (a) sebutan mengenai aset pengendali takaful tidak termasuk apa-apa aset dana takaful; dan
- (b) sebutan mengenai aset syarikat insurans tidak termasuk apa-apa aset dana insurans.

(2) Dalam penggulungan suatu pengendali takaful, aset dana takaful termasuklah apa-apa amaun yang diberikan oleh pengendali takaful untuk memenuhi apa-apa kekurangan dalam dana takaful sebelum penggulungan itu.

Penggulungan anggota penanggung insurans atas permohonan oleh orang selain Perbadanan

136. Jika suatu petisyen bagi penggulungan suatu anggota penanggung insurans dikemukakan oleh seseorang selain Perbadanan, Perbadanan hendaklah menjadi pihak kepada prosiding penggulungan itu dan—

- (a) orang itu hendaklah menyerahkan suatu salinan petisyen itu kepada Perbadanan pada masa yang sama ia dikemukakan;

- (b) Perbadanan berhak untuk hadir dan didengar dalam semua prosiding yang berhubungan dengan petisyen itu dan untuk memanggil, memeriksa dan memeriksa balas mana-mana saksi; dan
- (c) Perbadanan, jika difikirkannya patut, boleh menyokong atau menentang petisyen itu.

Notis prosiding penggulungan oleh orang selain Perbadanan

137. Jika suatu petisyen bagi penggulungan suatu anggota penanggung insurans dikemukakan oleh seorang selain Perbadanan, orang itu—

- (a) hendaklah memberi Perbadanan notis mengenai semua prosiding yang berhubungan dengan petisyen itu, termasuklah prosiding di bawah seksyen 243 dan 249 dan subseksyen 236(3), 277(2), 277(3) dan 277(4) Akta Syarikat 1965; dan
- (b) hendaklah menyerahkan kepada Perbadanan salinan dokumen dan rekod yang berhubungan dengan prosiding pada masa yang sama ia diserahkan simpan dengan Mahkamah Tinggi atau disampaikan kepada mana-mana pihak kepada prosiding itu.

Laporan dan akaun pelikuidasi

138. Dalam penggulungan suatu anggota penanggung insurans, pelikuidasi hendaklah mengemukakan kepada Perbadanan—

- (a) suatu salinan laporan yang disebut dalam subseksyen 235(3) Akta Syarikat 1965 pada masa yang sama dia mengemukakannya kepada Mahkamah;
- (b) suatu salinan borang yang ditetapkan yang disebut dalam subseksyen 281(1) Akta Syarikat 1965 pada masa yang sama dia mengemukakannya kepada Pegawai Penerima; dan
- (c) apa-apa dokumen lain sebagaimana yang ditentukan oleh Perbadanan.

Penyata hal ehwal

139. Penyata hal ehwal suatu anggota penanggung insurans pada tarikh perintah penggulangan yang dibuat di bawah seksyen 234 Akta Syarikat 1965 hendaklah dikemukakan kepada Perbadanan pada masa yang sama ia dikemukakan kepada Pegawai Penerima atau pelikuidasi.

Aturan bayaran tertentu dalam penggulangan suatu anggota penanggung insurans

140. (1) Dalam penggulangan suatu pengendali takaful, hendaklah dibayar daripada aset pengendali takaful, mendahului liabiliti manfaat takaful dan semua liabiliti tidak bercagar yang lain—

- (a) pertama, semua kos, caj dan perbelanjaan pelikuidasi termasuk saraannya dan apa-apa kos yang ditanggung dalam penjalanan kuasa dan pelaksanaan tugasnya sebagai pelikuidasi; dan
- (b) kedua, hutang keutamaan yang dinyatakan dalam perenggan 292(1)(b) hingga (f) Akta Syarikat 1965 dan hutang kepada Kerajaan di bawah seksyen 10 Akta Prosiding Kerajaan 1956.

(2) Walau apa pun subseksyen 247(3) Akta Syarikat 1965, jika aset pengendali takaful adalah tidak mencukupi untuk menjelaskan semua kos, caj, perbelanjaan dan hutang itu, maka baki kos, caj, perbelanjaan dan hutang itu hendaklah dibayar daripada aset satu dana takaful atau lebih, mendahului liabiliti manfaat takaful yang berkaitan, mengikut perkadaran sebagaimana yang diperintahkan oleh Mahkamah.

(3) Dalam penggulangan suatu syarikat insurans, hendaklah dibayar daripada aset syarikat insurans, mendahului liabiliti manfaat insurans dan semua liabiliti tidak bercagar lain—

- (a) pertama, semua kos, caj dan perbelanjaan pelikuidasi termasuk saraannya dan apa-apa kos yang ditanggung dalam penjalanan kuasa dan pelaksanaan tugasnya sebagai pelikuidasi; dan
- (b) kedua, hutang keutamaan yang dinyatakan dalam perenggan 292(1)(b) hingga (f) Akta Syarikat 1965 dan hutang kepada Kerajaan di bawah seksyen 10 Akta Prosiding Kerajaan 1956.

(4) Walau apa pun subseksyen 247(3) Akta Syarikat 1965, jika aset syarikat insurans adalah tidak mencukupi untuk menjelaskan semua kos, caj, perbelanjaan dan hutang itu, maka baki kos, caj, perbelanjaan dan hutang itu hendaklah dibayar daripada aset satu dana insurans atau lebih, mendahului liabiliti manfaat insurans yang berkaitan, mengikut perkadaran sebagaimana yang diperintahkan oleh Mahkamah.

Penggunaan dana takaful atau dana insurans dalam penggulangan suatu pengendali takaful atau syarikat insurans

141. (1) Dalam penggulangan suatu pengendali takaful, tertakluk kepada subseksyen 140(1) dan (2), aset suatu dana takaful hendaklah digunakan untuk menjelaskan liabiliti manfaat takaful terhadap dana itu mendahului semua liabiliti tidak bercagar lain.

(2) Tertakluk kepada subseksyen (1)—

- (a) aset suatu dana takaful yang disenggarakan oleh pengendali takaful berkenaan dengan perniagaan perpaduan keluarga atau takaful am hendaklah digunakan untuk menjelaskan liabiliti dana itu;
- (b) jika aset suatu dana takaful melebihi liabilitinya, lebih aset itu hendaklah dibahagikan kepada pemunya sijil dana itu mengikut perkadaran hak mereka di bawah sijil takaful mereka masing-masing;
- (c) apa-apa kekurangan yang tinggal dalam satu dana takaful atau lebih selepas penggunaan aset dana-dana takaful itu mengikut perenggan (a) dan, jika berkenaan, subseksyen (3), hendaklah dibayar daripada aset pengendali takaful mengikut subseksyen 142(1); dan
- (d) aset suatu dana takaful tidak boleh digunakan untuk menjelaskan suatu liabiliti dana itu bagi suatu amaun yang disebut dalam subseksyen 135(2) melainkan jika semua liabiliti lain dana itu, dan semua amaun lain yang kena dibayar daripada aset dana itu, telah terlebih dijelaskan atau dibayar sepenuhnya.

(3) Walau apa pun perenggan (2)(b), apa-apa lebih aset satu dana takaful atau lebih hendaklah digunakan untuk menjelaskan liabiliti mana-mana dana atau dana-dana takaful yang asetnya adalah kekurangan jika ia diperuntukkan secara nyata mengikut terma sijil takaful dana atau dana-dana takaful yang mula-mula disebut itu.

(4) Dalam penggulungan pengendali takaful, manfaat takaful boleh dibahagikan kepada kategori berbeza dan diberi keutamaan di antara kategori itu melalui peraturan-peraturan yang dibuat di bawah seksyen 209.

(5) Dalam penggulungan suatu syarikat insurans, tertakluk kepada subseksyen 140(3) dan (4), aset suatu dana insurans hendaklah digunakan untuk menjelaskan liabiliti manfaat insurans dana itu mendahului semua liabiliti tidak bercagar yang lain.

(6) Tertakluk kepada subseksyen (5)—

- (a) aset suatu dana insurans yang disenggara oleh syarikat insurans berkenaan dengan perniagaan insurans hayat atau amnya hendaklah digunakan untuk menjelaskan liabiliti dana itu;
- (b) jika aset satu dana insurans atau lebih melebihi liabiliti dana atau dana-dana itu, lebih aset itu hendaklah digunakan untuk menjelaskan liabiliti mana-mana dana atau dana-dana insurans lain yang asetnya adalah kekurangan; dan
- (c) apa-apa kekurangan yang tinggal dalam satu dana insurans atau lebih selepas penggunaan aset dana-dana insurans itu di bawah perenggan (a) dan (b), hendaklah dibayar daripada aset syarikat insurans mengikut subseksyen 142(2).

(7) Bagi maksud subseksyen (3), jika lebih aset dua dana takaful atau lebih digunakan, lebih aset itu hendaklah digunakan bersekadar dengan amaun lebih itu dan jika lebih aset itu digunakan untuk menjelaskan liabiliti dua dana takaful atau lebih yang asetnya adalah kekurangan, lebih aset itu hendaklah digunakan bersekadar dengan amaun kekurangan itu, melainkan jika terma dana-dana takaful yang mula-mula disebut itu memperuntukkan secara nyata bagi penggunaan lebih aset itu dengan cara yang lain, dalam hal itu lebih aset itu hendaklah digunakan mengikut terma itu.

(8) Bagi maksud perenggan (6)(b), jika lebih aset dua dana insurans atau lebih digunakan, lebih aset itu hendaklah digunakan bersekadar dengan amaun lebih itu dan jika lebih aset itu digunakan untuk menjelaskan liabiliti dua dana insurans atau lebih yang asetnya adalah kekurangan, lebih aset itu hendaklah digunakan bersekadar dengan amaun kekurangan itu.

Aturan bayaran berhubung dengan aset pengendali takaful atau syarikat insurans

142. (1) Dalam penggulungan suatu pengendali takaful, apa-apa defisit yang tinggal dalam suatu dana takaful selepas penggunaan aset dana-dana takaful mengikut perenggan 141(2)(a) dan, jika berkenaan, subseksyen 141(3), hendaklah dijelaskan dengan menggunakan aset pengendali takaful itu, dan liabiliti yang tidak dijelaskan kepada pemunya sijil atau benefisiari takaful lain di bawah suatu sijil hendaklah diberi keutamaan mendahului semua liabiliti tidak bercagar yang lain kecuali kos, caj, perbelanjaan dan hutang yang disebut dalam subseksyen 140(1).

(2) Dalam penggulungan suatu syarikat insurans, apa-apa defisit yang tinggal dalam suatu dana insurans selepas penggunaan aset dana-dana insurans mengikut perenggan 141(6)(a) dan (b) hendaklah dijelaskan dengan menggunakan aset syarikat insurans itu, dan liabiliti yang tidak dijelaskan kepada pemunya polisi atau orang diinsuranskan lain di bawah suatu polisi hendaklah diberi keutamaan mendahului semua liabiliti tidak bercagar yang lain kecuali kos, caj, perbelanjaan dan hutang yang disebut dalam subseksyen 140(3).

Penepian beban bukti hutang yang ketat

143. Dalam penggulungan anggota penanggung insurans, jika pelikuidasi mendapati bahawa oleh sebab kekurangan dokumen, atau apa-apa hal keadaan lain, kesusahan akan wujud jika dia menghendaki beban bukti hutang yang ketat, dia boleh bertindak atas apa-apa keterangan yang difikirkannya patut dan pembayaran hutang yang dibuat secara suci hati oleh pelikuidasi kepada mana-mana orang yang berhak kepada pembayaran itu hendaklah melepaskan pelikuidasi daripada semua liabiliti berkenaan dengan hutang itu.

Ketidapkapaian peruntukan tertentu dalam Akta Syarikat 1965, Akta Insurans 1996 dan Akta Takaful 1984

144. (1) Atas suatu petisyen bagi penggulungan anggota penanggung insurans, kecuali jika petisyen itu dikemukakan oleh Bank Negara Malaysia, peruntukan statutori yang berikut tidak terpakai:

(a) seksyen 176, 237, 241, 242, 246, 267 dan 278 Akta Syarikat 1965;

- (b) seksyen 110, 112 hingga 119 dan 122 Akta Insurans 1996; dan
- (c) seksyen 48 dan 49 Akta Takaful 1984.

(2) Walau apa pun seksyen 67 Akta Takaful 1984 dan seksyen 199 Akta Insurans 1996, jika terdapat apa-apa percanggahan atau ketidakselarasan antara peruntukan Akta ini dengan peruntukan Akta-Akta itu, peruntukan Akta ini, dan Akta Syarikat 1965 setakat yang terpakai, hendaklah mengatasi.

BAHAGIAN VIII

PERLINDUNGAN PENSTABILAN

Tafsiran

145. Dalam Bahagian ini—

- (a) “tempoh perlindungan penstabilan” ertinya tempoh perintah perlindungan penstabilan termasuk apa-apa perubahan kepada tempoh itu sebagaimana yang ditetapkan oleh Menteri di bawah subseksyen 146(5);
- (b) “perbadanan yang ditetapkan” ertinya suatu perbadanan, yang tidak disifatkan sebagai suatu institusi anggota di bawah seksyen 36, yang ditetapkan dalam perintah perlindungan penstabilan;
- (c) “peruntukan khas” ertinya peruntukan seksyen 148 hingga 156; dan
- (d) “perlindungan penstabilan” ertinya apa-apa insurans atau perlindungan yang diperuntukkan mengikut seksyen 146.

Perintah perlindungan penstabilan

146. (1) Bagi maksud melindungi dan menggalakkan atau mengekalkan kestabilan sistem kewangan dan menggalakkan atau mengekalkan keyakinan orang awam, Perbadanan diberi kuasa untuk memperuntukkan perlindungan penstabilan.

(2) Suatu perlindungan penstabilan adalah tertakluk kepada perintah perlindungan penstabilan yang ditetapkan oleh Menteri selepas berunding dengan Perbadanan dan Bank Negara Malaysia (disebut “perintah perlindungan penstabilan” dalam Bahagian ini).

(3) Walau apa pun apa-apa yang bertentangan yang terkandung dalam Akta ini, perintah perlindungan penstabilan boleh memperuntukkan satu atau lebih yang berikut:

- (a) insurans bagi suatu deposit pada suatu amaun maksimum yang lebih besar daripada yang selainnya terpakai dalam seksyen 42;
- (b) perlindungan bagi suatu manfaat takaful atau insurans dilindungi pada suatu amaun maksimum yang lebih besar daripada yang selainnya terpakai dalam seksyen 69;
- (c) insurans, secara keseluruhannya atau sebahagiannya, terhadap apa-apa liabiliti atau surat cara kewangan suatu anggota penerima deposit yang selainnya tidak diinsuranskan berbangkit daripada pemakaian subsubperenggan 41(a)(A) hingga (E) atau peruntukan perenggan 46(a);
- (d) perlindungan, secara keseluruhannya atau sebahagiannya, terhadap suatu manfaat takaful atau insurans di bawah suatu sijil atau polisi yang dikeluarkan oleh suatu anggota penanggung insurans yang selainnya bukan suatu manfaat takaful atau insurans dilindungi dalam pengertian Akta ini;
- (e) insurans, secara keseluruhannya atau sebahagiannya, terhadap apa-apa liabiliti atau surat cara kewangan suatu perbadanan yang ditetapkan yang sama atau serupa jenisnya dengan jenis liabiliti atau surat cara kewangan suatu anggota penerima deposit, sama ada termasuk atau tidak termasuk dalam takrif “deposit” dalam seksyen 41 atau peruntukan perenggan 46(a); dan
- (f) perlindungan, secara keseluruhannya atau sebahagiannya, terhadap apa-apa obligasi suatu perbadanan yang ditetapkan yang sama atau serupa jenisnya dengan suatu jenis manfaat yang ditawarkan oleh anggota penanggung insurans, sama ada atau tidak ia selainnya suatu manfaat takaful atau insurans dalam pengertian Akta ini.

(4) Suatu perintah perlindungan penstabilan hendaklah bersifat sementara dan hendaklah berkuat kuasa bagi tempoh yang ditetapkan dalam perintah itu.

(5) Bagi maksud yang dinyatakan dalam subseksyen (1), Menteri boleh, selepas berunding dengan Perbadanan dan Bank Negara Malaysia, melalui perintah yang disiarkan dalam *Warta*, meminda perintah perlindungan penstabilan termasuk mengubah tempoh perintah perlindungan penstabilan.

Pemakaian peruntukan khas

147. (1) Peruntukan khas hendaklah terpakai apabila suatu perintah perlindungan penstabilan sedang berkuat kuasa.

(2) Tertakluk kepada seksyen 157, peruntukan khas hendaklah terhenti terpakai apabila habis tempoh perlindungan penstabilan.

Perlindungan penstabilan

148. (1) Perbadanan hendaklah memperuntukkan perlindungan penstabilan mengikut cara yang sama sebagaimana Perbadanan memperuntukkan insurans deposit dalam Bab 1 Bahagian IV atau perlindungan manfaat takaful atau insurans dalam Bab 1 Bahagian V.

(2) Apa-apa liabiliti atau surat cara kewangan atau manfaat takaful atau insurans yang menjadi hal perkara suatu perintah perlindungan penstabilan dan yang selainnya bukan suatu deposit atau manfaat takaful atau insurans dalam pengertian Akta ini, adalah disifatkan sebagai suatu deposit atau manfaat takaful atau insurans dan seseorang yang dengannya obligasi itu terhutang adalah disifatkan sebagai seorang pendeposit atau benefisiari takaful atau orang diinsuranskan bagi segala maksud Akta ini.

Fi atau premium bagi perlindungan penstabilan

149. (1) Jika suatu perlindungan penstabilan diperuntukkan, institusi anggota atau perbadanan yang ditetapkan hendaklah membayar kepada Perbadanan apa-apa fi atau premium sebagaimana yang ditentukan oleh Menteri.

(2) Walau apa pun mana-mana peruntukan lain dalam Akta ini, institusi anggota atau perbadanan yang ditetapkan hendaklah membayar fi atau premium di bawah subseksyen (1) dalam apa-apa tempoh dan mengikut apa-apa cara sebagaimana yang difikirkan sesuai oleh Perbadanan.

Pemakaian peruntukan berkenaan dengan institusi anggota

150. (1) Jika suatu perlindungan penstabilan diperuntukkan berkenaan dengan suatu perbadanan yang ditetapkan, kesemua peruntukan Akta ini yang terpakai bagi suatu institusi anggota hendaklah terpakai bagi suatu perbadanan yang ditetapkan.

(2) Walau apa pun subseksyen (1)—

- (a) perenggan 14(1)(b) tidaklah terpakai bagi seorang pegawai perbadanan yang ditetapkan;
- (b) Bab 2 Bahagian IV tidaklah terpakai bagi suatu perbadanan yang ditetapkan; dan
- (c) suatu perbadanan yang ditetapkan tidak boleh mengemukakan dirinya sebagai suatu institusi anggota dan seksyen 192 hendaklah terpakai bagi perbadanan itu.

Fi atau premium disifatkan sebagai diperoleh

151. Apa-apa fi atau premium berkenaan dengan perlindungan penstabilan hendaklah disifatkan sebagai terperoleh sepenuhnya apabila kena dibayar dan tidak boleh dibayar balik.

Perluasan pemakaian seksyen 51 atau 75

152. Jika suatu perlindungan penstabilan diperuntukkan kepada suatu institusi anggota, seksyen 51 atau 75 boleh digunakan oleh Perbadanan jika pada pendapat Perbadanan, institusi anggota itu telah tidak atau tidak menyenggara rekod deposit atau manfaat takaful atau insurans yang sepatutnya atau institusi anggota itu membuat salah nyataan, melalui apa-apa perbuatan atau peninggalan, mengenai apa-apa maklumat yang digunakan sebagai asas bagi pentaksiran apa-apa fi atau premium.

Surcaj

153. (1) Walau apa pun bayaran apa-apa fi atau premium berkenaan dengan perlindungan penstabilan, Perbadanan boleh mentaksirkan dan memungut suatu surcaj di bawah Bahagian ini daripada suatu perbadanan yang ditetapkan bagi apa-apa perbuatan atau peninggalan yang dinyatakan di bawah subseksyen (3).

(2) Surcaj di bawah subseksyen (1) dalam mana-mana tahun tertentu tidak boleh melebihi—

(a) 0.5 peratus setahun daripada jumlah liabiliti atau surat cara kewangan perbadanan yang ditetapkan yang diinsuranskan oleh Perbadanan di bawah perlindungan penstabilan; atau

(b) sejumlah satu juta ringgit,

mengikut mana-mana yang lebih tinggi.

(3) Jika pada pendapat Perbadanan, perbadanan yang ditetapkan—

(a) telah tidak atau tidak mematuhi mana-mana peraturan-peraturan, kaedah-kaedah, perintah, undang-undang kecil, pemberitahuan, garis panduan, pekeliling atau nota yang berhubungan dengan amalan kewangan dan perniagaan yang wajar yang dikeluarkan oleh Bank Negara Malaysia atau mana-mana aku janji yang diberikan kepada atau perjanjian yang dibuat dengan Bank Negara Malaysia;

(b) telah tidak atau tidak mematuhi terma dan syarat keanggotaan, mana-mana aku janji yang diberikan kepada atau perjanjian yang dibuat dengan Perbadanan, atau mana-mana peraturan-peraturan, kaedah-kaedah, perintah, undang-undang kecil, pemberitahuan, garis panduan, pekeliling atau nota Perbadanan berkenaan dengan perlindungan penstabilan;

(c) telah tidak atau tidak mematuhi permintaan bagi mendapatkan maklumat atau telah menyekat hak untuk mendapatkan akses kepada maklumat oleh Perbadanan, Bank Negara Malaysia atau mana-mana orang yang bertindak bagi pihak Perbadanan, di bawah Akta ini; atau

- (d) telah tidak atau tidak menyenggara rekod deposit atau manfaat takaful atau insurans dengan sepatutnya atau membuat salah nyataan, melalui apa-apa perbuatan atau peninggalan, mengenai apa-apa maklumat, termasuk maklumat mengenai deposit diinsuranskan, liabiliti manfaat dilindungi atau premium bersih yang digunakan sebagai suatu asas bagi pentaksiran apa-apa fi atau premium berkenaan dengan perlindungan penstabilan,

Perbadanan hendaklah—

- (A) jika ia bercadang untuk mengenakan surcaj ke atas perbadanan yang ditetapkan itu, berunding dengan Bank Negara Malaysia tentang alasan untuk mengenakan suatu surcaj dan amaun surcaj itu; dan
- (B) memberi perbadanan yang ditetapkan itu peluang untuk membuat representasi kepada Perbadanan tentang apa-apa cadangan surcaj dalam tempoh tujuh hari dari tarikh notis bertulis yang dikeluarkan oleh Perbadanan kepada perbadanan yang ditetapkan itu.
- (4) Jika Perbadanan menerima representasi daripada perbadanan yang ditetapkan itu dalam tempoh masa yang dinyatakan dalam subperenggan (3)(B), Perbadanan hendaklah menimbang representasi itu dalam memutuskan sama ada untuk mengenakan suatu surcaj dan, jika mengenakan, memutuskan amaun surcaj itu.
- (5) Jika Perbadanan memutuskan untuk mengenakan suatu surcaj, Perbadanan hendaklah mendapatkan kelulusan bertulis daripada Menteri sebelum mengenakan surcaj itu ke atas perbadanan yang ditetapkan itu.
- (6) Suatu surcaj hendaklah dikenakan oleh Perbadanan melalui notis bertulis kepada perbadanan yang ditetapkan itu dan hendaklah kena dibayar kepada Perbadanan dalam tempoh tiga puluh hari dari tarikh notis itu atau apa-apa tempoh lain sebagaimana yang ditentukan oleh Perbadanan.
- (7) Apa-apa pendapat yang dibentuk atau keputusan yang dibuat oleh Perbadanan berhubungan dengan pengenaan atau amaun apa-apa surcaj berkenaan dengan mana-mana perbadanan yang ditetapkan adalah muktamad dan mengikat.

(8) Suatu surcaj yang dibayar kepada Perbadanan di bawah seksyen ini hendaklah dibayar ke dalam dan menjadi sebahagian daripada Kumpulan Wang Disatukan.

Caj lampau tempoh

154. Jika apa-apa fi, premium atau surcaj yang terhutang dan kena dibayar di bawah Bahagian ini belum dibayar oleh suatu institusi anggota atau suatu perbadanan yang ditetapkan pada tarikh ia kena dibayar, amaun yang belum dibayar itu hendaklah, tanpa notis lanjutan disampaikan kepada institusi anggota atau perbadanan yang ditetapkan itu, dinaikkan ke suatu jumlah yang ditentukan oleh Menteri.

Tiada tolakan

155. Melainkan jika Perbadanan bersetuju sebaliknya dalam mana-mana hal tertentu, tiada pembayaran yang terhutang kepada Perbadanan oleh suatu institusi anggota atau perbadanan yang ditetapkan boleh dilepaskan, dikurangkan atau selainnya diselaraskan oleh sebab apa-apa tuntutan yang institusi anggota atau perbadanan yang ditetapkan itu ada terhadap Perbadanan.

Pendanaan dan kerugian

156. (1) Menteri hendaklah—

- (a) memperuntukkan kepada Perbadanan apa-apa dana sebagaimana yang dikehendaki oleh Perbadanan untuk mentadbirkan dan melaksanakan suatu perlindungan penstabilan; atau
- (b) membayar balik kepada Perbadanan apa-apa kerugian yang ditanggung oleh Perbadanan sebagai akibat daripada memperuntukkan perlindungan penstabilan.

(2) Apa-apa peruntukan dana yang dibuat menurut perenggan (1)(a) atau pembayaran balik yang dibuat menurut perenggan (1)(b) hendaklah dipertanggungkan pada Kumpulan Wang Disatukan dan jika peruntukan atau pembayaran balik itu dibuat, Menteri hendaklah menyebabkan suatu penyata mengenai peruntukan dana atau pembayaran balik itu dibentangkan di hadapan Dewan Rakyat pada kesempatan yang paling awal.

(3) Perbadanan hendaklah membayar apa-apa fi atau premium atau amaun lain berkenaan dengan perlindungan penstabilan atau apa-apa bahagiannya sebagaimana yang dipersetujui oleh Menteri dan Perbadanan ke dalam Kumpulan Wang Disatukan.

(4) Bagi maksud perenggan (1)(b), faktor yang hendaklah diambil kira untuk menentukan sama ada Perbadanan telah menanggung suatu kerugian akibat memperuntukkan perlindungan penstabilan adalah seperti yang berikut:

- (a) fi atau premium yang diterima oleh Perbadanan akibat memperuntukkan perlindungan penstabilan;
- (b) kos kepada Perbadanan bagi apa-apa pinjaman atau hutang lain yang ditanggungnya untuk membuat apa-apa bayaran yang disebabkan oleh perlindungan penstabilan;
- (c) fi atau premium atau amaun lain atau apa-apa bahagiannya yang kena dibayar berkenaan dengan perlindungan penstabilan ke dalam Kumpulan Wang Disatukan;
- (d) hasil bersih yang diperoleh oleh Perbadanan yang disebabkan oleh apa-apa bayaran perlindungan penstabilan;
- (e) kerugian nilai pelaburan apa-apa dana Perbadanan yang digunakan untuk membuat apa-apa bayaran perlindungan penstabilan;
- (f) apa-apa kos lain, termasuk cukai pendapatan atau cukai lain, yang ditanggung secara munasabah oleh Perbadanan akibat perlindungan penstabilan dan sebagaimana yang dipersetujui oleh Menteri; dan
- (g) apa-apa faktor lain yang dipersetujui sebagai sesuai oleh Menteri dan Perbadanan.

Pemakaian berterusan peruntukan khas

157. (1) Jika suatu perlindungan penstabilan diperuntukkan oleh Perbadanan kepada suatu institusi anggota di bawah seksyen 146 dan tempoh perlindungan penstabilan itu telah habis tempoh—

- (a) jika, sebelum tempoh perlindungan penstabilan itu habis tempoh, Perbadanan telah menjalankan mana-mana kuasanya di bawah seksyen 25, seksyen 161 atau Bahagian VII

berkenaan dengan institusi anggota itu, peruntukan khas hendaklah terus terpakai bagi dan berkenaan dengan institusi anggota itu seolah-olah tempoh perlindungan penstabilan itu belum habis tempoh; dan

- (b) jika, sebelum tempoh perlindungan penstabilan itu habis tempoh, Perbadanan berkewajipan atau diberi kuasa untuk membuat suatu bayaran perlindungan penstabilan berkenaan dengan institusi anggota, peruntukan khas hendaklah terus terpakai bagi dan berkenaan dengan institusi anggota itu seolah-olah tempoh perlindungan penstabilan itu belum habis tempoh.

(2) Jika suatu perlindungan penstabilan diperuntukkan oleh Perbadanan kepada suatu perbadanan yang ditetapkan dan tempoh perlindungan penstabilan telah habis tempoh—

- (a) perbadanan yang ditetapkan itu hendaklah masih bertanggung bagi semua liabiliti kepada Perbadanan yang ditanggungnya semasa tempoh perbadanan yang ditetapkan itu tertakluk kepada peruntukan yang terpakai bagi suatu institusi anggota menurut kuasa seksyen 150;
- (b) seksyen 193 hingga 201 hendaklah terpakai berkenaan dengan apa-apa perbuatan yang dilakukan oleh perbadanan yang ditetapkan semasa tempoh perbadanan yang ditetapkan itu tertakluk kepada peruntukan yang terpakai bagi suatu institusi anggota menurut kuasa seksyen 150;
- (c) seksyen 202 dan 203 hendaklah terpakai seolah-olah perbadanan yang ditetapkan itu masih tertakluk kepada peruntukan yang terpakai bagi suatu institusi anggota menurut kuasa seksyen 150;
- (d) jika, sebelum tempoh perlindungan penstabilan itu habis tempoh, Perbadanan telah menjalankan mana-mana kuasanya di bawah seksyen 25, seksyen 161 atau Bahagian VII berkenaan dengan perbadanan yang ditetapkan itu, peruntukan khas hendaklah terus terpakai bagi dan berkenaan dengan perbadanan yang ditetapkan itu seolah-olah tempoh perlindungan penstabilan itu belum habis tempoh; dan

- (e) jika, sebelum tempoh perlindungan penstabilan itu habis tempoh, Perbadanan berkewajipan atau diberi kuasa untuk membuat suatu bayaran perlindungan penstabilan berkenaan dengan perbadanan yang ditetapkan, peruntukan khas hendaklah terus terpakai bagi dan berkenaan dengan perbadanan yang ditetapkan itu seolah-olah tempoh perlindungan penstabilan itu belum habis tempoh.

BAHAGIAN IX

KUASA BERHUBUNG DENGAN ASET YANG DIPEROLEH OLEH PERBADANAN

Bab 1

Pemerolehan dan pelupusan oleh Perbadanan

Pemerolehan dan pelupusan aset oleh Perbadanan

158. (1) Tanpa menjejaskan subseksyen 99(5), 115(6) dan 180(5), Perbadanan boleh memperoleh atau melupuskan mana-mana aset —

- (a) menurut peruntukan peletakhakan statutori yang dinyatakan dalam Jadual Ketiga; atau
- (b) mengikut undang-undang am.

(2) Suatu perakuan peletakhakan atau perakuan pindah milik yang dikeluarkan mengikut Jadual Ketiga hendaklah mempunyai kesan yang dinyatakan dalam Jadual Ketiga dan hendaklah mengikat mana-mana orang yang terjejas dengannya.

Hak untuk melupuskan dan mengekalkan nilai harta

159. (1) Walau apa pun mana-mana undang-undang dan sebagai tambahan kepada mana-mana kuasa Perbadanan yang lain yang terdapat di bawah mana-mana kontrak atau undang-undang, Perbadanan sebagai pemegang cagaran atas apa-apa harta, sama ada sebagai pemegang gadaian, pemegang gadai janji, pemegang serah hak, pemegang lien atau selainnya, adalah berhak —

- (a) untuk melupuskan harta itu atau mana-mana bahagian harta itu secara triti persendirian mengikut Jadual Keempat; dan

- (b) jika harta itu terdiri daripada tanah, untuk mengambil segala langkah yang disifatkannya patut untuk mengekalkan nilai tanah itu atau memudahkan pelupusan tanah itu secara triti persendirian mengikut Jadual Keempat, termasuk memasuki tanah itu, sama ada sendirian atau dengan mana-mana orang yang dibenarkan olehnya, untuk memeriksa, melindungi, menjamin selamat, menyenggara atau membaiki tanah itu.

(2) Pemerolehan dan pelupusan harta mengikut Jadual Keempat hendaklah mempunyai kesan yang dinyatakan dalam Jadual itu.

Bab 2

Peruntukan berkaitan dengan konservator

Tafsiran

160. (1) Dalam Bahagian ini, melainkan jika konteksnya menghendaki makna yang lain—

“Bursa Malaysia” ertinya Bursa Malaysia Berhad, suatu syarikat pemegang bursa yang diluluskan di bawah Akta Pasaran Modal dan Perkhidmatan 2007;

“pemiutang bercagar” ertinya seorang yang memegang sebagai cagar bagi suatu liabiliti orang terjejas—

- (a) suatu gadaian yang didaftarkan dengan sewajarnya di bawah Kanun Tanah Negara, Ordinan Tanah Sabah atau Kanun Tanah Sarawak ke atas tanah yang dimiliki oleh orang terjejas;
- (b) suatu gadaian tetap atau terapung atas aku janji atau aset orang terjejas dan yang, jika dikehendaki oleh mana-mana peruntukan Akta Syarikat 1965, telah didaftarkan dengan sewajarnya mengikut peruntukan Akta Syarikat 1965 yang terpakai;
- (c) suatu penyerahhakan oleh orang terjejas atas haknya di bawah suatu perjanjian untuk membeli tanah atau suatu petak bagi suatu bangunan yang dokumen hakmilik keluaran kepada tanah atau hakmilik strata kepada petak bagi bangunan itu belum lagi dikeluarkan pada masa penyerahhakan;

- (d) dokumen hakmilik keluaran kepada mana-mana tanah atau pajakan pendua yang dimiliki oleh orang terjejas dan yang berkenaan dengannya suatu kaveat pemegang lien yang telah dibuat dengan sewajarnya mengikut peruntukan Kanun Tanah Negara;
- (e) suatu gadaian, gadai janji, sandaran atau lien ke atas sekuriti boleh dipasarkan (sebagaimana yang ditakrifkan dalam Akta Syarikat 1965) yang dimiliki oleh orang terjejas dan yang, jika dikehendaki dengan sewajarnya oleh mana-mana peruntukan Akta Syarikat 1965, telah didaftarkan dengan sewajarnya mengikut peruntukan Akta Syarikat 1965 yang terpakai; atau
- (f) suatu gadaian, gadai janji, sandaran atau lien ke atas wang yang diletakkan atas deposit tetap oleh orang terjejas dan yang, jika dikehendaki oleh mana-mana peruntukan Akta Syarikat 1965, telah didaftarkan dengan sewajarnya mengikut peruntukan Akta Syarikat 1965 yang terpakai.

(2) Menteri boleh, atas syor Perbadanan, meminda takrif “pemiutang bercagar” dalam subperenggan (1) melalui notis yang disiarkan dalam *Warta*.

Kuasa untuk melantik konservator dan konservator tambahan, dsb.

161. (1) Bagi maksud Akta ini, Perbadanan boleh melantik seorang konservator untuk mentadbirkan orang terjejas jika ia berpuas hati bahawa—

- (a) orang terjejas utama—
 - (i) tidak berupaya atau berkemungkinan tidak berupaya untuk membayar hutangnya; atau
 - (ii) tidak berupaya atau berkemungkinan tidak berupaya untuk memenuhi obligasinya kepada pemiutangnya;

- (b) kemandirian orang terjejas utama dan keseluruhan atau mana-mana bahagian asetnya sebagai usaha berterusan boleh tercapai;
- (c) penghasilan yang lebih menguntungkan akan aset orang terjejas utama boleh dicapai selain suatu penggulungan; atau
- (d) pelantikan itu boleh mencapai penghasilan yang lebih menguntungkan atau suatu penyelesaian yang lebih cepat akan suatu kewajipan atau liabiliti yang terhutang oleh mana-mana orang kepada Perbadanan atau mana-mana subsidiari Perbadanan, sama ada pada masa sekarang atau pada masa hadapan, atau sama ada terletak hak atau kontingen.

(2) Perbadanan boleh melantik seorang konservator atau lebih bagi orang terjejas.

(3) Perbadanan boleh pada bila-bila masa selepas pelantikan mana-mana konservator di bawah subseksyen (2) melantik konservator tambahan dan boleh, pada bila-bila masa, menamatkan mana-mana konservator sedia ada dan melantik seorang konservator baru untuk menggantikannya.

(4) Tiada apa-apa jua dalam subseksyen (3) boleh dikira sebagai menamatkan pentadbiran mana-mana orang terjejas melainkan jika ditamatkan sedemikian oleh Perbadanan.

(5) Apa-apa keputusan Perbadanan yang berhubungan dengan pelantikan seorang konservator, seorang konservator tambahan, penamatan mana-mana konservator sedia ada dan pelantikan seorang konservator baru bagi menggantikannya, adalah muktamad dan mengikat.

(6) Seorang konservator, dalam menjalankan kuasanya di bawah Bahagian ini, tidak dikehendaki untuk memberitahu atau mendapatkan kelulusan pemegang syer atau pemiutang orang terjejas dalam suatu mesyuarat agung atau selainnya walau apa pun apa-apa rukun undang-undang, kontrak atau apa-apa jua dalam mana-mana undang-undang termasuk Akta Syarikat 1965 atau apa-apa jua dalam dokumen konstituen orang terjejas itu.

(7) Mana-mana orang yang melanggar—

(a) seksyen 173 atau 177; atau

(b) subseksyen 170(1), 174(1), 175(2), 176(1), 179(1) atau 183(1),

melakukan suatu kesalahan dan boleh, apabila disabitkan, didenda tidak melebihi tiga juta ringgit atau dipenjarakan selama tempoh tidak melebihi tiga tahun atau kedua-duanya.

Kelayakan konservator

162. (1) Tiada seorang pun boleh dilantik sebagai seorang konservator melainkan jika—

(a) orang itu ialah orang sebenar; dan

(b) dia telah bersetuju secara bertulis mengenai pelantikannya dan tidak menarik balik persetujuannya pada tarikh pelantikannya.

(2) Orang yang berikut layak untuk dilantik sebagai konservator:

(a) juruaudit syarikat yang diluluskan di bawah Akta Syarikat 1965;

(b) seorang yang mempunyai, pada pendapat Perbadanan, pengalaman yang dikehendaki; atau

(c) seorang yang, pada pendapat Perbadanan, berupaya melaksanakan tugas seorang konservator.

(3) Orang yang berikut tidak layak untuk dilantik sebagai konservator:

(a) suatu perbadanan;

(b) seorang bankrap yang belum dilepaskan;

(c) seorang pemegang gadai janji mana-mana aset orang terjejas;

(d) seorang juruaudit orang terjejas; atau

(e) seorang pegawai orang terjejas.

Dua konservator atau lebih

163. Jika dua orang atau lebih dilantik sebagai konservator bagi orang terjejas—

- (a) fungsi atau kuasa konservator boleh dilaksanakan atau dijalankan oleh mana-mana satu daripada mereka atau oleh kedua-duanya atau kesemua mereka secara bersesama; dan
- (b) sebutan mengenai konservator dalam Akta ini ialah sebutan mengenai mana-mana satu daripada mereka yang dilantik.

Tempoh pentadbiran

164. (1) Pentadbiran orang terjejas oleh konservator hendaklah bermula dari tarikh pelantikan konservator dan hendaklah berterusan sehingga ditamatkan oleh Perbadanan.

(2) Lembaga boleh melantik suatu jawatankuasanya sendiri yang dipengerusikan oleh salah seorang daripada pengarahnya dan yang terdiri daripada seorang atau dua orang lagi pengarah dan orang lain yang mempunyai kepakaran yang berkaitan atau pengalaman yang berkaitan untuk mengawasi, memantau dan menilai prestasi mana-mana atau kesemua konservator yang dilantik oleh Perbadanan.

(3) Jawatankuasa yang dilantik di bawah subseksyen (2) hendaklah, dari semasa ke semasa, membuat apa-apa cadangan atau syor termasuk suatu cadangan bagi penamatan konservator bagi pertimbangan Perbadanan.

(4) Seorang konservator hendaklah dilepaskan daripada pelantikannya apabila penamatan pelantikannya diluluskan oleh Perbadanan.

(5) Jika pelantikan seorang konservator telah dilepaskan di bawah seksyen ini atau subseksyen 189(2), dia hendaklah, berkuat kuasa dari pelepasan itu, dilepaskan daripada segala kewajipan dan liabiliti berkenaan dengan pentadbirannya atau selainnya berhubungan dengan kelakuannya sebagai seorang konservator.

(6) Tiada apa-apa dalam seksyen ini boleh menghalang suatu tindakan atau prosiding lain oleh mana-mana orang bagi kerugian atau kerosakan yang disebabkan oleh perbuatan salah laku yang sengaja atau kecuaiannya melampau oleh konservator.

Pemberitahuan pelantikan konservator

165. (1) Jika seorang konservator telah dilantik, konservator itu hendaklah—

(a) dalam tempoh dua hari selepas pelantikan sedemikian memberi notis bertulis kepada orang terjejas;

(b) dalam tempoh tujuh hari selepas pelantikan sedemikian menyerahkan simpan suatu notis mengenai pelantikan konservator dengan—

(i) Suruhanjaya Syarikat Malaysia; dan

(ii) dalam hal suatu syarikat awam tersenarai, Bursa Malaysia,

dalam borang yang ditetapkan di bawah Akta ini; dan

(c) dalam tempoh tujuh hari selepas pelantikan itu menyebabkan suatu notis mengenai pelantikan konservator disiarkan dalam sekurang-kurangnya dua akhbar harian di Malaysia, salah satu daripadanya hendaklah dalam bahasa kebangsaan.

(2) Tiap-tiap inouis, pesanan barangan atau perkhidmatan, surat perniagaan, cek, nota kredit atau surat cara boleh niaga atau dokumen lain yang, selepas pelantikan seorang konservator berhubung dengan orang terjejas, telah dikeluarkan oleh atau bagi pihak orang terjejas atau konservator, yang merupakan suatu dokumen yang padanya atau dalamnya tertera nama orang terjejas, hendaklah mengandungi perkataan “Konservator Dilantik” atau perkataan yang seumpama itu.

(3) Suatu pelanggaran perenggan ini tidaklah menjejaskan kesahan tindakan konservator dalam pentadbiran orang terjejas.

Kesan pelantikan konservator

166. Pelantikan seorang konservator tidak boleh—

(a) diambil kira sebagai meletakkan konservator, orang terjejas atau mana-mana orang lain yang melanggar atau ingkar di bawah mana-mana kontrak atau dalam pecah kepercayaan;

- (b) diambil kira sebagai membangkitkan suatu hak kepada mana-mana orang untuk—
 - (i) menamatkan, membatalkan atau mengubah suai suatu perjanjian;
 - (ii) menguatkuasakan atau mempercepat pelaksanaan suatu kewajipan; atau
 - (iii) menghendaki pelaksanaan suatu obligasi yang jika tidak kerana itu tidak berbangkit untuk pelaksanaan;
- (c) dikira sebagai meletakkan konservator, orang terjejas atau mana-mana orang lain dalam kedudukan melanggar mana-mana undang-undang atau perjanjian yang melarang, menyekat atau mengawal selia penyerahhakan, jualan, pelupusan atau pindah milik apa-apa aset atau pendedahan maklumat;
- (d) melepaskan seorang penjamin daripada suatu kewajipan;
- (e) menidaksahkan atau melepaskan suatu kontrak atau cagaran;
- (f) dikira sebagai menamatkan, membatalkan atau mengubah apa-apa hak, keistimewaan, pengecualian (termasuk apa-apa pengecualian cukai) atau keutamaan berhubung dengan suatu aset; atau
- (g) dikira sebagai meletakkan Perbadanan atau konservator dalam kedudukan melanggar mana-mana undang-undang atau apa-apa perintah mahkamah.

Kuasa am konservator

167. Seorang konservator hendaklah mempunyai kuasa yang berikut:

- (a) kuasa untuk menukar lokasi pejabat berdaftar orang terjejas;
- (b) kuasa untuk menggunakan meterai perbadanan orang terjejas;
- (c) kuasa untuk melakukan segala perbuatan dan menyempurnakan atas nama dan bagi pihak orang terjejas apa-apa surat ikatan, resit atau dokumen lain;

- (d) kuasa untuk melantik mana-mana ejen untuk melakukan apa-apa urusan yang tidak dapat dilakukan sendiri oleh konservator atau yang boleh dilakukan dengan lebih mudah oleh seseorang ejen dan kuasa untuk mengambil kerja dan memecat pegawai dan pekerja berhubungan dengan orang terjejas;
- (e) kuasa untuk menubuhkan subsidiari orang terjejas;
- (f) kuasa untuk memindahkan kepada subsidiari orang terjejas semua atau mana-mana bahagian aset orang terjejas;
- (g) kuasa untuk mengambil dan mengekalkan insurans berkenaan dengan aset orang terjejas;
- (h) kuasa untuk mengambil milikan, mengumpul dan mendapatkan aset orang terjejas dan bagi maksud itu, untuk mengambil apa-apa prosiding sebagaimana yang suai manfaat kepada konservator;
- (i) kuasa untuk menjual atau selainnya melupuskan aset orang terjejas secara lelongan awam atau kontrak persendirian;
- (j) kuasa untuk memberikan atau menerima suatu penyerahan balik pajakan atau penyewaan aset orang terjejas, dan untuk mengambil pajakan atau penyewaan apa-apa aset yang dikehendaki atau sesuai untuk aset orang terjejas;
- (k) kuasa untuk membuat semua benda, termasuk menjalankan kerja, sebagaimana yang perlu bagi pengurusan dan penghasilan aset, urusan dan hal ehwal orang terjejas;
- (l) kuasa untuk mendapatkan wang, meminjam wang atau memberi cagaran baginya ke atas aset orang terjejas;
- (m) kuasa untuk mengeluarkan, menerima, membuat dan mengendors apa-apa bil pertukaran atau nota janji hutang atas nama dan bagi pihak orang terjejas;
- (n) kuasa untuk membuat panggilan ke atas mana-mana modal orang terjejas yang belum dipanggil;
- (o) kuasa untuk membuat apa-apa bayaran yang diperlukan atau bersampingan dengan pelaksanaan fungsinya;
- (p) kuasa untuk menjalankan urusan orang terjejas;

- (q) kuasa untuk melaksanakan apa-apa fungsi dan menjalankan apa-apa kuasa, yang orang terjejas, mana-mana pengarah atau pegawainya boleh melaksanakan atau menjalankan sekiranya seorang konservator tidak dilantik;
- (r) kuasa untuk melantik mana-mana orang sebagai pengarah orang terjejas, sama ada untuk mengisi suatu kekosongan atau sebagai mana-mana pengarah tambahan;
- (s) kuasa untuk melantik seorang peguam cara, akauntan atau orang berkeelayakan profesional yang lain untuk membantunya dalam pelaksanaan fungsinya berhubungan dengan orang terjejas;
- (t) kuasa untuk memecat atau menggantung jawatan mana-mana pengarah orang terjejas atau melantik orang lain untuk bertindak sebagai pengarah orang terjejas walau apa pun mana-mana undang-undang atau dokumen konstituen orang terjejas;
- (u) kuasa untuk membawa atau membela apa-apa tindakan atau prosiding undang-undang yang lain atas nama dan bagi pihak orang terjejas;
- (v) kuasa untuk merujuk kepada timbang tara apa-apa persoalan yang melibatkan orang terjejas;
- (w) kuasa untuk membuat apa-apa perkiraan atau kompromi bagi pihak orang terjejas;
- (x) kuasa untuk memeringkat dan menuntut dalam kebangkrapan, ketaksolvenan atau pelikuidasian mana-mana orang yang berhutang kepada orang terjejas dan untuk menerima dividen atau pulangan, dan untuk menyertai surat ikatan amanah bagi pemiutang orang terjejas;
- (y) kuasa untuk mengemukakan atau membela petisyen untuk penggulungan orang terjejas, dan untuk memulakan penggulungan orang terjejas secara sukarela; dan
- (z) kuasa untuk melakukan semua benda lain yang perlu untuk atau bersampingan dengan penjalanan kuasa yang disebut terdahulu.

Tugas am konservator

168. (1) Tanpa menjejaskan seksyen 173, 175 dan 176, konservator hendaklah, selepas pelantikannya, mengambil ke dalam jagaannya atau di bawah kawalannya semua aset yang kepadanya orang terjejas berhak atau ternyata berhak.

(2) Konservator hendaklah menguruskan aset, urusan dan hal ehwal orang terjejas—

(a) pada bila-bila masa sebelum kelulusan cadangan oleh pemiutang bercagar orang terjejas di bawah seksyen 185, mengikut apa-apa arahan yang diberikan oleh Perbadanan; dan

(b) pada bila-bila masa selepas kelulusan cadangan oleh pemiutang bercagar orang terjejas di bawah seksyen 185, mengikut cadangan itu sebagaimana yang diubahsuaikan dari semasa ke semasa mengikut seksyen 187.

Konservator sebagai ejen orang terjejas

169. Konservator hendaklah, dalam pentadbiran orang terjejas, disifatkan bertindak sebagai ejen orang terjejas.

Pegawai orang terjejas hendaklah melaksanakan atau menjalankan fungsi dengan kelulusan bertulis

170. (1) Jika seorang konservator telah dilantik, tiada seorang pun, termasuk lembaga pengarah orang terjejas, selain konservator, boleh melaksanakan atau menjalankan atau berupa sebagai melaksanakan atau menjalankan fungsi sebagai seorang pegawai orang terjejas, kecuali dengan kelulusan bertulis konservator terlebih dahulu.

(2) Jika konservator meluluskan pelaksanaan atau penjalanan sesuatu fungsi oleh pegawai orang terjejas mengikut subseksyen (1), konservator hendaklah membayar kepada pegawai itu apa-apa fi atau saraan lain sebagaimana yang ditentukan dengan munasabah oleh konservator.

(3) Kecuali sebagaimana yang diperuntukkan dalam subseksyen (2) dan walau apa pun mana-mana undang-undang atau kontrak lain, tiada apa-apa jua pun jenis saraan akan terakru atau boleh dibayar kepada mana-mana pegawai orang terjejas kecuali sebagaimana yang diluluskan secara bertulis oleh konservator itu berhubung dengan mana-mana aktiviti yang dikehendaki atau diberi kuasa oleh konservator bagi tempoh pentadbiran orang terjejas.

(4) Bagi maksud subseksyen (1), konservator berhak untuk menjalankan segala fungsi lembaga pengarah orang terjejas.

(5) Dalam seksyen ini, seseorang pekerja orang terjejas tidak boleh ditafsirkan sebagai seorang pegawai semata-mata kerana dia ialah pekerja orang terjejas.

Urus niaga dengan aset orang terjejas

171. (1) Jika seseorang orang terjejas berupa sebagai membuat atau mana-mana orang berupa sebagai membuat bagi pihak orang terjejas, suatu transaksi atau urus niaga dengan mana-mana aset orang terjejas, transaksi atau urus niaga itu hendaklah menjadi batal melainkan jika—

- (a) ia suatu transaksi atau urus niaga yang dibuat oleh Perbadanan atau konservator; atau
- (b) persetujuan bertulis konservator diperoleh terlebih dahulu bagi transaksi atau urus niaga itu.

(2) Mana-mana orang yang berupa sebagai membuat suatu transaksi atau urus niaga yang melanggar subseksyen (1) melakukan suatu kesalahan.

Pampasan

172. (1) Jika mahkamah mendapati seseorang bersalah bagi suatu kesalahan di bawah subseksyen 171(2) dan mahkamah berpuas hati bahawa orang terjejas atau seorang lain telah menanggung kerugian atau kerosakan kerananya, mahkamah boleh memerintahkan orang yang melakukan kesalahan itu supaya membayar pampasan kepada orang yang telah menanggung kerugian atau kerosakan itu.

(2) Walau apa pun subseksyen (1) konservator boleh memulakan prosiding guaman terhadap mana-mana orang untuk mendapatkan kembali aset orang terjejas atau pampasan sebagai gantinya.

Obligasi pegawai orang terjejas

173. (1) Seseorang pegawai atau pekerja orang terjejas hendaklah dalam tempoh tujuh hari selepas pelantikan konservator—

- (a) menyerahkan kepada konservator semua buku, rekod, akaun atau dokumen lain orang terjejas dalam milikan pegawai atau pekerja itu; dan
- (b) jika pegawai atau pekerja itu mengetahui lokasi buku, rekod, akaun atau dokumen lain yang berhubungan dengan orang terjejas, memaklumkan konservator mengenai lokasi buku, rekod, akaun atau dokumen itu.

(2) Seseorang pegawai atau pekerja orang terjejas hendaklah—

- (a) memberi konservator apa-apa maklumat berkenaan dengan aset, urusan, hal ehwal dan hal keadaan kewangan orang terjejas; dan
- (b) membantu konservator pada bila-bila masa,

sebagaimana yang dikehendaki dengan munasabah oleh konservator.

Penyiasatan urusan dan hal ehwal

174. (1) Konservator boleh menghendaki mana-mana orang yang disebut dalam subseksyen (2), dalam tempoh dua puluh satu hari dari tarikh itu atau apa-apa tempoh lanjutan sebagaimana yang dibenarkan oleh konservator, untuk menentusahkan dan mengemukakan kepada konservator suatu pernyataan tentang urusan dan hal ehwal orang terjejas dalam bentuk yang ditentukan oleh konservator yang mengandungi—

- (a) butiran aset dan liabiliti orang terjejas;
- (b) nama dan alamat pemiutang orang terjejas;

- (c) cagaran yang dipegang oleh pemiutang orang terjejas yang disebut dalam perenggan (1)(b);
- (d) tarikh cagaran yang disebut dalam perenggan (1)(c) telah diberikan;
- (e) suatu akuan berkanun yang dibuat menurut peruntukan Akta Akuan Berkanun 1960 [*Akta 13*], mengisytiharkan maklumat dalam pernyataan hal ehwal itu sebagai benar dan betul; dan
- (f) apa-apa maklumat lanjut atau maklumat lain sebagaimana yang dikehendaki oleh konservator.

(2) Konservator boleh menghendaki orang yang berikut supaya menentusahkan dan mengemukakan pernyataan urusan dan hal ehwal yang disebut dalam subseksyen (1):

- (a) orang yang menjadi atau pernah menjadi pegawai orang terjejas;
- (b) orang yang pernah mengambil bahagian dalam pembentukan orang terjejas pada bila-bila masa dalam tempoh dua tahun sebelum pelantikan konservator itu; atau
- (c) orang yang dalam penggajian orang terjejas atau pernah berada dalam penggajian orang terjejas dalam tempoh dua tahun sebelum pelantikan konservator yang, pada pendapat konservator, mempunyai maklumat yang dikehendaki.

(3) Konservator boleh pada bila-bila masa melepaskan seseorang daripada apa-apa obligasi yang dikenakan ke atasnya di bawah subseksyen (1) atau (2).

(4) Konservator hendaklah, apabila fungsi dan kewajipannya di bawah Akta ini tamat, memulangkan kepada orang terjejas apa-apa buku, pernyataan, rekod, akaun atau dokumen lain atau apa-apa jua yang disebut di bawah subseksyen 173(1), seksyen ini dan seksyen 175.

(5) Dalam seksyen ini, “penggajian” termasuklah penggajian di bawah suatu kontrak untuk perkhidmatan.

Hak konservator ke atas buku, rekod, akaun atau dokumen lain orang terjejas

175. (1) Tertakluk kepada subseksyen (3), tiada seorang pun berhak berbanding dengan konservator—

- (a) untuk menyimpan dalam milikan buku, rekod, akaun atau dokumen lain orang terjejas; atau
- (b) untuk menuntut atau menguatkuasakan suatu lien ke atas buku, rekod, akaun atau dokumen lain orang terjejas.

(2) Konservator boleh memberikan notis kepada seseorang berhubung dengan buku, rekod, akaun atau dokumen lain orang terjejas dan orang itu hendaklah menyerahkan kepada konservator buku, rekod, akaun atau dokumen lain yang disebut dalam notis itu yang ada dalam milikannya.

(3) Subseksyen (1) dan (2) tidaklah terpakai berhubung dengan mana-mana buku, rekod, akaun atau dokumen lain—

- (a) yang berhak dimiliki oleh seorang pemiutang bercagar orang terjejas melainkan jika disebabkan oleh suatu lien; atau
- (b) orang terjejas yang ditahan oleh mana-mana badan kawal selia,

tetapi konservator itu berhak untuk memeriksa dan membuat salinan buku, rekod, akaun atau dokumen lain itu.

Hak konservator ke atas aset orang terjejas

176. (1) Konservator boleh menghendaki mana-mana orang yang mempunyai dalam milikan atau kawalannya aset, buku, rekod, akaun atau dokumen lain yang orang terjejas ternyata berhak kepadanya supaya menyampaikan, memberikan, menyerahkan atau memindahkan aset, buku, rekod, akaun atau dokumen lain kepada konservator dengan serta merta atau dalam apa-apa tempoh yang diarahkan oleh konservator dan orang itu hendaklah dengan serta merta menyampaikan, memberikan, menyerahkan atau memindahkan aset, buku, rekod, akaun atau dokumen lain itu kepada konservator.

(2) Jika konservator menyita apa-apa aset yang bukan aset orang terjejas dan pada masa penyitaan itu, mempercayai, dan mempunyai alasan yang munasabah untuk mempercayai, bahawa dia berhak untuk menyita aset itu, maka konservator tidak bertanggung kepada mana-mana orang berkenaan dengan apa-apa kerugian atau kerosakan yang diakibatkan oleh penyitaan itu melainkan jika kerugian atau kerosakan itu disebabkan dengan sengaja oleh konservator atau mana-mana orang yang bertindak bagi pihaknya atau oleh kecuaiannya konservator sendiri.

Menyekat atau menghalang konservator

177. Tiada seorang pun boleh menyekat atau menghalang penjalanan mana-mana kewajipan, hak atau kuasa oleh seorang konservator.

Penafian tuntutan

178. (1) Tertakluk kepada subseksyen (3), jika mana-mana bahagian aset orang terjejas terdiri daripada—

- (a) apa-apa kepentingan dalam tanah yang mengandungi waad yang membebankan;
- (b) syer dalam perbadanan;
- (c) kontrak yang tidak menguntungkan; atau
- (d) apa-apa aset lain yang tidak boleh dijual atau tidak sedia untuk dijual, oleh sebab ia mengikat pemiliknya kepada pelaksanaan apa-apa tindakan yang membebankan atau kepada pembayaran apa-apa jumlah wang,

konservator boleh dalam tempoh dua belas bulan selepas dia menyedari akan mana-mana aset yang tersebut di atas, menafikan tuntutan mana-mana aset sedemikian.

(2) Hak mana-mana orang yang terjejas oleh konservator menurut penjalanan kuasanya untuk menafikan tuntutan di bawah subseksyen (1) hendaklah diuruskan mengikut cara yang dinyatakan dalam cadangan itu dan apa-apa pampasan kepada orang itu hendaklah ditarafkan sebagai suatu hutang tidak bercagar.

(3) Konservator boleh tidak menjalankan kuasanya di bawah subseksyen (1) untuk menafikan tuntutan apa-apa kontrak pasaran.

(4) Bagi maksud subseksyen (3), suatu “kontrak pasaran” mempunyai erti yang sama sebagaimana yang ditakrifkan di bawah Akta Pasaran Modal dan Perkhidmatan 2007 dan hendaklah termasuk kontrak niaga hadapan yang diniagakan dalam pasaran niaga hadapan yang dijelaskan melalui suatu pusat penjelasan yang diluluskan.

Moratorium

179. (1) Tertakluk kepada subseksyen (6), dengan pelantikan konservator, suatu moratorium hendaklah berkuat kuasa yang dalam tempoh itu—

- (a) tiada tindakan, guaman atau prosiding dalam mana-mana mahkamah atau tribunal boleh dimulakan atau diteruskan terhadap Perbadanan, konservator atau orang terjejas;
- (b) apa-apa petisyen untuk penggulangan orang terjejas hendaklah ditolak oleh Mahkamah Tinggi;
- (c) tiada ketetapan boleh diluluskan atau perintah dibuat bagi penggulangan orang terjejas, kecuali jika konservator mengambil apa-apa langkah untuk melaksanakan suatu cadangan di bawah Bahagian ini;
- (d) tiada penerima, pengurus, penerima dan pengurus atau pelikuidasi sementara boleh dilantik, atau jika dilantik, pelantikannya hendaklah tamat dengan serta merta dan dia hendaklah mengosongkan jawatannya;
- (e) tiada langkah boleh diambil—
 - (i) untuk mewujudkan, menyempurnakan atau menguatkuasakan apa-apa cagaran ke atas mana-mana aset orang terjejas;
 - (ii) untuk menguatkuasakan apa-apa penghakiman atau award atau perintah ke atas orang terjejas atau mana-mana aset orang terjejas;
 - (iii) untuk memiliki semula apa-apa aset dalam milikan, jagaan atau kawalan orang terjejas; atau
 - (iv) untuk menolak apa-apa hutang yang terhutang kepada orang terjejas berkenaan dengan apa-apa tuntutan terhadap orang terjejas,

kecuali dengan persetujuan bertulis Perbadanan terlebih dahulu;

- (f) tiada tindakan, guaman, prosiding, pelaksanaan atau proses undang-undang boleh dimulakan atau diteruskan, dan tiada distress boleh dilevikan, terhadap orang terjejas atau asetnya kecuali dengan persetujuan bertulis Perbadanan terlebih dahulu;
- (g) apa-apa permohonan yang dibuat di bawah Akta Syarikat 1965 berkenaan dengan apa-apa kompromi atau perkiraan yang melibatkan orang terjejas dan pemiutangnya atau pemegang syernya atau mana-mana kelasnya hendaklah ditangguhkan *sine die* dan apa-apa perintah sekatan yang dikeluarkan menurut mana-mana peruntukan Akta Syarikat 1965 hendaklah dilepaskan dan diketepikan dengan serta merta; dan
- (h) tiada tindakan, guaman, prosiding, pelaksanaan atau proses undang-undang boleh dimulakan atau diteruskan terhadap mana-mana orang yang menyediakan suatu jaminan atau yang bertindak sebagai seorang penjamin bagi liabiliti orang terjejas kecuali dengan persetujuan bertulis Perbadanan terlebih dahulu.

(2) Tempoh moratorium yang diperuntukkan dalam subseksyen (1) hendaklah bagi suatu tempoh dua belas bulan bermula dari tarikh pelantikan konservator dan boleh ditamatkan pada bila-bila masa oleh Perbadanan.

(3) Walau apa pun subseksyen (2), Perbadanan boleh melanjutkan moratorium itu bagi apa-apa tempoh sebagaimana yang disifatkan sesuai oleh Perbadanan bagi membolehkan konservator menyediakan atau melaksanakan suatu cadangan di bawah Bahagian ini.

(4) Jika tempoh moratorium itu dilanjutkan menurut subseksyen (3), suatu notis mengenai pelanjutan itu hendaklah disiarkan dalam sekurang-kurangnya dua akhbar harian di Malaysia, satu daripadanya hendaklah dalam bahasa kebangsaan.

(5) Perbadanan tidaklah bertanggung bagi sesuatu tindakan atau ganti rugi berkenaan dengan sesuatu keengganan untuk memberikan persetujuannya di bawah subseksyen (1).

(6) Tiada apa-apa dalam seksyen ini boleh menghalang apa-apa prosiding sivil atau jenayah daripada dimulakan atau diteruskan oleh mana-mana badan kawal selia di bawah mana-mana undang-undang terhadap orang terjejas.

(7) Apa-apa keputusan Perbadanan di bawah seksyen ini adalah muktamad dan mengikat.

Perjanjian kewangan yang layak dengan orang terjejas

180. (1) Walau apa pun seksyen 166, jika seorang konservator telah dilantik untuk mentadbirkan orang terjejas, tiada seorang pun yang menjadi pihak balas kepada suatu perjanjian kewangan yang layak dengan orang terjejas boleh menamatkan perjanjian itu, menjalankan apa-apa hak tolakan di bawah perjanjian itu atau menjalankan apa-apa remedi atau hak terhadap orang terjejas atau asetnya dan tiada peruntukan dalam mana-mana perjanjian itu yang memperuntukkan mana-mana yang disebut terdahulu boleh dikuatkuasakan atau memberi kesan melainkan jika ditentukan sebaliknya oleh Perbadanan secara bertulis dalam apa-apa tempoh berikutan pelantikan konservator sebagaimana yang ditetapkan dalam peraturan-peraturan oleh Perbadanan.

(2) Jika Perbadanan menyetujui pemindahan suatu perjanjian kewangan yang layak dengan orang terjejas kepada seorang pihak ketiga yang layak, tiada seorang pun yang menjadi suatu pihak kepada perjanjian itu boleh menamatkan perjanjian itu, menjalankan apa-apa hak tolakan di bawah perjanjian itu atau menjalankan apa-apa remedi atau hak terhadap orang terjejas atau asetnya dan tiada peruntukan dalam mana-mana perjanjian itu yang memperuntukkan mana-mana yang disebut terdahulu boleh dikuatkuasakan atau memberi kesan semata-mata oleh sebab pemindahan itu atau pelantikan konservator itu.

(3) Jika suatu perjanjian kewangan yang layak ialah suatu perjanjian yang disebut dalam perenggan 115(1)(i) dan terpakai bagi harta orang terjejas, harta itu hendaklah juga dipindahkan kepada pihak ketiga yang layak.

(4) Jika suatu perjanjian kewangan yang layak tidak dipindahkan mengikut seksyen ini dan orang yang menjadi pihak balas boleh menamatkan perjanjian itu mengikut termannya tetapi belum berbuat demikian, Perbadanan boleh mengisytiharkan melalui notis bertulis bahawa perjanjian itu ditamatkan, dalam hal sedemikian,

dan walaupun terdapat apa-apa terma yang bertentangan dalam perjanjian itu, perjanjian itu hendaklah disifatkan sebagai telah ditamatkan oleh pihak balas itu.

(5) Perbadanan boleh memindahkan suatu perjanjian kewangan yang layak kepada seorang pihak ketiga yang layak melalui suatu surat cara pindah milik yang dikeluarkan mengikut Jadual Kedua dan ia hendaklah mempunyai kesan yang dinyatakan dalam Jadual Kedua dan hendaklah mengikat mana-mana orang yang terjejas dengannya.

Mendapatkan balik balasan wang daripada aset yang diperoleh atau dijual sebelum pelantikan konservator

181. (1) Bagi maksud seksyen ini—

“balasan wang”, berhubung dengan suatu pemerolehan atau jualan oleh orang terjejas, ertinya balasan bagi pemerolehan atau jualan yang kena dibayar selain melalui pengeluaran syer oleh orang terjejas;

“pengarah” mempunyai erti yang sama sebagaimana yang ditakrifkan di bawah seksyen 4 Akta Syarikat 1965;

“nilai aset” termasuklah nilai bagi apa-apa nama baik atau keuntungan yang mungkin diperoleh daripada aset atau balasan yang seumpama.

(2) Jika mana-mana aset telah diperoleh oleh orang terjejas untuk balasan wang dalam tempoh dua tahun sebelum pelantikan seorang konservator di bawah Akta ini—

- (a) daripada seorang yang pada masa pemerolehan itu, ialah seorang pengarah bagi orang terjejas; atau
- (b) daripada suatu syarikat yang baginya pada masa pemerolehan itu, seorang yang menjadi pengarahnya adalah juga pengarah bagi orang terjejas,

konservator boleh mendapatkan balik daripada orang atau syarikat yang daripadanya aset itu telah diperoleh apa-apa amaun yang balasan wang bagi pemerolehan itu melebihi nilai aset itu pada masa pemerolehannya.

(3) Jika apa-apa aset telah dijual oleh orang terjejas bagi sesuatu balasan wang dalam tempoh dua tahun sebelum pelantikan seorang konservator di bawah Akta ini—

- (a) kepada seorang yang pada masa jualan, ialah seorang pengarah bagi orang terjejas; atau
- (b) kepada suatu syarikat yang baginya pada masa jualan, seorang yang menjadi pengarahnya adalah juga pengarah bagi orang terjejas,

konservator boleh mendapatkan balik daripada orang atau syarikat yang kepadanya aset itu telah dijual apa-apa amaun yang nilai aset itu ketika jualan melebihi balasan wang.

Keutamaan tidak wajar

182. (1) Dengan pelantikan konservator, apa-apa pindahan, gadai janji, penyempurnaan, penahanan, obligasi, penyelesaian, gadaian, penyerahhakan, penghantaran barangan, bayaran atau perbuatan lain yang berhubungan dengan apa-apa aset yang dibuat, ditanggung oleh atau terhadap orang terjejas yang, sekiranya ia dilakukan oleh atau terhadap orang perseorangan, akan menjadi batal atau boleh batal jika dilakukan semasa dia dalam keadaan bankrap di bawah undang-undang kebangkrapan, bolehlah dielakkan atau didapatkan oleh konservator itu.

(2) Bagi maksud subseksyen (1), jika sebutan dibuat dalam undang-undang kebangkrapan mengenai suatu tarikh bagi maksud untuk menentukan kesan kebangkrapan ke atas transaksi yang disebut dalamnya, tarikh itu hendaklah menjadi tarikh pelantikan konservator.

Pengosongan jawatan penerima, dsb.

183. (1) Mana-mana penerima, pengurus, penerima dan pengurus atau pelikuidasi sementara yang mengosongkan jawatannya mengikut perenggan 179(1)(d) hendaklah dengan serta merta menyerahkan semua aset, buku, rekod, akaun atau dokumen lain orang terjejas kepada konservator.

(2) Semua jumlah wang yang ditanggung dengan sewajarnya berkenaan dengan kos, perbelanjaan dan saraan penerima, pengurus, penerima dan pengurus atau pelikuidasi sementara hendaklah dipertanggungjawabkan pada dan dibayar daripada hasil terealisasi orang terjejas mengikut cara yang dinyatakan dalam cadangan di bawah seksyen 185.

Konservator hendaklah menyediakan cadangan

184. (1) Konservator hendaklah, tertakluk kepada terma dan syarat pelantikannya, menyediakan dan mengemukakan kepada Perbadanan suatu cadangan yang membentangkan rancangan konservator berkenaan dengan orang terjejas.

(2) Cadangan konservator atau mana-mana pengubahsuaian kepada cadangan di bawah seksyen 187 boleh termasuk mana-mana peruntukan sebagaimana yang difikirkan patut oleh konservator.

(3) Tanpa menjejaskan keluasan peruntukan yang terdahulu, cadangan itu boleh termasuk peruntukan untuk—

- (a) suatu kompromi atau perkiraan antara orang terjejas dengan pemiutangnya atau mana-mana kelas pemiutangnya atau antara orang terjejas dengan pemegang syernya atau mana-mana kelas pemegang syernya atau antara orang terjejas dengan penghutangnya atau mana-mana kelas penghutangnya;
- (b) perubahan atau pengurangan keseluruhan atau sebahagian modal syer orang terjejas;
- (c) jualan keseluruhan atau sebahagian aku janji atau aset orang terjejas;
- (d) pemindahan kepada mana-mana syarikat akan keseluruhan atau mana-mana bahagian aku janji, aset atau liabiliti orang terjejas;
- (e) penerusan oleh atau terhadap syarikat yang disebut dalam perenggan (d) akan mana-mana prosiding undang-undang yang belum selesai oleh atau terhadap orang terjejas;
- (f) penggulungan atau pembubaran tanpa penggulungan orang terjejas; atau

- (g) mana-mana peruntukan lain yang perlu untuk memastikan cadangan atau rancangan konservator atau mana-mana kompromi, perkiraan, penyusunan semula atau percantuman berkenaan dengan orang terjejas hendaklah dijalankan dengan sepenuhnya dan secara berkesan.

(4) Perbadanan hendaklah menimbangkan cadangan yang dikemukakan oleh konservator dan, tidak lewat daripada tiga puluh hari selepas pengemukakan cadangan itu atau apa-apa tempoh yang lebih panjang sebagaimana yang dibenarkan oleh Menteri, meluluskan atau menolak cadangan itu.

Mesyuarat pemiutang bercagar

185. (1) Konservator hendaklah, selepas kelulusan bagi cadangan oleh Perbadanan, menghantar melalui pos berdaftar bayar dahulu atau mengikut apa-apa cara lain yang ditetapkan di bawah Akta ini ke alamat terakhir setiap pemiutang bercagar orang terjejas yang diketahui oleh konservator—

- (a) suatu salinan cadangan itu;
- (b) jika Perbadanan menyifatkannya sesuai, suatu memorandum daripada Perbadanan yang membentangkan apa-apa perkara yang pada pandangan Perbadanan patut diambil kira oleh pemiutang bercagar dalam menimbangkan cadangan itu; dan
- (c) suatu notis mengenai mesyuarat pemiutang bercagar bagi maksud yang dinyatakan dalam seksyen ini.

(2) Suatu mesyuarat pemiutang bercagar orang terjejas hendaklah diadakan dalam tempoh empat belas hari selepas pengeluaran notis mengenai mesyuarat pemiutang bercagar di bawah subseksyen (1).

(3) Mesyuarat pemiutang bercagar orang terjejas yang diadakan di bawah subseksyen (2) hendaklah memutuskan sama ada untuk meluluskan atau menolak cadangan itu.

(4) Jika—

- (a) majoriti pemiutang bercagar mengikut nilai, yang hadir dan mengundi, sama ada dengan sendiri atau melalui proksi, pada mesyuarat itu meluluskan cadangan itu; atau

- (b) tiada pemiutang bercagar orang terjejas yang diketahui oleh konservator dan Perbadanan meluluskan cadangan itu di bawah subseksyen 184(4),

cadangan itu, termasuk cadangan sebagaimana ia diubahsuaikan kemudiannya di bawah seksyen 187, hendaklah mengikat orang terjejas, semua pemegang syer dan pemiutang orang terjejas atau mana-mana orang lain yang terjejas oleh cadangan itu, sama ada atau tidak orang itu mempunyai pengetahuan atau notis mengenai cadangan itu.

(5) Bagi maksud perenggan (4)(a), suatu resolusi untuk meluluskan cadangan itu dengan apa-apa ubah suaian hendaklah disifatkan sebagai suatu penolakan cadangan itu.

(6) Walau apa pun mana-mana undang-undang —

- (a) kelulusan atau pelaksanaan suatu cadangan di bawah subseksyen (4), termasuk cadangan sebagaimana ia boleh diubahsuaikan kemudiannya di bawah seksyen 187, tidak boleh melepaskan mana-mana cagaran yang diperuntukkan oleh mana-mana orang untuk menjamin apa-apa kewajipan atau liabiliti yang terhutang oleh orang terjejas kepada mana-mana pemiutang orang terjejas kecuali mengikut apa-apa cara dan setakat yang diperuntukkan dalam cadangan itu; dan
- (b) kecuali sebagaimana yang diperuntukkan dalam cadangan itu setiap cagaran, kewajipan atau liabiliti sedemikian bagi orang yang memperuntukkan cagaran itu hendaklah sentiasa sah dan berkuat kuasa terhadap orang itu walau apa pun kelulusan atau pelaksanaan cadangan itu, termasuk cadangan itu sebagaimana ia diubahsuaikan kemudiannya di bawah seksyen 187, atau mana-mana kompromi, perkiraan, penyusunan semula atau percantuman berkaitan dengan orang terjejas.

(7) Kegagalan untuk memberitahu mana-mana pemiutang bercagar orang terjejas mengenai mesyuarat pemiutang bercagar tidak boleh menidaksahkan mesyuarat yang diadakan di bawah subseksyen (2) atau resolusi yang diluluskan dalam mesyuarat itu.

(8) Bagi mengelakkan keraguan, jika Perbadanan ialah pemiutang bercagar orang terjejas, Perbadanan adalah berhak untuk menghadiri dan mengundi pada mesyuarat pemiutang bercagar orang terjejas yang diadakan oleh konservator di bawah subseksyen (2) atau seksyen 187.

Pelaksanaan cadangan

186. (1) Tertakluk kepada seksyen 185, 187 dan 188, konservator hendaklah melaksanakan cadangan itu mengikut termannya.

(2) Konservator hendaklah—

- (a) dalam tempoh empat belas hari dari tarikh kelulusan cadangan itu oleh pemiutang bercagar orang terjejas di bawah seksyen 185;
- (b) jika tiada pemiutang bercagar yang diketahui oleh konservator, dalam tempoh empat belas hari dari tarikh kelulusan cadangan itu oleh Perbadanan di bawah subseksyen 184(4); atau
- (c) dalam tempoh empat belas hari dari tarikh kelulusan cadangan di bawah subseksyen 184(4),

menyebabkan disiarkan dalam sekurang-kurangnya dua akhbar harian di Malaysia, salah satu daripadanya hendaklah dalam bahasa kebangsaan, kelulusan cadangan itu dan masa serta tempat bagi mana-mana pemiutang orang terjejas untuk memeriksa butiran mengenai cadangan itu.

(3) Walau apa pun peruntukan mana-mana undang-undang atau kontrak, suatu cadangan yang diluluskan atau diubahsuai di bawah Akta ini boleh dilaksanakan, dan konservator hendaklah mempunyai kuasa untuk melaksanakan dan melakukan segala benda yang perlu untuk menjalankan dan melaksanakan dengan sepenuhnya dan seberkesannya cadangan atau mana-mana bahagian cadangan itu tanpa memerlukan apa-apa notis kepada atau kelulusan atau persetujuan mana-mana pemegang syer, pemiutang orang terjejas atau mana-mana orang lain yang terjejas oleh cadangan itu atau kelulusan atau pengesahan oleh mahkamah, dan apa-apa notis, kelulusan, persetujuan atau pengesahan sedemikian, sama ada dikehendaki di bawah mana-mana undang-undang, kontrak atau selainnya, hendaklah disifatkan sebagai telah diberikan atau didapati dengan sewajarnya.

(4) Jika mana-mana bahagian aset orang terjejas adalah tertakluk kepada hak pemiutang bercagar atau mana-mana orang lain dan suatu cadangan telah diluluskan di bawah Akta ini, konservator berhak untuk menguruskan aset sedemikian mengikut cara yang dinyatakan dalam cadangan itu.

(5) Konservator hendaklah menggunakan semua hasil terealisasi dalam pelaksanaan cadangan itu mengikut cara yang dinyatakan dalam cadangan itu.

(6) Jika seorang konservator memindahmilikkan aset atau liabiliti menurut suatu cadangan, maka aset itu hendaklah dipindahmilikkan dan diletak hak pada, dan liabiliti itu hendaklah dipindahmilikkan kepada dan menjadi liabiliti, penerima pindah milik, bebas dalam hal mana-mana aset tertentu jika cadangan itu mengarahkan sedemikian, daripada mana-mana gadaian, kaveat atau bebanan lain.

(7) Walau apa pun apa-apa yang bertentangan dalam mana-mana undang-undang, Perbadanan atau subsidiarinya boleh memperoleh mana-mana aset atau cagaran boleh pasar yang dikeluarkan oleh, orang terjejas.

(8) Walau apa pun apa-apa yang bertentangan dalam mana-mana undang-undang, konservator hendaklah mempunyai kuasa untuk melakukan segala benda yang perlu untuk memberi kesan kepada dan untuk melaksanakan cadangan yang diluluskan mengikut seksyen 184 dan 185 atau diubahsuaikan mengikut seksyen 187.

(9) Jika suatu cadangan memberi kesan kepada modal syer orang terjejas, konservator hendaklah dalam tempoh empat belas hari selepas cadangan itu diluluskan mengikut Bahagian ini, memberitahu Pendaftar Syarikat bagaimana cadangan itu menjejaskan modal syer orang terjejas.

(10) Suatu notis di bawah subseksyen (9) hendaklah dalam borang sebagaimana yang ditetapkan di bawah Akta Syarikat 1965.

(11) Apabila suatu notis diserahkan di bawah subseksyen (9), kesemua kehendak di bawah Akta Syarikat 1965 atau mana-mana undang-undang lain yang berkenaan dengan perubahan dalam modal syer orang terjejas hendaklah disifatkan telah dipatuhi dan, berkuat kuasa dari tarikh yang dinyatakan dalam cadangan itu, modal syer orang terjejas hendaklah sebagaimana yang dinyatakan dalam notis itu.

(12) Dengan serahan notis di bawah subseksyen (9), butiran yang ditunjukkan dalam notis itu hendaklah disifatkan sebagai menggantikan butiran yang bersamaan dengannya dalam dokumen konstituen orang terjejas.

Pengubahsuaian kepada cadangan

187. (1) Konservator boleh pada bila-bila masa selepas—

- (a) cadangan itu diluluskan oleh pemiutang bercagar orang terjejas di bawah seksyen 185; atau
- (b) jika tiada pemiutang bercagar yang diketahui oleh konservator, kelulusan cadangan itu oleh Perbadanan di bawah subseksyen 184(4),

mencadangkan ubah suaian kepada cadangan itu.

(2) Jika Perbadanan berpandangan bahawa ubah suaian yang dicadangkan tidak berbeza secara substansial daripada cadangan pemiutang bercagar di bawah subseksyen (1), Perbadanan hendaklah memutuskan keperluan untuk mengadakan suatu mesyuarat pemiutang bercagar untuk menimbangkan cadangan ubah suaian yang dicadangkan itu.

(3) Keputusan Perbadanan di bawah subseksyen (2) adalah muktamad, konklusif dan mengikat konservator, orang terjejas, kesemua pemegang syer dan pemiutang orang terjejas dan orang lain yang terjejas oleh cadangan itu sama ada orang itu mempunyai pengetahuan atau notis mengenai cadangan yang diubahsuaikan itu.

(4) Sekiranya Perbadanan memutuskan bahawa adalah perlu untuk mengadakan suatu mesyuarat pemiutang bercagar untuk menimbangkan ubah suaian yang dicadangkan, Perbadanan hendaklah melalui notis bertulis memberitahu konservator mengenai keperluan untuk mengadakan mesyuarat itu.

(5) Konservator hendaklah, dalam tempoh enam puluh hari dari tarikh penerimaan notis daripada Perbadanan atau apa-apa tempoh yang lebih panjang sebagaimana yang dinyatakan oleh Perbadanan dalam notis itu, mengadakan suatu mesyuarat.

(6) Konservator hendaklah, sebelum mesyuarat yang diadakan di bawah subseksyen (5), menghantar melalui pos berdaftar bayar dahulu atau mengikut apa-apa cara lain yang ditetapkan di bawah Akta ini ke alamat terakhir setiap pemiutang bercagar yang diketahui oleh konservator—

- (a) suatu salinan ubah suaian yang dicadangkan itu;

- (b) jika Perbadanan menyifatkan sesuai, suatu memorandum daripada Perbadanan menyatakan apa-apa perkara yang pada pandangan Perbadanan patut diambil kira oleh pemiutang bercagar dalam menimbangkan ubah suaian yang dicadangkan itu; dan
- (c) suatu notis mengenai mesyuarat pemiutang bercagar bagi ubah suaian yang dicadangkan dalam seksyen ini.

(7) Mesyuarat pemiutang bercagar orang terjejas untuk menimbangkan ubah suaian yang dicadangkan itu hendaklah diadakan dan dijalankan mengikut cara yang dinyatakan dalam seksyen 185.

(8) Tanpa menjejaskan seksyen 188, pematuhan mana-mana syarat kelulusan yang dikenakan oleh suatu badan kawal selia tidak boleh ditafsirkan sebagai suatu ubah suaian kepada cadangan bagi maksud seksyen ini.

Syarat kelulusan kawal selia

188. (1) Jika—

- (a) kelulusan mana-mana badan kawal selia dikehendaki untuk melaksanakan cadangan itu; atau
- (b) kelulusan mana-mana badan kawal selia dikehendaki untuk melaksanakan apa-apa ubah suaian yang dicadangkan kepada cadangan itu,

dan syarat kelulusan dikenakan oleh badan kawal selia itu, Perbadanan boleh, walau pun pemiutang bercagar orang terjejas telah bersetuju dengan cadangan di bawah perenggan seksyen 185 atau 187, mengarahkan konservator untuk tidak meneruskan cadangan itu atau selainnya memberhentikan pelaksanaan cadangan itu jika Perbadanan berpendapat bahawa syarat kelulusan sedemikian adalah bukan demi kepentingan orang terjejas.

(2) Keputusan Perbadanan di bawah subseksyen (1) hendaklah mengikat orang terjejas, semua pemegang syer dan pemiutang orang terjejas dan mana-mana orang lain yang terjejas oleh cadangan itu, sama ada atau tidak orang itu mempunyai pengetahuan atau notis mengenai cadangan itu.

Penolakan atau pemberhentian cadangan

189. (1) Jika Perbadanan mengarahkan konservator untuk tidak meneruskan cadangan atau selainnya memberhentikan pelaksanaan cadangan di bawah seksyen 188 atau cadangan itu tidak diluluskan di bawah seksyen 185 atau 187, Perbadanan boleh menimbangkan opsiyen lain untuk menguruskan pengurusan dan pelupusan aset orang terjejas dan boleh—

- (a) meminta konservator untuk mengemukakan suatu cadangan baru;
- (b) membatalkan moratorium yang dikenakan di bawah seksyen 179; atau
- (c) melantik seorang konservator gantian.

(2) Walau apa pun subseksyen (1), Perbadanan boleh pada bila-bila masa menamatkan pelantikan seorang konservator dan pentadbirannya jika pada pendapatnya penerusan pentadbiran itu tidak akan lagi mencapai matlamat yang dinyatakan dalam subseksyen 161(1).

(3) Apa-apa keputusan Perbadanan di bawah subseksyen (1) atau (2) adalah muktamad dan mengikat.

Laporan mengenai salah laku

190. Jika sesuatu penyiasatan ke dalam urusan dan hal ehwal orang terjejas oleh konservator mendedahkan apa-apa fraud, misfeasans atau salah laku lain berkaitan dengan penajaan atau pembentukan orang terjejas atau dalam pengurusan orang terjejas atau hal ehwalnya, atau jika telah berlaku apa-apa pelepasan atau penahanan salah apa-apa aset kepunyaan orang terjejas, konservator hendaklah melaporkan fraud, misfeasans atau salah laku sedemikian kepada badan kawal selia atau badan penguatkuasa yang berkaitan.

Kesahan transaksi

191. Apa-apa bayaran yang dibuat, transaksi yang dibuat atau apa-apa perbuatan atau benda lain yang dilakukan dengan suci hati oleh, atau dengan persetujuan konservator, adalah sah dan

mempunyai kuat kuasa bagi maksud Akta ini dan tidaklah terbatal, boleh batal atau dianggap sebagai suatu keutamaan tidak wajar dalam penggulungan orang terjejas.

BAHAGIAN X

KESALAHAN

Mengemukakan diri sebagai institusi anggota

192. (1) Tiada seorang pun boleh mengemukakan dirinya sebagai institusi anggota, atau menggambarkan bahawa mana-mana liabilitinya atau liabiliti mana-mana orang lain adalah diinsuranskan di bawah sistem insurans deposit atau dilindungi di bawah sistem perlindungan manfaat takaful dan insurans, melainkan jika ia atau orang lain itu ialah suatu institusi anggota.

(2) Mana-mana orang yang melanggar subseksyen (1) melakukan suatu kesalahan, dan boleh, apabila disabitkan, didenda tidak melebihi lima juta ringgit atau dipenjarakan selama tempoh tidak melebihi lima tahun atau kedua-duanya dan boleh, sebagai tambahan, dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan.

Pernyataan palsu

193. Mana-mana orang yang menyediakan, menandatangani, meluluskan atau menyetujui dalam mana-mana—

- (a) akaun, pernyataan, penyata, laporan atau dokumen lain yang dikehendaki untuk dikemukakan kepada Perbadanan di bawah Akta ini yang dia tahu atau mempunyai sebab untuk mempercayai adalah palsu, atau mengandungi maklumat palsu atau mengelirukan; atau
- (b) penyata yang tidak menunjukkan secara berpatutan maklumat yang dikehendaki untuk dikemukakan kepada Perbadanan di bawah Akta ini,

melakukan suatu kesalahan dan boleh, apabila disabitkan, didenda tidak melebihi tiga juta ringgit atau dipenjarakan selama tempoh tidak melebihi tiga tahun atau kedua-duanya dan boleh, sebagai tambahan, dikenakan denda harian tidak melebihi tiga puluh ribu ringgit bagi tiap-tiap hari kesalahan itu berterusan selepas sabitan.

Tidak memberikan maklumat, dsb.

194. Tiap-tiap institusi anggota yang tidak atau cuai—

- (a) dalam masa yang ditentukan untuk berbuat demikian, untuk memberi Perbadanan apa-apa akaun, rekod, pernyataan, penyata, laporan atau dokumen lain berkenaan dengan urusan atau hal ehwal suatu institusi anggota yang dikehendaki untuk dikemukakan kepada Perbadanan di bawah Akta ini; atau
- (b) untuk memberi maklum balas, dalam masa yang ditentukan dalam notis, kepada suatu permintaan bagi maklumat atau penjelasan berkenaan dengan suatu institusi anggota yang dibuat oleh atau bagi pihak Perbadanan di bawah Akta ini,

melakukan suatu kesalahan dan boleh, apabila disabitkan, didenda tidak melebihi satu juta ringgit atau dipenjarakan selama tempoh tidak melebihi satu tahun atau kedua-duanya dan boleh, sebagai tambahan, dikenakan denda harian tidak melebihi sepuluh ribu ringgit bagi tiap-tiap hari kesalahan itu berterusan selepas sabitan.

Kesalahan am

195. Melainkan jika diperuntukkan selainnya dalam Akta ini, mana-mana orang, selain Perbadanan dan pengarah, pegawai dan pekerjanya, yang melakukan suatu kesalahan di bawah Akta ini, atau yang melanggar atau tidak mematuhi mana-mana peruntukan Akta ini atau apa-apa penentuan atau kehendak yang dibuat, atau apa-apa perintah secara bertulis, arahan, petunjuk, atau notis yang diberikan, atau apa-apa had, terma, syarat atau sekatan yang dikenakan, atau apa-apa benda lain bagaimana jua pun dilakukan, pada penjalanan mana-mana kuasa yang diberikan di bawah, menurut atau menurut kuasa, mana-mana peruntukan Akta ini melakukan suatu kesalahan dan boleh, apabila disabitkan—

- (a) dalam hal orang sebenar, didenda tidak melebihi lima ratus ribu ringgit atau dipenjarakan selama tempoh tidak melebihi enam bulan atau kedua-duanya dan boleh, sebagai tambahan, dikenakan denda harian tidak melebihi lima ribu ringgit bagi tiap-tiap hari kesalahan itu berterusan selepas sabitan; atau
- (b) dalam mana-mana hal lain, didenda tidak melebihi satu juta ringgit.

Kesalahan oleh pertubuhan perbadanan atau badan tidak diperbadankan atau oleh pengarah, pegawai, pengawal, dsb.

196. (1) Jika suatu kesalahan telah dilakukan oleh mana-mana pertubuhan perbadanan atau badan tidak diperbadankan di bawah Akta ini, mana-mana orang yang pada masa kesalahan itu dilakukan merupakan seorang pengarah, pegawai atau pengawal pertubuhan perbadanan atau badan tidak diperbadankan itu atau berupa sebagai bertindak atas apa-apa sifat sedemikian, atau telah dengan apa jua cara atau apa-apa takat bertanggungjawab bagi penjalanan apa-apa urusan atau bagi pengurusan apa-apa aset, liabiliti atau hal ehwal pertubuhan perbadanan atau badan tidak diperbadankan itu, atau telah membantu dalam pengurusan sedemikian, melakukan kesalahan itu melainkan jika dia membuktikan bahawa kesalahan itu telah dilakukan tanpa persetujuan atau pembiarannya dan bahawa dia telah menjalankan segala usaha untuk mengelakkan berlakunya kesalahan itu sebagaimana yang sepatutnya telah dijalankannya, dengan mengambil kira kepada jenis fungsinya atas sifat itu dan kepada segala hal keadaan.

(2) Jika mana-mana orang (disebut dalam seksyen ini sebagai “prinsipal”) adalah bertanggungjawab di bawah Akta ini bagi apa-apa hukuman atau penalti bagi apa-apa perbuatan, peninggalan, pengabaian atau keingkaran, dia boleh dikenakan hukuman atau penalti yang sama bagi tiap-tiap perbuatan, peninggalan, pengabaian atau keingkaran demikian yang dilakukan oleh mana-mana kerani, pekhidmat atau ejennya, atau oleh kerani atau pekhidmat ejen itu.

(3) Subseksyen (2) hendaklah terpakai jika perbuatan, peninggalan, pengabaian atau keingkaran itu telah dilakukan oleh kerani atau pekhidmat prinsipal itu dalam menjalankan kerjanya, atau oleh ejen itu semasa bertindak bagi pihak prinsipal, atau oleh kerani atau pekhidmat ejen itu dalam menjalankan kerjanya dengan ejen itu atau selainnya bagi pihak ejen itu.

(4) Bagi maksud seksyen ini, “pengawal” hendaklah mempunyai erti yang diberikan kepadanya di bawah subseksyen 2(1) Akta Bank dan Institusi Kewangan 1989.

Kuasa Perbadanan untuk mengkompaun kesalahan

197. (1) Perbadanan, dengan keizinan Pendakwa Raya secara bertulis, boleh dalam hal yang disifatkannya layak dan patut untuk berbuat demikian, mengkompaun apa-apa kesalahan yang

dilakukan oleh mana-mana orang yang boleh dihukum di bawah Akta ini, dengan membuat suatu tawaran bertulis kepada orang itu untuk mengkompaun kesalahan dengan membayar kepada Perbadanan dalam masa yang ditentukan dalam tawaran itu apa-apa jumlah wang sebagaimana yang ditentukan dalam tawaran itu yang tidak boleh melebihi lima puluh peratus daripada amaun denda maksimum, termasuk denda harian, jika ada, dalam hal suatu kesalahan yang berterusan, yang akan dikenakan kepada orang itu jika dia telah disabitkan atas kesalahan itu.

(2) Apa-apa wang yang dibayar kepada Perbadanan menurut peruntukan subseksyen (1) hendaklah dibayar ke dalam dan menjadi sebahagian daripada Kumpulan Wang Disatukan.

(3) Sesuatu tawaran di bawah subseksyen (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan, dan jika amaun yang ditentukan dalam tawaran itu tidak dibayar dalam masa yang ditentukan dalam tawaran itu, atau apa-apa pelanjutan masa yang diberikan oleh Perbadanan, pendakwaan bagi kesalahan itu boleh dimulakan pada bila-bila masa selepas itu terhadap orang yang kepadanya tawaran itu dibuat.

(4) Jika sesuatu kesalahan telah dikompaun di bawah subseksyen (1), tiada pendakwaan boleh selepas itu dimulakan berkenaan dengan kesalahan itu terhadap orang yang kepadanya tawaran untuk mengkompaun itu dibuat.

Mahkamah boleh memerintahkan pematuhan

198. Jika seseorang telah disabitkan atas suatu kesalahan di bawah Akta ini, mahkamah boleh, sebagai tambahan kepada apa-apa denda atau tempoh pemenjaraan yang dikenakan, memerintahkan orang itu untuk meremеди pelanggaran Akta ini yang berkenaan dengannya orang itu telah disabitkan.

Hukuman kewangan tambahan

199. Jika seseorang telah disabitkan atas suatu kesalahan di bawah Akta ini, mahkamah boleh, jika ia berpuas hati bahawa sebagai akibat daripada pelakuan kesalahan itu orang yang disabitkan itu memperoleh suatu faedah kewangan atau bahawa suatu faedah kewangan telah terakru kepada orang itu, memerintahkan orang

yang disabitkan itu untuk membayar, walau apa pun amaun maksimum mana-mana denda yang selainnya boleh dikenakan di bawah Akta ini, suatu denda tambahan dalam suatu amaun yang sama dengan anggaran mahkamah mengenai amaun faedah kewangan itu.

Perintah pematuhan atau penyekatan

200. Jika seseorang tidak mematuhi mana-mana peruntukan Akta ini yang terpakai berkenaan dengan orang itu, Perbadanan boleh memohon kepada Mahkamah Tinggi untuk suatu perintah mengarahkan orang itu supaya mematuhi atau menyekat orang itu daripada bertindak melanggar peruntukan itu dan, atas permohonan itu, mahkamah boleh memerintahkan sedemikian dan membuat apa-apa perintah selanjutnya yang difikirkannya patut.

Mendapatkan kembali denda

201. Segala denda yang kena dibayar di bawah Akta ini boleh didapatkan kembali dan dikuatkuasakan, dengan kos, atas guaman oleh Perbadanan, dimulakan oleh Perbadanan dan, apabila didapatkan kembali, hendaklah dibayar ke dalam dan menjadi sebahagian daripada Kumpulan Wang Disatukan.

BAHAGIAN XI

PERUNTUKAN AM

Pengemukakan maklumat kepada Perbadanan

202. (1) Melainkan jika diperuntukkan selainnya secara nyata dalam Akta ini, jika, bagi maksud perjalanan mana-mana kuasanya, pelaksanaan mana-mana fungsinya, atau penunaian mana-mana tugasnya, di bawah Akta ini, Perbadanan menghendaki apa-apa maklumat daripada suatu institusi anggota atau daripada mana-mana perbadanan yang berkaitan dengan suatu institusi anggota, tentang apa-apa perkara yang berhubungan dengan urusan atau hal ehwal institusi anggota atau perbadanan yang berkaitan itu, institusi anggota atau perbadanan yang berkaitan itu hendaklah, walau apa pun mana-mana peruntukan Akta Bank dan Institusi-Institusi Kewangan 1989, Akta Bank Islam 1983, Akta Insurans 1996 atau Akta Takaful 1984, mengemukakan maklumat itu kepada Perbadanan.

(2) Mana-mana pegawai atau ejen institusi anggota atau perbadanan yang berkaitan atau mana-mana orang lain yang mempunyai akses atau memegang atau memiliki buku, rekod, akaun atau dokumen lain suatu institusi anggota atau perbadanan yang berkaitan hendaklah, jika pada bila-bila masa diminta secara bertulis oleh Perbadanan untuk melakukan sedemikian, mengemukakan buku, rekod, akaun atau dokumen lain itu kepada Perbadanan sebagaimana yang dikehendaknya.

(3) Jika maklumat yang didapati oleh Perbadanan di bawah subseksyen (1) atau (2) adalah berhubungan dengan akaun, urusan atau hal ehwal mana-mana pelanggan mana-mana institusi anggota atau perbadanan yang berkaitan yang membekalkan maklumat, maka maklumat itu hendaklah menjadi rahsia antara Perbadanan dengan institusi anggota atau perbadanan yang berkaitan yang membekalkannya.

(4) Mana-mana orang yang tidak mematuhi apa-apa kehendak di bawah seksyen ini melakukan suatu kesalahan dan boleh, apabila disabitkan, didenda tidak melebihi tiga juta ringgit dan boleh, sebagai tambahan, dikenakan denda harian tidak melebihi tiga puluh ribu ringgit bagi tiap-tiap hari kesalahan itu berterusan selepas sabitan.

Pengemukaan maklumat kepada Bank Negara Malaysia

203. Bank Negara Malaysia berhak kepada semua maklumat yang didapati oleh atau dikemukakan kepada Perbadanan, sama ada semasa menjalankan suatu pemeriksaan, penelitian atau selainnya, berkenaan dengan urusan dan hal ehwal institusi anggota atau mana-mana perbadanan yang berkaitan atau bersekutu dengannya atau mana-mana orang yang berurusan dengan institusi anggota itu atau mana-mana perbadanan yang berkaitan atau bersekutu dengannya, yang berhubungan dengan keselamatan dan kukuhannya atau pengendalian, institusi anggota itu.

Niat untuk menggulung institusi anggota

204. (1) Tiada resolusi oleh pemegang syer suatu institusi anggota atau mana-mana orang lain untuk menggulung institusi anggota itu boleh dikuatkuasakan tanpa kelulusan Mahkamah Tinggi terlebih dahulu.

(2) Tiada permohonan boleh dibuat kepada Mahkamah Tinggi bagi kelulusan suatu ketetapan untuk menggulung suatu institusi anggota dan tiada prosiding penggulungan berkenaan dengan suatu institusi anggota boleh dimulakan oleh mana-mana orang, selain Bank Negara Malaysia atau Perbadanan, tanpa terlebih dahulu memberikan notis bertulis selama tempoh tiga puluh hari kepada Bank Negara Malaysia dan Perbadanan mengenai niat untuk memohon kelulusan suatu resolusi untuk menggulung institusi anggota atau mengemukakan suatu petisyen penggulungan terhadap institusi anggota itu.

(3) Bagi mengelakkan keraguan, seksyen ini terpakai bagi bekas institusi anggota yang keanggotaannya telah dibatalkan atau ditamatkan di bawah Akta ini.

Pengiktirafan kehakiman

205. Mahkamah hendaklah memberikan pengiktirafan kehakiman mengenai—

- (a) apa-apa fakta atau perkara yang dikehendaki disiarkan di bawah Akta ini; dan
- (b) apa-apa fakta atau perkara yang dinyatakan dalam apa-apa perakuan atau surat cara yang dikeluarkan di bawah Akta ini.

Penggulungan Perbadanan

206. Tiada undang-undang bertulis yang berhubungan dengan ketidaksolvenan atau penggulungan mana-mana pertubuhan perbadanan terpakai bagi Perbadanan dan dalam apa jua keadaan urusan dan hal ehwal Perbadanan tidak boleh digulungkan.

Kekebalan

207. (1) Tiada tindakan, guaman, pendakwaan atau prosiding apa-apa jua pun, boleh dibuat atau dibawa, dimulakan atau dikekalkan dalam mana-mana mahkamah, tribunal atau di hadapan mana-mana pihak berkuasa lain terhadap—

- (a) Kerajaan Malaysia atau sesuatu Kerajaan Negeri;
- (b) Menteri;

- (c) Perbadanan;
- (d) Bank Negara Malaysia;
- (e) mana-mana pengarah, pegawai atau pekerja mana-mana Kerajaan, Perbadanan atau Bank Negara Malaysia, sama ada secara peribadi atau atas sifat rasminya;
- (f) mana-mana orang yang dilantik di bawah perenggan 99(1)(c), mana-mana penerima, pengurus, penerima dan pengurus, pelikuidasi atau konservator yang dilantik menurut Akta ini, Jawatankuasa Pentaksir atau mana-mana anggota Jawatankuasa Pentaksir;
- (g) mana-mana pengarah, pegawai atau pekerja suatu institusi perantaraan atau mana-mana subsidiari milik penuh Perbadanan; atau
- (h) mana-mana orang yang bertindak secara sah bagi pihak mana-mana Kerajaan, Perbadanan, Bank Negara Malaysia atau mana-mana pengarah, pegawai atau pekerja, sama ada secara peribadi atau atas sifatnya sebagai seorang yang bertindak bagi pihak sedemikian,

bagi atau disebabkan oleh, atau berkenaan dengan, apa-apa perbuatan yang dilakukan atau pernyataan yang dibuat atau ditinggal daripada dilakukan atau dibuat, atau yang berupa sebagai dilakukan atau dibuat atau ditinggalkan daripada dilakukan atau dibuat, menurut atau dalam melaksanakan, atau penurutan atau pelaksanaan yang dimaksudkan terhadap, Akta ini, atau apa-apa perintah secara bertulis, arahan, petunjuk, notis atau apa-apa jua pun perkara lain yang dikeluarkan di bawah Akta ini:

Dengan syarat bahawa perbuatan atau pernyataan itu telah dilakukan atau dibuat, atau ditinggalkan daripada dilakukan atau dibuat, dengan suci hati.

(2) Perbuatan atau pernyataan yang disebut dalam proviso kepada subseksyen (1) hendaklah disifatkan, melainkan jika dibuktikan sebaliknya, sebagai dilakukan atau dibuat, atau ditinggalkan daripada dilakukan atau dibuat, dengan suci hati.

(3) Dalam apa-apa hal tetapi tertakluk kepada subseksyen (4), apa-apa tindakan, guaman atau prosiding oleh mana-mana orang di bawah Akta ini terhad kepada suatu tuntutan ganti rugi sahaja bagi apa-apa kerugian yang ditanggung oleh orang itu.

(4) Bagi mengelakkan keraguan—

(a) walau apa pun tindakan, guaman atau prosiding yang disebut dalam subseksyen (3), mana-mana orang yang disebut dalam perenggan (1)(a) hingga (h) hendaklah terus menjalankan mana-mana atau semua kuasanya di bawah Akta ini atau selainnya; dan

(b) seseorang yang menuntut telah menanggung apa-apa kerugian berhubung dengan apa-apa perkara yang ditentukan oleh Jawatankuasa Pentaksir di bawah Jadual Pertama hendaklah terlebih dahulu menghabiskan semua remedinya di bawah Jadual Pertama sebelum memulakan apa-apa tindakan, guaman atau prosiding lain berkenaan dengan tuntutan itu.

(5) Bagi maksud seksyen ini, mana-mana anggota pentadbiran Kerajaan Malaysia atau Kerajaan Negeri hendaklah disifatkan sebagai seorang pegawai Kerajaan itu.

(6) Tiada apa-apa dalam subseksyen (1) boleh ditafsirkan sebagai melepaskan Perbadanan daripada obligasi untuk membuat bayaran berkenaan dengan suatu deposit yang diinsuranskan atau manfaat takaful atau insurans yang dilindungi di bawah Akta ini.

Pemakaian dan ketidakpakaian Akta lain

208. (1) Tertakluk kepada seksyen 207, Akta Perlindungan Pihak Berkuasa Awam 1948 [*Akta 198*] hendaklah terpakai bagi apa-apa tindakan, guaman, pendakwaan atau prosiding terhadap Perbadanan atau mana-mana pengarah, pegawai atau pekerja Perbadanan berkenaan dengan mana-mana perbuatan atau peninggalan, yang dibuat atau dilakukan olehnya atas sifat rasminya.

(2) Akta Pemberi Pinjam Wang 1951 [*Akta 400*] tidak terpakai bagi Perbadanan.

Kuasa untuk membuat peraturan-peraturan, kaedah-kaedah, perintah, undang-undang kecil, arahan, garis panduan, pekeliling atau nota

209. (1) Perbadanan boleh membuat—

- (a) dengan kelulusan Menteri, apa-apa peraturan-peraturan, kaedah-kaedah atau perintah; atau
- (b) undang-undang kecil, arahan, garis panduan, pekeliling atau nota,

sebagaimana yang perlu atau suai manfaat untuk melaksanakan sepenuhnya peruntukan Akta ini, untuk menjalankan atau mencapai matlamat dan maksud Akta ini, atau mana-mana peruntukannya, atau untuk melaksanakan peruntukan Akta ini selanjutnya, dengan lebih baik atau lebih mudah.

(2) Mana-mana peraturan-peraturan, kaedah-kaedah, perintah, undang-undang kecil, arahan, garis panduan, pekeliling atau nota yang dibuat di bawah seksyen ini boleh berhubungan dengan semua, atau mana-mana kelas, kategori atau perihalan orang dan peruntukan yang berlainan boleh dibuat bagi orang, kelas, kategori atau perihalan orang yang berlainan.

(3) Tanpa menjejaskan keluasan subseksyen (1), peraturan-peraturan, kaedah-kaedah, perintah, undang-undang kecil, arahan, garis panduan, pekeliling atau nota boleh dibuat berkenaan dengan—

- (a) borang, termasuk borang pemberitahuan, notis dan perakuan, bagi maksud Akta ini;
- (b) kelakuan, urusan dan hal ehwal Perbadanan;
- (c) deposit pemegang amanah, pemilik bersama atau perniagaan atau amalan profesional;
- (d) perlindungan deposit, bayaran berkenaan dengan deposit diinsuranskan dan hal berkaitan dengannya mengenai yang berikut:
 - (i) jika seseorang telah mendepositkan dengan dua anggota penerima deposit atau lebih yang bergabung dan terus beroperasi sebagai satu anggota penerima deposit;

- (ii) jika deposit dengan suatu anggota penerima deposit akan diperolehi oleh seseorang yang bukan anggota penerima deposit; atau
 - (iii) jika draf bank, cek atau surat cara bayaran lain yang seumpamanya atau arahan bayaran atau penjelasan telah memasuki suatu sistem pembayaran;
- (e) keutamaan bayaran antara deposit Islam yang berasaskan jagaan dan deposit Islam yang lain;
- (f) membahagikan deposit Islam yang berlainan jenis yang tidak berasaskan jagaan, kepada kategori yang berbeza dan menetapkan keutamaan bayaran antara kategori deposit Islam yang berbeza itu;
- (g) pulangan atau bunga yang kena dibayar di bawah subsubperenggan 3(10)(j) Jadual Ketiga;
- (h) perlindungan manfaat takaful atau insurans, bayaran berkenaan dengan manfaat dilindungi dan perkara yang berkaitan, jika seseorang berhak kepada manfaat takaful atau insurans daripada dua anggota penanggung insurans atau lebih yang bergabung dan terus beroperasi sebagai satu anggota penanggung insurans;
- (i) membahagikan manfaat perpaduan keluarga atau takaful am yang berlainan jenis kepada kategori yang berbeza dan menetapkan suatu keutamaan bayaran antara kategori manfaat takaful yang berbeza itu;
- (j) menentukan tarikh dan kadar penukaran kepada Ringgit bagi maksud membuat bayaran di bawah Bahagian IV berkenaan dengan deposit mata wang asing yang diinsuranskan;
- (k) borang, kaedah dan tatacara bagi mengkompaun kesalahan; dan
- (l) apa-apa jua di bawah Akta ini yang dikehendaki atau dibenarkan untuk dibuat sebagai peraturan-peraturan, kaedah-kaedah, perintah, undang-undang kecil, arahan, garis panduan, pekeliling atau nota.
- (4) Apa-apa peraturan-peraturan atau perintah yang dibuat di bawah seksyen ini hendaklah disiarkan dalam *Warta* dan hendaklah dibentangkan di hadapan Dewan Rakyat secepat yang dapat dilaksanakan selepas penyiarannya.

BAHAGIAN XII

PEMANSUHAN, KECUALIAN DAN PERALIHAN

Pemansuhan

210. Akta Perbadanan Insurans Deposit Malaysia 2005 dimansuhkan.

Kecualian dan peralihan

211. Walau apa pun pemansuhan Akta Perbadanan Insurans Deposit Malaysia 2005 di bawah seksyen 210—

- (a) semua pengarah Perbadanan dan Ketua Pegawai Eksekutif yang memegang jawatan di bawah Akta yang dimansuhkan sebaik sebelum permulaan kuat kuasa Akta ini hendaklah disifatkan telah dilantik di bawah Akta ini dan hendaklah terus memegang jawatan itu bagi tempoh jawatan masing-masing yang belum habis tempohnya di bawah Akta yang dimansuhkan pada masa Akta itu dimansuhkan di bawah seksyen 210;
- (b) kumpulan wang insurans deposit Islam dan kumpulan wang insurans deposit konvensional yang disenggara dan ditadbirkan oleh Perbadanan di bawah Akta yang dimansuhkan hendaklah disifatkan telah dan terus disenggara dan ditadbirkan oleh Perbadanan di bawah Akta ini;
- (c) perundangan subsidiari dan apa-apa kelulusan, arahan, keputusan, pengecualian, syor, penentuan, notis dan perbuatan atau benda lain yang dikeluarkan, dibuat atau dilakukan di bawah Akta yang dimansuhkan dan berkuat kuasa atau mempunyai kesan sebaik sebelum permulaan kuat kuasa Akta ini, hendaklah disifatkan telah dibuat atau dilakukan di bawah peruntukan yang bersamaan Akta ini, dan hendaklah terus mempunyai kuat kuasa dan kesan sepenuhnya berhubung dengan orang yang kepadanya ia terpakai sehingga dipinda atau digantikan;
- (d) semua transaksi, urus niaga, kontrak, surat kuasa wakil atau perkiraan yang disempurnakan atau dibuat menurut undang-undang dan semua urusan yang dilakukan menurut undang-undang, di bawah atau mengikut Akta yang dimansuhkan dengan mana-mana orang lain hendaklah

disifatkan telah disempurnakan, dibuat atau dilakukan menurut undang-undang dan secara sah, di bawah atau mengikut Akta ini, dan dengan demikian itu, apa-apa hak atau liabiliti di bawah transaksi, urusan niaga atau urusan itu yang wujud sebaik sebelum permulaan kuat kuasa Akta ini, hendaklah disifatkan sebagai terus menurut undang-undang dan sah di bawah Akta ini;

- (e) tiada apa jua pun boleh menjejaskan liabiliti mana-mana orang untuk didenda, didakwa atau dihukum bagi apa-apa pelanggaran atau kesalahan yang dilakukan di bawah Akta yang dimansuhkan sebaik sebelum permulaan kuat kuasa Akta ini;
- (f) apa-apa surat ikatan yang dikeluarkan atau disempurnakan secara sah di bawah Akta yang dimansuhkan hendaklah disifatkan telah dikeluarkan atau disempurnakan menurut undang-undang dan secara sah di bawah atau mengikut Akta ini;
- (g) apa-apa harta alih, harta tak alih dan aset yang dibeli, diperolehi, dipajak atau dipegang oleh Perbadanan di bawah Akta yang dimansuhkan hendaklah disifatkan telah dibeli, diperolehi, dipajak atau dipegang di bawah atau mengikut Akta ini;
- (h) apa-apa sebutan mengenai Akta yang dimansuhkan dalam mana-mana undang-undang bertulis hendaklah ditafsirkan sebagai sebutan mengenai Akta ini dan apa-apa sebutan mana-mana peruntukan tertentu Akta yang dimansuhkan dalam mana-mana undang-undang bertulis hendaklah ditafsirkan sebagai sebutan mengenai peruntukan Akta ini yang hampir-hampir bersamaan dengan peruntukan tertentu itu;
- (i) apa-apa perbuatan yang dikehendaki dilakukan di bawah Akta yang dimansuhkan hendaklah disifatkan sebagai dikehendaki dilakukan di bawah atau mengikut Akta ini;
- (j) apa-apa hak, faedah, keistimewaan, obligasi atau liabiliti yang diperolehi, terakru atau ditanggung di bawah Akta yang dimansuhkan, termasuk apa-apa obligasi untuk memelihara kerahsiaan, tidaklah terjejas oleh Akta ini dan hendaklah terus berkuat kuasa dan mempunyai kesan sepenuhnya; dan

- (k) semua perbuatan atau benda yang dilakukan mengikut Akta yang dimansuhkan hendaklah disifatkan telah dilakukan mengikut Akta ini dan sewajarnya, hendaklah terus sah di bawah Akta ini.

Pemindahan kumpulan wang tertentu daripada Bank Negara Malaysia

212. Pada suatu tarikh yang ditetapkan oleh Menteri atas syor Perbadanan dan Bank Negara Malaysia, wang dan apa-apa aset lain yang berada dalam kredit kumpulan wang skim jaminan insurans am dan hayat yang ditubuhkan di bawah seksyen 173 Akta Insurans 1996 hendaklah dipindahkan oleh Bank Negara Malaysia kepada Perbadanan dan dikreditkan secara bersamaan oleh Perbadanan kepada kumpulan wang perlindungan insurans am dan kumpulan wang perlindungan insurans hayat.

JADUAL PERTAMA

[Seksyen 104]

JAWATANKUASA PENTAKSIR

Tafsiran

1. Dalam seksyen 104 dan Jadual ini—

“harga transaksi” ertinya balasan bersih yang diterima atau boleh diterima oleh suatu institusi anggota bagi mana-mana aset institusi anggota yang dianggap oleh Perbadanan sebagai substansial atau mana-mana perniagaan institusi anggota yang telah dijual atau selainnya dilupuskan, sama ada melalui satu surat cara pindah milik atau lebih atau apa-apa cara lain, semasa Perbadanan atau orang dilantik berada dalam kawalan di bawah perenggan 99(1)(c), dan jika aset atau perniagaan institusi anggota telah dijual atau selainnya dilupuskan dalam dua transaksi atau lebih, ertinya agregat balasan bersih.

“institusi anggota” ertinya suatu institusi anggota yang diambil alih kawalannya oleh Perbadanan atau orang dilantik di bawah perenggan 99(1)(c);

“pemegang syer menentang” ertinya pemegang syer suatu institusi anggota, sama ada secara berseorangan atau kolektif yang memegang agregat tidak kurang daripada sepuluh peratus daripada modal dikeluarkan dan berbayar institusi anggota, pada masa yang ditentukan oleh Perbadanan dalam notis yang dikeluarkan di bawah subperenggan 2(1);

“pemiutang menentang” ertinya pemiutang suatu institusi anggota, sama ada secara berseorangan atau kolektif yang memegang agregat tidak kurang daripada sepuluh peratus daripada hutang belum dijelaskan yang cair dan tidak bercagar institusi anggota berdasarkan kepada rekod institusi anggota, pada masa yang ditentukan oleh Perbadanan dalam notis yang dikeluarkan di bawah subperenggan 2(1);

Notis transaksi

2. (1) Jika mana-mana aset institusi anggota yang dianggap Perbadanan sebagai substansial atau mana-mana perniagaan institusi anggota telah dijual atau selainnya dilupuskan, sama ada melalui satu surat cara pindah milik atau lebih atau apa-apa cara lain dan sama ada dalam satu transaksi atau lebih (dalam Jadual ini disebut secara kolektif sebagai “transaksi itu”), semasa Perbadanan atau orang dilantik berada dalam kawalan di bawah perenggan 99(1)(c), Perbadanan atau orang dilantik hendaklah memberikan notis mengenai jualan atau pelupusan lain itu pada suatu tarikh yang ditentukan oleh Perbadanan, selepas transaksi itu dianggap Perbadanan sebagai telah selesai secara substansial, dalam sekurang-kurangnya dua akhbar harian yang disiarkan di Malaysia, salah satu daripadanya hendaklah dalam bahasa kebangsaan.

(2) Notis di bawah subperenggan (1) hendaklah—

(a) menyatakan harga transaksi atau memperihalkan bagaimana harga transaksi akan dikira; dan

(b) menyatakan bahawa—

(i) jika institusi anggota berada dalam penggulungan, pelikuidasi boleh, tidak lebih daripada sembilan puluh hari dari tarikh notis yang disebut dalam subperenggan (1), memohon secara bertulis kepada Perbadanan bagi suatu kajian semula oleh Jawatankuasa Pentaksir mengenai kemunasabahan harga transaksi atau pengagihan dan penggunaan harga transaksi, atau kedua-duanya; atau

(ii) jika institusi anggota tidak berada dalam penggulungan—

(A) pemiutang menentang boleh, tidak lebih daripada dua puluh satu hari dari tarikh notis yang disebut dalam subperenggan (1), memohon secara bertulis kepada Perbadanan bagi suatu kajian semula oleh Jawatankuasa Pentaksir mengenai kemunasabahan harga transaksi atau pengagihan dan penggunaan harga transaksi, atau kedua-duanya; dan

(B) jika tiada permohonan dibuat oleh pemiutang menentang dalam tempoh masa yang dinyatakan dalam subsubsubsubperenggan (A), pemegang syer menentang boleh, tidak lebih daripada dua puluh satu hari selepas tempoh masa itu, memohon secara bertulis kepada Perbadanan bagi suatu kajian semula oleh Jawatankuasa Pentaksir mengenai kemunasabahan harga transaksi.

(3) Suatu permohonan di bawah subsubperenggan (2)(b) hendaklah dalam bentuk yang ditetapkan oleh Perbadanan.

Kajian semula oleh Jawatankuasa Pentaksir

3. (1) Jika Perbadanan menerima suatu permohonan yang disebut dalam subsubperenggan 2(2)(b), ia hendaklah dalam tempoh masa yang munasabah menubuhkan suatu Jawatankuasa Pentaksir dan merujuk permohonan itu kepada Jawatankuasa itu.

(2) Suatu Jawatankuasa Pentaksir hendaklah terdiri daripada tiga orang anggota yang dipilih daripada suatu panel yang mengandungi sepuluh orang yang dilantik oleh Menteri.

(3) Orang yang dilantik ke panel itu hendaklah layak dan berupaya melaksanakan fungsi Jawatankuasa Pentaksir, setiap orang mempunyai sekurang-kurangnya pengalaman selama lima belas tahun dalam bidang audit, penilaian, perakaunan atau kewangan dan panel itu hendaklah termasuk sekurang-kurangnya yang berikut:

- (a) seorang juruaudit syarikat atau pelikuidasi yang diluluskan di bawah Akta Syarikat 1965;
- (b) seorang akauntan yang mempunyai kelayakan profesional; dan
- (c) seorang penilai yang mempunyai kelayakan profesional.

(4) Orang yang berikut tidak layak untuk dilantik ke panel itu:

- (a) suatu perbadanan;
- (b) seorang bankrap belum lepas;
- (c) seorang pemegang gadaian atau gadai janji mana-mana aset institusi anggota;
- (d) seorang juruaudit institusi anggota; atau
- (e) seorang pegawai institusi anggota.

(5) Tiada tindakan atau prosiding Jawatankuasa Pentaksir menjadi tidak sah semata-mata oleh sebab—

- (a) apa-apa kecacatan dalam keanggotaan Jawatankuasa Pentaksir; atau
- (b) apa-apa peninggalan, kecacatan atau ketidakteraturan dalam prosiding Jawatankuasa Pentaksir.

Kuasa Jawatankuasa Pentaksir

4. (1) Apabila suatu permohonan dirujuk kepada Jawatankuasa Pentaksir di bawah subperenggan 3(1), ia hendaklah mengkaji semula kemunasabahan harga transaksi atau pengagihan dan penggunaan harga transaksi, atau kedua-duanya, mengikut permintaan dalam permohonan itu.

(2) Dalam mengkaji semula kemunasabahan harga transaksi, Jawatankuasa Pentaksir hendaklah mengambil kira perkara yang berikut:

- (a) apa-apa perkara yang dianggapnya berkaitan termasuk hakikat bahawa suatu notis dalam perenggan 2 telah dikeluarkan; dan
- (b) keadaan pasaran yang terpakai bagi jualan atau pelupusan aset atau perniagaan dalam suatu penerimaan atau penggulungan,

dan dalam semua keadaan ia hendaklah menolak nilai manfaat yang diperoleh daripada apa-apa bantuan kewangan khas yang diperuntukkan, secara langsung atau tidak langsung, kepada institusi anggota oleh Perbadanan atau Bank Negara Malaysia.

(3) Walau apa pun subperenggan (2), jika suatu permohonan dibuat oleh pemegang syer menentang dan Jawatankuasa Pentaksir berpendapat institusi anggota adalah tidak solven, hakikat bahawa balasan bersih yang diterima adalah tidak mencukupi untuk mengakibatkan apa-apa bayaran kepada pemegang syer dan tiada apa-apa pun daripada balasan bersih itu diagihkan dan digunakan bagi syer institusi anggota adalah disifatkan sebagai munasabah secara konklusif.

(4) Jika Jawatankuasa Pentaksir memutuskan bahawa—

- (a) harga transaksi adalah rendah daripada harga yang pada pendapatnya adalah balasan munasabah bagi aset atau perniagaan itu (dalam subperenggan ini disebut “harga munasabah”), ia hendaklah menasihatkan Perbadanan supaya membayar kepada institusi anggota itu perbezaan antara harga transaksi dengan harga munasabah dan Perbadanan hendaklah dalam apa-apa tempoh yang ditentukan oleh Jawatankuasa Pentaksir membayar perbezaan itu kepada institusi anggota itu; atau
- (b) harga transaksi adalah harga munasabah pada pendapatnya, ia hendaklah menasihatkan Perbadanan sewajarnya.

(5) Dalam mengkaji semula pengagihan harga transaksi, Jawatankuasa Pentaksir hendaklah memutuskan sama ada harga transaksi telah atau akan diagihkan antara pemiutang institusi anggota mengikut aturan keutamaan dan takat yang sama seolah-olah aset atau perniagaan itu tidak dijual atau selainnya dilupuskan oleh Perbadanan atau orang dilantik dan sebaliknya institusi anggota telah digulungkan secara keseluruhannya dan semua asetnya dijual atau selainnya dilupuskan untuk wang tunai.

(6) Jika Jawatankuasa Pentaksir memutuskan bahawa—

- (a) harga transaksi telah tidak atau tidak akan diagihkan dan digunakan dalam cara yang diperihalkan dalam subperenggan (5), ia hendaklah menasihatkan Perbadanan supaya membayar amaun yang berkenaan kepada institusi anggota itu atau mengambil apa-apa langkah lain untuk menghasilkan keputusan yang sama seolah-olah harga transaksi telah atau akan diagihkan dan digunakan dalam cara yang diperihalkan dalam subperenggan (5) dan Perbadanan hendaklah berbuat demikian dalam apa-apa tempoh yang ditentukan oleh Jawatankuasa Pentaksir; atau

(b) harga transaksi telah atau akan diagihkan dan digunakan dalam cara yang diperihalkan dalam subperenggan (5), ia hendaklah menasihatkan Perbadanan sewajarnya.

(7) Jika Jawatankuasa Pentaksir memutuskan bahawa adalah adil dan munasabah sekiranya bunga atau pulangan lain dibayar atas suatu amaun yang kena dibayar di bawah subsubperenggan (4)(a) atau subsubperenggan (6)(a), bunga atau pulangan itu hendaklah dibayar oleh Perbadanan pada kadar atau dalam amaun yang diputuskan oleh Jawatankuasa itu sebagai adil dan munasabah dalam apa-apa tempoh yang ditentukan oleh Jawatankuasa Pentaksir.

(8) Jika Jawatankuasa Pentaksir memutuskan bahawa adalah adil dan munasabah sekiranya kos prosiding di hadapan Jawatankuasa Pentaksir diawardkan kepada satu pihak terhadap pihak prosiding yang lain, amaun yang diputuskan oleh Jawatankuasa itu sebagai adil dan munasabah untuk diawardkan kepada satu pihak berkenaan dengan kosnya hendaklah dibayar oleh pihak yang lain itu dalam apa-apa tempoh yang ditentukan oleh Jawatankuasa Pentaksir.

(9) Jawatankuasa Pentaksir hendaklah menyelesaikan sesuatu permohonan yang dirujukkan kepadanya di bawah subperenggan 3(1) dalam tempoh tiga bulan dari tarikh rujukan itu dibuat kepada Jawatankuasa Pentaksir atau dalam apa-apa tempoh lain yang diluluskan oleh Menteri.

(10) Suatu perakuan yang ditandatangani oleh ketiga-tiga anggota Jawatankuasa Pentaksir yang mengesahkan mana-mana keputusan Jawatankuasa Pentaksir hendaklah menjadi keterangan muktamad bagi keputusan itu.

(11) Jika harga transaksi telah dibayar atau kena dibayar oleh suatu institusi perantaraan, Perbadanan boleh menentukan mana-mana obligasi Perbadanan di bawah subperenggan (4), (6), (7) atau (8) yang hendaklah dilaksanakan oleh institusi perantaraan, secara keseluruhannya atau sebahagiannya, dalam tempat dan menggantikan Perbadanan.

Pemohon dimaklumkan mengenai keputusan Jawatankuasa Pentaksir

5. Perbadanan hendaklah dengan secepat yang dapat dilaksanakan memaklumkan pemohon mengenai keputusan Jawatankuasa Pentaksir di bawah subperenggan 4(9).

Honorarium dan elaun

6. Pentaksir yang dilantik di bawah subperenggan 3(1) hendaklah dibayar apa-apa honorarium dan elaun sebagaimana yang ditentukan oleh Lembaga.

JADUAL KEDUA

[Subseksyen 99(5), 115(6) dan 180(5)]

PEMINDAHAN ASET DAN LIABILITI

Tafsiran

1. (1) Dalam Jadual ini, melainkan jika konteksnya menghendaki makna yang lain—

“kepentingan berdaftar” ertinya apa-apa hak atau kepentingan dalam—

- (a) suatu gadaian yang dibuat oleh suatu syarikat dan boleh didaftarkan di bawah Akta Syarikat 1965 dan yang didaftarkan sewajarnya mengikut peruntukan yang berkenaan Akta itu; atau
- (b) tanah yang didaftarkan sewajarnya di bawah Akta Hakmilik Strata 1985 [*Akta 318*], Kanun Tanah Negara, Ordinan Tanah Sabah atau Kanun Tanah Sarawak;

“kepentingan mengenai tanah” ertinya—

- (a) apa-apa kepentingan mengenai tanah, sama ada berdaftar atau boleh didaftarkan, termasuk kepentingan yang baginya Akta Hakmilik Strata 1985 terpakai dan yang boleh dipindahmilikkan di bawah Bahagian Empat Belas Kanun Tanah Negara atau Bahagian V Ordinan Tanah Sabah atau Bahagian VI Kanun Tanah Sarawak;
- (b) apa-apa kaveat pemegang lien atau kaveat lain; atau
- (c) apa-apa hak atau kelayakan lain yang berhubungan dengan tanah;

“pemindah” dan “penerima pindahan” ertinya pihak masing-masing yang dinyatakan sedemikian dalam suatu surat cara pindah milik.

“penanggung kewajipan” ertinya mana-mana orang yang berhutang suatu kewajipan atau obligasi dalam apa-apa bentuk, sama ada pada masa sekarang atau hadapan, dan sama ada terletak hak atau kontingen, kepada seseorang pemindah, termasuk seseorang penanggung kewajipan di bawah suatu kemudahan pembiayaan Islam, kemudahan kredit konvensional, cagaran atau hak dalam tindakan yang lain;

“surat cara pindah milik” ertinya suatu perakuan yang dikeluarkan oleh Perbadanan di bawah perenggan 2 dan termasuklah suatu surat cara pindah milik gantian yang dikeluarkan di bawah perenggan 4;

“tarikh pindah milik” ertinya tarikh yang dinyatakan dalam suatu surat cara pindah milik sebagai tarikh kuat kuasa pindahan suatu aset atau liabiliti;

(2) Sebutan mengenai “liabiliti” dalam Jadual ini ertinya keseluruhan atau mana-mana bahagian liabiliti yang dipindahkan melalui suatu surat cara pindah milik.

(3) Bagi mengelakkan keraguan, jika hanya suatu bahagian liabiliti dipindahkan, peruntukan Jadual ini dan kesan pindahan, termasuklah surat cara pindah milik, hendaklah berhubung dengan bahagian liabiliti yang dipindahkan itu sahaja.

Surat cara pindah milik

2. (1) Jika Perbadanan bercadang untuk memindahmilikkan mana-mana aset atau liabiliti menurut peruntukan Jadual ini, Perbadanan hendaklah mengeluarkan suatu surat cara pindah milik mengikut Jadual ini.

(2) Bagi mengelakkan keraguan, Perbadanan boleh mengeluarkan suatu surat cara pindah milik berkenaan dengan mana-mana perjanjian kewangan yang layak.

(3) Walau apa pun mana-mana undang-undang lain atau mana-mana rukun undang-undang atau perjanjian, suatu surat cara pindah milik hendaklah mempunyai kesan mengikut peruntukan Jadual ini dan hendaklah mengikat mana-mana orang yang terjejas dengannya.

(4) Suatu surat cara pindah milik boleh dalam apa-apa bentuk sebagaimana yang ditentukan oleh Perbadanan.

(5) Suatu surat cara pindah milik hendaklah dikeluarkan di bawah meterai perbadanan atau meterai faksimile Perbadanan.

(6) Suatu surat cara pindah milik boleh dikeluarkan oleh Perbadanan sebelum, pada atau selepas tarikh pindah milik.

Kesan surat cara pindah milik

3. (1) Jika suatu aset dipindahkan di bawah suatu surat cara pindah milik—

- (a) dalam hal jika aset itu dipegang berseorangan oleh pemindah sebaik sebelum tarikh pindah milik, aset itu hendaklah pada dan dari tarikh pindah milik terletak hak pada penerima pindahan; dan
- (b) dalam hal jika aset itu dipegang bersesama oleh pemindah dan seorang yang lain sebaik sebelum tarikh pindah milik, aset itu hendaklah pada dan dari tarikh pindah milik terletak hak pada penerima pindahan bersesama dengan seorang yang lain itu.

(2) Penerima pindahan hendaklah, pada dan dari tarikh pindah milik suatu aset, memperoleh dan diletak hak dengan segala hak, hakmilik dan kepentingan pemindah mengenai, pada masa sekarang dan hadapan, dan kewajipan berkenaan dengan, aset itu, bebas daripada apa-apa bebanan kecuali apa-apa kepentingan berdaftar yang terpakai pada tarikh pindah milik.

(3) Suatu surat cara pindah milik yang menyatakan bahawa suatu aset atau liabiliti dipindahkan kepada penerima pindahan menjadi keterangan muktamad mengenai pindahan itu pada tarikh yang dinyatakan dalam surat cara pindah milik itu sebagai tarikh pindah milik.

(4) Tiada peruntukan dalam mana-mana undang-undang termasuk Akta Undang-Undang Sivil 1956 [*Akta 67*], rukun undang-undang atau perjanjian yang membataskan atau melarang hak pemindah atau menghendaki apa-apa persetujuan untuk menyerahkan, menjual, melupuskan atau memindahkan aset itu boleh terpakai atau mempunyai apa-apa kesan berkenaan dengan pindahan kepada atau pemerolehan oleh penerima pindahan.

(5) Jika aset yang dipindahkan di bawah suatu surat cara pindah milik ialah suatu kemudahan pembiayaan Islam atau kemudahan kredit konvensional, penerima pindahan disifatkan telah memberikan pembiayaan, pendahuluan, pinjaman atau kemudahan atau transaksi lain atau memberikan jaminan walau pun pembiayaan, pendahuluan, pinjaman, kemudahan atau transaksi lain atau jaminan itu telah diberikan, digunakan atau dikeluarkan oleh pemindah.

(6) Jika cagaran bagi suatu kemudahan pembiayaan Islam atau kemudahan kredit konvensional yang dipindahkan di bawah suatu surat cara pindah milik termasuk suatu syer—

- (a) bagi maksud perenggan 6A(9)(b) Akta Syarikat 1965, penerima pindahan, disifatkan memegang suatu kepentingan mengenai syer hanya melalui cagaran bagi maksud suatu transaksi yang dibuat dalam perjalanan biasa perniagaan berkaitan dengan peminjaman wang; dan
- (b) kepentingan penerima pindahan dalam syer hendaklah diabaikan bagi maksud seksyen 6A Akta Syarikat 1965.

(7) Tertakluk kepada subperenggan (8), berhubung dengan suatu liabiliti yang dipindahkan di bawah suatu surat cara pindah milik—

- (a) penerima pindahan disifatkan telah mengambil alih liabiliti; dan
- (b) pemindah dibebaskan dan dilepaskan daripada liabiliti dan penerima pindahan bertanggungjawab, bukannya pemindah, untuk melepaskan liabiliti.

(8) Subperenggan (7) tidak terpakai bagi suatu pengambilalihan oleh penerima pindahan akan sebahagian sahaja liabiliti yang tidak diinsuranskan atau dilindungi oleh Perbadanan di bawah Akta ini.

(9) Bagi mengelakkan keraguan, jika sebahagian sahaja liabiliti dipindahkan di bawah suatu surat cara pindah milik—

- (a) bahagian baki liabiliti yang tinggal tidak diambil alih oleh penerima pindahan; dan
- (b) pemindah tidak dibebaskan atau dilepaskan daripada keseluruhan liabiliti.

(10) Berhubung dengan suatu aset atau liabiliti yang dipindahkan di bawah suatu surat cara pindah milik—

- (a) suatu perjanjian atau surat cara sedia ada, sama ada dalam bentuk suatu surat ikatan, wasiat atau selainnya, atau perintah mana-mana mahkamah, yang di bawah atau menurut kuasanya, pemindah mempunyai hakmilik atau pemilikan kepentingan mengenai atau hak kepada aset itu, hendaklah ditafsirkan dan hendaklah mempunyai kuat kuasa seolah-olah apa-apa sebutan dalamnya mengenai pemindah telah digantikan dengan sebutan mengenai penerima pindahan;
- (b) suatu perjanjian sedia ada yang di bawahnya pemindah ialah suatu pihak hendaklah mempunyai kuat kuasa seolah-olah penerima pindahan menjadi suatu pihak di bawahnya dan bukannya pemindah;
- (c) suatu petunjuk, arahan, mandat, surat kuasa wakil, kuasa, aku janji atau persetujuan sedia ada, sama ada berhubung dengan suatu akaun atau tidak, yang telah diberikan kepada pemindah, sama ada berseorangan atau secara bersesama dengan orang lain, hendaklah mempunyai kuat kuasa, seolah-olah diberikan kepada penerima pindahan sama ada berseorangan atau bersesama dengan orang lain itu;
- (d) mana-mana cagaran yang dipegang sebaik sebelum tarikh pindah milik oleh pemindah, atau oleh seorang penama atau pemegang amanah bagi pemindah, sebagai cagaran untuk pembayaran atau pelepasan apa-apa liabiliti mana-mana orang, hendaklah dipegang oleh penerima pindahan atau penama atau pemegang amanah itu sebagai penama atau pemegang amanah bagi penerima pindahan, dengan keutamaan yang sama seperti yang ada pada pemindah, dan setakat liabiliti itu hendaklah tersedia kepada penerima pindahan sebagai cagaran bagi pembayaran atau pelepasan liabiliti itu, dan jika mana-mana cagaran diluaskan kepada pendahuluan atau liabiliti pada masa hadapan, ia hendaklah dipegang oleh dan tersedia kepada penerima pindahan sebagai cagaran bagi pendahuluan atau liabiliti masa hadapan kepada penerima pindahan mengikut cara yang sama dalam segala hal sebagaimana pendahuluan atau liabiliti masa hadapan kepada pemindah dijamin sebaik sebelum tarikh pindahmilik;
- (e) sebagai tambahan kepada apa-apa hak, kuasa atau remedi lain yang diberikan kepada penerima pindahan dalam Jadual ini, penerima pindahan hendaklah mempunyai hak, kuasa dan remedi pemindah (dan khususnya, hak dan kuasa untuk mengambil atau menentang prosiding undang-undang atau prosiding lain atau membuat atau menentang permohonan kepada mana-mana pihak berkuasa) bagi menentukan, melindungi atau menguatkuasakan hak, hakmilik atau kepentingan yang terletak hak pada penerima pindahan atau menentang mana-mana liabiliti, tuntutan atau kepentingan berdaftar seolah-olah ia pada setiap masa ialah hak, hakmilik, kepentingan atau liabiliti penerima pindahan, termasuklah hak, hakmilik, kepentingan atau liabiliti berhubung dengan mana-mana prosiding undang-undang atau prosiding lain atau permohonan kepada mana-mana pihak berkuasa yang belum selesai sebaik sebelum tarikh pindah milik oleh atau terhadap pemindah;

- (f) suatu penghakiman, award atau perintah yang diperoleh oleh pemindah dan tidak diselesaikan sepenuhnya sebelum tarikh pindah milik boleh dikuatkuasakan oleh penerima pindahan;
 - (g) tiada pindahan kepada atau pemerolehan oleh penerima pindahan akan menjadi tidak sah atau boleh menjadi tidak sah disebabkan oleh pemakaian mana-mana undang-undang;
 - (h) jika apa-apa—
 - (i) keuntungan atau pulangan lain (dalam subperenggan ini disebut sebagai “pulangan”); atau
 - (ii) bunga,
yang kena dibayar di bawah suatu perjanjian diputuskan dengan merujuk kepada kos dana atau kadar pinjaman asas atau sumber rujukan lain yang digunakan oleh pemindah, atau ia tidak lagi boleh diputuskan sebagaimana yang diperuntukkan dalam perjanjian itu, pulangan atau bunga yang kena dibayar di bawah perjanjian itu hendaklah sebagaimana yang ditetapkan di bawah seksyen 209 atau sebagaimana yang dipersetujui oleh penerima pindahan dengan penanggung kewajipan perjanjian itu;
 - (i) jika jagaan mana-mana barangan, benda atau dokumen dipegang oleh pemindah sebagai baili sebaik sebelum tarikh pindah milik, barangan, benda atau dokumen itu disifatkan telah berpindah kepada penerima pindahan dan hak dan obligasi pemindah di bawah mana-mana kontrak bailmen berkaitan dengan barangan, benda atau dokumen itu hendaklah dipindahkan kepada penerima pindahan;
 - (j) suatu surat cara boleh niaga atau arahan bayaran wang yang diberikan kepada atau digunakan atau diterima oleh pemindah, atau kena dibayar di tempat perniagaan pemindah, sama ada diberikan, digunakan atau diterima sebelum, pada atau selepas tarikh pindah milik, hendaklah mempunyai kesan yang sama pada dan dari tarikh pindah milik, seolah-olah ia telah diberikan kepada atau digunakan atau diterima oleh penerima pindahan atau kena dibayar di tempat perniagaan penerima pindahan; dan
 - (k) mana-mana akaun antara pemindah dengan pelanggannya hendaklah menjadi akaun antara penerima pindahan dengan pelanggan itu, tertakluk kepada syarat dan insiden yang ada hingga ketika itu, dan akaun itu disifatkan bagi semua maksud sebagai satu akaun yang berterusan.
- (11) Suatu pindahan aset atau liabiliti di bawah suatu surat cara pindah milik tidak boleh—
- (a) dianggap sebagai meletakkan—
 - (i) penerima pindahan;
 - (ii) pemindah;
 - (iii) mana-mana orang yang mendapat hakmilik daripada penerima pindahan; atau

- (iv) mana-mana orang lain,
dalam kedudukan mungkir atau ingkar di bawah apa-apa kontrak atau pecah kepercayaan;
- (b) dianggap sebagai menimbulkan suatu hak atau kewajipan bagi mana-mana orang untuk—
 - (i) menamatkan, membatalkan atau mengubah suatu perjanjian;
 - (ii) menguatkuasakan atau mempercepat pelaksanaan suatu obligasi; atau
 - (iii) mengkehendaki pelaksanaan suatu obligasi yang tidak selainnya timbul untuk pelaksanaan;
- (c) dianggap sebagai meletakkan pemindah, penerima pindahan atau mana-mana orang lain dalam kedudukan melanggar mana-mana undang-undang, rukun undang-undang atau perjanjian yang melarang, menyekat atau mengawal selia penyerahhakan, jualan, pelupusan atau pindah milik apa-apa aset atau liabiliti atau penzahiran maklumat;
- (d) melepaskan seorang penjamin daripada suatu obligasi;
- (e) menidaksahkan atau melepaskan suatu kontrak atau cagaran; atau
- (f) dianggap sebagai menamatkan, membatalkan atau mengubah apa-apa hak, keistimewaan, pengecualian (termasuk apa-apa pengecualian cukai) atau keutamaan yang pemindah berhak kepadanya dan yang menurut kuasa Jadual ini telah terletak hak pada penerima pindahan atau yang wujud demi manfaat pemindah berhubung dengan mana-mana aset atau liabiliti yang dipindahkan kepada penerima pindahan menurut Jadual ini.

Surat cara pindah milik gantian

4. (1) Perbadanan boleh mengeluarkan suatu surat cara pindah milik baru (dalam perenggan ini disebut “surat cara pindah milik gantian”) untuk menggantikan mana-mana surat cara pindah milik yang telah dikeluarkannya sebelum ini bagi tujuan membetulkan apa-apa peninggalan atau khilaf dalam surat cara pindah milik itu.

(2) Apa-apa surat cara pindah milik gantian yang dikeluarkan di bawah subperenggan (1) yang disempurnakan di bawah meterai perbadanan atau meterai faksimile Perbadanan, yang menyatakan bahawa suatu aset atau liabiliti telah dipindahkan kepada penerima pindahan menjadi keterangan muktamad mengenai pindahan itu pada tarikh pindah milik yang dinyatakan dalam surat cara pindah milik gantian itu.

(3) Jika mana-mana undang-undang menyatakan suatu tempoh masa yang dalamnya suatu pindahan apa-apa aset atau liabiliti yang menjadi hal perkara suatu surat cara pindah milik gantian hendaklah didaftarkan atau difailkan, tempoh itu hendaklah bermula dari tarikh pindah milik yang dinyatakan dalam surat cara pindah milik gantian atau tarikh surat cara pindah milik gantian itu dikeluarkan, mengikut mana-mana yang kemudian.

(4) Apa-apa perbuatan yang dilakukan oleh penerima pindahan atau mana-mana orang lain, dengan bergantung kepada suatu surat cara pindah milik yang dikeluarkan sebelum ini tidaklah terjejas oleh mana-mana peninggalan atau khilaf yang dibetulkan dalam suatu surat cara pindah milik gantian.

(5) Bagi maksud Akta ini, apa-apa sebutan mengenai suatu surat cara pindah milik hendaklah disifatkan sebagai termasuk suatu sebutan mengenai suatu surat cara pindah milik gantian.

Peruntukan tambahan mengenai tanah

5. (1) Walau apa pun peruntukan Kanun Tanah Negara, Ordinan Tanah Sabah, Kanun Tanah Sarawak atau mana-mana undang-undang lain, apa-apa kaveat atau perintah larangan yang telah dimasukkan, diendorskan, didaftarkan atau diserahkan, sebelum, pada atau selepas tarikh pindah milik tidaklah boleh menghalang pindah milik apa-apa kepentingan mengenai tanah pemindah kepada penerima pindahan.

(2) Jika suatu surat cara pindah milik meletak hak pada penerima pindahan apa-apa kepentingan mengenai tanah—

(a) di Semenanjung Malaysia, apabila diterima—

(i) bayaran fi yang ditetapkan; dan

(ii) surat cara pindah milik,

Pendaftar di bawah Kanun Tanah Negara hendaklah, tanpa memerlukan apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melakukan segala benda yang diperlukan untuk menguatkuasakan pindah milik itu;

(b) di Sabah, apabila diterima—

(i) bayaran fi yang ditetapkan; dan

(ii) surat cara pindah milik,

Pendaftar di bawah Ordinan Tanah Sabah hendaklah, tanpa memerlukan apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melakukan segala benda yang diperlukan untuk menguatkuasakan pindah milik itu;

(c) di Sarawak, apabila diterima—

(i) bayaran fi yang ditetapkan; dan

(ii) surat cara pindah milik,

Pendaftar di bawah Kanun Tanah Sarawak hendaklah, tanpa memerlukan apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melakukan segala benda yang diperlukan untuk menguatkuasakan pindah milik itu;

(3) Walau apa pun mana-mana peruntukan Kanun Tanah Negara, Ordinan Tanah Sabah, Kanun Tanah Sarawak atau mana-mana undang-undang lain, suatu surat cara pindah milik berkuat kuasa untuk meletak hak suatu kepentingan mengenai tanah pada penerima pindahan pada tarikh pindah milik dan menjadi keterangan muktamad mengenai pindah milik itu.

Pendaftar lain hendaklah memberikan kuat kuasa kepada surat cara pindah milik

6. (1) Walau apa pun peruntukan mana-mana undang-undang lain, tiap-tiap pendaftar mahkamah, Pendaftar Syarikat, pendaftar kapal Malaysia, depositori pusat, ejen depositori yang dibenarkan dan mana-mana orang yang menyenggara suatu daftar atau rekod pemilikan, kepentingan atau cagaran (dalam perenggan ini disebut “Pendaftar”) hendaklah, apabila menerima—

- (a) bayaran fi yang ditetapkan; dan
- (b) surat cara pindah milik,

tanpa memerlukan apa-apa permohonan lanjut atau pemfailan apa-apa dokumen lanjut, melakukan segala benda dan membuat semua catatan atau memorial dalam mana-mana daftar atau rekod yang disimpan oleh Pendaftar sebagaimana yang perlu untuk memberikan kuat kuasa kepada pindah milik aset yang berkaitan dengan surat cara pindah milik itu.

(2) Bagi maksud perenggan ini, subseksyen 112A(1) Akta Syarikat 1965 hendaklah disifatkan terpakai bagi penerima pindahan seolah-olah perkataan “tiga puluh” dalam subseksyen itu telah digantikan dengan perkataan “seratus lapan puluh”.

(3) Walau apa pun mana-mana peruntukan Akta Syarikat 1965 atau mana-mana undang-undang lain, suatu surat cara pindah milik berkuat kuasa untuk meletak hak pada penerima pindahan, mana-mana hakmilik, kepentingan atau cagaran dalam aset atau untuk memindahkan liabiliti kepada penerima pindahan, pada tarikh pindah milik dan menjadi keterangan muktamad mengenai pindah milik atau pindahan itu.

Kekebalan Pendaftar

7. Seseorang Pendaftar atau orang yang menyenggara suatu daftar atau rekod yang disebut di bawah perenggan 5 atau 6 tidaklah bertanggung kepada mana-mana orang berkenaan dengan pembuatan apa-apa memorial atau catatan pada dokumen hakmilik daftaran atau mana-mana daftar atau rekod lain dengan bergantung pada surat cara pindah milik itu.

Gantian automatik dalam mana-mana prosiding undang-undang atau yang lain

8. Walau apa pun peruntukan mana-mana undang-undang lain, tiap-tiap pendaftar mahkamah hendaklah apabila menerima suatu surat cara pindah milik melakukan segala benda dan membuat segala catatan dalam mana-mana

daftar atau rekod yang disimpan oleh pendaftar itu sebagaimana yang perlu untuk memberi kesan kepada penggantian automatik penerima pindahan di tempat pemindah sebagai pihak dalam mana-mana prosiding undang-undang atau yang lain.

Pemindahan aset di luar Malaysia

9. (1) Suatu surat cara pindah milik yang dikeluarkan di bawah Jadual ini boleh berhubungan dengan mana-mana aset pemindah di luar Malaysia dan kesan boleh diberikan sama ada mengikut apa-apa perjanjian bersaling yang berhubungan dengan penguatkuasaan penghakiman yang wujud antara Malaysia dengan negara atau wilayah di luar Malaysia di mana aset itu terletak, atau jika tiada perjanjian sedemikian, mengikut undang-undang yang terpakai di negara atau wilayah itu, dan sehingga peletakhakan itu diberi kesan sepenuhnya di negara atau wilayah di luar Malaysia di mana aset itu terletak, pemindah hendaklah memegang aset itu, bersama-sama mana-mana aset atau hak tambahan yang terakru menurut kuasa aset itu atau apa-apa hak dalamnya, sebagai seorang pemegang amanah demi manfaat penerima pindahan dan dengan segera mengirimitkan atau memindahkan kepada penerima pindahan apa-apa wang atau benda lain yang bernilai yang diterima oleh pemindah disebabkan oleh aset itu atau mana-mana aset atau hak tambahan itu.

(2) Atas permintaan penerima pindahan, pemindah, atas kosnya sendiri, hendaklah mengambil segala langkah yang perlu untuk memastikan peletakhakan mana-mana aset pemindah di luar Malaysia diberi kesan sepenuhnya di bawah undang-undang yang terpakai di negara atau wilayah di mana aset itu terletak.

JADUAL KETIGA

[Seksyen 158]

PELETAKHAKAN STATUTORI

Tafsiran

1. (1) Dalam Jadual ini, melainkan jika konteksnya menghendaki makna yang lain—

“kepentingan berdaftar” ertinya apa-apa hak atau kepentingan dalam—

- (a) suatu gadaian yang dibuat oleh suatu syarikat dan boleh didaftarkan di bawah Akta Syarikat 1965 dan yang didaftarkan sewajarnya mengikut peruntukan yang berkenaan Akta itu; atau
- (b) tanah yang didaftarkan sewajarnya di bawah Akta Hakmilik Strata 1985, Kanun Tanah Negara, Ordinan Tanah Sabah atau Kanun Tanah Sarawak;

“kepentingan mengenai tanah” ertinya—

- (a) apa-apa kepentingan mengenai tanah, sama ada berdaftar atau boleh didaftarkan, termasuk kepentingan yang baginya Akta Hakmilik Strata 1985 terpakai dan yang boleh dipindahmilikkan di bawah Bahagian Empat Belas Kanun Tanah Negara atau Bahagian V Ordinan Tanah Sabah atau Bahagian VI Kanun Tanah Sarawak;
- (b) apa-apa kaveat pemegang lien atau kaveat lain; atau
- (c) apa-apa hak atau kelayakan lain yang berhubungan dengan tanah;

“kewajipan didedahkan”, berhubung dengan suatu perakuan peletakhakan, ertinya suatu kewajipan atau liabiliti yang terhutang kepada penanggung kewajipan oleh penjual di bawah atau berkenaan dengan aset dan kewajipan atau liabiliti itu didedahkan oleh penjual kepada Perbadanan secara bertulis sebelum tarikh peletakhakan;

“pembeli” ertinya seseorang yang kepadanya Perbadanan melupuskan sesuatu aset;

“penanggung kewajipan” ertinya mana-mana orang yang berhutang suatu kewajipan atau obligasi dalam apa-apa bentuk, sama ada pada masa sekarang atau hadapan, dan sama ada terletak hak atau kontingen, kepada seseorang pembeli, termasuk seseorang penanggung kewajipan di bawah suatu kemudahan pembiayaan Islam, kemudahan kredit konvensional, cagaran atau hak dalam tindakan yang lain;

“penjual” ertinya seseorang yang daripadanya Perbadanan memperoleh sesuatu aset;

“perakuan peletakhakan” ertinya suatu perakuan yang dikeluarkan oleh Perbadanan di bawah perenggan 3 dan termasuklah suatu perakuan peletakhakan gantian yang dikeluarkan di bawah perenggan 5.

“perakuan pindah milik” ertinya suatu perakuan yang dikeluarkan oleh Perbadanan di bawah perenggan 10 dan termasuklah suatu perakuan pindah milik gantian yang dikeluarkan di bawah perenggan 11;

“tarikh peletakhakan” ertinya tarikh yang dinyatakan dalam suatu perakuan peletakhakan sebagai tarikh yang suatu aset terletak hak pada Perbadanan atau suatu subsidiari Perbadanan;

“tuntutan” ertinya apa-apa jenis tuntutan, pembelaan, tuntutan balas, penolakan, prosiding undang-undang atau yang lain, tindakan, ekuiti atau kepentingan ekuiti oleh seseorang penanggung kewajipan atau mana-mana pihak ketiga terhadap penjual, atau yang berkenaan dengan suatu aset, sama ada pada masa sekarang atau hadapan, dan sama ada terletak hak atau kontingen;

“tuntutan didedahkan”, berhubung dengan suatu perakuan peletakhakan, ertinya apa-apa tuntutan khusus yang didedahkan oleh penjual kepada Perbadanan secara bertulis sebelum tarikh peletakhakan;

Peletakhakan

2. Jika Perbadanan bercadang untuk memperoleh atau melupuskan suatu aset menurut peruntukan peletakhakan statutori yang dinyatakan dalam Jadual ini, Perbadanan hendaklah mengeluarkan suatu perakuan peletakhakan berkenaan dengan perolehan itu atau suatu perakuan pindah milik berkenaan dengan pelupusan itu mengikut Jadual ini.

Perolehan

3. (1) Suatu perakuan peletakhakan boleh dalam apa-apa bentuk sebagaimana yang ditentukan oleh Perbadanan.

(2) Suatu perakuan peletakhakan hendaklah dikeluarkan di bawah meterai perbadanan atau meterai faksimile Perbadanan.

(3) Suatu perakuan peletakhakan boleh dikeluarkan oleh Perbadanan sebelum, pada atau selepas tarikh peletakhakan.

(4) Jika Perbadanan memperoleh suatu aset dengan mengeluarkan suatu perakuan peletakhakan—

(a) dalam hal jika aset itu dipegang berseorangan oleh penjual sebaik sebelum tarikh peletakhakan, aset itu hendaklah pada dan dari tarikh peletakhakan terletak hak pada Perbadanan; dan

(b) dalam hal jika aset itu dipegang bersesama oleh penjual dan seorang yang lain sebaik sebelum tarikh peletakhakan, aset itu hendaklah pada dan dari tarikh peletakhakan terletak hak pada Perbadanan bersesama dengan seorang yang lain itu.

(5) Perbadanan hendaklah, pada dan dari tarikh peletakhakan suatu aset, memperoleh dan diletak hak dengan segala hak, hakmilik dan kepentingan penjual dalam, pada masa sekarang dan hadapan, dan kewajiban didedahkan berkenaan dengan, aset itu, bebas daripada apa-apa bebanan atau tuntutan kecuali apa-apa kepentingan berdaftar yang terpakai pada tarikh peletakhakan dan tuntutan didedahkan.

(6) Suatu perakuan peletakhakan yang menyatakan bahawa suatu aset terletak hak pada Perbadanan menjadi keterangan muktamad mengenai peletakhakan itu pada tarikh yang dinyatakan dalam perakuan peletakhakan itu sebagai tarikh peletakhakan.

(7) Tiada peruntukan dalam mana-mana undang-undang termasuk Akta Undang-Undang Sivil 1956, rukun undang-undang atau perjanjian yang membataskan atau melarang hak penjual atau menghendaki apa-apa persetujuan untuk menyerahkan, menjual, melupuskan atau memindahkan aset itu boleh terpakai atau mempunyai apa-apa kesan berkenaan dengan apa-apa perolehan atau pelupusan oleh Perbadanan, kecuali suatu pindah milik aset kepada Perbadanan hendaklah tertakluk kepada apa-apa kehendak kelulusan Pihak Berkuasa Negeri yang berkaitan yang mempunyai bidang kuasa terhadap pindah milik itu.

(8) Jika aset yang Perbadanan perolehi mengikut Jadual ini ialah suatu kemudahan pembiayaan Islam atau kemudahan kredit konvensional, Perbadanan disifatkan telah memberikan pembiayaan, pendahuluan, pinjaman atau kemudahan atau transaksi lain atau memberikan jaminan walaupun pembiayaan, pendahuluan, pinjaman, kemudahan atau transaksi lain atau jaminan itu telah diberikan, digunakan atau dikeluarkan oleh penjual.

(9) Jika cagaran bagi suatu kemudahan pembiayaan Islam atau kemudahan kredit konvensional yang terletak hak di bawah Jadual ini termasuk suatu syer—

- (a) bagi maksud perenggan 6A(9)(b) Akta Syarikat 1965, Perbadanan disifatkan memegang suatu kepentingan dalam syer hanya melalui cagaran bagi maksud suatu transaksi yang dibuat dalam perjalanan biasa perniagaan berkaitan dengan peminjaman wang; dan
- (b) kepentingan Perbadanan dalam syer hendaklah diabaikan bagi maksud seksyen 6A Akta Syarikat 1965.

(10) Berhubung dengan suatu aset yang terletak hak pada Perbadanan—

- (a) setiap penanggung kewajiban berkenaan dengan aset itu hendaklah disifatkan telah membebaskan dan melepaskan penjual daripada semua kewajiban didedahkan yang berkenaan dengan aset itu;
- (b) setiap penanggung kewajiban dan tiap-tiap orang lain yang mempunyai apa-apa hak, hakmilik atau kepentingan dalam aset itu hendaklah disifatkan telah bersetuju dengan dan menerima pengambilalihan oleh Perbadanan akan semua kewajiban didedahkan yang berkenaan dengan aset itu;
- (c) suatu perjanjian atau surat cara sedia ada, sama ada dalam bentuk suatu surat ikatan, wasiat atau selainnya, atau perintah mana-mana mahkamah, di bawah atau yang menurut kuasanya, penjual mempunyai hakmilik atau pemilikan kepentingan dalam atau hak ke atas aset itu, hendaklah ditafsirkan dan hendaklah mempunyai kuat kuasa seolah-olah apa-apa sebutan dalamnya mengenai penjual telah digantikan dengan sebutan mengenai Perbadanan;
- (d) suatu perjanjian sedia ada yang kepada penjual ialah suatu pihak hendaklah mempunyai kuat kuasa setakat yang ia terpakai terhadap hakmilik, kepentingan dan hak penjual kepada aset itu dan kewajiban didedahkan, tuntutan didedahkan dan kepentingan berdaftar terhadap aset itu seolah-olah Perbadanan menjadi suatu pihak kepadanya dan bukannya penjual;
- (e) suatu petunjuk, arahan, mandat, surat kuasa wakil, kuasa, aku janji atau persetujuan sedia ada yang telah diberikan kepada penjual, sama ada berseorangan atau secara berse sama dengan orang lain, hendaklah mempunyai kuat kuasa, seolah-olah diberikan kepada Perbadanan sama ada berseorangan atau berse sama dengan orang lain itu;

- (f) mana-mana cagaran yang dipegang sebaik sebelum tarikh peletakhakan oleh penjual, atau oleh seorang penama atau pemegang amanah bagi penjual, sebagai cagaran untuk pembayaran atau pelepasan apa-apa liabiliti mana-mana orang, hendaklah dipegang oleh Perbadanan atau penama atau pemegang amanah itu sebagai penama atau pemegang amanah bagi Perbadanan, dengan keutamaan yang sama seperti yang ada pada penjual, dan setakat liabiliti itu hendaklah tersedia kepada Perbadanan sebagai cagaran bagi pembayaran atau pelepasan liabiliti itu, dan jika mana-mana cagaran diluaskan kepada pendahuluan atau liabiliti pada masa hadapan, ia hendaklah dipegang oleh dan tersedia kepada Perbadanan sebagai cagaran bagi pendahuluan atau liabiliti masa hadapan kepada Perbadanan mengikut cara yang sama dalam segala hal sebagaimana pendahuluan atau liabiliti masa hadapan kepada penjual dijamin sebaik sebelum tarikh peletakhakan;
- (g) sebagai tambahan kepada apa-apa hak, kuasa atau remedi lain yang diberikan kepada Perbadanan dalam Jadual ini, Perbadanan hendaklah mempunyai hak, kuasa dan remedi penjual (dan khususnya, hak dan kuasa untuk mengambil atau menentang prosiding undang-undang atau prosiding lain atau membuat atau menentang permohonan kepada mana-mana pihak berkuasa) bagi menentukan, melindungi atau menguatkuasakan hak, hakmilik, kepentingan atau kewajipan didedahkan yang terletak hak pada Perbadanan termasuklah hak, hakmilik, kepentingan atau kewajipan didedahkan itu yang berkenaan dengan mana-mana prosiding undang-undang atau prosiding lain atau permohonan kepada mana-mana pihak berkuasa yang belum selesai sebaik sebelum tarikh peletakhakan oleh atau terhadap penjual, dan menentang mana-mana tuntutan didedahkan atau kepentingan berdaftar seolah-olah ia pada setiap masa ialah hak, hakmilik, kepentingan atau kewajipan Perbadanan;
- (h) suatu penghakiman, award atau perintah yang diperoleh oleh penjual dan tidak dijelaskan sepenuhnya sebelum tarikh peletakhakan boleh dikuatkuasakan oleh Perbadanan;
- (i) tiada pindahan kepada atau pemerolehan oleh Perbadanan akan menjadi tidak sah atau boleh menjadi tidak sah disebabkan oleh pemakaian mana-mana undang-undang;
- (j) jika apa-apa—
- (i) keuntungan atau pulangan lain (dalam subperenggan ini disebut “pulangan”); atau
 - (ii) bunga,

yang kena dibayar di bawah suatu perjanjian diputuskan dengan merujuk kepada kos dana atau kadar pinjaman asas atau sumber rujukan lain yang digunakan oleh penjual, atau ia tidak lagi boleh diputuskan sebagaimana yang diperuntukkan dalam perjanjian itu, pulangan atau bunga yang kena dibayar di bawah perjanjian itu hendaklah sebagaimana yang ditetapkan di bawah seksyen 209 atau sebagaimana yang dipersetujui oleh Perbadanan oleh dengan penanggung kewajipan perjanjian itu;

- (k) jika jagaan mana-mana barangan, benda atau dokumen dipegang oleh penjual sebagai baili sebaik sebelum tarikh peletakhakan, barangan, benda atau dokumen itu disifatkan telah berpindah kepada Perbadanan dan hak dan kewajipan didedahkan penjual di bawah mana-mana kontrak bailmen berkaitan dengan barangan, benda atau dokumen itu hendaklah dipindahkan kepada Perbadanan bebas daripada apa-apa tuntutan kecuali tuntutan didedahkan; dan
- (l) suatu surat cara boleh niaga atau arahan bayaran wang yang diberikan kepada atau digunakan atau diterima oleh penjual, sama ada diberikan, digunakan atau diterima sebelum, pada atau selepas tarikh peletakhakan, hendaklah mempunyai kesan yang sama pada dan dari tarikh peletakhakan, seolah-olah ia telah diberikan kepada atau digunakan atau diterima oleh Perbadanan.
- (11) Peletakhakan mana-mana aset pada Perbadanan tidak boleh—
- (a) dianggap sebagai meletakkan—
- (i) Perbadanan;
 - (ii) penjual;
 - (iii) mana-mana orang yang mendapat hakmilik daripada Perbadanan; atau
 - (iv) mana-mana orang lain,
- dalam kedudukan mungkir atau ingkar di bawah apa-apa kontrak atau pecah kepercayaan;
- (b) dianggap sebagai menimbulkan suatu hak atau kewajipan bagi mana-mana orang untuk—
- (i) menamatkan, membatalkan atau mengubah suatu perjanjian;
 - (ii) menguatkuasakan atau mempercepat pelaksanaan suatu obligasi; atau
 - (iii) menghendaki pelaksanaan suatu obligasi yang tidak selainnya timbul untuk pelaksanaan;
- (c) dianggap sebagai meletakkan penjual, Perbadanan atau mana-mana orang lain dalam kedudukan melanggar mana-mana undang-undang, rukun undang-undang atau perjanjian yang melarang, menyekat atau mengawal selia penyerahhakan, jualan, pelupusan atau pindah milik apa-apa aset atau penzahiran maklumat;
- (d) melepaskan seorang penjamin daripada suatu obligasi;
- (e) menidaksahkan atau melepaskan suatu kontrak atau cagaran; atau
- (f) dianggap sebagai menamatkan, membatalkan atau mengubah apa-apa hak, keistimewaan, pengecualian (termasuk apa-apa pengecualian cukai) atau keutamaan yang penjual berhak kepadanya dan yang menurut kuasa Jadual ini telah terletak hak pada Perbadanan.

(12) Dalam mana-mana prosiding yang dibawa oleh atau terhadap Perbadanan berkenaan dengan apa-apa aset yang terletak hak pada Perbadanan menurut Jadual ini, tiada seorang pun boleh, melainkan jika tuntutan itu ialah suatu tuntutan dizahirkan, menimbulkan sebagai suatu tuntutan atau pembelaan terhadap prosiding itu mana-mana perkara yang berikut:

- (a) orang itu ada atau mungkin ada suatu tolakan atau tuntutan balas terhadap penjual atau mana-mana orang lain;
- (b) mana-mana orang mempunyai kepentingan terdahulu, sama ada di sisi undang-undang atau ekuiti, dalam aset itu;
- (c) mana-mana orang menjadi pihak kepada atau mengambil bahagian dalam apa-apa fraud, desakan, paksaan, pengaruh tidak wajar atau salah nyataan;
- (d) terdapat kesilapan undang-undang atau fakta;
- (e) mana-mana perjanjian yang berkaitan dengan aset itu adalah bagi melaksanakan maksud yang menyalahi undang-undang atau apa-apa balasan yang diberikan atau diterima di bawahnya adalah menyalahi undang-undang, atau matlamat perjanjian itu yang membentuk atau menjadi sebahagian daripada aset itu adalah menyalahi undang-undang;
- (f) terdapat kegagalan balasan secara menyeluruh atau tiada balasan atau terdapat apa-apa balasan yang gagal sebahagiannya;
- (g) orang yang menyempurnakan, disifatkan telah menyempurnakan atau menjadi pihak kepada, apa-apa dokumen hakmilik aset itu atau kontrak bertulis yang menjadi keterangan mengenai, menimbulkan atau menjamin aset itu, tidak memahami dokumen itu;
- (h) orang yang menyempurnakan, disifatkan telah menyempurnakan atau menjadi pihak kepada, apa-apa dokumen hakmilik aset itu atau kontrak bertulis yang menjadi keterangan mengenai menimbulkan atau menjamin aset itu, tidak mempunyai keupayaan atau kuasa untuk melakukan sedemikian; dan
- (i) terdapat suatu kekhilafan dalam mana-mana penyata akaun yang dikeluarkan oleh penjual atau mana-mana orang lain yang berkenaan dengan apa-apa hutang yang dengannya aset itu adalah berhubungan.

Pengekalan hak

4. (1) Seseorang yang dihalang daripada membuat suatu tuntutan terhadap Perbadanan atau dihalang daripada menimbulkan suatu pembelaan terhadap Perbadanan di bawah Jadual ini, adalah berhak meminta pampasan terhadap penjual berkenaan dengan tuntutan itu.

(2) Jika mahkamah berpuas hati bahawa orang yang disebut dalam subperenggan (1) mempunyai tuntutan terhadap penjual termasuk mana-mana kepentingan ekuiti terdahulu dalam aset itu yang mungkin dapat ditimbulkan atau dituntut oleh orang itu tetapi dihalang oleh subperenggan 3(12), orang itu berhak mendapat pampasan daripada penjual berkenaan dengan tuntutan itu sebagaimana yang dianggap adil dan munasabah oleh mahkamah.

Perakuan peletakhakan gantian

5. (1) Perbadanan boleh mengeluarkan suatu perakuan peletakhakan baru (dalam perenggan ini disebut “perakuan peletakhakan gantian”) untuk menggantikan mana-mana perakuan peletakhakan yang telah dikeluarkannya sebelum ini bagi tujuan membetulkan apa-apa peninggalan atau khilaf dalam perakuan peletakhakan itu.

(2) Apa-apa perakuan peletakhakan gantian yang dikeluarkan di bawah subperenggan (1) yang disempurnakan di bawah meterai perbadanan atau meterai faksimile Perbadanan, yang menyatakan bahawa suatu aset telah terletak hak pada Perbadanan menjadi keterangan muktamad mengenai peletakhakan itu pada tarikh peletakhakan yang dinyatakan dalam perakuan peletakhakan gantian itu.

(3) Jika mana-mana undang-undang menyatakan suatu tempoh masa yang dalamnya suatu pindahan apa-apa aset yang menjadi hal perkara suatu perakuan peletakhakan gantian hendaklah didaftarkan atau difailkan, tempoh itu hendaklah bermula dari tarikh peletakhakan yang dinyatakan dalam perakuan peletakhakan gantian atau tarikh perakuan peletakhakan gantian itu dikeluarkan, mengikut mana-mana yang kemudian.

(4) Apa-apa perbuatan yang dilakukan oleh Perbadanan atau mana-mana orang lain, dengan bergantung pada suatu perakuan peletakhakan yang dikeluarkan sebelum ini tidaklah terjejas oleh mana-mana peninggalan atau khilaf yang dibetulkan dalam suatu perakuan peletakhakan gantian.

(5) Bagi maksud Akta ini, apa-apa sebutan mengenai suatu perakuan peletakhakan hendaklah disifatkan sebagai termasuk suatu sebutan mengenai suatu perakuan peletakhakan gantian.

Peruntukan tambahan mengenai tanah

6. (1) Walau apa pun peruntukan Kanun Tanah Negara, Ordinan Tanah Sabah, Kanun Tanah Sarawak atau mana-mana undang-undang lain, apa-apa kaveat atau perintah larangan yang telah dimasukkan, diendorskan, didaftarkan atau diserahkan simpan, sebelum, pada atau selepas tarikh peletakhakan tidaklah boleh menghalang suatu pindah milik apa-apa kepentingan mengenai tanah penjual kepada Perbadanan.

(2) Jika suatu perakuan peletakhakan meletak hak pada Perbadanan apa-apa kepentingan mengenai tanah—

(a) di Semenanjung Malaysia, apabila diterima—

- (i) bayaran fi yang ditetapkan; dan
- (ii) perakuan peletakhakan,

Pendaftar di bawah Kanun Tanah Negara hendaklah, tanpa memerlukan apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melakukan segala benda yang diperlukan untuk menguatkuasakan peletakhakan itu;

(b) di Sabah, apabila diterima—

(i) bayaran fi yang ditetapkan; dan

(ii) perakuan peletakhakan,

Pendaftar di bawah Ordinan Tanah Sabah hendaklah, tanpa memerlukan apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melakukan segala benda perkara yang diperlukan untuk menguatkuasakan peletakhakan itu;

(c) di Sarawak, apabila diterima—

(i) bayaran fi yang ditetapkan; dan

(ii) perakuan peletakhakan,

Pendaftar di bawah Kanun Tanah Sarawak hendaklah, tanpa memerlukan apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melakukan segala benda yang diperlukan untuk menguatkuasakan peletakhakan itu;

(3) Walau apa pun mana-mana peruntukan Kanun Tanah Negara, Ordinan Tanah Sabah, Kanun Tanah Sarawak atau mana-mana undang-undang lain, suatu perakuan peletakhakan berkuat kuasa untuk meletak hak suatu kepentingan mengenai tanah pada Perbadanan pada tarikh peletakhakan dan menjadi keterangan muktamad mengenai peletakhakan itu.

Pendaftar lain hendaklah memberikan kuat kuasa kepada perakuan peletakhakan

7. (1) Walau apa pun peruntukan mana-mana undang-undang lain, tiap-tiap pendaftar mahkamah, Pendaftar Syarikat, pendaftar kapal Malaysia, depository pusat, ejen depository yang dibenarkan dan mana-mana orang yang menyenggara suatu daftar atau rekod pemilikan, kepentingan atau cagaran (dalam perenggan ini disebut “Pendaftar”) hendaklah, apabila menerima—

(a) bayaran fi yang ditetapkan; dan

(b) perakuan peletakhakan,

tanpa memerlukan apa-apa permohonan lanjut atau pemfailan apa-apa dokumen lanjut, melakukan segala benda dan membuat semua catatan atau memorial dalam mana-mana daftar atau rekod yang disimpan oleh Pendaftar sebagaimana yang perlu untuk memberikan kuat kuasa kepada peletakhakan aset yang berkaitan dengan perakuan peletakhakan itu.

(2) Bagi maksud perenggan ini, subseksyen 112A(1) Akta Syarikat 1965 hendaklah disifatkan terpakai bagi Perbadanan seolah-olah perkataan “tiga puluh” dalam subseksyen itu telah digantikan dengan perkataan “seratus lapan puluh”.

(3) Walau apa pun mana-mana peruntukan Akta Syarikat 1965 atau mana-mana undang-undang lain, suatu perakuan peletakhakan berkuat kuasa untuk meletak hak pada Perbadanan, mana-mana hakmilik, kepentingan atau cagaran dalam aset pada tarikh peletakhakan dan adalah menjadi keterangan muktamad mengenai peletakhakan itu.

Kekebalan Pendaftar

8. Seseorang Pendaftar atau orang yang menyenggara suatu daftar atau rekod yang disebut di bawah perenggan 6 atau 7 tidaklah bertanggung kepada mana-mana orang berkenaan dengan pembuatan apa-apa memorial atau catatan pada dokumen hakmilik daftaran atau mana-mana daftar atau rekod lain dengan bergantung pada perakuan peletakhakan itu.

Gantian automatik dalam mana-mana prosiding undang-undang atau yang lain

9. Walau apa pun peruntukan mana-mana undang-undang lain, tiap-tiap pendaftar mahkamah hendaklah apabila menerima suatu perakuan peletakhakan melakukan segala benda dan membuat segala catatan dalam mana-mana daftar atau rekod yang disimpan oleh pendaftar itu sebagaimana yang perlu untuk memberi kesan kepada penggantian automatik Perbadanan di tempat penjual sebagai pihak dalam mana-mana prosiding undang-undang atau yang lain.

Pelupusan

10. (1) Perbadanan boleh mengeluarkan suatu perakuan pindah milik bagi maksud menjual atau selainnya melupuskan mana-mana aset oleh Perbadanan dan mana-mana harta yang terhadapnya Perbadanan memegang suatu cagaran, sama ada sebagai pemegang gadaian, pemegang gadai janji, pemegang serah hak, pemegang lien atau selainnya.

(2) Tertakluk kepada kelulusan, jika dikehendaki, badan pengawal selia atau Pihak Berkuasa Negeri yang berkaitan yang mempunyai bidang kuasa terhadap pelupusan suatu aset oleh Perbadanan, pelupusan itu kepada mana-mana pembeli hendaklah mempunyai kesan seperti suatu perolehan oleh Perbadanan seolah-olah pembeli itu ialah Perbadanan di bawah perenggan 3 dan peruntukan perenggan 3 (kecuali subperenggan 3(12)) dan perenggan 6 hingga 9 hendaklah terpakai bagi pembeli itu sebagaimana ia terpakai bagi Perbadanan, kecuali—

- (a) sebutan mengenai “penjual” hendaklah ditafsirkan sebagai mengenai sebutan Perbadanan;
- (b) sebutan mengenai “Perbadanan” hendaklah ditafsirkan sebagai mengenai sebutan pembeli itu;
- (c) sebutan mengenai “perakuan peletakhakan” hendaklah ditafsirkan sebagai sebutan perakuan pindah milik; dan
- (d) sebutan mengenai “tarikh peletakhakan” hendaklah ditafsirkan sebagai sebutan mengenai tarikh yang dinyatakan dalam perakuan pindah milik sebagai tarikh pelupusan.

(3) Suatu pelupusan aset oleh Perbadanan kepada seseorang pembeli hendaklah mempunyai kesan memindahmilikkan kepada pembeli itu kesemua hak, hakmilik, kepentingan dan kewajipan Perbadanan berhubung dengan aset itu.

(4) Tertakluk kepada apa-apa kehendak kelulusan badan pengawalselia atau Pihak Berkuasa Negeri yang berkaitan terhadap pindah milik itu, suatu perakuan pindah milik yang menyatakan suatu aset telah dipindahmilik kepada pembeli menjadi keterangan muktamad mengenai pindah milik itu pada tarikh yang dinyatakan dalam perakuan pindah milik sebagai tarikh pelupusan.

Perakuan pindah milik gantian

11. (1) Perbadanan boleh mengeluarkan suatu perakuan pindah milik baru (dalam perenggan ini disebut “perakuan pindah milik gantian”) untuk menggantikan mana-mana perakuan pindah milik yang telah dikeluarkannya sebelum ini bagi tujuan membetulkan apa-apa peninggalan atau khilaf dalam perakuan pindah milik itu.

(2) Apa-apa perakuan pindah milik gantian yang dikeluarkan di bawah subperenggan (1) yang disempurnakan di bawah meterai perbadanan atau meterai faksimile Perbadanan, yang menyatakan bahawa suatu aset telah dipindahkan kepada pembeli menjadi keterangan muktamad mengenai pindahan itu pada tarikh pelupusan yang dinyatakan dalam perakuan pindah milik gantian itu.

(3) Jika mana-mana undang-undang menyatakan suatu tempoh masa yang dalamnya suatu pindahan apa-apa aset yang menjadi hal perkara suatu perakuan pindah milik gantian yang dikeluarkan di bawah subperenggan hendaklah didaftarkan atau difailkan, tempoh itu hendaklah bermula dari tarikh pelupusan yang dinyatakan dalam perakuan pindah milik gantian atau tarikh perakuan pindah milik gantian itu dikeluarkan, mengikut mana-mana yang kemudian.

(4) Apa-apa perbuatan yang dilakukan oleh Perbadanan atau mana-mana orang lain, dengan bergantung suatu perakuan pindah milik yang dikeluarkan sebelum ini tidaklah terjejas oleh mana-mana peninggalan atau khilaf yang dibetulkan dalam suatu perakuan pindah milik gantian yang dikeluarkan di bawah subperenggan (1).

(5) Bagi maksud Akta ini, apa-apa sebutan mengenai suatu perakuan pindah milik hendaklah disifatkan sebagai termasuk sebutan mengenai suatu perakuan pindah milik gantian.

Pindahan kepada dan antara subsidiari

12. Walau apa pun mana-mana peruntukan lain Akta ini, Perbadanan boleh memberi kesan kepada—

(a) apa-apa pindahan aset oleh Perbadanan kepada mana-mana subsidiari Perbadanan;

(b) apa-apa pindahan aset antara mana-mana subsidiari Perbadanan; dan

- (c) apa-apa pindaan suatu aset kepada Perbadanan daripada mana-mana subsidiari Perbadanan,

dengan mengeluarkan suatu perakuan peletakhakan, yang hendaklah mempunyai kesan meletak hak kesemua hak, hakmilik, kepentingan dan liabiliti pemindah berkenaan dengan aset itu pada penerima pindahan.

Peletakhakan aset di luar Malaysia

13. (1) Suatu perakuan peletakhakan yang dikeluarkan di bawah Jadual ini boleh berhubungan dengan mana-mana aset penjual di luar Malaysia dan kesan boleh diberikan sama ada mengikut apa-apa perjanjian bersaling yang berhubungan dengan penguatkuasaan penghakiman yang wujud antara Malaysia dengan negara atau wilayah di luar Malaysia di mana aset itu terletak, atau jika tiada perjanjian sedemikian, mengikut undang-undang yang terpakai di negara atau wilayah itu, dan sehingga peletakhakan itu diberi kesan sepenuhnya di negara atau wilayah di luar Malaysia di mana aset itu terletak, penjual hendaklah memegang aset itu, bersama-sama mana-mana aset atau hak tambahan yang terakru menurut kuasa aset itu atau apa-apa hak dalamnya, sebagai seorang pemegang amanah demi manfaat Perbadanan dan dengan segera mengirinkan atau memindahkan kepada Perbadanan apa-apa wang atau benda lain yang bernilai yang diterima oleh penjual disebabkan oleh aset itu atau mana-mana aset atau hak tambahan itu.

(2) Atas permintaan Perbadanan, penjual, atas kosnya sendiri, hendaklah mengambil segala langkah yang perlu untuk memastikan peletakhakan mana-mana aset penjual di luar Malaysia diberi kesan sepenuhnya di bawah undang-undang yang terpakai di negara atau wilayah di mana aset itu terletak.

JADUAL KEEMPAT

[Seksyen 159]

HAK UNTUK MEMELIHARA, MELUPUSKAN ATAU MEMPEROLEH HARTA

Tafsiran

1. Dalam Jadual ini—

“pembeli” ertinya mana-mana orang yang kepadanya Perbadanan melupuskan apa-apa harta di bawah seksyen 159;

“undang-undang tanah yang berkaitan” ertinya—

- (a) dalam hal Semenanjung Malaysia, kaedah-kaedah tanah masing-masing Negeri;
- (b) dalam hal Sabah, Ordinan Tanah Sabah; atau
- (c) dalam hal Sarawak, Kanun Tanah Sarawak.

Kuasa disifatkan untuk memperoleh

2. Bagi maksud seksyen 159—

- (a) Perbadanan disifatkan sebagai diberi kuasa oleh pemberi cagaran atau pemunya berdaftar harta untuk melupuskan harta dan memberi kesan kepada pindahan hakmilik atau pemunya harta kepada pembeli; dan
- (b) tiap-tiap pendaftar mahkamah, Pendaftar Syarikat, Pendaftar tanah, pendaftar kapal Malaysia, depositori pusat, ejen depositori yang dibenarkan dan mana-mana orang yang menyenggara suatu daftar atau rekod pemilikan atau kepentingan hendaklah menerima suatu perakuan peletakhakan atau perakuan pindah milik atau suatu surat cara pindah milik atau apa-apa dokumen atau surat cara pendaftaran lain yang dilaksanakan oleh Perbadanan dan tertakluk kepada bayaran fi yang ditetapkan di bawah undang-undang tanah yang berkaitan, mendaftarkan atau selainnya memberi kesan kepada pindah milik harta itu atau mana-mana bahagian harta itu kepada pembeli tanpa memerlukan apa-apa permohonan lanjut atau pemfailan apa-apa dokumen selanjutnya.

Jualan harta melalui triti persendirian

3. Suatu jualan melalui suatu triti persendirian di bawah seksyen 159 boleh dibuat melalui suatu kontrak persendirian, lelongan, tender atau apa-apa cara jualan yang lain.

Perbadanan boleh memperoleh harta

4. Jika Perbadanan atau suatu subsidiari Perbadanan melupuskan mana-mana harta atau mana-mana bahagian harta itu melalui triti persendirian maka, walau apa pun apa-apa jua yang bertentangan dalam mana-mana undang-undang, Perbadanan atau subsidiari itu boleh tanpa perlu membayar apa-apa deposit, memperoleh harta itu atau sebahagian daripada harta itu dan menolak harga belian terhadap apa-apa liabiliti yang terhutang kepada Perbadanan atau subsidiari itu.

Hak pemerolehan Perbadanan hendaklah mengatasi

5. Hak Perbadanan di bawah seksyen 159 boleh dijalankan—

- (a) walau apa pun apa-apa perintah jualan yang dibuat sama ada di bawah mana-mana kaedah mahkamah, Kanun Tanah Negara, Ordinan Tanah Sabah, Kanun Tanah Sarawak atau mana-mana undang-undang lain atau apa-apa langkah atau prosiding yang diambil atau yang belum selesai untuk menjual harta;
- (b) tanpa memerlukan apa-apa kelulusan, pengesahan atau perintah mahkamah; dan
- (c) bersesama dengan apa-apa hak atau remedi yang diperuntukkan oleh mana-mana undang-undang lain atau mana-mana kontrak.

HURAIAN

Rang Undang-Undang ini bertujuan untuk mengadakan peruntukan bagi kewujudan berterusan Perbadanan Insurans Deposit Malaysia yang telah ditubuhkan di bawah Akta Perbadanan Insurans Deposit Malaysia 2005 [*Akta 642*], dan untuk mengadakan peruntukan bagi pentadbiran sistem insurans deposit dan sistem perlindungan manfaat takaful dan insurans di bawah Akta ini, dan bagi perkara yang bersampingan atau berkaitan.

Tujuan Rang Undang-Undang ini adalah untuk menggantikan Akta 642 yang sedia ada dengan mengekalkan kuasa-kuasa yang sedia ada di samping memasukkan peruntukan tambahan dan membuat pindaan untuk menambah baik beberapa peruntukan yang sedia ada. Secara khususnya, Rang Undang-Undang ini bertujuan untuk memperkatakan perkara yang berikut:

- (a) penubuhan sistem perlindungan manfaat takaful dan insurans nasional yang eksplisit dan penambahbaikan kepada sistem insurans deposit nasional yang sedia ada. Ini adalah sebahagian daripada cadangan perundangan untuk menambah baik perlindungan pengguna dari segi kewangan bagi rakyat Malaysia apabila Malaysia keluar daripada skim sementara Jaminan Deposit Kerajaan pada 31 Disember 2010; dan
- (b) pindaan kepada Akta yang sedia ada untuk memperbaiki bentuk mekanisme jaring keselamatan kewangan, secara lebih spesifik, untuk melengkapkan Perbadanan Insurans Deposit Malaysia dengan kuasa yang mencukupi untuk menguruskan institusi anggota yang bermasalah secara efektif, sejajar dengan perkembangan di negara lain berikutan krisis kewangan global. Ini termasuklah opsyen resolusi tambahan melalui penggunaan institusi perantaraan.

BAHAGIAN I

2. Bahagian I memperkatakan perkara permulaan.
3. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan ini.
4. *Fasal 2* mengandungi takrif perkataan dan istilah yang digunakan dalam Akta yang dicadangkan ini.

BAHAGIAN II

5. Bahagian II mengandungi enam Bab dan mengadakan peruntukan bagi perkara berhubungan dengan objektif dan fungsi Perbadanan, lembaga pengarah, pegawai dan pekerjanya termasuk Ketua Pegawai Eksekutif dan bagi perkara kewangan berhubungan dengan Perbadanan.
6. Berikutan dengan pemansuhan Akta 642, kewujudan berterusan Perbadanan yang telah ditubuhkan di bawah Akta Perbadanan Insurans Deposit Malaysia 2005 diperuntukkan dalam *fasal 3*.

7. *Fasal 4* mengadakan peruntukan bagi matlamat Perbadanan, iaitu, mentadbirkan suatu sistem insurans deposit dan suatu sistem perlindungan manfaat takaful dan insurans di bawah Akta yang dicadangkan ini, memperuntukkan insurans terhadap kehilangan sebahagian atau kesemua deposit yang dipegang oleh sesuatu anggota penerima deposit dan perlindungan terhadap kehilangan sebahagian atau kesemua manfaat takaful atau insurans yang menjadi liabiliti sesuatu anggota penanggung insurans, memperuntukkan insentif untuk pengurusan risiko yang wajar dalam sistem kewangan dan menggalakkan atau menyumbang kepada kestabilan sistem kewangan.
8. *Fasal 5* mengadakan peruntukan bagi penggunaan dan jagaan meterai Perbadanan dan meterai faksimile oleh Perbadanan.
9. *Fasal 6* mengadakan peruntukan bagi penyempurnaan apa-apa dokumen atau surat cara oleh Perbadanan atau seseorang pegawai diberi kuasa Perbadanan bagi pihaknya.
10. *Fasal 7* bertujuan untuk membenarkan Perbadanan menubuhkan apa-apa jawatankuasa sebagaimana yang difikirkannya perlu atau suai manfaat untuk melaksanakan fungsinya.
11. *Fasal 8* bertujuan untuk membenarkan Perbadanan menubuhkan, di dalam atau di luar Malaysia, apa-apa pejabat yang difikirkannya perlu atau suai manfaat untuk melaksanakan fungsinya.
12. *Fasal 9* bertujuan untuk membenarkan Perbadanan melantik seseorang, di dalam atau di luar Malaysia, untuk menjadi wakil atau ejennya.
13. *Fasal 10* bertujuan untuk membenarkan Perbadanan menubuhkan subsidiari dan sesuatu subsidiari boleh ditetapkan dengan kuasa Perbadanan tertakluk kepada kelulusan Menteri.
14. *Fasal 11* mengadakan peruntukan bagi tugas dan komposisi lembaga pengarah Perbadanan (“Lembaga”). Anggota Lembaga terdiri daripada seorang Pengerusi yang dilantik oleh Menteri, Gabenor, Ketua Setiausaha Perbendaharaan, seorang pengarah yang dilantik oleh Menteri daripada sektor awam, seorang pengarah yang dilantik oleh Menteri daripada sektor awam atau mempunyai pengalaman dalam sektor awam, dan tidak lebih daripada empat pengarah lain yang dilantik oleh Menteri, yang mempunyai pengalaman yang berkaitan dalam sektor swasta, dan sekurang-kurangnya seorang daripada mereka mesti mempunyai pengalaman yang berkaitan dalam sektor perbankan dan kewangan.
15. *Fasal 12* bertujuan untuk membenarkan Lembaga membuat undang-undang kecil sebagaimana yang perlu atau suai manfaat berhubung dengan pentadbiran, pengurusan, kawalan, urusan, aset dan hal ehwal Perbadanan.
16. *Fasal 13* mengadakan peruntukan bagi tempoh jawatan pengarah Lembaga.
17. *Fasal 14* mengadakan peruntukan bagi kehilangan kelayakan pengarah Lembaga dan penamatan atau penggantungan pelantikan mereka oleh Menteri.

18. *Fasal 15* mengadakan peruntukan bagi keadaan yang dalamnya apa-apa tindakan dan prosiding Lembaga tidak boleh menjadi tidak sah oleh kekosongan dan sebagainya.

19. *Fasal 16* mengadakan peruntukan bagi fi, elaun dan saraan lain pengarah Perbadanan sebagaimana yang ditentukan oleh Menteri atas syor Lembaga.

20. *Fasal 17* mengenakan kewajipan ke atas seseorang pengarah Lembaga untuk bertindak dengan jujur dan demi kepentingan terbaik Perbadanan. *Fasal* ini juga melarang seseorang pengarah daripada menggunakan secara tidak wajar maklumat yang diperoleh oleh sebab kedudukannya sebagai seorang pengarah untuk mendapat apa-apa faedah dan daripada melakukan, memperkatakan atau menyiarkan apa-apa yang boleh memudaratkan kepentingan Perbadanan.

21. *Fasal 18* mengadakan peruntukan bagi bilangan mesyuarat yang perlu diadakan oleh Lembaga dalam setahun dan tatacara mesyuarat.

22. *Fasal 19* mengadakan peruntukan mengenai pelantikan Ketua Pegawai Eksekutif Perbadanan oleh Menteri atas syor Lembaga dan bahawa pegawai itu bertanggungjawab dalam pentadbiran urusan dan hal ehwal harian Perbadanan dan bertanggung menenangkan dan bertanggung menjawab kepada Lembaga.

23. *Fasal 20* mengadakan peruntukan bagi pampasan, faedah dan saraan lain Ketua Pegawai Eksekutif.

24. *Fasal 21* bertujuan untuk membenarkan Perbadanan melantik mana-mana pegawai atau pekerja untuk menjalankan urusan dan hal ehwal Perbadanan.

25. *Fasal 22* bertujuan untuk membenarkan Perbadanan memperuntukkan bantuan kewangan kepada pegawai dan pekerjanya atau menderma kepada mana-mana orang.

26. *Fasal 23* melarang Menteri atau Perbadanan daripada menyiasat secara khusus mengenai hal ehwal mana-mana pelanggan suatu institusi anggota.

27. *Fasal 24* mengadakan peruntukan mengenai kerahsiaan maklumat yang berhubungan dengan urusan dan hal ehwal Perbadanan, Bank Negara Malaysia, sesuatu institusi anggota atau seseorang pelanggan Bank Negara Malaysia atau sesuatu institusi anggota.

28. *Fasal 25* mengandungi peruntukan berhubung dengan kuasa Perbadanan dalam melaksanakan matlamatnya.

29. *Fasal 26* bertujuan untuk membenarkan Perbadanan meminjamkan wang kepada suatu perbadanan selain institusi anggota bagi maksud tertentu sebagaimana yang dinyatakan dalam *fasal* ini.

30. *Fasal 27* bertujuan untuk memberi Menteri kuasa, atas syor Perbadanan dan Bank Negara Malaysia, untuk menetapkan melalui perintah, mana-mana institusi kewangan pembangunan atau perbadanan lain yang dikawal selia oleh dan di bawah penyeliaan Bank Negara Malaysia untuk menjadi suatu institusi anggota untuk menggalakkan atau mengekalkan kestabilan sistem kewangan atau keyakinan orang awam mengenai kestabilan itu.

31. *Fasal 28* mengandungi peruntukan bagi Perbadanan menyenggara dan mentadbirkan enam kumpulan wang yang berasingan bagi maksud Akta yang dicadangkan ini iaitu kumpulan wang insurans deposit Islam, kumpulan wang insurans deposit konvensional, kumpulan wang perlindungan takaful perpaduan keluarga, kumpulan wang perlindungan takaful am, kumpulan wang perlindungan insurans hayat dan kumpulan wang perlindungan insurans am.
32. *Fasal 29* bertujuan untuk membenarkan Menteri meminjamkan wang kepada Perbadanan.
33. *Fasal 30* menyatakan pelaburan yang dibenarkan bagi Perbadanan.
34. *Fasal 31* mengadakan peruntukan bagi tahun kewangan Perbadanan.
35. *Fasal 32* mengadakan peruntukan mengenai kehendak terhadap Perbadanan untuk menyimpan buku, rekod, akaun atau dokumen lain yang sepatutnya dan menyediakan penyata kewangan.
36. *Fasal 33* mengadakan peruntukan bagi pengauditan akaun Perbadanan oleh Ketua Audit Negara.
37. *Fasal 34* mengadakan peruntukan bagi kehendak akaun tahunan, yang diperakui oleh Ketua Audit Negara, dan laporan tahunan Perbadanan perlu dihantar kepada Menteri, yang kemudiannya akan menyebabkan ia dibentangkan di hadapan Dewan Negara dan Dewan Rakyat.
38. *Fasal 35* bertujuan untuk membenarkan Perbadanan dan subsidiarinya menyediakan penyata kewangan yang berasingan dan bukan penyata kewangan yang disatukan.

BAHAGIAN III

39. Bahagian III mengandungi peruntukan berhubung dengan keanggotaan di bawah Akta yang dicadangkan ini dan pembatalan dan penamatan keanggotaan.
40. *Fasal 36* memperuntukkan bahawa sesuatu institusi kewangan yang disifatkan suatu institusi anggota di bawah Akta 642 akan kekal menjadi institusi anggota di bawah Akta ini. *Fasal* ini juga bertujuan untuk menyifatkan tiap-tiap institusi kewangan yang dilesenkan di bawah Akta Bank Dan Institusi Kewangan 1989 atau Akta Bank Islam 1983 selepas mula berkuatkuasanya Akta ini sebagai institusi anggota dari tarikh ia diberi lesen. *Fasal* ini juga bertujuan untuk menyifatkan tiap-tiap pengendali takaful atau syarikat insurans sebagai institusi anggota dari mula berkuatkuasanya Akta ini, atau tarikh ia didaftarkan di bawah Akta Takaful 1984 atau diberi lesen di bawah Akta Insurans 1996.
41. *Fasal 37* bertujuan untuk mengkehendaki institusi anggota mematuhi terma dan syarat keanggotaan di bawah peraturan-peraturan yang ditetapkan di bawah fasal 209.
42. *Fasal 38* memperuntukkan tatacara untuk membatalkan keanggotaan institusi anggota jika lesen atau pendaftarannya telah diserahkan atau dibatalkan di bawah Akta Bank Dan Institusi Kewangan 1989, Akta Bank Islam 1983, Akta Takaful 1984 atau Akta Insurans 1996.

43. *Fasal 39* memperuntukkan tatacara untuk menamatkan keanggotaan. *Fasal* ini membenarkan Lembaga untuk membuat untuk keputusan sama ada hendak menamatkan keanggotaan institusi anggota pada bila-bila masa selepas Bank Negara Malaysia mengeluarkan pemberitahuan tidak berdaya maju berkenaan dengan institusi anggota di bawah *fasal 98*.

44. *Fasal 40* mengandungi peruntukan mengenai kesan pembatalan atau penamatan keanggotaan.

BAHAGIAN IV

45. Bahagian IV mengandungi peruntukan berhubung dengan deposit diinsuranskan.

46. *Fasal 41* mengandungi takrif istilah tertentu yang digunakan dalam Bahagian IV. *Fasal* ini juga bertujuan untuk membolehkan Perbadanan menentukan sesuatu liabiliti atau surat cara kewangan sebagai deposit diinsuranskan atau tidak termasuk dalam insurans deposit, selain liabiliti dan surat cara kewangan yang dinyatakan secara eksplisit dalam *fasal* ini.

47. *Fasal 42* mengandungi peruntukan mengenai insurans deposit yang berasingan bagi deposit Islam dan deposit konvensional dalam sesuatu anggota penerima deposit dan tentang layanan terhadap deposit pemegang amanah, pemunya bersama dan jenis pendeposit lain yang dinyatakan dalam *fasal* ini. Had insurans deposit bagi agregat deposit seseorang pendeposit dalam sesuatu anggota penerima deposit ialah apa-apa amaun sebagai yang ditetapkan oleh Menteri atas syor Perbadanan.

48. *Fasal 43* mengadakan peruntukan bagi liabiliti deposit suatu anggota penerima deposit yang dipindahkan kepada dan diambil alih oleh anggota penerima deposit yang lain, yang akan terus diinsuranskan setakat had insurans deposit dan secara berasingan oleh Perbadanan selama tempoh dua tahun, atau sehingga deposit itu matang atau dikeluarkan kesemuanya, mengikut mana-mana yang lebih awal, selepas tarikh pemindahan dan pengambilalihan.

49. *Fasal 44* mengadakan peruntukan bagi liabiliti deposit suatu anggota penerima deposit dipindahkan kepada dan diambil alih oleh seseorang yang bukan anggota penerima deposit, yang akan terus diinsuranskan sepanjang baki tahun taksiran itu, atau sehingga deposit itu matang atau dikeluarkan kesemuanya, mengikut mana-mana yang lebih awal, selepas tarikh pindahan dan pengambilalihan.

50. *Fasal 45* bertujuan untuk menyifatkan liabiliti deposit suatu anggota penerima deposit yang diambil alih oleh anggota penerima deposit yang lain sebagai diletakkan dengan anggota penerima deposit yang mengambil alihnya pada hari ia diambil alih.

51. *Fasal 46* mengadakan peruntukan bagi jenis wang yang tidak menjadi suatu deposit bagi maksud Akta yang dicadangkan ini.

52. *Fasal 47* mengadakan peruntukan bagi premium pertama yang ditaksirkan dan dipungut oleh Perbadanan daripada anggota penerima deposit.

53. *Fasal 48 dan 49* mengadakan peruntukan bagi premium tahunan yang kena dibayar oleh anggota penerima deposit Perbadanan dan cara pengiraan premium tahunan itu.
54. *Fasal 50* melarang sesuatu tolakan ke atas apa-apa premium atau bayaran surcaj premium oleh sesuatu anggota penerima deposit.
55. *Fasal 51* bertujuan untuk memberi Perbadanan kuasa untuk mengenakan surcaj premium ke atas sesuatu anggota penerima deposit dalam hal keadaan tertentu.
56. *Fasal 52* bertujuan untuk memberi Perbadanan kuasa untuk mengenakan caj lampau tempoh berkenaan dengan sesuatu pembayaran premium atau surcaj premium yang lewat oleh sesuatu anggota penerima deposit.
57. *Fasal 53* bertujuan untuk memberi Perbadanan kuasa untuk membuat peraturan-peraturan berhubung dengan premium pertama dan premium tahunan yang kena dibayar oleh anggota penerima deposit.
58. *Fasal 54* memperuntukkan bahawa apa-apa premium atau surcaj premium yang dibayar oleh anggota penerima deposit tidak boleh dibayar balik.
59. *Fasal 55* memperuntukkan bahawa bayaran yang dibuat oleh Perbadanan kepada pendeposit berkenaan dengan deposit Islam dan deposit konvensional hendaklah dibuat daripada kumpulan wang insurans deposit Islam dan kumpulan wang insurans deposit konvensional masing-masing.
60. *Fasal 56* mengadakan peruntukan mengenai hal keadaan yang dalamnya bayaran wajib akan dibuat oleh Perbadanan berkenaan dengan deposit diinsuranskan.
61. *Fasal 57* mengadakan peruntukan mengenai hal keadaan yang dalamnya bayaran budi bicara boleh dibuat oleh Perbadanan berkenaan dengan deposit diinsuranskan.
62. *Fasal 58* bertujuan untuk membenarkan Perbadanan untuk membuat apa-apa bayaran atau bayaran sebahagian kepada mana-mana pendeposit berkenaan dengan apa-apa deposit yang diinsuranskan oleh Perbadanan, mendahului bayaran kepada mana-mana pendeposit lain.
63. *Fasal 59* mengandungi peruntukan tentang tarikh material bagi pengiraan amaun sesuatu bayaran wajib atau bayaran budi bicara.
64. *Fasal 60* mengadakan peruntukan bagi cara pengiraan bayaran wajib berkenaan dengan mana-mana deposit diinsuranskan yang dipegang oleh suatu anggota penerima deposit yang digulungkan.
65. *Fasal 61* mengadakan peruntukan bagi budi bicara Perbadanan untuk membayar pulangan atau bunga ke atas sesuatu bayaran wajib berkenaan dengan sesuatu deposit diinsuranskan.

66. *Fasal 62* mengadakan peruntukan bagi cara pengiraan pulangan atau bunga ke atas sesuatu bayaran budi bicara berkenaan dengan sesuatu deposit diinsuranskan.

67. *Fasal 63* bertujuan untuk membolehkan Perbadanan menetapkan kaedah-kaedah untuk menentukan pulangan atau bunga atas deposit berkaitan indeks dalam hal keadaan tertentu.

68. *Fasal 64* mengadakan peruntukan bagi melepaskan Perbadanan daripada liabiliti setelah membuat sesuatu bayaran yang berkenaan dengan sesuatu deposit diinsuranskan.

69. *Fasal 65* mengadakan peruntukan bagi subrogasi Perbadanan, setakat amaun bayaran yang dibuat berkenaan dengan sesuatu deposit diinsuranskan, terhadap semua hak dan kepentingan pendeposit berhubung dengan deposit itu.

70. *Fasal 66* bertujuan untuk membenarkan Perbadanan menahan bayaran berkenaan dengan sesuatu deposit diinsuranskan sehingga ia telah menerima suatu penyerahhakan secara bertulis terhadap semua hak dan kepentingan pendeposit berhubung dengan deposit itu.

71. *Fasal 67* mengadakan peruntukan bagi had masa untuk memulakan suatu tindakan terhadap Perbadanan berkenaan dengan kewajipannya untuk membuat suatu bayaran wajib berhubung dengan suatu deposit.

BAHAGIAN V

72. Bahagian V mengandungi peruntukan berhubung dengan manfaat takaful dan insurans dilindungi.

73. *Fasal 68* mengandungi takrif istilah tertentu yang digunakan dalam Bahagian V.

74. *Fasal 69* mengandungi peruntukan mengenai perlindungan secara berasingan berkenaan dengan manfaat dilindungi yang ditetapkan yang di bawah sijil takaful bagi takaful perpaduan keluarga dan takaful am dan polisi insurans bagi insurans hayat dan insurans am. Had perlindungan bagi agregat manfaat dilindungi seseorang pemunya sijil atau polisi di bawah sijil takaful atau polisi insurans dengan sesuatu anggota penanggung insurans adalah apa-apa amaun yang ditetapkan oleh Menteri atas syor Perbadanan.

75. *Fasal 70* mengadakan peruntukan bagi liabiliti sijil takaful atau polisi insurans suatu anggota penanggung insurans yang dipindahkan kepada dan diambil alih oleh anggota penanggung insurans yang lain yang akan terus dilindungi secara berasingan sehingga penunaian semua obligasi anggota pemindah berkenaan dengan manfaat takaful atau insurans dilindungi.

76. *Fasal 71* mengadakan peruntukan bagi premium pertama yang ditaksirkan dan dipungut oleh Perbadanan daripada anggota penanggung insurans.

77. *Fasal 72 dan 73* mengadakan peruntukan bagi premium tahunan yang kena dibayar oleh anggota penanggung insurans kepada Perbadanan dan cara pengiraan premium tahunan itu.
78. *Fasal 74* melarang sesuatu tolgan ke atas apa-apa premium atau bayaran surcaj premium oleh sesuatu anggota penanggung insurans.
79. *Fasal 75* bertujuan untuk memberi Perbadanan kuasa untuk mengenakan surcaj premium ke atas sesuatu anggota penanggung insurans dalam hal keadaan tertentu.
80. *Fasal 76* bertujuan untuk memberi Perbadanan kuasa untuk mengenakan caj lampau tempoh berkenaan dengan sesuatu pembayaran premium atau surcaj premium yang lewat oleh sesuatu anggota penanggung insurans.
81. *Fasal 77* bertujuan untuk memberi Perbadanan kuasa untuk membuat peraturan-peraturan berhubung dengan premium pertama dan premium tahunan yang kena dibayar oleh anggota penanggung insurans.
82. *Fasal 78* memperuntukkan bahawa apa-apa premium atau surcaj premium yang dibayar oleh anggota penanggung insurans tidak boleh dibayar balik.
83. *Fasal 79* memperuntukkan bahawa bayaran yang dibuat oleh Perbadanan berkenaan dengan manfaat dilindungi di bawah takaful perpaduan keluarga, polisi hayat, takaful am dan polisi am hendaklah dibuat daripada kumpulan wang perlindungan takaful perpaduan keluarga, kumpulan wang perlindungan insurans hayat, kumpulan wang perlindungan takaful am dan kumpulan wang perlindungan insurans am masing-masing.
84. *Fasal 80* memperuntukkan hal keadaan yang dalamnya bayaran wajib akan dibuat oleh Perbadanan berkenaan dengan manfaat takaful dan insurans dilindungi.
85. *Fasal 81* memperuntukkan hal keadaan yang dalamnya bayaran budi bicara boleh dibuat oleh Perbadanan berkenaan dengan manfaat dilindungi.
86. *Fasal 82* bertujuan untuk membenarkan Perbadanan membuat apa-apa bayaran atau bayaran sebahagian kepada mana-mana benefisiari takaful atau orang diinsuranskan berkenaan dengan apa-apa manfaat dilindungi, mendahului bayaran kepada mana-mana benefisiari takaful atau orang diinsuranskan yang lain.
87. *Fasal 83* mengadakan peruntukan bagi penamatan sijil takaful atau polisi insurans apabila sesuatu anggota penanggung insurans digulungkan.
88. *Fasal 84* mengandungi peruntukan bagi menentukan bayaran wajib yang akan dibuat oleh Perbadanan di bawah sijil takaful perpaduan keluarga atau polisi hayat apabila sesuatu anggota penanggung insurans digulungkan.
89. *Fasal 85* mengandungi peruntukan bagi penamatan sijil takaful am atau polisi am jika sesuatu petisyen penggulungan terhadap sesuatu anggota penanggung insurans dikemukakan di mahkamah dan bagi menentukan bayaran wajib yang akan dibuat oleh Perbadanan dalam hal keadaan sedemikian.

90. *Fasal 86* memperuntukkan tatacara untuk Perbadanan memberitahu maklumat tertentu kepada pemunya sijil atau pemunya polisi selepas pemfailan suatu petisyen penggulungan terhadap suatu anggota penanggung insurans.

91. *Fasal 87* mengadakan peruntukan bagi cara pengiraan bayaran wajib berkenaan dengan sesuatu manfaat dilindungi.

92. *Fasal 88* mengadakan peruntukan mengenai budi bicara Perbadanan untuk membayar pulangan atau bunga ke atas sesuatu bayaran wajib berkenaan dengan sesuatu manfaat dilindungi.

93. *Fasal 89* memperuntukkan cara pengiraan pulangan atau bunga ke atas sesuatu bayaran budi bicara berkenaan dengan sesuatu manfaat dilindungi.

94. *Fasal 90* mengadakan peruntukan bagi melepaskan Perbadanan daripada liabiliti setelah membuat sesuatu bayaran yang berkenaan dengan sesuatu manfaat dilindungi.

95. *Fasal 91* mengadakan peruntukan bagi subrogasi Perbadanan, setakat amaun bayaran yang dibuat berkenaan dengan sesuatu manfaat dilindungi, terhadap semua hak dan kepentingan benefisiari takaful atau orang diinsuranskan berhubung dengan manfaat dilindungi itu.

96. *Fasal 92* bertujuan untuk membenarkan Perbadanan menahan bayaran berkenaan dengan sesuatu manfaat dilindungi sehingga ia menerima suatu penyerahhakan secara bertulis terhadap semua hak dan kepentingan benefisiari takaful atau orang diinsuranskan berhubung dengan manfaat dilindungi itu.

97. *Fasal 93* mengadakan peruntukan bagi had masa untuk memulakan suatu tindakan terhadap Perbadanan berkenaan dengan kewajibannya untuk membuat suatu bayaran wajib berhubung dengan suatu sijil takaful atau polisi insurans.

98. *Fasal 94* mengandungi peruntukan berhubung dengan pelantikan seorang aktuari bebas oleh Perbadanan.

BAHAGIAN VI

99. Bahagian VI mengandungi peruntukan berhubung dengan pemeriksaan institusi anggota.

100. *Fasal 95* memperuntukkan bahawa Bank Negara Malaysia hendaklah memberikan apa-apa maklumat yang dikehendaki di bawah *fasal* ini kepada Perbadanan dan dalam masa yang sesuai.

101. *Fasal 96* bertujuan untuk memberi kuasa kepada Perbadanan atau Bank Negara Malaysia, atas permintaan Perbadanan, untuk memeriksa operasi suatu institusi anggota menurut skop pemeriksaan yang diperuntukkan di bawah *fasal* ini dan membenarkan Perbadanan menugaskan orang lain untuk menjalankan pemeriksaan di bawah *fasal* ini atau *fasal 97*.

102. *Fasal 97* bertujuan untuk memberi Perbadanan kuasa untuk menjalankan pemeriksaan khas.

BAHAGIAN VII

103. Bahagian VII mengandungi peruntukan berhubung dengan kuasa resolusi Perbadanan untuk menyelesaikan kegagalan institusi anggota.

104. *Fasal 98* mengadakan peruntukan untuk Bank Negara Malaysia memberitahu Perbadanan secara bertulis jika institusi anggota telah terhenti, atau berkemungkinan terhenti, menjadi berdaya maju.

105. *Fasal 99* menyatakan kuasa Perbadanan yang boleh dijalankan terhadap institusi anggota setelah Bank Negara Malaysia mengeluarkan pemberitahuan mengenai institusi anggota yang tidak berdaya maju. *Fasal* ini juga mengadakan peruntukan bagi pemindahan apa-apa aset atau liabiliti institusi anggota kepada institusi perantaraan melalui surat cara pindah milik yang dikeluarkan di bawah Jadual Kedua atau mengikut undang-undang am.

106. *Fasal 100* mengadakan peruntukan untuk Perbadanan memberikan notis mengenai permulaan dan penamatan pengambilalihan kawalan sesuatu institusi anggota.

107. *Fasal 101* mengandungi peruntukan berhubung dengan pengambilalihan kawalan yang dilaksanakan oleh Perbadanan terhadap institusi anggota menurut *perenggan 99(1)(c)*.

108. *Fasal 102* bertujuan untuk memberi kuasa Perbadanan atau orang yang dilantik di bawah *perenggan 99(1)(c)* untuk mengurangkan modal syer institusi anggota yang diambil alih kawalannya, dan untuk membatalkan syer institusi anggota, dengan membuat suatu permohonan kepada Mahkamah Tinggi.

109. *Fasal 103* mengadakan peruntukan bagi tempoh penyelesaian mana-mana resolusi yang dijalankan semasa pengambilalihan kawalan sesuatu institusi anggota.

110. *Fasal 104* mengadakan peruntukan bagi penubuhan suatu Jawatankuasa Pentaksir untuk mengkaji semula, mengikut Jadual Pertama, kemunasabahan harga transaksi atau pengagihan dan penggunaan harga transaksi yang pada hanya itu perniagaan atau aset substansial institusi anggota telah dilupuskan oleh Perbadanan atau orang dilantik.

111. *Fasal 105* bertujuan untuk memberi kuasa Perbadanan atau orang dilantik untuk menyebabkan institusi anggota menyediakan perkhidmatan peralihan kepada penerima pindahan.

112. *Fasal 106* mengandungi peruntukan berhubung dengan pelantikan seorang penerima berkenaan dengan suatu institusi anggota.

113. *Fasal 107* mengandungi peruntukan berhubung dengan kuasa Perbadanan, orang dilantik atau penerima jika Perbadanan atau orang dilantik telah mengambil alih kawalan suatu institusi anggota atau penerima telah dilantik berkenaan dengan suatu institusi anggota.

114. *Fasal 108* mengadakan peruntukan bagi kesahan apa-apa bayaran, transaksi atau apa-apa perbuatan lain yang dilakukan oleh Perbadanan, orang dilantik atau penerima walau apa pun penggulungan suatu institusi anggota.

115. *Fasal 109* mengandungi peruntukan berhubung dengan penggantungan prosiding jika Perbadanan atau orang dilantik telah mengambil alih kawalan suatu institusi anggota atau penerima telah dilantik berkenaan dengan suatu institusi anggota.

116. *Fasal 110* mengadakan peruntukan bagi lanjutan masa berkenaan dengan suatu perbuatan yang dikehendaki dilakukan dalam suatu tempoh tertentu oleh suatu perjanjian atau undang-undang lain tetapi terhalang oleh Akta yang dicadangkan ini.

117. *Fasal 111* mengadakan peruntukan bagi kesahan apa-apa cagaran yang didapati oleh Perbadanan terhadap mana-mana aset institusi anggota di bawah Akta ini walau apa pun sekatan dalam *fasal 109* atau apa-apa perjanjian terdahulu yang bertentangan oleh institusi anggota.

118. *Fasal 112* mengadakan peruntukan bagi kesahan apa-apa perjanjian dengan institusi anggota yang dipindahkan kepada institusi anggota lain, suatu institusi perantaraan atau pihak ketiga yang layak di bawah Akta ini walau apapun apa-apa perjanjian bertentangan sebelum ini oleh institusi yang dicadangkan anggota yang mula-mula disebut itu.

119. *Fasal 113* mengadakan peruntukan bahawa apa-apa terma dalam mana-mana perjanjian yang dibuat oleh institusi anggota sebelum suatu pengambilalihan kawalan atau pelantikan seorang penerima adalah diatasi bagi maksud memberi kesan kepada peruntukan tertentu Akta yang dicadangkan ini.

120. *Fasal 114* mengadakan peruntukan bahawa, selepas suatu pengambilalihan kawalan atau pelantikan seorang penerima, seseorang pihak ketiga tidak perlu terus menyediakan perkhidmatan selanjutnya kepada institusi anggota walau apa pun sekatan dalam *fasal 109* dan *113*.

121. *Fasal 115* mengandungi peruntukan berhubung dengan perjanjian kewangan tertentu yang boleh ditamatkan selepas habisnya tempoh yang ditetapkan oleh Perbadanan apabila institusi anggota berada di bawah pengambilalihan kawalan atau seorang penerima telah dilantik, melainkan jika Perbadanan memindahkan perjanjian itu kepada suatu institusi perantaraan atau pihak ketiga yang layak sebelum habisnya tempoh itu.

122. *Fasal 116* bertujuan untuk melindungi Perbadanan, orang dilantik, seorang penerima dan pelikuidasi yang dilantik menurut Akta yang dicadangkan ini daripada dianggap sebagai majikan yang menggantikan institusi anggota dan daripada liabiliti institusi anggota kepada pekerjanya.

123. *Fasal 117* melarang Perbadanan, orang dilantik, suatu institusi perantara, seorang penerima dan pelikuidasi yang dilantik menurut Akta yang dicadangkan ini daripada dijadikan suatu pihak dalam prosiding yang dibawa oleh pekerja institusi anggota berkenaan dengan tuntutan mereka terhadap institusi anggota.

124. *Fasal 118* mengandungi peruntukan berhubung dengan tempoh dan penamatan penamaan institusi perantara.

125. *Fasal 119* mengadakan peruntukan bagi pemberian notis oleh Perbadanan mengenai penamaan dan penamatan institusi perantara.

126. *Fasal 120* bertujuan menyifatkan institusi perantara sebagai mempunyai lesen atau pendaftaran di bawah Akta Bank dan Institusi Kewangan 1989, Akta Bank Islam 1983, Akta Insurans 1996 atau Akta Takaful 1984 apabila ia dinamakan sebagai institusi perantara.

127. *Fasal 121* mengadakan peruntukan bagi pengecualian institusi perantara daripada apa-apa kehendak atau bagi pemberian apa-apa kelulusan di bawah Akta Bank dan Institusi Kewangan 1989, Akta Bank Islam 1983, Akta Insurans 1996 atau Akta Takaful 1984 sebagaimana yang dipersetujui dalam perjanjian perikatan strategik antara Perbadanan dan Bank Negara Malaysia.

128. *Fasal 122* bertujuan untuk melindungi institusi perantara daripada dianggap sebagai majikan yang menggantikan institusi anggota dan daripada liabiliti institusi anggota kepada pekerjanya.

129. *Fasal 123* bertujuan untuk memberi Perbadanan kuasa untuk memberikan arahan kepada institusi perantara.

130. *Fasal 124* mengandungi peruntukan berhubung dengan institusi perantara mengambil alih sebahagian deposit yang tidak diinsuranskan atau liabiliti manfaat yang tidak dilindungi daripada institusi anggota.

131. *Fasal 125* dan *126* bertujuan untuk membenarkan penggantungan prosiding terhadap institusi perantara atau asetnya selama tempoh sembilan puluh hari.

132. *Fasal 127* bertujuan untuk memberi Perbadanan kuasa untuk memberikan bantuan kewangan kepada institusi perantara.

133. *Fasal 128* mengadakan peruntukan untuk membenarkan Perbadanan memegang syer institusi anggota akibat pelupusan mana-mana syer dalam atau aset institusi perantara.

134. *Fasal 129* mengadakan peruntukan bagi Mahkamah Tinggi memberikan suatu perintah penggulangan berkenaan dengan suatu institusi anggota menurut petisyen Perbadanan menurut perenggan 99(1)(e) dan berdasarkan pemberitahuan mengenai institusi anggota yang tidak berdaya maju yang dikeluarkan oleh Bank Negara Malaysia di bawah *fasal 98*.

135. *Fasal 130* bertujuan untuk menyifatkan Perbadanan sebagai seorang pemiutang institusi anggota jika suatu petisyen penggulungan difailkan terhadap institusi anggota oleh seseorang selain Bank Negara Malaysia.

136. *Fasal 131* mengandungi peruntukan berhubung dengan objektif pelikuidasi yang dilantik berkenaan dengan penggulungan suatu institusi anggota.

137. *Fasal 132* mengandungi peruntukan berhubung dengan pelantikan dan saraan pelikuidasi atas petisyen atau permohonan Perbadanan berkenaan dengan penggulungan suatu institusi anggota.

138. *Fasal 133* mengadakan peruntukan untuk pelikuidasi menjalankan fungsinya di bawah penyeliaan Perbadanan.

139. *Fasal 134* mengandungi peruntukan berhubung dengan penggunaan hasil daripada likuidasi dan aturan bayaran dalam penggulungan anggota penerima deposit.

140. *Fasal 135* bertujuan untuk menjelaskan pengasingan antara aset pengendali takaful dengan aset dana takaful, dan antara aset syarikat insurans dengan aset dana insurans.

141. *Fasal 136* mengadakan peruntukan bagi Perbadanan menjadi suatu pihak dalam prosiding penggulungan jika pihak ketiga mengemukakan petisyen penggulungan terhadap suatu anggota penanggung insurans.

142. *Fasal 137* mengadakan peruntukan supaya Perbadanan diberi notis mengenai prosiding berhubung dengan petisyen penggulungan yang difailkan oleh pihak ketiga berserta salinan dokumen dan rekod yang berkenaan dengan prosiding itu.

143. *Fasal 138* dan *139* mengadakan peruntukan untuk pelikuidasi menyerahkan salinan laporan dan dokumen tertentu kepada Perbadanan.

144. *Fasal 140* mengandungi peruntukan berhubung dengan keutamaan bayaran tertentu dalam penggulungan anggota penanggung insurans.

145. *Fasal 141* mengandungi peruntukan berhubung dengan penggunaan dana takaful atau dana insurans dalam penggulungan pengendali takaful atau syarikat insurans.

146. *Fasal 142* mengandungi peruntukan berhubung dengan aturan bayaran berhubung dengan aset pengendali takaful atau syarikat insurans.

147. *Fasal 143* bertujuan untuk membenarkan pelikuidasi suatu anggota penanggung insurans untuk mengetepikan beban bukti hutang yang ketat jika sebaliknya akan menyebabkan kesusahan.

148. *Fasal 144* bertujuan untuk mengecualikan pemakaian peruntukan tertentu dalam Akta Syarikat 1965, Akta Insurans 1996 dan Akta Takaful 1984 dalam penggulungan suatu anggota penanggung insurans kecuali jika petisyen dikemukakan oleh Bank Negara Malaysia.

BAHAGIAN VIII

149. Bahagian VIII mengandungi peruntukan berhubung dengan peruntukan perlindungan penstabilan di bawah Akta yang dicadangkan ini.

150. *Fasal 145* mengandungi takrif istilah tertentu yang digunakan dalam Bahagian VIII.

151. *Fasal 146* bertujuan untuk memberi Perbadanan kuasa untuk memperuntukkan perlindungan penstabilan untuk melindungi dan menggalakkan atau mengekalkan kestabilan sistem kewangan dan menggalakkan atau mengekalkan keyakinan orang awam.

152. *Fasal 147* memperuntukkan bahawa peruntukan khas *fasal 148* hingga *156* terpakai apabila suatu perintah perlindungan penstabilan sedang kuat kuasa.

153. *Fasal 148* mengadakan peruntukan bagi suatu perlindungan penstabilan yang ditadbirkan mengikut cara yang sama sebagaimana insurans deposit biasa di bawah Bab 1 Bahagian IV atau perlindungan manfaat takaful atau insurans biasa di bawah Bab 1 Bahagian V.

154. *Fasal 149* bertujuan untuk menghendaki institusi anggota atau perbadanan yang ditetapkan dalam suatu perlindungan penstabilan untuk membayar kepada Perbadanan apa-apa fi atau premium sebagai yang ditentukan oleh Menteri.

155. *Fasal 150* memperuntukkan bahawa kesemua peruntukan di bawah Akta yang dicadangkan ini yang terpakai bagi suatu institusi anggota kecuali perenggan 14(1)(b) dan Bab 2 Bahagian IV hendaklah terpakai bagi suatu perbadanan yang ditetapkan.

156. *Fasal 151* mengadakan peruntukan bahawa apa-apa fi atau premium yang dibayar kepada Perbadanan berkenaan dengan perlindungan penstabilan tidak boleh dibayar balik.

157. *Fasal 152* bertujuan untuk memperluas pemakaian *fasal 51* atau *75* untuk mengenakan suatu surcaj ke atas institusi anggota yang tidak menyenggara rekod deposit atau manfaat takaful atau insurans dengan sewajarnya atau ia membuat salah nyata maklumat yang digunakan sebagai asas pentaksiran apa-apa fi atau premium.

158. *Fasal 153* bertujuan untuk memberi Perbadanan kuasa untuk mengenakan suatu surcaj ke atas suatu perbadanan yang ditetapkan kerana kegagalan mematuhi mana-mana kehendak sebagaimana yang dinyatakan dalam *fasal* ini.

159. *Fasal 154* bertujuan untuk memberi Perbadanan kuasa untuk mengenakan caj lampau tempoh berkenaan dengan fi, premium atau surcaj yang lewat dibayar di bawah Bahagian VIII oleh institusi anggota atau perbadanan yang ditetapkan.

160. *Fasal 155* melarang apa-apa tolakan atas mana-mana bayaran oleh institusi anggota atau perbadanan yang ditetapkan.

161. *Fasal 156* mengadakan peruntukan supaya Menteri menyediakan apa-apa dana yang dikehendaki oleh Perbadanan bagi maksud perlindungan penstabilan. Apa-apa dana yang diperuntukkan atau pembayaran balik yang dibuat hendaklah dipertanggungjawabkan pada Kumpulan Wang Disatukan dan suatu penyata mengenai peruntukan dana atau pembayaran balik itu hendaklah dibentangkan di hadapan Dewan Rakyat.

162. *Fasal 157* mengadakan peruntukan bagi pemakaian yang berterusan peruntukan khas dalam hal keadaan yang dinyatakan dalam *fasal* ini.

BAHAGIAN IX

163. Bahagian IX mengandungi peruntukan berhubung dengan kuasa khusus Perbadanan berhubung dengan pemerolehan dan pelupusan aset dan fungsi konservator yang dilantik di bawah Akta yang dicadangkan ini.

164. *Fasal 158* bertujuan untuk memberi Perbadanan kuasa untuk memperoleh atau melupuskan aset menurut peruntukan peletakhakan statutori yang dinyatakan dalam Jadual Ketiga atau mengikut undang-undang am.

165. *Fasal 159* bertujuan untuk memberi Perbadanan kuasa untuk melupuskan harta secara triti persendirian mengikut Jadual Keempat.

166. *Fasal 160* mengandungi takrif istilah tertentu yang digunakan dalam Bahagian IX.

167. *Fasal 161* bertujuan untuk membenarkan Perbadanan melantik seorang konservator untuk mentadbirkan orang terjejas.

168. *Fasal 162* mengadakan peruntukan bagi kelayakan konservator.

169. *Fasal 163* mengadakan peruntukan supaya fungsi konservator, jika dua orang atau lebih dilantik sebagai konservator bagi orang terjejas, dijalankan oleh mana-mana satu daripada mereka atau oleh kesemua mereka secara bersesama.

170. *Fasal 164* mengandungi peruntukan berhubung dengan tempoh pentadbiran orang terjejas oleh konservator.

171. *Fasal 165* dan *166* mengandungi peruntukan berhubung dengan pemberitahuan dan kesan pelantikan konservator.

172. *Fasal 167* dan *168* mengadakan peruntukan bagi kuasa dan tugas am konservator.

173. *Fasal 169* bertujuan untuk menyifatkan konservator sebagai ejen orang terjejas.

174. *Fasal 170* mengadakan peruntukan bagi konservator menjalankan fungsi mana-mana pegawai orang terjejas termasuk lembaga pengarahnya. Seseorang pegawai orang terjejas hanya boleh melaksanakan fungsinya dengan kelulusan bertulis konservator terlebih dahulu.

175. *Fasal 171* dan *172* mengandungi peruntukan berhubung dengan urus niaga dengan aset orang terjejas dan pampasan berkenaan dengan urus niaga yang melanggar *fasal 171*.

176. *Fasal 173* mengadakan peruntukan bagi obligasi pegawai orang terjejas apabila seorang konservator dilantik.

177. *Fasal 174* mengandungi peruntukan berhubung dengan penyiasatan oleh konservator akan urusan dan hal ehwal orang terjejas.

178. *Fasal 175* mengandungi peruntukan berhubung dengan hak konservator ke atas buku, rekod, akaun dan dokumen lain orang terjejas.

179. *Fasal 176* mengandungi peruntukan berhubung dengan hak konservator ke atas aset orang terjejas.

180. *Fasal 177* melarang mana-mana orang daripada menghalang konservator untuk menjalankan tugas dan kuasanya.

181. *Fasal 178* bertujuan untuk membenarkan konservator menolak tuntutan aset tertentu orang terjejas dalam tempoh masa yang dinyatakan.

182. *Fasal 179* mengandungi peruntukan berhubung dengan moratorium yang berkuat kuasa apabila seorang konservator dilantik.

183. *Fasal 180* mengandungi peruntukan berhubung dengan perjanjian kewangan tertentu yang boleh ditamatkan selepas habisnya tempoh yang ditetapkan oleh Perbadanan apabila seorang konservator dilantik, melainkan jika Perbadanan memindahkan perjanjian itu kepada pihak ketiga yang layak sebelum habisnya tempoh itu.

184. *Fasal 181* bertujuan untuk membenarkan konservator mendapatkan balik wang tertentu daripada suatu perolehan atau pelupusan aset yang berlaku sebelum pelantikan konservator.

185. *Fasal 182* bertujuan untuk membenarkan konservator megelakkan atau mendapatkan apa-apa perbuatan atau transaksi berhubung dengan suatu aset yang telah dilakukan oleh atau terhadap orang terjejas yang, sekiranya ia dilakukan oleh atau terhadap orang perseorangan, akan menjadi batal atau boleh batal di bawah undang-undang kebangkrapan.

186. *Fasal 183* mengandungi peruntukan berhubung dengan pengosongan jawatan penerima, pengurus, penerima dan pengurus atau pelikuidasi sementara apabila seorang konservator dilantik.

187. *Fasal 184* mengandungi peruntukan berhubung dengan cadangan konservator yang membentangkan rancangannya berkenaan dengan orang terjejas.

188. *Fasal 185* mengandungi peruntukan tentang pengadaaan mesyuarat pemiutang bercagar untuk meluluskan atau menolak cadangan konservator.

189. *Fasal 186 dan 187* mengandungi peruntukan berhubung dengan pelaksanaan dan pengubahsuaian sesuatu cadangan.

190. *Fasal 188* mengandungi peruntukan berhubung dengan cadangan yang memerlukan kelulusan kawal selia.

191. *Fasal 189* mengandungi peruntukan berhubung dengan kesan penolakan atau pemberhentian sesuatu cadangan.

192. *Fasal 190* mengadakan peruntukan untuk konservator melaporkan kepada badan kawal selia atau badan penguat kuasa yang berkaitan mengenai apa-apa fraud atau salah laku dalam urusan atau hal ehwal orang terjejas.

193. *Fasal 191* mengadakan peruntukan bagi kesahan tindakan dan transaksi konservator walau apa pun penggulungan orang terjejas.

BAHAGIAN X

194. Bahagian X mengandungi peruntukan berhubung dengan kesalahan di bawah Akta yang dicadangkan ini.

195. *Fasal 192* menjadikan suatu kesalahan bagi mana-mana orang untuk mengemukakan dirinya sebagai suatu institusi anggota melainkan jika orang itu ialah suatu institusi anggota.

196. *Fasal 193* menjadikan suatu kesalahan bagi mana-mana orang untuk mengemukakan apa-apa pernyataan palsu atau maklumat yang mengelirukan kepada Perbadanan.

197. *Fasal 194* memperuntukkan suatu kesalahan bagi kegagalan memberikan maklumat yang dikehendaki oleh Perbadanan.

198. *Fasal 195* memperuntukkan penalti bagi kesalahan am.

199. *Fasal 196* mengandungi peruntukan berhubung dengan kesalahan oleh pertubuhan perbadanan atau tidak diperbadankan atau oleh pengarah, pegawai, pengawal dan sebagainya.

200. *Fasal 197* bertujuan untuk memberi Perbadanan kuasa untuk mengkompaun kesalahan di bawah Akta yang dicadangkan ini.

201. *Fasal 198* memberi mahkamah kuasa untuk memerintahkan orang yang disabitkan dengan kesalahan di bawah Akta yang dicadangkan ini untuk membetulkan pelanggaran yang berkenaan dengannya orang itu telah disabitkan.

202. *Fasal 199* memberi mahkamah kuasa untuk mengenakan hukuman kewangan tambahan terhadap orang yang disabitkan dengan kesalahan di bawah Akta yang dicadangkan ini.

203. *Fasal 200* bertujuan untuk membenarkan Perbadanan untuk memohon kepada Mahkamah Tinggi bagi suatu perintah pematuhan atau sekatan terhadap seseorang yang tidak mematuhi peruntukan Akta yang dicadangkan ini.

204. *Fasal 201* mengadakan peruntukan bahawa apa-apa denda yang kena dibayar di bawah Akta yang dicadangkan ini boleh didapatkan dan dikuatkuasakan oleh Perbadanan dan setelah didapatkan, denda itu hendaklah dibayar ke dalam Kumpulan Wang Disatukan.

BAHAGIAN XI

205. Bahagian XI mengandungi peruntukan am.

206. *Fasal 202* mengadakan peruntukan bagi pengemukaan maklumat kepada Perbadanan oleh sesuatu institusi anggota atau perbadanan yang berkaitan dengannya tentang apa-apa perkara yang berhubungan dengan urusan atau hal ehwalnya.

207. *Fasal 203* memberi Bank Negara Malaysia hak ke atas maklumat yang didapati oleh atau dikemukakan kepada Perbadanan berkenaan dengan urusan dan hal ehwal institusi anggota atau perbadanan yang berkaitan atau bersekutu dengannya atau mana-mana orang yang berurusan dengan institusi anggota itu atau perbadanan yang berkaitan atau bersekutu dengannya, yang berkaitan dengan keselamatan dan kekukuhan atau operasi institusi anggota itu.

208. *Fasal 204* bertujuan untuk menghendaki seseorang pihak ketiga untuk terlebih dahulu memberitahu Bank Negara Malaysia dan Perbadanan dan juga mendapatkan kelulusan mahkamah terlebih dahulu sebelum memulakan prosiding penggugungan terhadap sesuatu institusi anggota.

209. *Fasal 205* mengadakan peruntukan bagi pengiktirafan kehakiman mengenai apa-apa fakta atau perkara yang dikehendaki untuk disiarkan di bawah Akta yang dicadangkan ini atau yang dinyatakan dalam apa-apa perakuan yang dikeluarkan di bawah Akta yang dicadangkan ini.

210. *Fasal 206* melarang penggugungan Perbadanan.

211. *Fasal 207* mengadakan peruntukan bagi kekebalan statutori Perbadanan dan orang lain yang dinyatakan dalam *fasal* ini dalam menjalankan fungsi dan kewajipan mereka di bawah Akta yang dicadangkan ini asalkan perbuatan mereka adalah dengan suci hati.

212. *Fasal 208* mengadakan peruntukan bagi pemakaian Akta Perlindungan Pihak Berkuasa Awam 1948 dan ketidakpakaian Akta Peminjam Wang 1951.

213. *Fasal 209* bertujuan untuk memberi Perbadanan kuasa untuk membuat undang-undang kecil, arahan, garis panduan, pekeliling dan nota dan, dengan kelulusan Menteri, peraturan-peraturan, kaedah-kaedah dan perintah.

BAHAGIAN XII

214. Bahagian XII memperkatakan perkara pemansuhan, kecualian dan peralihan.

215. *Fasal 210* memansuhkan Akta Perbadanan Insurans Deposit Malaysia 2005.

216. *Fasal 211* mengandungi peruntukan kecualian dan peralihan yang berhubungan dengan pengarah Perbadanan dan Ketua Pegawai Eksekutif yang memegang jawatan apabila Akta yang dicadangkan ini mula berkuat kuasa, kumpulan wang insurans deposit Islam dan kumpulan wang insurans deposit konvensional yang ditadbirkan oleh Perbadanan di bawah Akta 642 dan perkara tertentu yang akan terus kekal berkuat kuasa dan berkesan sepenuhnya di bawah Akta yang dicadangkan ini termasuk benda yang dilakukan secara sah menurut Akta.

217. *Fasal 212* mengadakan peruntukan bagi pemindahan kumpulan wang tertentu daripada Bank Negara Malaysia kepada Perbadanan pada tarikh yang ditetapkan oleh Menteri.

IMPLIKASI KEWANGAN

Rang Undang-Undang ini akan melibatkan Kerajaan dalam perbelanjaan wang tambahan, yang amaunnya belum dapat ditentukan sekarang ini.

[PN(U²)2747]